


# Wedau Mark



The Gospel of Mark in the Wedau Language of Papua New Guinea

**Wedau Mark**  
**The Gospel of Mark in the Wedau Language of Papua New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2017-08-30

---

PDF generated using Haiola and XeLaTeX on 22 Feb 2024 from source files dated 31 Aug 2023

aa19f3e3-98fb-51fa-9c53-3906edc75f11

## Contents

FRT . . . . .	1
INT . . . . .	2
Genesis - Karena . . . . .	3
Exodus - Oputawanana . . . . .	29
Leviticus - Levi ai kua . . . . .	47
Numbers - Au Mutulua . . . . .	50
Deuteronomy - Tarawatu Viruaina . . . . .	58
Joshua . . . . .	62
Judges - Taurauetara . . . . .	64
1 Samuel . . . . .	65
Samuel Viruaina . . . . .	75
1 Kings - Gulagulau Naona . . . . .	79
2 Kings - Gulagulau Viruaina . . . . .	91
Chronicles Viruaina . . . . .	98
Ezra . . . . .	99
Nehemiah . . . . .	100
Job . . . . .	101
Psalm - Wela ma Pari . . . . .	106
Proverbs - Nuaulaula Riwai . . . . .	116
Ecclesiastes - Tauviararamana . . . . .	120
Isaiah . . . . .	125
Jeremiah . . . . .	138
Lamentation . . . . .	142
Ezekiel . . . . .	144
Daniel . . . . .	147
Hosea . . . . .	148
Amos . . . . .	149
Jonah . . . . .	150
Micah . . . . .	153
Zechariah . . . . .	154
Mark . . . . .	155
Apasol . . . . .	185

**Buka Vivivireina  
Parivainuaḡana Wadubona Ġuta Vinevine  
ma  
Mark ma Acts**

**Translation of The Gospel of Mark and Acts in the Wedau  
language,  
Milne Bay Provins, Papua New Guinea.**

**Buka Vivivireina  
Parivainuaḡana Wadubona Ġuta Vinevine ma Mark ma Acts**

**Translation of The Gospel of Mark and Acts in the Wedau language,  
Milne Bay Provins, Papua New Guinea**

© VITAL/SIL PNG 2010

Milne Bay Province  
Papua New Guinea.  
Printed in Ukarumpa.  
2016, 700 Printed  
wed  
ISBN 9980 0 3979 5

© Wycliffe Bible Translators 2016

*Illustrations:*

By Horace Knowles and are used by permission of

© The British and Foreign Bible Society, 1954, 1967, 1972

Additions and amendments by Louise Bass

© The British and Foreign Bible Society, 1994

© VITAL/SIL PNG 2010

*Translation of The Gospel of Mark in the Wedau language,*

*Milne Bay Provins,*

*Papua New Guinea.*

*Printed in Ukarumpa.*

**Preface - Pariverena**

Nature & Purpose of book

Translation principles

Text followed

Orthography

Name location & number of speakers

## Genesis Karena Pariverena

Wei bukana e ririweta ma e vivieġeta da menanarena mara ma dobu i tupuanei. Wei bukana maiteni e vivieġeta da aiai rava i kauei ma menanarena mai Israel i tupuanei. Kaua ġaeġaei ruaġa e vivieġeta wei bukana au orana.

1. Kapita 1-11 e vivieġeta da menanarena mara, dobu ma rava i kauei. E vivieġeta da Adam ma Eve, Cain ma Abel, Noah ma ututuva ma numa ġeġetelarana au Babel.
2. Kapita 12-50 e ririweta menanarena mai Israel i tupuanei. E vivieġeta da Abraham natuna Isaac ma ġoġana Jacob ma Jacob natunatuna 12 Israel noinoii.

Wei bukana taugirumana eġa wavana ita vieġeta. Wate tauviararamana ġelau e notanotai da Moses i girumi mai Israel aubaii da tau i ita aramanei da God i vinei da Tauna ana rava, ma aiwai i kauei mai Israel aubaii. Au gunai wei bukana Moses i girumi madeġa! 1,500 - 1,230 BC. - muriai Iesu i tupua.

### Giruma rereġana

#### Virarautua wadubona

- God, mara ma dobu i kauei (1:1 - 2:3)
- God, oroto ma wavine i kauei (2:4, 7-9, 15-25)
- Apoapoe mena i vikarenei (3:1-24, 4:1-12; 25-26)
- Noah ana virarautua (6:5-22; 7:1-5, 17, 23; 8:15-22; 9:1-15)
- Babel ana numa ġeġe dewadewana (11:1-9)

#### Mai Israel ġoġoġai

#### Abraham, Isaac ma Jacob

- God Abram i kwatuei (12:1-7)
- Abram ma Lot i vilamonei (13:5-6, 8-1)
- Abram, Lot i vai-melei (14:11-16)
- Melkisedek, Abram i viaiaini (18-20)
- God parivainuaġana bagibagina Abram maiteni i kauei (15:1-6, 12-16)
- Sarai ma Hagar (16:1-3, 15)
- God ana mataira terenana (17:1-21)
- Nelara tonuġa i nei Abraham awarina (18:1-15)
- Sodom ana virarautua (23; 19:1-7, 24-26)
- Isaac i tupua (21:1-5)
- Hagar ma natuna Ishmael i paritawanei (21:8-14)
- God Abraham ana tumaġa i raudadani (22:1-19)
- Esau ma Jacob i tupua (25:19-26)
- Esau, natuevou ana buderi i verenei Jacob awarina (25:27-34)
- God i parivainuaġana da Isaac ina viaiaini (26:1-6)
- Isaac, Jacob i paritawanei Laban awarina (28:1-4)
- Jacob ana rauboni au Bethel (28:10-22)
- God, Jacob i viaiaini (35:9-15, 16-20, 22b-29)
- Joseph, tuatana maiteni ai virarautua (37:1-8, 12-35)
- Joseph ana nola au Egypt (39:1-23)
- Joseph, rava ai rauboni anoi i vieġei (40:1-23)
- Pharaoh ana rauboni (41:1-16, 25-42, 45-49, 53-57)
- Jacob natunatuna i paritawanei au Egypt (42:1-10, 21-23)
- Joseph i vieġana-melei (45:4-11, 25-28)
- Jacob, natunatuna ma ġoġoġana maiteni i nae au Egypt (46:1-7, 28-30)
- Jacob, Ephraim ma Manasseh i viaiaini (48:1-6, 13-21)
- Jacob, Juda i viaiaini (49:8-10, 33)

## Joseph, tuatuaana i vinuaubai (50:15-21)

*BADA, mara ma dobu i kauēi*

- <sup>1</sup> Au karena, God, mara ma dobu i vitupui. <sup>2</sup> Dobu kwakwavina ma eġa aiwai ita mamae. Gimtona, gabinou i purui. Ma God Aruana, gabinou au tepana i genagenara ġaira.
- <sup>3</sup> Ma God i riwa i pa, “Ina lalai!” Ma i lalai. <sup>4</sup> Ma lalalaina i ’nanai da i ai. Ma lalalaina ma gimtona i vilamonei. <sup>5</sup> Ma lalaina i ġorei Marai ma gimtona i ġorei Au Pom. Ma au bigai i nae ma ubaubanai i nei, au pom tagogi.
- <sup>6</sup> Ma God i riwa i pa, “Parata mara au tepana ina mae da waira au tepana ma waira au gabaurina ina vilamonei.” <sup>7</sup> Ma parata mara au tepana i terei da waira au dobu ma waira au mara i vilamonei. <sup>8</sup> Ma parata i ġorei Mara. Ma au biga i nae ma ubaubanai i nei, nai au pom viruaina.
- <sup>9</sup> Ma God i riwa, “Waira, mara au gabaurina, gabu au tagogi ona vitagogiemi ma doa alalana ina eġa.” Ma nanare i tupua. <sup>10</sup> Ma doa alalana i ġorei, Dobu ma waira i vivitagogieia i ġorei, Boga. Ma i ’nanai da i ai.
- <sup>11</sup> Anina ma God i riwa i pa, “Dobu, tam modu ma ai ma vigogoi, modu rarauanoi nununai ma ai rarauanoi nununai, ma peii ina gogo ma ina rauano me aloi nanare, ma nanare i tupua.” <sup>12</sup> Ma dobu, modu ma ai anatapui i vigogoi. Ma i ’nanai da i ai. <sup>13</sup> Au bigai i nae ma ubaubanai i nei, au pom vitonuina.
- <sup>14</sup> Ma God i riwa i pa, “Aniravilala au mara ina mae da marai ma waguvara ina vilamonei, ma iri ina vieġeta ma nanare mara ma borima.\* <sup>15</sup> Ma tauī, mara ina ravilalai da lalaina dobu ina verei.” Ma nanare i mae. <sup>16</sup> Ma aniravilala ġaeġaei ruaġa i kauēi, voġaeġaena marai i vibadei ma voaburuna waguvara i vibadei ma ubona maiteni i kauēi. <sup>17</sup> Aniravilala au mara i terei da dobu ita ravilalai <sup>18</sup> da marai ma waguvara ita vibadei ma lalalaina ma waguvara ita vilamonei. Ma i ’nanai da i ai. <sup>19</sup> Ma au bigai i nae ma ubaubanai i nei, au pom vi-four-na.
- <sup>20</sup> Ma God i riwa i pa, “Sia ma lawalawai anatapui waira ona vioai ma kiu ona tupua ma ona lave au aidamo.” <sup>21</sup> Ma sia ġaeġae ma sia tapuna ma tapuna, boga au orana maemaēi ma kiu tapuna ma tapuna maiteni i vitupui. Ma God, i ’nanai da i ai. <sup>22</sup> I viaiaini ma i riwa i pa, “Ona vinatuna ma ona vimaġaimi da boga ona vioai ma kiu ona vinatuna da ona maġa au dobu.” <sup>23</sup> Ma au bigai i nae ma ubaubanai i nei, au pom vi-five-na.
- <sup>24</sup> Ma God i riwa i pa, “Doa, ġamoġamo nununai ma vitupui, ġamoġamo maramaraġamai ma ġamoġamo moduei, ma ġamoġamo tetetei ma ina vinatuna da me tauī nanare.” Ma nanare i tupua. <sup>25</sup> Ġamoġamo nununai anatapui i vitupui ma tauī ina vinatuna da me tauī nanare. Ma i ’nanai da i ai.
- <sup>26</sup> Anina ma God i riwa i pa, “Marina, rava tana kauēi me tauta ma ai kaua tauta nanare. Ma tauī sia ma kiu ma ġamoġamo anatapui au dobu ina vibadei, ġamoġamo maramaraġamai ma ġamoġamo moduei, ġaeġaei ma muomuoi.”
- <sup>27</sup> ✧ Ma God, rava i kauēi  
Anina ma oroto ma wavine i kauēi,  
me tauna nanare.
- <sup>28</sup> Rava i viaiaini ma i riwei i pa, “Ona vinatuna ma ona vimaġaimi da dobu ona vioai ma dobu ona vibadei. Taumi, sia, kiu ma aiwai anatapui au doa tetetei ona vibadei.
- <sup>29</sup> Lam, modu anoi ma ai uana a vereveremi ami lam. <sup>30</sup> Ma ġamoġamo moduei ma kiu ma ġamoġamo nununai anatapui aubai; ai rugurugu a vereverei ai lam.” Ma nanare i mae.

\* **1:14:** Eng. Year, Madeġa tagogi. ✧ **1:27:** Mrk 10:6

<sup>31</sup> Aiwai anapui i kaukaueia i 'nanai da i ai kua ma i vinuaia. Ma au bigai i nae ma ubaubanai i nei, aupom vi-six-na.

## 2

<sup>1</sup> Ma nanare God mara ma dobu ma anapui au orana i vitupui.

<sup>2</sup> \*God ana nola i vorovei ma mara au vi-seven-na i vilauvita. <sup>3</sup> Ana nola i vikwai ma lamna aubaina God wei marana vi-seven-na i viaiini ma i vovivirei.

### *Oroto ma Wavine*

<sup>4</sup> Wei lamna mara ma dobu ana virarautua. Menanare BADA God mara ma dobu i vitupui.

<sup>7</sup> Ma BADA \* God doa pokauna i vaia ma oroto i voai ma lavutu lawalawaina au giaganana i uveni ma oroto† i lawana.

<sup>8</sup> Ma BADA God pepei Eden i paewi au maramatanei ma kampa orotona i vivitupuia i terei da i mae. <sup>9</sup> Ma BADA God ai inanana aiaina ma uana amna aiaina anapui i paewi ma pepei au pouna ai vinevinei ruaḡa i gogo. Ai tagogi uana lamna lawana tauvereina ma ai ḡelauna uana lamna nota rava ina verei da metauna aiaina ma metauna apoapoena.

<sup>15</sup> Ma BADA God oroto au pepei Eden i terei da ita nolei ma ita paini. <sup>16</sup> Ma BADA God riwa bagibaginei i riwei i pa, “Ai uana anapui au pepei am ḡoanei ma ani. <sup>17</sup> Wate a viviḡaem da nota aiiai ma nota apoapoei aina uana eḡa ma ani! Mepa da u ani, tam nai au marana ma iraḡe!”

<sup>18</sup> BADA God i riwa i pa, “Oroto ainelana e mamae ma lamna eḡa ita ai. Ana tauagu ana kauei da ina voagui.”

<sup>19</sup> Ma BADA God doa pokauna i vaia ma ḡamoḡamo anapui ma kiu anapui i kauei. Ma tau i nei ai oroto awarina da ita viwawai. Ma oroto aiwai i viwawai, nanare ai wava i mae. <sup>20</sup> Ma oroto kiu ma ḡamoḡamo maramaraḡamai ma moduei, wava i verei. Wate Adam eḡa ana tauagu ita nelaḡai da ita voagui.

<sup>21</sup> Ma BADA God oroto i kauei da i matave ma maranaina i raunuavuru kaua, torotorona tagogi i votawanei ma viora i pota-melei ana au gabu. <sup>22</sup> Ma BADA God oroto torotoronei wavine i kauei ma wavinena i nei ai oroto awarina.

<sup>23</sup> Anina ma oroto i auepai ma i riwa,  
“Ee wei tauna! Marina gelama tau gelamiuei  
ma viora tauviorauei,  
wei tauna awariu i votawanei,  
lamna aubaina, ana ḡorei *Wavine*.‡”

<sup>24</sup> \*Ma nanare i tupua ma lamna aubaina oroto, amana ma alona e vovoterei ma awana maiteni e vivitagogiei.

<sup>25</sup> Oroto awana maiteni, ana kovakovai, wate eḡa ita vinimala.

## 3

### *Apoapoe mena i vikarenei*

*Maranai God mara ma dobu i vitupui, aiwai anapui i ai kua ma rava aiiai. Wei virarautuana lamna menanare apoapoei au dobu i rui.*

<sup>1</sup> Anina ma mota lamna terevaideḡa kaukauana eḡa me ḡamoḡamo ḡelau i kaukaueia nanare. Ma mota wavine i paridadanei i pa, “Riwa kaua bo eḡa da God i riwem da eḡa ai uana au pepei ma ani.”

✧ 2:2: Exo 20:11 \* 2:7: Yahweh bo Jehovah Exo 3:13-15. † 2:7: ... doa pokauna i vaia ma oroto Pona Hebrew oroto lamna Adam, ma doa lamna adamah. ‡ 2:23: Au Hebrew pona oroto lamna ish ma wavine lamna isah.

✧ 2:24: Mrk 10:7-8



<sup>2</sup> Ma wavine i paribelei i pa, “Tauai ai uana peipei au orana ana ani. <sup>3</sup> Wate God i riwa da peipei au pouna, ai uana eġa ana ani bo ana vodadani. Mepa da ana ani bo ana vodadani lamna ana iraġe.”

<sup>4</sup> Ma mota wavine i paribelei, “Eġateni! Amapo eġa ma iraġe. <sup>5</sup> Nai maranai u ani, matam ina vikalai me God nanare ma aiaina ma apoapoena ona aramanei. Ma God i aramanei, lamna aubaina i viġaem da avena ma ani.”

<sup>6</sup> Ma wavine i 'nana da ai uana aniam aiaina ma inanana i ai kaua, ma i ġoei da ita ani da nuaulaula ita vaini, lamna aubaina tauna ai uana i vaia da i ani. Ma ġelauna awana au ririvana i mamae i verei da i ani. <sup>7</sup> Ma matai i kala ma i aramanei da tau i ana kovakovai, lamna aubaina ai bawara rugurugui i vaia da i vaturi da tupuai i tere-ġaġari.

<sup>8</sup> Au biga ubana i opuopu ma tau i nonori BADA God au peipei i bababara nae. Ma oroto awana maiteni ai au orai BADA God i raugovaġei. <sup>9</sup> Wate BADA God oroto i kwatuei i pa, “Tam mepa?”

<sup>10</sup> Tauna i paribelei i pa, “A nonorim au peipei ma tau ana kovakovau aubaina a rovo da a raugovaġem.”

<sup>11</sup> Ma BADA God i riwa i pa, “Aiai i riwem da tam ana kovakovam? Ai uana a viġaem da avena uta ani, ma u ani bo?”

<sup>12</sup> Ma oroto i paribelei i pa, “Wavine u verevereu, tauna ai uana i vereu da a ani.”

<sup>13</sup> BADA God wavine i riwei i pa, “Aiwai u kauei?”

Ma wavine i paribelei i pa, “Mota i moruii da a ani.”

*BADA, Rava ai kovoġa i vinolenolei*

<sup>14</sup> BADA God mota i riwei i pa, “Wei u kauei aubaina, kovoġa ġaeġaena tam awarim, eġa me ġamoġamo ġelau nanare, maramaraġamai ma moduei.

Manawamei ma matave-taitaina-nae  
ma am lam doa ma ani  
am mara au anatapuna.

<sup>15</sup> Ana kauei da tam ma wavine ona viġavia nonoa,  
ma am epaia ma wavine ana epaia ona viġavia.

Tauna kolam ina gwadai  
ma tam ae karena ma ani.”

<sup>16</sup> Ma wavine i riwa i pa:

“Am nuabola ana viratai am au raumanawa,  
ma am iniviarra ina rata am au vinatuna.

Tam u ġoei da awam uta vibadei,  
wate tauna tam ina vibadem.”

<sup>17</sup> Adam i riwei i pa,

“Ma tam awam ponana u rautaniġanei  
ma ai uana a viviġaeia u ani,  
Tam am kauelei doa u viapoepeni.

Tam ma nola guratana ma inim ina viara da lam ma nelaġai, am mara au anatapuna.

<sup>18</sup> Ma doa, donadona ma modu viganaganai ina vigogoi aubaim  
ma tam ma ipi da ma am.

<sup>19</sup> Tam polapolam ina toi  
da lam ma nelaġai  
ma nanare ma mae da ma nae me au doa.  
Doa pokauna a vaia da tam a kauem  
ma tam ma nae me doa au pokauna.”

<sup>20</sup> Orotu i aramanei da awana tauna rava anatapui aloi ma lamna aubaina i ġorei Eve.\*

\* **3:20:** Eve Wei wavana nonorana me Hebrew ponanei lawana tauverena.

<sup>21</sup> BADA God ġamoġamo opina i vaia da iniġaġara i kauēi Adam<sup>†</sup> awana maiteni aubai ma ini i tere-ġaġari.

### *BADA, Adam ma Eve Edenei i viopuni*

<sup>22</sup> BADA God i riwa i pa, “Orotona aiaina ma apoapoena i aramane, tauna marina tauta nanare. Eġa tana voterei da urana ina vilolo-melei da lawana aina uana ina vaia da ina ani ma ina mae-nonoa.” <sup>23</sup> Ma lamna aubaina peipeiei, oroto i viopuni da doa ita ipiei. BADA, doei oroto i voai. <sup>24</sup> Anina ma oroto i viaġaġana-opunei ma *cherub*<sup>‡</sup> biaġa au peipei Eden au maramatane i terei ma ana dabaruma araratana i terei da i nenaē ma i nenei ma lawana aina etanaina e gagagaloei.

## 4

### *Cain ma Abel*

<sup>1</sup> Ma Adam awana Eve maiteni i matave ma i duama ma tevera orotona i tupua. Ma i riwa, “BADA ana aguei natu a vaia.” Lamna aubaina i ġorei “Cain.”<sup>\*</sup> <sup>2</sup> Ma muriai tevera orotona ġelauna i ġuni ma i ġorei “Abel.”<sup>†</sup>

Ma maranai tau i vilaraga, Abel tauna tauviġamoġamo ma Cain tauipi. <sup>3</sup> Mara tagogi Cain doa uana ġelau i neiai da i puloei BADA awarina. <sup>4</sup> Wate Abel nanare sipu natuevouii i vunu-naiei ma sia monamonai i apui BADA awarina ana pulo. BADA Abel ma ana pulo i vinuaiaiei. <sup>5</sup> Wate Cain ma ana pulo eġa ita vinuaiaiei. Ma lamna aubaina, Cain amlona i ġaiġai ma naona i peu.

<sup>6</sup> Anina ma BADA Cain i riwei i pa, “Aiwai aubaina amlom i ġaiġai? Aiwai aubaina naom i peu? <sup>7</sup> Mepa da kua aiaina uta kauēi, lamna ata vinuaiai awarim. Wate am nota da apoapoena ma kauēi, lamna ma aramane i da apoapoe am au metaeta e daradaraim da ina vovaiubaim. Wate tam ma virewapana da ma vovaiubai.”

<sup>8</sup> Ma muriai Cain ana tevera Abel i riwei, i pa, “Tana nae, tana babara.” Ma maranai i ġeta au wapu, Cain i vomairi ma ana tevera Abel i vunui da i viraġeni.

<sup>9</sup> Ma BADA Cain i paridadani i pa, “Am tevera Abel mepa?”

Ma Cain i paribelei, i pa, “Eġa ata aramane! Tau au tevera taupainina bo?”

<sup>10</sup> Ma BADA i riwa, i pa, “Aiwai u kauēi? Am tevera tarana doei e kwatukwatu raubiwa aubaina. <sup>11</sup> Lamna aubaina tam marina apoapoe awarim a tereterei. Am tevera tarana uramei au doa i toi da doa i matave ġaġari. <sup>12</sup> Ma lamna aubaina maranai u ġoei da doa uta ipiei, lamna uana eġa ma nelaġai ma am animae eġa. Tam ma babara labalababa.”

<sup>13</sup> Cain BADA i riwei, i pa, “Au kovoġa i rata kua ma eġa tagotagogina da ana avarai! <sup>14</sup> Tam wei doanei e viviopuniu da naom eġa ana inana-melei. Tau ana babara labalababa ma eġa au animae. Ma rava ina nelaġaiu ma ina viraġeniu.”

<sup>15</sup> Ma BADA i paribelei, i pa, “Eġa! Aiai da i viraġenim, ana kovoġa ina rata guratana.” Ma ana mataira Cain awarina i terei da rava ita viġaei da tauna avena ita vunui, maranai i nelaġai.

<sup>25</sup> Adam awana maiteni i matave ma Eve natui ġelauna i ġuni. Eve i riwa, i pa, “Cain ana tevera Abel i viraġeni. Ma lamna aubaina God natu orotona i vereu da Abel i raviepaiai.” Ma i ġorei Seth.<sup>‡</sup>

<sup>26</sup> Seth natuna orotona i tupua ma i ġorei Enosh. Ma nai marana, rava, BADA wavana vivivireina viborumana i vikarei.

<sup>†</sup> 3:21: Au Hebrew ponana oroto lamna adamah lamna aubaina oroto i ġorei Adam. <sup>‡</sup> 3:24: Arua lawalawaii gabu vivivireina taupaini. Tagogi lamna cherub <sup>\*</sup> 4:1: Cain Wei wavana nonorana me Hebrew ponane i anona a vaia. <sup>†</sup> 4:2: Abel Wei wavana nonorana me Hebrew ponane i anona lavutuna tupona. <sup>‡</sup> 4:25: Seth Wei wavana nonorana me Hebrew ponane i anona i vereu.

## 6

### *Rava ai ġo'apoapoe*

<sup>5</sup> Ma BADA i 'nanai da rava anapui au dobu ai ġo'apoapoe i rata kaua ma aiwai i viogatarei ma i vinua-notenotei anapui apoapoei. <sup>6</sup> BADA i 'nanai ma orana i viara kaua ma i vinuabola da aiwai aubaina rava i kauei. <sup>7</sup> Ma BADA i riwa, "Tau rava a kaukaueia ana vipupui dobu au anapuna ma nanare ġamoġamo ġaeġaei ma ġamoġamo au doa tetetei ma kiu au aidamo. Nuanuau i bola-kauei da tau i kauei." <sup>8</sup> Wate BADA Noah i 'nanai ma i vinuaiaiei.

### *Noah ana virarautua*

<sup>9-10</sup> Noah ma ana epaepaieia ai virarautua wenanare.

Noah natunatuna nelarai tonuġa: Shem, Ham ma Japheth. Noah ana ġo'apoapoe eġa, tauna ainelana rava aiaina eġa me ai ai ġelauna nai au marana. Ma God maiteni i bababani nonoa ma ana au viaiaina i mamae.

<sup>11</sup> Rava ai ġo'apoapoele i dobu i viapoapoeni God au matana ma vigaigaiawa dobu i oai. <sup>12</sup> Ma God i 'nanai da rava ai ġo'apoapoe i rata kaua ma lawana apoapoena i maemaele. <sup>13</sup> Ma God Noah i riwei, "Rava pupunana a vivinua-notenotei. Aubaina rava ai ġo'apoapoe dobu i oai, lamna aubaina rava ma dobu anapuna ana vipupui. <sup>14</sup> Lamna aubaina a ġoei da wei ma kauei. Waga ġaeġaena ai bagibaginei ma voai tam aubaim. Ma babalaraġi ma koltei au orana ma au doa ma pasi. <sup>15</sup> Wenanare ma voai. Waga ana manawa 140 mita ma ana dabora 22 mita ma ana ġae 14 mita\* <sup>16</sup> Ma poewi ma gavogavo aburuna ma voterei poewa ma biribiri au poui, ive ma madeġa aubaina. Ma au ririvana, metaeta ma terei. Ma vatara, au gabaurina, au pouna ma au tepana ma voai.

<sup>17</sup> —Ona rautaniġana! Tau marina ututuva ana paritawaneia i dobu ma aiwai anapui lawalawaii ina amoa. <sup>18</sup> Wate marina tau parivainuaġana bagibagina ana kauei tam maiteni. Tam, awam, ma natunatum awawai maiteni au waga ona rui. <sup>19-20</sup> Ma ġamoġamo anapui, wavinena ma orotona ma vigerui, kiu, ma ġamoġamo au doa tetetei ruaruagei ava ina rui da ina lawana. <sup>21</sup> Ma lam taputapunei ava ma vaia da taumi ma ġamoġamo aubaii."

<sup>22</sup> Ma God aiwai anapuna i ririweia; Noah i kauei.

## 7

### *Ututuva i vikarei*

<sup>1</sup> Ma BADA Noah i riwei, "Tam ainelam rava jijimanim au dobu wei au marana. Lamna aubaina tam ma am numa ravai anapumi au waga ona geru. <sup>2</sup> Ma BADA ġamoġamo i vianinei aniam ma pulo aubaina, ororotoi 7 ma waivinei 7 ma vaia. Ma BADA ġamoġamo eġa ita vianinei, orotona tagogi ma wavinena tagogi ma vaia. <sup>3</sup> Ma nanare kiu ma vaia, ororotoi 7 ma waivinei 7. Wei ma kauei da ġamoġamo da kiu anapui lawalawaii ina mae ma ina vinatuna. <sup>4</sup> Ma au pom 7 au murina ma garewa ana paritawaneia i da mara 40 ma au pom 40 ina atuna. Ma aiwai au dobu a kaukaueia, e mamae ma e lavulavutu anapui ina pupu."

<sup>5</sup> Anina ma BADA anapuna i ririweia, Noah i kauei.

<sup>17</sup> Ma au pom 40 au orana ututuva i rarata ma waga i tenam epa.

<sup>23</sup> Anina ma BADA anapuna lawalawaii au dobu i pupuna-pai, rava ma ġamoġamo ma kiu ma ġamoġamo tetetei, anapui i viamoai. Noah ma tau aiavo i waga i gerugeru, tau i ava i lawana.

\* **6:15:** Hebrew pona ana manawa 300 cubits ma ana dabora, 50 cubits ma ana ġae 30 cubits.

## 8

*Ututuva damona*

<sup>15</sup> Ma God Noah i riwei i pa, <sup>16</sup> “Tam ma awam ma natunatum ana awawai waga ona oputawanei. <sup>17</sup> Ma gāmoḡamo lawalawai anapui ma taravaina-opunei, kiu anapui, gāmoḡamo au doa tetetei da ina vinatuna ma ina maḡa da dobu ina vioai.”

<sup>18</sup> Ma Noah awana ma natunatum ma awawai waga i opu-tawanei. <sup>19</sup> Ma gāmoḡamo anapui, kiu ma gāmoḡamo ḡelau i au doa tetetei, ai au dam nununai nanare waga i opu-tawanei.

<sup>20</sup> Ma Noah pulo aniapuna i voai BADA awarina ma gāmoḡamo aiiai, kiu aiiai tagotagoga ava taputapuna i apui pulo aniapuna au tepana. <sup>21</sup> Ma maranai BADA pulo ḡabuna i laḡoni ma au nuanuana i pa, “A aramanei da rava melamelaiei ai nota i apoapoe. Wate dobu eḡa ana viapoapoeni ma eḡa melanai lawalawai anapui ana pupuna-melei me a kauēi nanare.

<sup>22</sup> Ma maranai dobu e mamae  
paewa ma tuaruta,  
ubauba ma vibola,  
bodu ma omra,  
garewa ma madeḡa,  
maratom ma au pom,  
ina mae-nonoa ma eḡa ina kwa.”

## 9

*BADA ana Parivainuaḡana bagibagina Noah maiteni i kauēi*

<sup>1</sup> ✧Ma God Noah natunatum maiteni i viaiaini ma i riwei i pa, “Ona vinatuna ma ona vimaḡaimi da dobu ona vioai. <sup>2</sup> Ana kauēi da gāmoḡamo ḡaeḡaei ma gāmoḡamo tetetei, iana ma kiu, anapui ina rovoemi. Ma au urami ana terei da ona vibadei. <sup>3</sup> Aiwai anapui lawalawai ami aniam. Modu anoi ma ai uana a veremi, wate marina aiwai anapuna a vereveremi ami aniam.

<sup>4</sup> ✧—Wate vioa taratarana eḡa ona ani, aubaina tara au orana lawana e mamae, ona voterei da tarana ina toi tawanana ma muriai ona ani. <sup>5</sup> Ma mepa da gāmoḡamo rava i viraḡeni. Tau ana raubiwa, wate nanare rava, rava turana i viraḡeni. Tau ana raubiwa.

<sup>6</sup> ✧Tau rava a kauēi me tau inanau nanare,  
ma lamna aubaina Rava aiiai i viraḡena,  
rava ḡelauna tauna ina viraḡeni.

<sup>7</sup> ✧Ma tam natunatum ina maḡa da am epaepaia dobu ina maena-pai.”

<sup>8</sup> Ma God Noah natunatum maiteni i riwei i pa, <sup>9</sup> “Ona rautaniḡana wei marina, Tau au parivainuaḡana bagibagina taumi ami epaepaia maiteni a kaukauei. <sup>10</sup> Ma gāmoḡamo lawalawai anapuna, kiu ma gāmoḡamo numei ma moduei ma anapui wagei i opuopu, ma gāmoḡamo anapui muriai au dobu ina mae. <sup>11</sup> Wei riwanei au parivainuaḡana bagibagina taumi maiteni a terei da eḡa melanai ututuva ḡelauna ana paritawanana-meleiai au dobu da purapura lawalawai ina vipupui.”

<sup>12</sup> Ma God i riwa, “Parivainuaḡana bagibagina a kaukauei taumi ma anapui lawalawai maiteni anapui muriai e nenei. Wei parivainuaḡana matairana wenanare: <sup>13</sup> Warilolo au apau ana terei da ina vimataira da tau au parivainuaḡana bagibagina a terei tau ma taumi ma anapui lawalawai au dobu maemaei. <sup>14</sup> Maranai mara e ḡuvaḡuvai ma warilolo au apau e eḡaeḡa, <sup>15</sup> lamna ina vieḡeu da au parivainuaḡana bagibagina tau ma taumi ma anapui lawalawai au dobu. Ma eḡa melanai ututuva lawana ina vipupui.”

## 11

### *Babel ana numa ġeġe dewadewana*

<sup>1</sup> Au naona rava anapui au dobu pona tagogi ma riwa tagogina i bababaniei. <sup>2</sup> Nai maranai rava i vaġavaġai nae au maramatanei ma wapu au ġaeġaena i ġeta au Shinar \* ma kampa i mae.

<sup>3</sup> Ma i babani vivira i pa, “Ona nei, doa tana vaia ma brik tana pasi ma tana apui da ina bagibagi.” Ma nanare ai numa brikiei i voai ma koltei i ampasi. <sup>4</sup> Ma tau i riwa, “Ona nei melagai ġaeġaena tana voai tauta aubaita ma numa ġeġe dewadewana tana voai da ina ġae au mara da wavata tana kauei ma eġa tana vilamoneta dobu au anapupuna.”

<sup>5</sup> Anina ma BADA i ġairai da ravai melagai ġaeġaena ma numa ġeġe dewadewana i voavoia ita inanai. <sup>6</sup> Ma BADA i riwa i pa, “Wei tau rava tagogi ma pona tagogina e bababaniei. Wei lamna karena, aburuna ava aiwai ai au nota anapupuna ina kauana-paiei. <sup>7</sup> Ona nei tana ġaira da noi ravai ai pona tana vinua-raġaraġai ma ina babani labal-ababa.”

<sup>8-9</sup> Anina ma BADA rava anapui ai pona i vinua-raġaraġai ma i vilamonei dobu au anapupuna, lamna aubaina nai melagaina i ġorei Babel.† Ma melagai ġaeġaena voana i voterei. BADA tau i vilamonei dobu au anapupuna.

## 12

### *BADA, Abram i kwatuei*

<sup>1</sup> ✧ BADA Abram i riwei i pa, “Am dobu, am rava ma amam ana dam ravai ma netawanei ma ma nae dobu ana viatataiem kampa ma mae.

<sup>2</sup> Ma am epaepaia ai dam ana viratai,  
ma ana viaiainim,  
ma ana kauei da wavam ina rata,  
ma tamei viaiaina ina nei rava awarii.

<sup>3</sup> Ma aiai i viaiainim, tau ana viaiaini,  
ma aiai i parivai-apoapoenim, tauna ana parivai-apoapoeni,  
ma tamei dam anapui au dobu ana viaiaini.”

<sup>4-5</sup> Ma BADA i ririweia nanare, Abram awana Sarai ma maiana Lot \* Haran i opu-tawanei, Abram ana madeġa 75. Ai purapura, ai ġamoġamo ma ai laralaraga ma i vomairi Canaan aubaina. <sup>6</sup> I ġeta Canaan ana au parata ma i verautua da au gabu vinevinena, Shekem melagaina ġaeġaena au ririvana. Ma kampa au Moreh† ai ġaeġaena au ġouna i rauġaravu. (Nai maranaina mai Canaan, nai au dobuna i mamae.) <sup>7</sup> ✧ Kampa BADA i viatataeana-melei ma i riwa i pa, “Wei dobuna Canaan am epaepaia ana verei.” Ma Abram pulo aniapuna, i voai BADA awarina ma pulo i apui. Mepa BADA i viatataeana-melei lamna au gabuna aniamapu i voai.

## 13

### *Abram ma Lot i vilamonei*

<sup>5</sup> Maranai Lot, Abram maiteni i vaġavaġai, Lot maiteni ana ġamoġamo maġamaġau ma ana numa ravai ma ana tauvilaraga. <sup>6</sup> Ma tau ai ġamoġamo i maġa guratana ma gabu eġa tagotagogina da anapui ita ġamoi, <sup>7a</sup> Ma lamna aubaina eġa tagotagogina da tau i ita mae-gogona.

\* **11:2:** Babilon au paratana. † **11:8-9:** Babel Nonorana me Hebrew ponanei nuaraġaraġa. ✧ **12:1:** Act 7:2-3

\* **12:4-5:** Abram ana tevera Haran natuna Lot. † **12:6:** Mai Canaan weka ai god morumoruna i vimae-ġaeġaeni.

✧ **12:7:** Act 7:5

<sup>8</sup> Anina ma Abram Lot i riwei i pa, “Ma rautaniġana, tauta tara tagogi ma eġa tana viparipariniġai ma ata taunola avena ita viġaiġaiawa vivira. <sup>9</sup> Weka tana vilamoneta ma ata naei tana nae. Doa au naota e inainanai. Metauna e ġoeġoei ma nae ma kampa ma mae. Mepa da tam ma nae au oiena, tau ana nae au kelakela. Mepa da tam ma nae au kelakela, tau ana nae au oiena.”

<sup>10</sup> Anina ma Lot matana i tawanei da waira Jordan wapuna ma Zoar melagaina au paratana. Ma i 'nanai da waira i maġa ma doa maumaurana me BADA ana peipei,\* me doa maumaurana au Egypt. (Nai marana BADA eġa Sodom ma Gomorah ita vipupui.)

<sup>11</sup> Ma Lot waira Jordan wapuna i vinei tauna aubaina ma i nae au maramatanei. Tau nanare i vilamonei. <sup>12</sup> Abram au Canaan i mae ma Lot Sodom au ririvana i mae. <sup>13</sup> Ma mai Sodom ai lawana i apoapoe kua ma ġo'apoapoe i kaukauei BADA au matana.

<sup>14</sup> Ma Lot Abram i netawanei ma muriai BADA Abram i riwei i pa, “Mepa u mamae lana, matam ma tawanei au lavaratei ma au rauanaġei ma madeġa e gogogolana ma mepa madeġa e neneulai. <sup>15</sup> ☆Dobu anatapuna e inainanai tam ma am epaepaia ana verononoemi. <sup>16</sup> Ma am epaepaia ana kaui me doa pokauna ma aiai da pokau e iaiavi lamna am epaepaia tagotagogina ina iavi. <sup>17</sup> Dobuna anatapuna taumi a vereveremi, ma nae ma dobuna ana manawa ma ana dabora ma babarani.”

<sup>18</sup> Ma nanare Abram ana numagara i naiei Mamre ana ai ġaeġaena au ġereġerena au Hebron i mae ma kampa pulo aniapuna i voai ma pulo i apui BADA awarina.

## 14

### *Abram, Lot i vai-melei*

<sup>11-12</sup> Gulagulau 4 Sodom ma Gomorah ai purapura ma ai lam i kwalei. Abram maiana Lot au Sodom i mamae i vaia ma ana purapura maiteni i vaia ma i nae. <sup>13</sup> Abram tauna Hebrewei ma Mamre ana ai ġaeġaena au ġereġerena i mamae. Ai taniwagana wavana Mamre tauna Amoriei, varevareina Eskol ma Aner. Anatapui Abram ana tauagu, ġavia au marana. Ma oroto tagogi ġavia i rovoei da i rovo-nae ma i ġeta Abram awarina ma i vibenabenamei. <sup>14</sup> Ma maranai Abram i nonori da tau maiana Lot i vaia. Tauna ana sorodia vinevinei ana au melagai tuputupuai 318 i kwatuei. Ma ġaviġaviai i votaġoi da i ġae au Dan. \* <sup>15</sup> Waguvarai ana sorodia i ġutai ma ġaviġaviai i viaġaġei da Damaskas i verautuini da au Hobah i ġeta ma kampa i vovaiubai. <sup>16</sup> Purapura anatapui i vai-melei. Maiana Lot ma ana purapura ma waivine ma rava ġelau.

### *Melkisedek, Abram i viaiaini*

<sup>18</sup> Melkisedek tauna Salem† ai gulau ma God AIDAMO TELARANA ana pirisi pulo tauapuina. Palawa ma wine i neiai, <sup>19</sup> ma Abram i viaiaini ma i pa,

“God AIDAMO TELARANA mara ma dobu taukaueina,  
ina viaiainim.

<sup>20</sup> Ma God AIDAMO TELARANA am ġavia au uram i terei,  
lamna aubaina tana voepapai.”

Ma Abram aiwai ana sorodia maiteni i tami i vitagogiei da ġuta 10 i kaui. Ma ġuta tagogi i votawanei ma Melkisedek i verei.

## 15

### *BADA, Parivainuaġana bagibagina Abram maiteni i kaui*

\* **13:10:** Eden peipeina, Gen 2:8. ☆ **13:15:** Act 7:5 \* **14:14:** Lamna melagai ġaeġaena au lavaratei Canaan ana parata au ġereġerena. † **14:18:** Jerusalem.

<sup>1</sup> Ma muriai BADA Abram ana au rauboni i riwei i pa, “Abram eġa ma rovo. Tau am taugagalo am pulo ġaeġaena.”

<sup>2-3</sup> Ma Abram i paribelei i pa, “Oo BADA God. Tau eġa natunatu, ma am pulo eġa ina voaguii. Tam eġa natu orotona uta vereu ma lamna aubaina au iraġe au murina, Eleasar au taunola Damaskasei au vigulau ina vaia.”

<sup>4</sup> Anina ma BADA i riwana-melei i pa, “Eġa! Tauna am vigulau eġa ina vaia, wate natum orotona tamei ina tupua, tauna am vigulau ina vaia.”

<sup>5</sup> Anina ma BADA tauna i taravaina-opunei au doa ma i riwei i pa, “Ma ġoutata au mara ma ubona ma inanai, mepa da tam tagotagogina da uta iavi. Lamna am epaepaia ina maġa me ubona nanare. Eġa aiai tagotagogina da ina iavi.”

<sup>6</sup> Abram, BADA riwana i vitumaġanei ma lamna aubaina BADA i riwa da Abram rava jijimanina.

<sup>12</sup> Ma maranai madeġa i neneulai ma Abram i matave-nuavuru kaua. Ma gimtona ma rovo ġaeġaena i nei ma i purui. <sup>13</sup> ✧Ma BADA i riwei i pa, “Wei ma aramana-kauei! Am epaepaia ina vitaomana au dobu ġela ma kampa ina vitaunola. Ma dobuna ravai\* tau i ina rau-iviapoapoele da madeġa 400 ina kwa. <sup>14</sup> ✧Wate muriai tau nai dobuna ravai ana kovoġi ma am epaepaia ina vipurapura kaua ma ina nememei. <sup>15-16</sup> Ma mai Amori† ai ġo’apoapoe ina rata guratana, ma nai maranaina ana kovoġi ma ana viaġaġana-opunei wei au dobuna. Ma lamna aubaina am epaepaia eġa ina nei laġilaġinai da kimta au vi-four-na. Wate tam, Abram ma magura kaua ma ana nuaubam ma iraġe ma ina doboim.”

## 16

### *Sarai ma Hagar*

<sup>1-3</sup> Abram au Canaan i mae madeġa 10 i kwa, awana Sarai aipoi ma eġa ita vinatuna. Sarai ana taunola wavinena Egyptei wavana Hagar. Ma Sarai Abram i riwei i pa, “BADA i viġaeu da eġa ata vinatuna. Ma nae au taunola maiteni ma matave, mepa da ina vinatuna, ma tevera ana vinatunei.” Abram, Sarai ponana i voteletelei ma Hagar i vaia ma i viawanei.

<sup>15</sup> Ma Hagar i vinatuna da Abram natuna orotona i tupua. Ma Abram, natuna i viwavai Ishmael.

## 17

### *BADA ana mataira terenana*

<sup>1</sup> Maranai Abram ana madeġa 99 ma BADA i vieġana-melei Abram awarina ma i riwei i pa, “Tau God VIVIREWAPANA KAUKAUANA.\* Au naou ma babara ma kaua aiaina ava ma kauei <sup>2</sup> da nanare au Parivainuaġana bagibagina ana vovai-virewapani tau ma tam awarita ma am dam ana vimaġa-guratei.”

<sup>3</sup> Ma Abram i mae-ġaira au doa ma i raudune. Ma God Abram i riwei i pa, <sup>4</sup> “Tau au navanava au parivainuaġana bagibagina tam maiteni wenanare: Ana kauei, da dam patarana maġamaġai tam ina viamanem. <sup>5</sup> Ma marina wavam Abram, † ana terevirai da Abraham;‡ aubaina marina ana kauei da dam patarana maġamaġai ina viamanem. <sup>6</sup> Ma ana kauei da am epaepaia ina maġa ma am damei gulau maġamaġai ina nei. <sup>7</sup> Au parivainuaġana bagibagina ana vovai-virewapani, tau ma tam ma am epaepaia muriai

✧ **15:13:** Exo 1:1-14; Act 7:6 \* **15:13:** Mai Egypt. ✧ **15:14:** Exo 12:40, 41; Act 7:7 † **15:15-16:** Nai maranai, mai Amori ma mai Canaan au dobuna Canaan i mae. \* **17:1:** God vivirewapana kaukauana. Hebrew El-Shaddai. † **17:5:** Abram. Wei wavana nonorana Hebrew ponaiei anona viwavalatonana. ‡ **17:5:** Abraham. Wei nonorana me Hebrewi anona dam maġamaġai amai.

e nenei da tau am God ma tau ai God. <sup>8</sup> ✨ Canaan dobuna taputapuna marina e mamae-gubai, tam am epaepaia maiteni ana vere-nonoemi aubaimi ma tau, tau ai God.”

<sup>9</sup> Ma God Abraham i riwei i pa, “Ma au parivainuaḡana bagibagina, tam ma am epaepaia maiteni ona voteletelei. <sup>10</sup> ✨ Wei taumi ami au navanava parivainuaḡana bagibagina ona voteletelei, ami nelara anatapui inii ina bori. <sup>11</sup> Ma taumi inimi ona bori, lamna ata parivainuaḡana matairana. <sup>12</sup> Roaroa melamelai nelarai i tupua ma au pom 8 au murina inii ona bori. Wei kauana ona kauai, natunatumi nelarai ma ami taunola natunatumi nelarai ma nelara anatapui am au numa e vivitaunola. <sup>13</sup> Riwa kaua, maranai roaroa nelarai i tupua am au dam bo maranai taunola o gimarai, tau ai mataira lamna inii ona bori. Lamna au parivainuaḡana matairana au tupuami ina mae-nonoa. <sup>14</sup> Wate aiai orotona nai matairana eḡa au tupuana, lamna au parivainuaḡana bagibagina i viaigai ma lamna aubaina tauna ina viravaḡela.”

### *BADA, Sarai i parivainuaḡani*

<sup>15</sup> God Abraham i riwei i pa, “Awam eḡa ma ḡorei Sarai, wate ma ḡorei Sarah. § <sup>16</sup> Tau ana viaiaini ma natum orotona ina vitupui. Anina ma ana viaiaini da ina vidam ḡaeḡae aloi. Ma dam ai gulau maḡamaḡau taunei ina opu.”

<sup>17</sup> Abraham i mae-peu ma i raudune ma i mutu-kaka ma au nuanuana i pa, “Amapo oroto ana madeḡa 100 ma ina vinatuna bo? Ma Sarah ana madeḡa 90 ma ina vinatuna bo?” <sup>18</sup> Ma Abraham God i riwei i pa, “Ma Ishmael menanare, uta viaiaini bo eḡa?”

<sup>19</sup> Wate God i riwa i pa, “Eḡa! Awam Sarah natum orotona ina vitupui ma ma viwavai Isaac.\* Au parivainuaḡana bagibagina tauna awarina ma ana epaepaia awarii ina mae-nonoa. <sup>20</sup> Ma Ishmael aubaina, am nuabola a nonori. Ana viaiaini ma natunatumi ana vimaḡai ma ana epaepaia ana vituai. Tauna dam 12 ai babada amai ma ana epaepaia ai dam ana vimaḡai. <sup>21</sup> Wate au parivainuaḡana bagibagina ana kauai Isaac maiteni. Ma wei marana nanare, madeḡa ḡelauna Sarah, Isaac ina vinatunei.”

## 18

### *Nelara tonuḡa i nei Abraham awarina.*

<sup>1</sup> Au benai Abraham ana numagara au metaetana i kiakiala. <sup>2</sup> I taepai ma nelara tonuḡa i 'nanai i maimairi. Maranai i 'nanaanai i ruba da au naoi i mae-ḡaira ma i raudune.

<sup>3</sup> Ma i riwa i pa, “Au bada. Mepa da u notai da tau anina, eḡa ma tutelareu. <sup>4</sup> Waira ana neiai da aemi ana oḡai ma ona vilauvitau ai au ḡouna. <sup>5</sup> Lam ana veremi da ina vovai-virewapanimi ma muriai ona vaḡai. Taumi o notaiu da o nei.”

Tau i paribelei, “Anina u ririweia ma kauai.”

<sup>6</sup> Anina ma Abraham laḡilaḡina i nae au numagara ma Sarah i riwei i pa, “Laḡilaḡina, am palawa aiaina baikena ma vaia ma palawa ma apui.”

<sup>7</sup> Ma i ruba ma bulumakau orotona ḡaubona i vaia da ana taunola i verei ma i vokaukauai.

<sup>8</sup> Anina ma Palawa ma mereki ma mereki ravi taputapui ma sia i neiai tau ai awarii au ḡou da i am ma tauna i mae-paini.

<sup>9</sup> Tau i paridadana i pa, “Awam Sarah mepa?”

Tauna i paribelei i pa, “Tauna numagara au orana.”

<sup>10</sup> Tau i tagogi Abraham i riwei i pa, “Riwa kaua da wei au marana nanare madeḡa au ḡelauna ana nenememei, lamna awam Sarah tevera orotona ina ḡuni.”

Ma Sarah, ravai au muri numagara au metaetana, i rarautaniḡana. <sup>11</sup> Sarah ma Abraham i magura kaua ma Sarah ana vinatuna ana mara i kwa. <sup>12</sup> Sarah i mutu-kaka ma

✨ **17:8:** Act 7:5 ✨ **17:10:** Act 7:8 § **17:15:** Sarai - Sarah: Wei wavai ruḡa anoi wavalatona natuna wavinena. God Sarai wavana vouna i verei da ita viatataiei da tauna dam ḡaeḡaena aloi. \* **17:19:** Isaac. Wei wavana Hebrewei anona i kaka.



i riwana-melei, “Tau ma awau a magura kaua ma au vinatuna ana mara i kwa. Ma amapo tagotagogina da duama ana morelanei bo?”

<sup>13</sup> BADA Abraham i paridadanei i pa, “Aiwai aubaina Sarah i kaka ma i riwa, “Tau a magura kaua ma riwa kaua da ana vinatuna bo?” <sup>14</sup> Aiwai i piripiri guratana BADA au matana? Me a ririwem nanare, ana nememei awarim wei marana nanare madeğa au ġelauna ma awam Sarah tevera orotona ina ġuni.”

<sup>15</sup> Sarah i rovo ma i bovi ma i riwa i pa, “Tau eğa ata kaka.”

Tauna i paribelana i pa, “Eğa! Tam u kaka.”

### *Sodom ana virarautua*

<sup>16</sup> Maranai nelara tonuğa i vomairi da ita nae, Abraham tau i maiteni i nae da au etanai ita tuterei. Ma tau i 'nana ġaira au Sodom, <sup>17-19</sup> ma BADA ana au nota i pa, “Aiwai marina ana kauei, eğa ana tere-govaġi Abraham awarina. Abraham ana epaepaia ina vidam ġaęęaena ma vivirewapanana ma taunei dam anatapui au dobu ana viaiaini. Tauna a vinei da natunatuna ina riwei ma tau i natunatui ina riwei da BADA ana lawana ina votaġotaġoi da aiaina ma jijimanina, ina kaukauei da tau Abraham a paripari-vainuaġania ana kauei.”

<sup>20</sup> Ma BADA Abraham i riwei, “Tau, vikaruwaġawaġa maġamaġau a nonori da Sodom ma Gomora melagaii ravai ai ġo'apoapoe i rata guratana. <sup>21</sup> A ġaiġaira da ana inana da wei vikaruwaġawaġana riwa kaua bo eğa.”

<sup>22</sup> BADA Abraham maiteni i maimairi ma nelara ruaġa i nae au Sodom. <sup>23</sup> Abraham i nei BADA awarina ma i riwa i pa, “Riwa kaua da rava aiiai ma vipupui rava apoapoei maiteni? <sup>24</sup> Mepa da rava aiiai 50 au melagai, amapo melagaina ma vipupui bo? Ma rava 50 notaiei ma melagaina eğa ma vipupui? <sup>25</sup> Lamna eğa ita ai, ma eğa ma kauei. Tam eğa rava aiiai ma viraġeni rava apoapoei maiteni. Nai kauai e kaukauei rava aiiai awarii, kauana tagogina rava apoapoei awarii e kaukauei, eġateni! Tam rava anatapui au dobu tauetareina ma ma etarana-kauelai tapa?”

<sup>26</sup> BADA i riwa i pa, “Mepa da rava 50 aiiai ana nelaġai au Sodom, dobuna ana voterei tau i ai ġo' aiiai aubaina.”

<sup>27</sup> Abraham i paribelei i pa, “Au BADA tau am molaka, wate tau wei babanina a vikarei aubaina amapo ana paridadana me. <sup>28</sup> Mepa da rava 50 aiiai ma 5 ina deġa, amapo melagaina ma vipupui bo?”

I riwa i pa, “Mepa da rava 45 kampa ana nelaġai lamna eğa ana vipupui.”

<sup>29</sup> Abraham i paridadana me i pa, “Mepa da rava aiiai 40 ava kampa u nelaġai?”

I riwa i pa, “Mepa da kampa 40, amapo eğa ana kauei.”

<sup>30</sup> Abraham i riwa i pa, “Au BADA, eğa awariu ma ġaiawa ma vianineu da ana babani me, mepa da 30 ava kampa ma nelaġai?”

I riwa i pa, “Mepa da 30 ava ana nelaġai, amapo eğa ana kauei.”

<sup>31</sup> Abraham i riwa i pa, “Tau wei babanina a vikarei, mepa da 20 ava kampa ma nelaġai?”

I riwa i pa, “Mepa da 20 ana nelaġai lamna, eğa ana vipupui.”

<sup>32</sup> Abraham i riwa i pa, “Au BADA, eğa awariu ma ġaiawa ma vianineu da mara tagogi ava ana babani me. Mepa da 10 kampa ma nelaġai?”

I riwa i pa, “Mepa da 10 ana nelaġai, amapo eğa ana vipupui.”

<sup>33</sup> Maranai BADA Abraham awarina i babani vorove, tauna i nae ma Abraham i nae ana au melagai.

## 19

<sup>1</sup> Ma raviraviai anela ruaġa au Sodom i ġeta, Lot melagai au metaetana i kiakiala.\* Maranai Lot tau i 'nanai, i vomairi da i nae awarii ma i raudune. <sup>2</sup> Ma i riwa i pa, “Au

\* **19:1:** Melagai, ġaime i gari-kwaviviroi; ma metaeta tagogi bo ruaġa i tereterei. Weka i kiakiala gimara bo viboruboru ma i viviogataru.

babada, tau ami taunola a nei, ona nei au au numa. Aemi ona oḡai ma ona matave. Maratmtomai ona vomairi da ami au aninae ona nae.”

Ma tau i paribelei i pa, “Eḡa! Tauai weka au deba ana matave.”

<sup>3</sup>Ma i riwana bagibagi da maiteni i nae ana au numa. Lot, palawa eḡayist<sup>†</sup> maiteni i apui ma tau i am.

<sup>4</sup>Ma ita matave ma mai Sodom nelarai laralaragai ma magumaguri anatapui i nei da numa i kwaipipini, <sup>5</sup>ma tau Lot i kwatuei i pa, “Nelara ruaḡa waguvarai i nenei awarim, tau mepa? Ma opuneiai awariai da ana viawawanei.”

<sup>6</sup>Ma Lot i opu tau awarii ma au murina metaeta i gudui. <sup>7</sup>Ma i riwei i pa, “Au rava a vivibaḡaimi, eḡa wei kauai apoapoei ona kauai. <sup>8</sup>Ona rautaniḡaneu, tau natunatu waivinei ruaḡa, tau matatapu. Ana opuneiai awarimi da ami ḡoana nanare ona kauai. Wei nelarai a neiai au numa lamna tau au taomana ma eḡa aiwai awarii ona kauai.”

<sup>9</sup>Ma Sodom nelarai i paribelei i pa, “Ma maeria! Tam dobu ḡela ravam weka e mamae-gubai ma marina u ḡoei da ma vibadabada. Marina ana viapoapoenā-kauem eḡa me tau ruaḡa!” Ma tau Lot au metaeta i dudu ratui da gudu ita rikai. <sup>10</sup>Wate nelara ruaḡa numa au orana urai i tere-opunei ma Lot i taina-ruiei awarii ma metaeta i gudui. <sup>11</sup>Ma nelara anatapui au metaeta matai i viaipotai mara tupona ava da eḡa tagotagogina metaeta ita inana.

<sup>12-13</sup>Anina ma nelara ruaḡa Lot i riwei i pa, “Tauai marina wei dobuna ana pupuni. BADA, vikaruwaḡawaḡa maḡamaḡau i nonori wei melagaina ravai awarii ma Tauna, tauai i paritawanelai da dobuna ana pupuni. Am dam ravai ḡelau weka e mamae bo eḡa? Natunatum nelarai ma waivinei ma poipoiam ma am rava aiavo i au melagai maemaie; ma taravaina-opunei!” <sup>14</sup>Ma Lot i opu natunatuna ai ḡopapara awarii ma i riwei i pa, “BADA marina dobuna ina pupuni. Laḡilaḡina, wei dobuna ona oputawanei.” Ma tau i notai da tauna i vivinama.

<sup>15</sup>Ma mara karena i tereterei ma anela Lot i vivibaḡai da ita volaḡilaḡina. Ma i riwa i pa, “Eḡa ita ai da ma iraḡe maranai BADA wei dobuna ina pupuni. Laḡilaḡina awam ma natunatum maiteni ona opu.” <sup>16</sup>Wate Lot i tatavira. BADA i ḡoei da Lot ita vilawani. Ma anela Lot awana maiteni ma natunatui urai i vojijini ma melagaiei i taravaina-opunei.

<sup>17</sup>Maranai melagai i opu-tawanei ma anela tagogi tau i riwei i pa, “Ona ruba ami lawana aubaina! Eḡa au murimi ona inana ma eḡa au wapu ona tumairi dadana. Ola aubaina ona ruba da ami lawana eḡa ona vine-boai.”

<sup>23</sup>Ma madeḡa i gogogo ma Lot ana numa ravai maiteni au melagai Zoar i ḡeta.‡  
<sup>24</sup>Lamna maranai BADA *salpa* araratana marei i paritawanana ḡaireiai me garewa, Sodom ma Gomora melagaii au tepai. § <sup>25</sup>Ma melagaii, wapu, rava anatapui ma aiwai gogogoi i aragibui. <sup>26</sup>Ma Lot awana i vivimuri, i mae-tavirei ma i ravi-taputapui.

<sup>27</sup>Ma ubaubanai boiboḡi Abraham i vomairi ma i nae mepa BADA maiteni i bababani lana. <sup>28</sup>Ma i 'nana ḡaira Sodom ma Gomora ma wapuna ana taputapuna ma kampa bau potopotona i 'nanai i ḡeḡae. <sup>29</sup>Maranai God nai melagaii ma wapuna i pupuni, tauna Abraham eḡa ita notavai-nuavurui. Ma lamna aubaina God Lot i paritawana-opunei ma muriai nai melagaina i vipupui.

## 21

### *Isaac i tupua*

<sup>1</sup>Ma BADA Sarah i viaiaini ma i paripari-vainuaḡani nanare i kauai. <sup>2</sup>Ma God mara i vinevineia nanare, Sarah i duama ma i vinatuna. Natuna orotona i tupua, Abraham

† 19:3: Eng. Yeast. ‡ 19:23: Hebrewi wava Zoar anona Aburu. § 19:24: Salpa lamna ḡaima logalogana. Maranaina e ararata, lamna i vibola kaua ma puḡuna i apoapoei.

i magura ma natuna i tupua. <sup>3</sup> Abraham natuna i viwavai Isaac. <sup>4</sup> ✠ Ma au pom 8 au murina Abraham natuna inina i bori me God i ririweia nanare. <sup>5</sup> Abraham ana madeğa 100 maranai wei kauai i tupua.

*Abraham, Hagar ma natuna Ishmael i paritawanei*

<sup>8</sup> Isaac i rata ma i viedai ma Abraham lam ġaeġaena i vokaukauei ma i am gogona. <sup>9</sup> Ma Sarah Ishmael i 'nanai Isaac i vivinamei. Ishmael lamna Abraham natuna ġelauna, ana taunola Hagar Egyptei i ġuniġunia. <sup>10</sup> Ma Sarah Abraham i riwei, "Taunola wavinena ma natuna ma viopuni! Eġa ata ġoei da tauna am buderi ina vaia. Natu Isaac ainelana am buderi ina vaia."

<sup>11</sup> Abraham wei riwana i nonori ma i vinuabola kua aubaina tauna natuna Ishmael. <sup>12</sup> Wate God Abraham i riwei i pa, "Eġa natum ma alona ma vinuabolei. Am epaia Isaac wavam ina mairiei. Aiwai Sarah i ririwem ma kauei. <sup>13</sup> Wate am taunola wavinena natuna ana epaepaia ana vimaġai ma ana dam ina rata aubaina tauna tam natum." <sup>14</sup> Ubaubanai boiboġi Abraham tamaina i vokaukauei ma waira i ġui ma Hagar i viavarai. Ma wavine natuna maiteni i paritawanei da i nelabalababa au mutulua.

## 22

*BADA, Abraham ana tumaġana i raudadani*

<sup>1</sup> Madeġa maġamaġa i kwa ma muriai God Abraham ana tumaġana i raudadani. God i riwa i pa, "Abraham!"

Abraham i paribelei i pa, "Tau weka!"

<sup>2</sup> Ma God i riwa i pa, "Natum tagotago Isaac nuanuam pouna, ma taravaini ma ona nae au dobu Moriah. Ma ola ana viatataem, kampa natum ma puloei aniamapu."

<sup>3</sup> Mara i tom ma ubaubanai boiboġi, Abraham i vomairi, ai i edari pulo apunana aubaina ma ana donki i vokaukauei. Ma ana taunola ruaġa ma natuna Isaac i taravaini ma anatapai i nae gabu God i ririweiana kampa. <sup>4</sup> Tau i pom tonuġa i babara ma Abraham i taepai ma gabu aueia i 'nanai. <sup>5</sup> Ana taunola i riwei i pa, "Weka ona mae. Donki ona paini. Tau natu maiteni ana nae nore ma God ana viborumei. Ma airuaġa ana nememei awarimi."

<sup>6</sup> Ma Abraham ai i tavana Isaac i viavarai. Tauna naipi ma ai mutuara i voai ma i negogona. <sup>7</sup> Tau i nena ma Isaac i riwa i pa, "Amau!"

Abraham i riwa, "Ee, ma babani natu!"

Isaac i riwa, "Ai ma ai mutuara awarita wate pulo aubaina sipu natuna mepa?"

<sup>8</sup> Abraham i paribelei i pa, "Natu, God sipu ina vereta pulo aubaina." Ma airuaġa i babara nae. <sup>9</sup> Maranai gabu God i ririweiana i ġeta, kampa aniamapu ġaimei i voai ma ai i vatari. Ma natuna Isaac urana ma aena i raġini ma aniamapu au tepana, ai i vatavataria kampa i vimataveni.

<sup>10</sup> Abraham urana i viloloi da naipi i vaia da natuna ita viraġeni. <sup>11</sup> Wate lamna maranaina BADA ana anela marei i riwa, "Abraham, Abraham!"

Abraham i paribelei, "Tau weka!"

<sup>12</sup> Ma BADA ana anela i riwa, "Eġa natum ma viraġeni! Eġa aiwai apoapoena awarina ma kauei! Tam natum tagotago eġa uta nuanei ma marina a aramanei da tam anina God e vivivirei." <sup>13</sup> Abraham i taepai ma sipu orotona i 'nanai, donana ai raġaraġai potopotona au orana i tapaiei. Ma i nae ma sipu i viraġeni ma sia taputapuna i apui ana pulo God awarina, natuna epaiana.

<sup>14</sup> Ma lamna aubaina wei dobuna i ġorei, "BADA ina verena." Lamna marana da marina rava e ririwa, "BADA ana au ola ina verena."

✠ 21:4: Gen 17:12; Act 7:8

<sup>15</sup> Ma BADA ana anela marei Abraham i ġorei <sup>16</sup> “BADA i riwa, ‘Tam u voteleteleu ma natum tagotago eġa uta nuanei. Tau wavauei a paripari-vainuaġanim da <sup>17</sup> anina ana viaiainim ma am epaepaia ana vimaġai me ubona au mara ma bubu au gera. Tau i ai ġavia ina vovaiubai ma ai melagai ina vaia. <sup>18</sup> ✧ Ma am epaepaia wavaiei dam anatapui au dobu ana viaiaini. Tam u voteleteleu aubaina wei ana kauēi.” <sup>19</sup> Ma Abraham natuna maiteni i nae me ana taunola awari ma anatapui i nae me au Beersheba. Ma kampa i mae.

## 25

### *Esau ma Jacob i tupua*

<sup>19</sup> Wei lamna Abraham natuna Isaac ana virarautua. Isaac amana Abraham <sup>20</sup> Isaac ana madeġa 40 ma Rebekah i ravaġi. Rebekah tauna Leban novuna aburuna; amai Bethuel. Tau i mai Aram au Padan-Aram i mamae. <sup>21</sup> Rebekah aipoi ma Isaac i raupari BADA awarina da awana ita voagui. BADA ana pari i nonori ma Rebekah i duama. <sup>22</sup> Raġaraġa i vivitua au manawa aubaina Rebekah i nae ma BADA i vibaġai, “Aiwai aubaina wei e tuputupua awariu?” <sup>23</sup> BADA i riwa i pa:

“Roaroa ruaġa au manawam ina vidam ruaġa,  
ma vinatuna da dam ruaġa ma tau i ina viġavia vivira.  
Tagogi ina virewapana telara  
ma magurina aburuna awarina ina vitaunola.”

<sup>24</sup> Ana vinatuna ana mara i ġeta ma riwa kaua da raġaraġa nelarai i ġuni. <sup>25</sup> Natuevou opina lebalebarina ma inina ororona ma lamna aubaina i viwawai Esau.<sup>\*</sup> <sup>26</sup> Natuna ġelauna i tuputupua turana au ae karena i vojijina ma i opu ma i viwawai Jacob.<sup>†</sup> Isaac ana madeġa 60 ma awana raġaraġa i vinatune i.

### *Esau, natuevou ana buderi i verenei Jacob awarina*

<sup>27</sup> Maranai raġaraġa i vilaraġa, Esau tauna rava aroarona. Wate Jacob rava genugenu-anana ma au numa maemaena. <sup>28</sup> Isaac ana ġoana ġaeġaena Esau, aubaina sia moduei i vunuvunui amna i ġoei. Wate Rebekah, Jacob i ġoana-kauēi.

<sup>29</sup> Mara tagogi Jacob gwada i vivitavi ma Esau i aroaro da i nei ma inina i garigari ma am i 'raġe-kaua. <sup>30</sup> Ma Jacob i riwei i pa, “Tau am a iraġe kaua. Nai gwada lebalebarina ma taraġui da ana ani!” (Wenanare i riwa aubaina wava i verei Edom.<sup>‡</sup>)

<sup>31</sup> Ma Jacob i riwa i pa, “Tam natuevou, Mara muriai amata ana buderi voġaeġaena ma vaia. Marina ma riweu da am buderi tau ma vereu ma gwada ana verem.”

<sup>32</sup> Esau i riwa i pa, “Tau am a iraġe kaua ma natuevou buderina amapo eġa ina voagui, anina ma vaia!”

<sup>33</sup> Ma Jacob i riwa i pa, “Marina ma parivai-nuaġaniu da am buderi tau ma vereu.” Ma Esau i parivainuaġana da natuevou buderina Jacob ina verei.

<sup>34</sup> Ma Jacob gwada i taraġui ma palawa da Esau i verei ma Esau i am ma i uma ma i vomairi da i nae. Wenanare i kauēi lamna Esau ana buderi eġa ita vinuabolei.

## 26

### *BADA i parivainuaġana da Isaac ina viaiaini me Abraham*

<sup>1</sup> Gomara ġaeġaena i nei au Canaan, me wariaġa Abraham ana au mara i tupua nanare. Ma Isaac ana dam maiteni i ġaira au melagai ġaeġaena wavana Gerar, kampa mai Philistia ai gulau Abimelek i mae. <sup>2</sup> Ma BADA Isaac awarina i eġa ma i riwa i pa,

✧ **22:18:** Act 3:25    \* **25:25:** Mai Hebrew ai pona, inina ororona nonorana me Esau.    † **25:26:** Mai Hebrew ai pona, Jacob anona ae karena i vojijini. Wei lamna awanaina, anona lamna amkwalakwalana.    ‡ **25:30:** Mai Hebrew au pona, Edom anona Lebalebarina.

“Eġa ma ġaira au Egypt, ma dobu ana riwem kampa ma mae. <sup>3</sup> ✧Weka ma mae-gubai, tam maiteni ana mae ma ana viaiainim. Wei dobuna anapuna tam ma am epaepaia ana veremi. Ma Abraham aiwai a parivainuaġani ana kauei aubaimi. <sup>4</sup> Am epaepaia ana vimaġai, ai maġa me ubona au mara ma wei dobuna anapuna tau ana verei. Am epaepaia awariei dam anapui au dobu ana viaiaini. <sup>5</sup> Abraham ponau i nonori ma au babani ma au viararamana ma au tarawatu i voteletelei, lamna aubaina wei ana kauei am epaepaia aubai.” <sup>6</sup> Anina ma Isaac au Gerar i mae.

## 28

*Muriai Isaac i nae da au Beersheba i mae. Maranai tauna i magura kaua (ma matana i oaoa) natuna orotona keikeina Jacob, amana i morui tauna i viaiaini me tauna natuevou. Maranai tuana Esau wei i nonori, tauna amlona i ġaiġai kaua ma i ġoei da Jacob ita viraġeni.*

*Isaac, Jacob i paritawanei Laban awarina.*

<sup>1</sup> Isaac Jacob i kwatuei, i viaiaini ma i riwei i pa, “Eġa au Canaan awam ma vaia, <sup>2</sup> wate ma vomairi ma ma nelaġilaġina au Padan-Aram, ġoġam Bethuel ana au dam ma kampa avum Leban natunatuna waivinei e mamae, kampa awam ma vaia. <sup>3</sup> Ma God VIVIRE-WAPANA KAUKAUANA am tavine ina viaiaini ma ina viuaim ma natunatum ina vimaġai ma tam dam borui ġaeġaei ina viamanem. <sup>4</sup> ✧Ma tam am epaepaia maiteni ina viaiainim me Abraham i viaiaini nanare, da dobu marina e mamae-gubai, God Abraham i verevereia tam ma vibuderiei.”

*Jacob ana rauboni au Bethel.*

<sup>10</sup> Jacob Beersheba i netawanei ma i nenaie au Haran. <sup>11</sup> Madeġa i neulai ma gabu au tagogi,\* i ġeta ma i rauvirai da i matave ma ġaima tagogi i vaia ma i viuutane. <sup>12</sup> Ma i rauboni da tete i 'nanai, karena au dobu ma damona au mara ma God ana anela i ġeġae ma i ġaiġaira. <sup>13</sup> ✧Ma BADA, au ririvana i maimairi ma i riwa i pa, “Tau BADA, Abraham ma Isaac ai God, dobu e matamatave lana tam ma am epaepaia ana veremi. <sup>14</sup> ✧Ma am dam ana vimaġai da me doa pokauna ma ai parata ana viratai au lavaratei, rauanaġei ma karuwabuei. Ma am epaepaia maiteni taumiei rava anapui au dobu ana viaiaini. <sup>15</sup> Ma notai da tau au ririvam a mamae ma ana painim am au vaġai. Ma ana neiana-meleiam wei au dobuna. Eġa ana voterem da aiwai a parivainuaġanim ana kauei.”

<sup>16</sup> Jacob i matave vomairi ma i riwa i pa, “BADA anina weka e mamae ma tau eġa ata aramanei!” <sup>17</sup> Jacob i rovo kaua ma i riwa i pa, “Wei dobuna i vinirovorovo ġaġa! Wei anina God ana numa, Mara ana metaeta.”

<sup>18</sup> Ubaubanai boiboġi Jacob i vomairi ma ġaima i viviuutaneia i vaia ma i vitura-mairini da ita vimataira. Ma Olive monamonana i buloi ġaima au tepana da i vovivirei God aubaina. <sup>19</sup> Dobuna i ġorei Bethel† (Melagaina au naona i ġoreġorei Luz).

<sup>20</sup> Ma Jacob, BADA awarina i parivainuaġana, “Mepa da tam au ririvau ma mae ma ma inana vaiteteu au vaġai, lam ma gara ma vereu. <sup>21</sup> Ma lawalawaiu ana nememei amau awarina, lamna maranaina Tam tau au God. <sup>22</sup> Ma wei matairana a teretere, weka ana viborumem, Ma aiwai u verevereu ana gimai da ġuta 10 ma ġuta tagogi ana veremelem.”

## 35

*BADA, Jacob i viaiaini*

✧ 26:3: Gen 22:16-18 ✧ 28:4: Gen 17:4-8 \* 28:11: Gabu vivivireina. ✧ 28:13: Gen 13:14-15 ✧ 28:14: Gen 12:3; 22:18 † 28:19: Wavana Hebrewi anona God ana numa.

<sup>9</sup> Jacob, Padan-Aramei\* i nememei au Bethel. God i eġa me Jacob awarina ma i viaiaini  
<sup>10</sup> ma i riwei i pa:

“Tam wavam Jacob,

wate marina eġa ina ġorei Jacob

ma wavam vouna Israel.†”

Ma i viwavai Israel

<sup>11</sup> ✧ ma i pa:

“Tau God **VIVIREWAPANA KAUKAUANA**

Ma vinatuna guratana ma ma vimaġaimi

Am epaepaia ina virava-ġaeġaei ma dam borui ġaeġaei awarime i ina tupua  
 ma gulagulau maġamaġau i ina viamanei.

<sup>12</sup> Dobu, Abraham ma Isaac a verei,

marina tam ana verem

ma am epaepaia

muriai wei dobuna ana verei.”

<sup>13</sup> Ma God i babani vorovei ma i netawanei. <sup>14</sup> ✧ God weka Jacob awarina i babani lamna  
 matairana Jacob gana i vimairini. Ma au tepana *wine* i waġi ana pulo‡ ma Olive monamo-  
 nana i buloi. § <sup>15</sup> Weka God Jacob awarina i babani ma lamna aubaina wei gabuna i ġorei  
Bethel.\*

### *Rachel ana iraġe*

<sup>16</sup> Muriai Jacob ana dam maiteni Bethel i voterei ma i vaġai, ma tau i uama i rata da au  
Ephrath ita ġeta. Ma Rachel malana i vaia da ina vinatuna ma vinatuna i voiana-guratei ma  
 ana iniviarra i rata kaua. <sup>17</sup> Ma i voivoia ma iniviarra i rata ma tauvipipiavao i riwa, “Eġa  
 ma rovo! Tevera orotona ġelauna i tupua!” <sup>18</sup> Wate Rachel i’rairaġe ma ana lavutu au  
 damona ma tevera i viwavai “Ben-Oni.”† Wate amana i viwavai, “Benjamin.”‡ <sup>19</sup> Ma Rachel  
 i’raġe ma eta e nena e au Ephrath (marina wavana Bethlehem) au ririvana i doboi. <sup>20</sup> Ma  
Jacob gana i vimairini Rachel ana kokoaga au tepana da i vimataira. Matairana amadodo  
 e mamea.

### *Isaac ana i’raġe*

<sup>22b</sup> Jacob natunatuna nelarai 12:

<sup>23</sup> Leah natunatuna:

Reuben; Jacob ana natuevou

Simeon, Levi, Judah, Isakar, ma Zebulun.

<sup>24</sup> Rachel natunatuna:

Joseph ma Benjamin.

<sup>25</sup> Bilhah - Rachel ana taunola wavine natunatuna:

Dan ma Naphtali.

<sup>26</sup> Zilpah - Leah ana taunola wavine natunatuna:

Gad ma Asher.

Wei lamna Jacob natunatuna anatapui au Padan-Aram i ġuni.

<sup>27</sup> ✧ Ma Jacob i nememei amana Isaac awarina au Mamre au Kiriath-Arba; marina

\* **35:9:** Padan-Aram Wei dobuna Aram au wapuna au Mesopotamia. Haran lamna melagai tagogi wei au dobuna.

† **35:10:** Jacob anona amkwalakwalana. Israel anona God maiteni i viġaiġaiawa. ✧ **35:11:** Gen 17:4-8 ✧ **35:14:** Gen 28:18, 19 ‡ **35:14:** Wine i puloei pulo ġelau maiteni. Jacob mataira i kau i tauna i verena-melei God awarina.

§ **35:14:** Jacob wei gabuna i vovivirei God viborumana aubaina. \* **35:15:** Bethel anona God ana numa. † **35:18:** Ben-Oni lamna anona au iniviarra natuna. ‡ **35:18:** Benjamin lamna anona au oiena natuna. Lamna anona au ġoana bo au tauagu ġaeġaena. ✧ **35:27:** Gen 13:18

e gōreḡorei Hebron. Abraham ma Isaac wariāga wei dobuna i mae-gubai. <sup>28</sup> Isaac i mae da ana madeḡa 180 <sup>29</sup> ma i magura kaua, i lavutu tawanana ma iraḡe ma amamana i votaḡoi. Natunatuna Esau ma Jacob amai i doboi.

## 37

### *Joseph, tuatuana maiteni ai virarautua*

<sup>1</sup> Jacob ana dam maiteni kampa i mae, wariāga amana weka i mae, mai Canaan ai au dobu.

<sup>2</sup> Wei lamna Jacob natunatuna maiteni ai virarautua.

Joseph tauna laraga ana madeḡa 17. Tauna tuatuana maiteni, amai awawana Bilhah ma Zilpah natunatui, amai ana sipu ma *gote* i paipaini. Wate Joseph tuatuana ai kaua apoapoe ḡelau amai i vibenabenamei.

<sup>3</sup> Jacob ana au magura Joseph i tupua ma lamna aubaina natuna nuanuana i vai-kauei, eḡa me natunatuna ḡelau nanare. Ma gara girugirumana, maiana ḡaeḡaena i kauei ma Joseph i verei. <sup>4</sup> Maranai tuatuana i 'nanai da amai Joseph i ḡoana-guratei eḡa me tauī, ma ai ora-apoapoe ai tevera awarina i rata ma eḡa ita bababani kaua awarina.

<sup>5</sup> Waguvara tagogi Joseph i rauboni ma maranai tuatuana ana rauboni i riwei, tauī ai ora-apoapoe i virata-guratei. <sup>6</sup> Joseph i riwa, “Ona rautaniḡana ma au rauboni ana riwemi. <sup>7</sup> Anataputa au wapu *witi* ta bawabawai. Ma tau au bawa au pouna i mairi ma taumi ami bawa i kwaviviroi ma i raudunelei!” <sup>8</sup> Ma tuatuana i riwa, “Tam u notai da ma vibada bo? Ma tam ma vibadelai bo?” Ma Joseph ana babani ma ana rauboni aubaina tauī amloi i ḡaiḡai guratana.

### *Joseph i gimarei*

<sup>12</sup> Mara tagogi Joseph tuatuana amai ana *sipu* ma *gote* i taravaini ma i naiei au Shekem ma kampa i paini. <sup>13</sup> Ma Israel (wavana ḡelauna Jacob) Joseph i riwei i pa, “Tuatuam au Shekem sipu ma *gote* e paipaini. A ḡoem da ma nae tauī awari.”

Joseph i vianina ma i riwa, “Anina ana nae.”

<sup>14</sup> Amana i riwa i pa, “Ma nae tuatuam ma ḡamoḡamo ma i 'nanai, tauī anina bo eḡa, ma ma nememei da ma riweu.” Ma Joseph i paritawanei. Hebron wapuna i netawanei ma i nae.

Maranai au Shekem i ḡeta, <sup>15</sup> ma kampa au wapu i kwavikwaviviro ma oroto tagogi tauna i 'nanai ma i riwei, “Aiwai e baibaiei?”

<sup>16</sup> Joseph i paribelei, “Tau tuatua a baibaiei, tauī ai sipu ma *gote* e paipaini. Uta riweu tauī mepa?”

<sup>17</sup> Tauna i paribelei i pa, “Tauī i nae. A nonori i bababani i pa, “Tana nae au Dothan.”

Anina ma Joseph tuatuana i votaḡoi da au Dothan i nelaḡai.

<sup>18</sup> Maranai tuatuana matai i tawanei ma Joseph i 'nanai i nenei ma i aramanei da tauna. Muriai da ita ḡetai tauī ai oga i tarai da tauna ita viraḡeni. <sup>19</sup> Tauī i babani vivira i pa, “Taurauboni e nenei. <sup>20</sup> Ona nei tana vunui ma waira dogona paipairana au orana tana tawana ḡairei. Ma tana riwa da ḡamoḡamo moduei tauna i viraḡeni. Ma tana inanai ana rauboni mena ina ḡoa.”

<sup>21</sup> Wate Reuben ai ogatara i nonori, ma i ḡoei da ana tevera ita gagaloei ma i riwa i pa, “Eḡa ana lawana tana vaitawanei.” <sup>22</sup> “Eḡa tana viraḡeni. Tana tawana ḡairei waira dogona paipairana au orana weka au mutulua ma eḡa tupuana tana vodadani.” Reuben wenanare i babani aubaina i ḡoei da ana tevera ita naiana-melei amana awarina.

<sup>23</sup> Maranai Joseph i ġeta tuatuna awarii, tauna i vojijini ma ana gara girugirumana i ġiġi-tawanei. <sup>24</sup> Ma i vaia ma i tawana ġairei waira dogona au orana.

<sup>25</sup> Ma tau i kiala da i amam ma i taepai da dam mai Ishmael i 'nanai au Gilead da i nena au Egypt. Tau i ai gimara lam anitavidagiai ma bunama *mur*\* au kamel i vigerui.

<sup>26</sup> Judah varevareina i riwei i pa, "Aiwai aiaina tana vaia mepa da ata tevera tana viraġeni ma tana moru. <sup>27</sup> Ona nei ma tana gimarei dam mai Ishmael awarii ma eġa urataiei tarana ina toi, tauna ata tevera, tara tagogi." Ma varevareina i vianina. <sup>28</sup> ✨Ma maranai taugimara mai Midian† i ġetai, Joseph tuatuna tauna dogoei i taina-epai ma i gimarei mai Ishmael awarii maiana silva 20 ana ruva nanare ma tau i naiei au Egypt.

<sup>29</sup> Muriai Reuben i nememei da au dogo i 'nana ġaira, ma Joseph kampa eġa ma i vinuabola kaua ma ana gara i sikai. <sup>30</sup> Ma i nae me ana roaroa awari ma i riwa, "Ata tevera kampa eġa. Aiwai ana kauei?"

<sup>31</sup> Anina ma tau i gote i vunui ma au tarana ana gara i virai. <sup>32</sup> Ma ana gara i naiei amai awarina ma i riwei i pa, "Tauai wei garana a nelaġai. Ma inanai wei natum ġarinei bo eġa?"

<sup>33</sup> Amai gara i 'nanai ma i riwa, "Anina wei tau natu ana gara. Ġamoġamo ġaġaiawai natui i vunui. Oo natu! Ġamoġamo natu i uta-sikasikai."

<sup>34</sup> Ma Jacob i vinuabola kaua ma ana gara i sikai. Ma ġamoġamo opina i oteni ma natuna i moguei da nawaravi biaġa i kwa. <sup>35</sup> Ana numa ravai i nae awarina da ita vinuaubai. Wate tauna vinuauba i geduaiei ma i riwa i pa, "Ana tou ma natu ana moguei da au dogo ina tereġaireu ma ana nae mepa natu i nenelana." Ma natuna i touei.

## 39

### *Potiphar awana, Joseph i rauoġarei*

<sup>1</sup> Dam mai Ishmael Joseph i ġairei au Egypt, ma Potiphar tauna i gimara da ana taunola. Potiphar tauna Egypte ma sorodia ai bada ġaeġaena. <sup>2</sup> ✨BADA Joseph i mae-ratui ma i voaġui da anatapuna aiaina i kaukauei ana bada aubaina. Tauna Potiphar ana au numa i mae. <sup>3</sup> Potiphar i 'nanai da BADA Joseph i mae-ratui ma i voaġui da aiwai anatapuna i kauana-kauei, <sup>4</sup> ma wei Potiphar i vinuaiaiei ma Joseph i terei da tauna aubaina ina nola, ma ana taunola numa au orana, ma ana purapura anatapuna ina vibadei. <sup>5</sup> Nai marana da i nenai, Joseph awarinei ma BADA Potiphar ana numa orana ravai ma ana purapura anatapui au numa ma ana au wapu i viaiaini.

<sup>6</sup> Anina ma Joseph vaivai i verei da Potiphar ana purapura anatapui i paini, ma ana bada ana nola da am ava ina paipaini.

Joseph i tupua da karawata ma inanana aiaina. <sup>7</sup> Kampa eġa ita mae-pora ma ana bada awana Joseph i 'nana rauoġarei ma i riwei i pa, "Ma nei tana matave."

<sup>8</sup> Wate Joseph i geduai ma wavine i riwei i pa, "Ma i 'nana, tau au bada weka i tereu da a vivipaipai ma lamna aubaina tauna eġa aiwai numa au orana ina vinuabolei. Tauna ana purapura anatapuna au urau i terei. <sup>9</sup> Tau au rewapana wei au numana nanare tauna, ma eġa aiwai ita nuanei anina tam ainelam. Menanare da kaua apoapoenana ana kauei da God au matana au ġoa ina apoapoe." <sup>10</sup> Wavine marana patapatai Joseph i rarauelari da maiteni ita matave, wate Joseph i gedugeduai ma i nene-tawanei.

\* 37:25: MurMyrrh. Wei dobuna ravai ai bunama ġabuabuna ma ana nola i maġa. ✨ 37:28: Act 7:9 † 37:28: Buka taugirumana dam wavai ruaġa i terei, mai Ishmael ma Midian, wate mepa da tau i dam tagogi. ✨ 39:2: Act 7:9



<sup>11</sup> Mara tagogi Joseph i nae au numa da ita nola, ma kampa eġa taunola ġelau. <sup>12</sup> Ma Potiphar awana i nae ma Joseph ana au kareko i voa ma i riwa i pa, “Ma nei tana matave!” Wate Joseph i ruba-opu au doa ma kareko wavine au urana i voterei.

<sup>13</sup> Wavine i ’nanai da Joseph i ruba-opu ma ana gara au urana i voterei, <sup>14</sup> ma wavine ana taunola i kwatuei da i nei ma i riwa i pa, “Weka ona inana! Wei Hebroweina awau i neiai awarita, i vinameta. I nei awariu ma i ġoei da ita viawawaneu wate tau garara a vikarei. <sup>15</sup> Ma i nonori a garagarara ma i ruba-opu ma ana kareko i ruba-tawanei.”

<sup>16</sup> Ma wavine kareko i paini da awana i nememei au numa. <sup>17</sup> Ma wavine riwana tagogina awana i riwei i pa, “Wei Hebroweina tam u neiai awarita, i vinameta. I nei ma i ġoei da ita viawawaneu. <sup>18</sup> Wate maranaina a garagarara, tauna i ruba-opu ma ana kareko au ririvau i voterei.”

<sup>19</sup> Potiphar awana ana babana i nonori ma amlona i ġaiġai kaua. <sup>20</sup> Anina ma tauna Joseph i vaia ma panipani au numana i tawana-ruiei, mepa gulau ana panipani e mamae ma kampa i mae.

Maranai Joseph au panipani-numana <sup>21</sup> ✧BADA Joseph i mae-ratui ma i viaiaini, lamna aubaina da panipani taupainina Joseph i vinuaiaiei. <sup>22</sup> Ma tauna Joseph i terei da panipani ravai ita vibadei ma nola au urana i terei. <sup>23</sup> Panipani taupainina ana nuabola eġa aiwai, aubaina Joseph aiwai anatapuna i paipaini. Ma BADA tauna i mae-ratui ma i voagui da aiwai anatapuna i kauana-kauei.

## 40

### *Joseph, tau i rauboni anoi i vieġei.*

<sup>1</sup> Ma mara tagogi Pharaoh \* ana *wine* taupainina ma palawa tauapuina babadai, i kauana-boai Pharaoh awarina. <sup>2</sup> Pharaoh amlona i ġaiġai babadai ruaġai awari. <sup>3</sup> Ma i vaia ma panipani au numana i terei mepa Joseph i mamae lana, sorodia ai bada ana au numa. <sup>4</sup> Sorodia ai bada wei ruaġai i naiei Joseph awarina ma tauna ravai i paini. Tau i mae-guratana au panipani numana.

<sup>5</sup> Waguvara tagogi babadai ruaġai panipani au numana i rauboni. Ma ai rauboni anoi taputapune i ava.

<sup>6</sup> Ma ubaubanai maranai Joseph i nei awari ma i ’nanai da tau i eġa ita vinuaiai. <sup>7</sup> Ma ruaġai i paridadanei, “Aiwai aubaina naomi i peu?”

<sup>8</sup> Tau i paribelei, “Tauai airuaġa a rauboni ma eġa aiai da ai rauboni anona ita vieġelai.” Joseph i riwa, “God ainelana rauboni e vivieġai. Ami rauboni ona riweu.”

<sup>9</sup> Anina ma *wine* taupainina ana rauboni Joseph i riwei, “Au rauboni au orana grape ġoroġorovana a inanai au naou. <sup>10</sup> Ma ġoroġorovana raġaraġana tonuġa. Ma i raurugu ma i talai ma anona tapina i magura. <sup>11</sup> Pharaoh ana aniuma kelakana a vovojjini ma grape a purai ma au kelaka a buloi da Pharaoh a verei.”

<sup>12</sup> Ma Joseph tauna i riwei, “Am rauboni anona wei. Grape raġaraġana tonuġa, anona lamna au pom tonuġa. <sup>13</sup> Au pom tonuġa au murina, Pharaoh ina tere-opunem ma am au nola ina tere-melem. Ma tam, Pharaoh ana aniuma kelakana au urana ina tere-melei, me au noana nanare. <sup>14</sup> Wate maranai wei gabuna u opu-tawanei ma aiwai anatapuna ina aime. Tau ma notaiu, am i viaiai ma kauei da au nuabola Pharaoh ma parivere i da panipani-numanei ina tere-opuneu. <sup>15</sup> Pharaoh ma riwei aiwai awariu i tupua. Mai Hebrew ai au dobu i daneneu ma weka i neiaiu, wate tau eġa aiwai ata kauana-boai ma weka au dogo i tawaneu.”

✧ 39:21: Act 7:9 \* 40:1: Mai Egypt ai wavalatona i ġorei Pharaoh. Wei lamna ana vaivai ma eġa wavana.

<sup>16</sup> Ma palawa tauapuina i 'nanai da Joseph nuaiiai riwana i vieġai ma i riwa, “Tau nanare a rauboni. Palawa irigana tonuġa au kolau a terei. <sup>17</sup> Iriga au tepana, lamna palawa apuapunana tapuna ma tapuna Pharaoh aubaina, wate kiu i nei ma au kolau, au iriga palawa i amam.”

<sup>18</sup> Joseph i paribelei i pa, “Am rauboni anona wei. Iriga tonuġa lamna au pom tonuġa. <sup>19</sup> Aupom au vitonuina, Pharaoh panipani-numanei ina tere-opunem da uam ina borituini ma tupuam ai au tepana ina vitakei ma kiu ina nei ma vioam ina ani.”

<sup>20</sup> Ma au pom au vitonuina, lamna Pharaoh ana tupua marana ma torela ġaeġaena i kauei, ana gabemani babadai aubaii. Ma ana *wine* taupainina ma palawa tauapuina panipani-numanei i tere-opunei ma i neiai Pharaoh awarina, ana gabemani babadai au matai. <sup>21</sup> Ana *wine* taupainina, ana au nola i tere-melei me au naona nanare. Ma tauna, Pharaoh ana aniuma kelakana au urana i tere-melei. <sup>22</sup> Wate ana sorodia i egari da ana palawa tauapuina uana i borituini ma tupana ai au tepana i vitakei. Joseph menanare rauboni i vivieġanei, nanare i tupua.

<sup>23</sup> Wate *wine* taupainina, Joseph nuanuana i vuru ma eġa ita vinua-notenotei.

## 41

### *Pharaoh ana rauboni*

<sup>1</sup> Ma madeġa ruaġa i kwa, ma Pharaoh i rauboni da tauna waira Nile au adana i maimairi.

<sup>2</sup> Ma bulumakau 7 aiaii ma dododoi wairei i ġeta ma waira au adana gidagida i amam.

<sup>3</sup> Ma bulumakau 7 apoapoei ma kirakiramai wairei i ġetai da bulumakau aiaii au ririvai i raumairiei waira au adana. <sup>4</sup> Bulumakau 7 apoapoei ma kirakiramai i vomairi da bulumakau 7 aiaii ma dododoi i lawana-pai. Anina, ma Pharaoh matana i kala.

<sup>5</sup> Ma i matave me ma mara viruaina i rauboni da *witi* aina tagogi ma rovei 7 aiaii ma dododoi i 'nanai.

<sup>6</sup> Anina ma *witi* rovei 7 muriai i gogogo wate rauanaġa i ravi da i jinajina.

<sup>7</sup> Ma *witi* rovei jinajinai 7 i vomairi da *witi* rovei dododoi 7 i lawani. Anina ma Pharaoh matana i kala ma i aramanei da i rauboni.

<sup>8</sup> Ubaubanai Pharaoh nuanuana i bolai ma riwa i paritawanei da rauboni tauvieġai ma nuaulaulai anatapui au Egypt i nei. Ma ana rauboni i riwei ma eġa aiai ravana da ana rauboni anona ita vieġei.

<sup>9</sup> Ma *wine* taupainina Pharaoh i riwei, “Amadodo ana rupena da tau a kauana-boai.

<sup>10</sup> Mara tagogi tam amlom i ġaiġai palawa tauapuina ma tau awariu, da u paniai ma sorodia ai bada ana au numa a mae. <sup>11</sup> Ma waguvara tagogi tauai tagotagogi ava a rauboni ma ai rauboni anoi taputapunei ava. <sup>12</sup> Laraga Hebrawei kampa tauai maiteni, tauna sorodia ai bada ana taunola. Ai rauboni a riwei ma tauna ai rauboni anona i vieġelai <sup>13</sup> Ma tauna aiwai i ririweia nanarena i tupua. Tau u tere-meleu au au nola ma palawa tauapuina u viraġeni.”

<sup>14</sup> Ma Pharaoh, Joseph ana riwa i paritawanei ma panipani-numanei laġilaġina i neiai. Joseph i viamġari ma ana gara aiaina i oteni. Ma i naiei Pharaoh awarina.

<sup>15</sup> Ma Pharaoh Joseph i riwei, “Waguvarai a rauboni ma eġa aiai au rauboni anona ita vieġeu. Wate rava i riwa da maranai tam rauboni e nononori, lamna anona e vivieġai.”

<sup>16</sup> Joseph i paribelana, “Tau eġa tagotagogina, wate God am rauboni anona ina verem da oram ina viubai.”

<sup>25</sup> Joseph i paribelei, i pa, “Oo bada, rauboni ruaġai anoi tagogina. God aburuna ava da aiwai ina kauei lamna gulau i viatataiei. <sup>26</sup> Bulumakau dododoi 7, ma *witi* rovei aiaii 7, lamna maura madeġana 7. <sup>27</sup> Bulumakau kirakiramai 7 muriai i nei, ma *witi* rovei jinajinai 7, lamna anona amapo madeġana 7 au orana gomara.

<sup>28</sup> —Aiwai a ririweia, nanare ina tupua. God i viatataiem da aiwai ina kauēi. <sup>29</sup> Madeġa 7 au orana, lamna maura ġaeġaena Egypt au anatapuna. <sup>30</sup> Wate au murina, gomara ġaeġaena ina mae da madeġa 7 da Egypt ana maura marana rava nuanuai ina vuru ma gomara rava ina vipupui. <sup>31</sup> Gomara ina rata kua da maura marana nuanuata ina vuru. <sup>32</sup> God i vianina da wei ina tupua ma eġa barana ina uama, lamna aubaina rauboni ruaġa i verei.

<sup>33</sup> —Au bada, tam, oroto nuaulaulana ma notanotana uta vinei da Egypt ita vibadei. <sup>34</sup> Wei uta kauēi, babada uta terei Egypt au anatapuna da tuaruta au marana ġuta vi-five-na ita vaia madeġa 7 maura au marana. <sup>35</sup> Ma rewapana ma verei da au maura, tau i lam ina tami da au anara ina vidamni ma ina paini. <sup>36</sup> Wei lamii ina tereriei rava aubaii maranai madeġa 7 gomara au Egypt ina nei. Ma wei taunei, mai Egypt eġa am ina iraġe.”

<sup>37</sup> Anina, ma Pharaoh ana gabemani maiteni oġa-tarana i vianinei. <sup>38</sup> Ma i riwei i pa, “Mepa rava ġelauna tana nelaġai me Joseph ma God Aruana tauna au orana e mamae?”

<sup>39</sup> Anina ma Pharaoh, Joseph i riwei, “God wei anatapuna i viatataiem, eġa aiai ġelauna nuaulaulana ma notanota kauana me tam. <sup>40</sup> ✧ Tam ana terem da au dobu ma vibadei ma au rava anatapui am riwa ina voteletelei. Tau Pharaoh, ma am rewapana tau ainelau au rewapana eġa ina ġetawanei.”

<sup>41</sup> Ma Pharaoh i riwa, “Marina tau a vinem da Egypt anatapuna ma vibadei.” <sup>42</sup> Ma Pharaoh au urana ana vigulau *ringna* i votawanei ma Joseph au urana i terei,\* ma gara maiana ġaeġaena i vioteni ma sein goldei au uana i tere-taġonei.

<sup>45</sup> Ma Pharaoh Joseph wava Zaphenath-Paneah,† i verei ma mai On ai pirisi Potiphera ‡ natuna guguinina Asenath, Joseph i verei da awana. Anina ma Joseph, dobu Egypt i vibadei.

<sup>46</sup> Joseph ana madeġa 30 ma wei vibadana i vaia. Ma Joseph, Pharaoh i netawanei ma Egypt i naeni ma i tuvirevirei. <sup>47</sup> Maura ġaeġaena i nelaġai madeġa 7 au orana. <sup>48</sup> Joseph ai maura ġelau i tami maura madeġana 7 au orana au Egypt, ma au melagai nununai i tere-kauēi ma i paini. Melagai anatapui ai lam au anara i terei. <sup>49</sup> Joseph lam i vidamni da olana i mairi me bubu au gera ma iavana i kauana-avei aubaina lam i rata dewadewa.

<sup>53</sup> Ma maura madeġana 7 au Egypt au damona i ġeta. <sup>54</sup> ✧ Ma gomara madeġana 7 i raukarei, me Joseph i ririweia nanare. Gomara dobu au anatapuna, wate Egypt au anatapuna lam i mamae. <sup>55</sup> Maranai mai Egypt raumolaġau i vikarei, tau i Pharaoh i vibaġai lam aubaina. Ma tau i riwei da ita nae Joseph awarina ma tauna aiwai i ririweia ita kauēi.

<sup>56-57</sup> Maranai gomara Egypt anatapuna i vaia, Joseph anara i votawatawanei ma lam mai Egypt awari i gimarei. Anina ma gomara i rata kua dobu au anatapuna da rava anatapui i nei Joseph awarina au Egypt lam gimarana aubaina.

## 42

### *Jacob, natunatuna i paritawanei au Egypt*

<sup>1</sup> Ma au Canaan Jacob i nonori da au Egypt lam ma natunatuna nelarai i riwei, “Aiwaina da o mamae labalababa? <sup>2</sup> ✧ Anina ona rautaniġana! A nonori da lam au Egypt. Ona ġaira kampa ma aubaita lam ona gimarai da tana lawana ma eġa tana iraġe.”

✧ 41:40: Act 7:10 \* 41:42: Mataira da Joseph, Pharaoh ana rewapanei ma ana riwei i nolanolā. † 41:45: Safenat-panea Egypt ai ponei anona God i bababani ma i lawana. ‡ 41:45: On Wei lamna dobu wavana, ma wavana ġelauna lamna Heliopolis. Wei au dobu rava, madeġa i raudunelei. ✧ 41:54: Act 7:11 ✧ 42:2: Act 7:12

<sup>3</sup> Anina ma Joseph varevareina ten i ġaira au Egypt da lam ita gimarai. <sup>4</sup> Wate Jacob eġa Joseph ana tevera oiena Benjamin ita paritawanei aubaina i rovo mepa da aiwai apoapoena awarina ita tupua. <sup>5</sup> Tau i rava ġelau maiteni i nae au Egypt da lam ita gimarai aubaina gomara ġaeġaena dobu Canaan maiteni i vaia.

<sup>6</sup> Joseph i vibada ġaeġaena au Egypt ma tauna lam i gimagimarei dobu anatapui ravai awari. Varevareina i ġetai ma Joseph au naona i mae-ġaira au doa ma i raudune. <sup>7</sup> Joseph tau i 'nanai ma maratagogi i aramanei da tau aiavoi ma i kauana-melei da apamina tau eġa ita aramanei. Ma riwa bagibaginei i vitara-virevirei, "Taumi meiei o nei?"

Tau i paribelei, "Tauai Canaan a nei da lam ata gimarai."

<sup>8</sup> Joseph tuatwana i 'nanai da i aramanei, wate tau ai tevera i vinua-nainei. <sup>9</sup> ✧ Ma ana rauboni wariġana i notai ma i riwei, "Taumi i paritawanemi da ai dobu ana ġokokokara ota inana bo."

<sup>10</sup> Tau i paribelei, "Oo bada eġa! Tauai am laralaraga a nei da lam ana gimarai."

<sup>21</sup> Ma tau i babani vivira, "Nai maranaina ata tevera ana ora-viarana agu i toutouei awarita ma, eġa tata rau-nu'apoapoelei. Tauta ata wavu lamna kovoġana marina ta vaivaia."

<sup>22</sup> ✧ Reuben i paribelei, "Nai maranaina a riwemi, 'Eġa ata tevera ona vodadani!' Wate taumi eġa ota rautaniġaneu. Marina ata tevera tarana kovoġana ta vaivaia." <sup>23</sup> Joseph Egypt ponanei i babani ma rava ġelauna tau ai ponei i paripari-verei. Wate tau eġa ita aramanei da Joseph ai babani i nononori.

## 45

### *Joseph i vieġana-melei*

<sup>4</sup> Joseph varevareina i riwei, "Ona nei au ġereġereu." Ma tau i nei au ġereġerena. Ma i babani, i pa, "Tau ami tevera Joseph, mai Egypt awari o gimareu. <sup>5</sup> Wate eġa orami ina bolai, ma eġa ami rava maiteni tau o gimareu aubaina ona viamparipari. Wate God au naona i paritawaneu da rava ata vilawani. <sup>6</sup> Wei gomarana dobu e viviapoapoeni marina madeġa ruaġa i kwa. Wate madeġa five ġelauna e mammae da eġa tana ipi bo tana tuaruta. <sup>7</sup> God i aipari-tawaneu da taumi ma ami dam ravai maiteni ata vilawanimi, ma ami dam avena ita pupu. <sup>8</sup> Ma eġa taumi weka ota paritawaneu wate God, ma tauna i tereu da Pharaoh ana taunola ai bada ġaeġaena ma ana numa ma aiwai anatapuna au Egypt a vivibadei. <sup>9</sup> ✧ Marina laġilaġina ona nae me amau awarina ma ona riwei, 'Natum Joseph wenanare i riwa, God i tereu da Egypt anatapuna a vivibadei, ma tam laġilaġina ma ġairai awariu. <sup>10</sup> Tam au ġeġereu ma mae au Goshen; ma nanare natunatum ma ġoġoġam ma am ġamoġamo ma aiwai anatapuna ġarime. <sup>11</sup> Gomara madeġana five amapo e mammae, aubaina tau lam ana verem. Mepa da wei eġa ana kauei tam ma am dam ma am laraga ma am ġamoġamo anatapui ina vinuapoapoe ma ina raumolaġau."

<sup>25</sup> Anina ma Joseph tuatwana Egypt i opu-tawanei ma i nae me amai Jacob awarina au Canaan. <sup>26</sup> Ma tau Jacob i riwei, "Natum Joseph lawalawaina e mammae, ma tauna marina Egypt e vivibadei." Jacob i vinuanaina ma nai babani eġa ita vitumaġane. <sup>27</sup> Wate tau aiwai anatapuna Joseph i ririweia amai i pariveri. Ma Joseph ana anigeru i paritawanei da Jacob ita vigeru da ita naiei au Egypt. Maranai wei i 'nanai, Jacob ana nota i nememe. <sup>28</sup> I pa, "Tau marina a aramanei da natu lawalawaina e mammae, ma ana nae da ana inana ma muria da ana iraġe."

## 46

*Jacob, natunatuna ma ḡoḡoḡana maiteni i nae au Egypt.*

<sup>1</sup> Anina ma Jacob ḡarinei anapuna maiteni i nae au Egypt. Ma au Beersheba i ḡeta, ma kampa pulo i apui amana Isaac ana God awarina. <sup>2</sup> Ma waguvarai God raubonie awarina i babani i pa, “Jacob! Jacob!”

Ma tauna i paribei, “Tau weka.”

<sup>3</sup> God i riwa, “Tau God, amam ana God. Egypt ḡairana eḡa ma rovoei, aubaina tau am epaepaia ai dam boruna ana vimaḡai kampa. <sup>4</sup> Tau maiteni tana nae au Egypt ma am epaepaia ana neiana-meleiai wei au dobuna. Joseph amapo au ririvam, maranai ma iraḡe.”

<sup>5</sup> Jacob, Beersheba i voterei, ma natunatuna nelarai amai i vojijini, ma anapui awawai ma natunatui maiteni, au anivigeru Pharaoh i paripari-tawaneiana i geru. <sup>6-7</sup> ✨Ai ḡamoḡamo ma ḡariei anapuna au Canaan i vaivainia i naiei au Egypt. Anina ma Jacob, natunatuna nelarai ma waivinei ma ḡoḡoḡai ma ana numa ravai anapui i nae au Egypt.

<sup>28</sup> Jacob Judah i aiparitawanei au Egypt da Joseph ita riwei da au Goshen ita nebelei. Maranai i ḡeta. <sup>29</sup> Joseph ana chariot i gerui ma i nae au Goshen. Maranai amana i nebelei, i taragwabei ma i tou guratana. <sup>30</sup> Jacob Joseph i riwei, “Naom a inanai ma a aramanei da tam lawalawaim, marina ana nuaubau ana iraḡe.”

## 48

*Jacob, Ephraim ma Manasseh i viaiaini*

<sup>1</sup> Wei kauai au murina, rava Joseph i riwei, “Amam i doria.” Anina ma natunatuna Manasseh ma Ephraim i taravaini ma i nae amana da ita inanai.

<sup>2</sup> Rava tagogi Jacob i riwei, “Natunatum Joseph i ḡetai da ina inanaim.” Jacob doridoriana ma i voguratei da i vomairi ma ana animatave au tepanai i kiala.

<sup>3</sup> ✨Anina ma Jacob natuna Joseph i riwei, “God VIVIREWAPANA KAUKAUANA awariu i eḡa au Luz (Bethel) au Canaan ma i viaiainiu. <sup>4</sup> Ma i riweu, ‘Natunatum ana vimaḡai ma am epaepaia ai dam ana viratai; wei dobuna am epaepaia ana verei da ina viḡariana-nonoei.’

<sup>5</sup> —Ma lamna aubaina ḡoḡoḡau ruaḡa Manasseh ma Ephraim au Egypt tuputupuai muriai da a nei; lamna tau ana vaia da natunatu me natunatu Reuben ma Simeon. <sup>6</sup> Roaroa muriai e tuputupua lamna tam ḡarime; ma ai buderi Ephraim ma Manasseh awariei ina vaia.”

<sup>13</sup> Anina ma Joseph natunatuna ruaḡa i neiai Jacob awarina, Ephraim amana au oiena lamna Jacob au kelakelauna ma Manasseh amana au kelakelauna lamna Jacob au oiena <sup>14</sup> Wate Jacob uraoiena i tere-taḡonei ma Ephraim au kolana i terei avena da tauna umau, ma ura-kelakelauna i tere-taḡonei da Manasseh au kolana i terei avena da tauna natuevou.\* <sup>15</sup> Anina ma Joseph† i viaiaini i pa,

“God. Tam Amau Isaac ma ḡoḡau Abraham ai God,  
God taupainiu au lawana au anapuna,

✨ **46:6-7:** Act 7:15 ✨ **48:3:** Gen 28:13-14 \* **48:14:** Tau ai nota da au oiena kialana lamna kaua bo nota ḡaeḡaena ma eḡa me au kelakelauna kialana nanare. Lamna aubaina Jacob nimana au oiena tevera au kolana i tereterei tauna amapo viaiaina ḡaeḡaena ina vaia eḡa me ḡelauna nanare. Lamna aubaina Joseph i baiei maranai Jacob nimana au oiena tevera umauna au kolana i terei. † **48:15:** Maranai Jacob ḡoḡoḡana i viaiaini, tauna Joseph i viaiaini.

<sup>16</sup> Ma am anela taugagaloou au anata-puna wei roaroai ma viaiaini!

Ma wavau ma amamau wavai awarii ina mae-nonoa ma a raraupari da ai dam ma viratai au dobu.”

<sup>17</sup> Wate maranai Joseph i 'nanai da amana aiwai i kaukauei ma tauna eġa ita vinuaiiai; ma amana urana Ephraim au kolana ita vaitawanei ma Manasseh au kolana ita terei.

<sup>18</sup> Joseph amana i riwei, “Amau eġa nanare. Wei tauna natuevou uraoiem au kolana ma terei.”

<sup>19</sup> Wate Amana i riwa, “Natu! Tau a aramanei aiwai a kaukauei. Manasseh maiteni ana dam ina rata kaua. Wate ana tevera wavana ina rata ma ana dam ina rata dewadewa eġa me tuana.” <sup>20</sup> Anina ma Jacob roaroa nai marana i viaiaini i pa,

“Mai Israel wavam ina latoni maranai e viviaiaina, tau i ina riwa,

‘Tauai a raraupari da God ina viaiainim me Ephraim ma Manasseh i viaiaini nanare.”

Wenanare lamna Ephraim wavana i ailatoni ma muriai Manasseh wavana.

<sup>21</sup> Ma Israel, Joseph i riwei, “Tau aburuna ava da ana iraġe. Wate God awarim ina mae da ina naiana-melem au Canaan, amamam ai au dobu.”

## 49

### *Jacob, Judah i viaiaini*

<sup>8</sup> “Judah, varevareim ina voepaepaim, ma amam natunatuna ina raudunelem aubaina tam am ġavia au uai ma voa ma ma vovaiubai.

<sup>9</sup> Judah natu, tam me lion natuna, ana sia i am vorovei da i amruruna ma e matamatave, eġa aiai ana matave ina viapoapoeni!

<sup>10</sup> Gulau ana jiġona Judah ina vojijini ma ana epaepaia ina vibada nonoa, anina da jiġona taniwagana ina nei maranaina dobu anata-pui ravai tauna ina raudunelei ma ina viborumei.”

<sup>33</sup> ✧ Ma Jacob natunatuna awarii i babani vorovei, ma tauna ana au animatave i rauvirai ma i 'raġe.

## 50

### *Joseph, tuatuaana i vinuaubai*

<sup>15</sup> Ma maranai Jacob i 'raġe, Joseph tuatuaana i rovo ma i riwa, “Mepa da Joseph amlona ina ġaiġai ma ina raubiwa, kaua apoapoena awarina ta kauai aubaina.” <sup>16</sup> Ma lamna aubaina riwa i paritawanei Joseph awarina i pa, “Amata maeninai ma wenanare i riwelai i pa, <sup>17</sup> ‘Joseph wenanare ona riwei, “Tuatuam kaua apoapoe kaukauana awarim i kauai. Wate a ġoei da ai kaua apoapoe ma nota-tawanei.” “Tauai amam ana God a vovoepaepai, ma a vivibaġa-guratem da ai ġo'apoapoe ma nota-tawanei.” Maranai Joseph wei riwana i nonori tauna orana i viara kaua ma i tou.

<sup>18</sup> Anina ma tuatuaana i nei ma au naona i mae-peu ma i riwa, “Ma inanaiai tauai am taunola a nei.”

<sup>19</sup> Wate Joseph tau i wenanare i riwei, “Tau eġa ona rovoeu, tau eġa God da ana kovoġimi.

<sup>20</sup> Wariaġa o ġoei da ota viapoapoeniu wate God i virai da aiaina i kauai da rava maġamaġai

ina vilawani ma eġa ina pupu. <sup>21</sup> Anina, eġa ona rovo! Tau ana painimi, natunatumi maiteni.” Ma nanare i babani da orai i rauei.

## Exodus Oputawanana

### *Jacob dam gaegeaena i vitupui au Egypt*

<sup>1</sup> Jacob natunatuna ana awawai ma natunatui anapui maiteni i gaira au Egypt. Tauu wavai wenanare: <sup>2</sup> Reuben, Simeon, Levi, Judah; <sup>3</sup> Isakar, Zebulun ma Benjamin; <sup>4</sup> Dan, Naphtali, Gad ma Asher. <sup>5</sup> Jacob natunatuna ma gogogana nelarai, anapui ai maga 70 i gaira, Joseph au Egypt maemaena maiteni i 'avi.

<sup>6</sup> Muriai Joseph ma varevareina ma nai kimtana i 'rage-pai, <sup>7</sup> ✧ Wate ai epaepaia - mai Israel, i vinatuna guratana da dam gaegeaena i vitupui ma Egypt anapuna i vioai.

### *Pharaoh mai Israel i rau-iviapoapelei*

<sup>8</sup> ✧ Madega magamagau i murina Pharaoh vouna i vibada au Egypt, ma Joseph ma aiwai i kauai ega ita aramanei. <sup>9</sup> Pharaoh ana rava i riwei, "Ona inana, mai Israel i maga guratana ma i virewapana kaua ega me tauta. <sup>10</sup> ✧ Tauta tana viogatara da menanare tana kauanei da ai vinatuna ega ina rata guratana. Ma mepa da wei ega tana kauai ma maranai gavia ina nei, ma tauu gavia maiteni ina vitagogiei da ina vigavieta, ma ina oputawaneta."

<sup>11</sup> Ma nola babadai i terei da mai Israel nolei i vunuvunui. Wei babadai mai Israel i egari da taon gaegeae ruaiga i voai wavai Pithom ma Rameses, ma kampa Pharaoh ana lam ma purapura gelau i vidamni. <sup>12</sup> Mai Egypt amapo da tauu i rau-iviapoapelei, wate mai Israel amapo da i vivinatuna ma ai dam i rarata au Egypt. Ma lamna aubaina mai Egypt mai Israel i roveoi. <sup>13-14</sup> Ma tauu mai Israel i egari da nola vivitaina i kaukai ma i vinuapoape. Ma brik i kaukai ma doa i gwadai da brik anipasina, ma wapu nolai maiteni i kaukai. Mai Egypt nolei mai Israel i vunuvunui ma ega ita rau-nuapoapelei.

<sup>22</sup> ✧ Pharaoh ana rava i riwei, "Maranai wavine Hebrewei tevera orotona i guni, tev-erana au waira Nile ona tawanei. Wate maranai tevera wavinena i tupua, ona voterei da ina mae."

## 2

### *Moses i tupua*

<sup>1</sup> Maranai wei kauai i tuputupua, oroto tagogi Levi ana damei ma wavine ana damei i ravaigi, <sup>2</sup> ✧ wavine i raumanawa ma natuna orotona i guni. Ma wavine i 'nanai da natuna inanana aiaina i tupua, ma natuna i tere-govaigi da nawaravi tonuga i kwa. <sup>3</sup> Wate ega tagotagogina da ita teregovaiga-nonoai ma iriga waira modunei\* voavoana i vaia ma koltei gavogavo i pasi-tomeni da waira ega ina rui. Ma tevera au iriga i poai ma waira modui au orai i terei au waira Nile. <sup>4</sup> Tevera tuana wavinena aueia i mae ma ana tevera i vinenegeanei da ita inanai awarina aiwai ita tupua.

<sup>5</sup> Ma Pharaoh natuna gugunina i gairai da ita toa. Ma ana taunola waivinei waira au adana i bababara-nae. Pharaoh natuna iriga i 'nanai modu au orana ma ana taunola i paritawanei da irigana ita neiai. <sup>6</sup> Maranai Pharaoh natuna iriga i votawanei ma tevera i toutou i 'nanai, nuuana i bolai ma i riwa, "Wei mai Hebrew natui."

<sup>7</sup> Tevera tuana wavinena i nae ma Pharaoh natuna i vibaigai, "Anina bo ega da ana nae ma tataovao Hebrewei ana baiei da tevera ina viguui ma ina gamoi?"



<sup>8</sup> Wavine i vianina ma i riwa, “Anina, ma nae!” Ma tevera i nae ma alo oina i taravainiai. <sup>9</sup> Ma Pharaoh natuna wavinena i riwei, “Wei teverana ma viḡuḡui aubaiu ma ana vimaiem.” Ma wavine teverana i naiei ana au numa ma i ḡamoi. <sup>10</sup> ✧ Ma tevera i eda ma i naiei Pharaoh natuna awarina ma tauna i vaini da natuna. Ma Pharaoh natuna i riwa, “Au waira a sinaepai.” Lamna aubaina ana viwavai Moses.†

*Moses ana rovona Egypt i ruba-tawanei.*

<sup>11</sup> ✧ Maranai Moses i vilaraga, ma i nae da ana rava oina ita raugenari, ma i ’nanai menanare mai Egypt ana rava i egari da i nolanolā ma i rau-iviapoapoelei, ma i ’nanai Egyptei Hebrowei i vunuvunui. <sup>12</sup> Moses i ’nana viravira ma eḡa aiāi ita inanai, anina ma Egyptei i viraḡeni ma au bubu i doboi. <sup>13</sup> Ma marana i tom Moses i naeme, da ana rava ruaḡa i viḡaiḡaiawa i ’nanai ma ḡaiawa tauvikareina i riwei, “Aiwai aubaina turam Hebrowei e raviravi?”

<sup>14</sup> Ma orotona i riwa, “Aiāi i terem da ma vibadelai bo ma rauetaralai? Tam ma viraḡeniu me Egyptei u viraḡeni nanare bo?” Kampa Moses i rovo ma i riwa, “Rava boiboḡi i aramanei tau aiwai a kauēi.” <sup>15</sup> ✧ Pharaoh wei riwana i nonori ma i ḡoei da menanare Moses ina viraḡenanei, wate Moses Egypt i ruba-tawanei ma i nae au Midian ma waira dogona au adana i kiala.

### 3

*Moses kampa mai Midian ai pirisi pulo tauapuna maiteni i mae, ma natuna Zippora i ravaḡi.*

*God Moses awarina i babani*

<sup>1</sup> Moses poiana Jethro ana sipu ma gote i ḡamoḡamoi - Jethro lamna mai Midian ai pirisi pulo tauapuna. Mara tagogi Moses ḡamoḡamo i naiei au mutulua au gia dewadewana ma au Sinai i ḡeta, God ana au ola. <sup>2</sup> ✧ Kampa BADA ana anela Moses awarina i eḡa, inanana me ai menamenana, ai rugurugui au orana da i ḡeḡae. Moses ai i lebalebara i ’nanai wate aina ruguruguna maiteni eḡa ita ararai. <sup>3</sup> Moses i vinua-notanota, “Wei lamna aiwai? Aiwai aubaina ai e lebalebara wate ai eḡa ita ararai? Ana nae au ḡereḡerena ma ana tuvirevirei.”

<sup>4</sup> Maranai BADA i ’nanai da Moses i nenei au ḡereḡere da ita tuvirevirei, God ai menamenana au orana Moses i ḡorei, “Moses! Moses!”

Ma i paribelei, “Ee, Tau weka.”

<sup>5</sup> BADA i riwa, “Eḡa ma neguratanai. Wei gabuna au tepana e maimairi lamna doa vivivireina, lamna aubaina am ae uma ma votawanei. <sup>6</sup> Tau amamam Abraham ma Isaac ma Jacob ai God.” Maranai Moses wei babanina i nonori i rovo kaua ma naona i teregovaḡi da avena God naona ita inanai.

<sup>7</sup> Anina ma BADA i riwa, “A inanai menanare mai Egypt natunatu e rarau-iviapoapoelei. Ma ai tou agu aubaina i ḡetai awariu da vibadabadai awarii ata vaitawanei. Menanare e vinua-apoapoelei a aramanei. <sup>8</sup> Lamna aubaina a ḡairai da natunatu Egypt awari ana vaitawanei ma ana opunei da dobu wapuna ḡaeḡaena ma doana maumaurana ina maeni. Kampa marina mai Canaan, mai Hitti, mai Amori, mai Perisi, mai Hivi ma mai Jebus e mamae. <sup>9</sup> Ai tou a nonori. A inanai menanare mai Egypt tau i rarau-iviapoapoelei. <sup>10</sup> Tau a paripari-tawanem, marina ma nae vibadabadana Pharaoh awarina da mai Israel au Egypt ma taravaina-opunei.”

<sup>11</sup> Wate Moses i riwa, “Tau aiāi da ata nae Pharaoh awarina ma mai Israel ata taravaina-opunei?”

✧ 2:10: Act 7:21 † 2:10: Moses Au Hebrew ponana ana nonora me sinaepai. ✧ 2:11: Act 7:23-28 ✧ 2:15: Act 7:29 ✧ 3:2: Act 7:30-34

<sup>12</sup> Ma God i paribelei, “Tau tam maiteni ana mae. Maranai ravai Egypte ma taravaina-opunei. Taumi wei au olana ona rauduneleu. Lamna ina vimataira da Tau a pari-tawanem.”

<sup>13</sup> Wate Moses i riwa, “Maranai ana nae au rava awarii ma ana riwei, ‘Amamata ai God i paritawaneu awarimi.’ Ma tau i na paridadaneu, ‘Tauna wavana aiai?’ Ma aiwai ana riwei?”

<sup>14</sup> God Moses i riwei, “TAU MAEMAE-NONOAU.\* Wei mai Israel ma riwei, Tauna wavana, TAU MAEMAE NONOAU. i paritawaneu awarimi. <sup>15</sup> Mai Israel ma riwei, ‘TAU BADA, amamami ai God, Abraham, Isaac ma Jacob ai God, tauna i paritawaneu awarimi.’

—Wei Tau wavau Maemae-Nonoana, kimta anatapui wenanare wavau ina ḡorei.”

*Wei au murina Moses i naeme poiana ana au dobu, ma i nae au Egypt. Ma kua anatapui i tuputupua tuana Aaron ma Israel babadai i riwei. Ma Moses ma Aaron i nae Pharaoh awarina ma i riwei, “BADA i paritawaneiai awarim da ata riwem da natunatuna mai Israel ma vianinei da ina opu au mutulua da pulo ina apui tauna awarina.”*

*Egypt gulauna i riwa, “Tau eḡa ana vianinei da nanare ina kauēi. Taui eḡa aiwai ḡelauna ina kauēi ma ina nola.”*

*Ma God kua maḡamaḡauna aniba ma vi'nirovorovi i kaukauei mai Egypt awarii, wate Egypt ai gulau amapo da i viviḡa. Waira i vitara wate amapo da Egypt ai gulau kolana i vobagibagi. Mai Egypt ai ḡamoḡamo i vi'rairagelana ma mai Egypt tupuai paramaitua i oai, Wate amapo da mai Egypt ai gulau eḡa mai Israel ita voterei da ita nae.*

## 11

*Moses, natuevou au Egypt ai iraḡe i vinolenolei*

<sup>1</sup> Ma BADA Moses i riwei, “Anivinuabola tagogi ava ana neiai Pharaoh ma Egypt awarii. Ma au murina tauna ina voteremi da ona nae ma lamna maranaina ina viaḡaḡana-opunemi. <sup>2</sup> Ma nae ma mai Israel ma riwei, ‘Anatapumi ona nae ma mae-turami Egypte ona vibaḡai da ai via goldei ma silvei ina veremi.” <sup>3</sup> BADA i kauēi da mai Egypt mai Israel i vivirei. Pharaoh ana gabemani babadai ma rava anatapui au Egypt Moses i vivirana-kauēi.

<sup>4</sup> Ma Moses i nae ma Pharaoh i riwei, “BADA e ririwa, ‘Nubautuva nanare tau Egypt anatapuna ana babarani. <sup>5</sup> Natuevou nelarai au Egypt anatapui ina iraḡe, Pharaoh natuevouna orotona, amana ana epaepaia, awarina ina vikarei, ma ina ḡaira da taunola awarina ina ḡeta, waivineviti taugudaina natunatui maiteni. Ḡamoḡamo natuevou anatapui ina iraḡe. <sup>6</sup> Ma dobu Egypt au anatapuna tou ḡaeḡaena ina ḡae, rorova eḡa nanare ma eḡa melanai nanare ina tupua me.’ <sup>7</sup> Wate eḡa aiwai apoapoenā mai Israel awari ina tupua, eḡa auou tagogi, rava tagogi, bo ḡamoḡamo ina gwauei. Ma kampa ona aramanei da TAU BADA, mai Israel ma mai Egypt awariei a vivilamonei. <sup>8</sup> Am gabemani babadai anatapui ina ḡairai awariu ma au naou ina mae-ḡaira ma ina raudune ma ina riwa, ‘Laḡilaḡina ma ruba-nae am rava tauvotaḡotaḡoim anatapui maiteni.’ Lamna au murina tau ana nae.” Moses meji orana i oai ma Pharaoh i netawanei.

<sup>9</sup> BADA Moses i riwei, “Pharaoh tam eḡa ina rautaniḡanem. Wenanare ina tupua da tau kua babai ana kauēi au Egypt.” <sup>10</sup> Moses ma Aaron kua ḡaeḡaei ma babai i kauēi Pharaoh au matana wate BADA Pharaoh orana i vibadoi da mai Israel eḡa ita paritawanei.

\* **3:14:** Pona Hebrewēi, *Tau maemae-nonoau* nonorana me *Yahweh*. Vipaniapani au Babilon i kwa ma mai Jew i nememei au murina, tau i vitumaḡana da wava *Yahweh* lamna vivivireina ma eḡa aiai ina latoni. Aubaina da ai au buka giruma ḡaeḡaei wei wavana i girumi da eḡa melanai ina latoni ma *Adonai* (bada) i latolatonī epaiana. Ma riwa BADA muomuonei i girumi lamna God wavana.

## 12

### *Raḡona karena*

<sup>1</sup> BADA, wenanare i babani Moses ma Aaron awarii au Egypt, <sup>2</sup> \**“Marina da e nenai wei nawaravina lamna nawaravi tagogi ma weka ona vikarei da ami madeḡa ona iavi.* <sup>3</sup> *Ona vinolanola mai Israel anatapui awarii, ‘Au pom <sup>vi-10-na</sup> wei au nawaravina oroto tagotagogi ava sipu ḡaubona bo *gote* ḡaubona ina rautani ana numa ravai aubai. Ḡamoḡamo tagogi numa tagogi aubaina.’* <sup>4</sup> *Mepa da numa tagogi ana rava i viruaḡa ma sia i rata guratana, lamna mae-turai maiteni sia ina ḡutai rava ai maḡa ma ai am ana au ruva nanare.* <sup>5</sup> *Ḡamoḡamo e rarautani lamna orotona ma ana madeḡa tagogi ma aiaina eḡa ana apoapoe aiwai.* <sup>6</sup> *Ona ḡamo-kauei da au pom <sup>vi-14-na</sup> wei au nawaravina. Ma maranai madeḡa e arearere, mai Israel anatapui ai ḡamoḡamo ina viraḡeni.* <sup>7</sup> *Metauna au numana sia e aniani kampa tara ina taraiḡui ma metaeta au tepana, au gabaurina ma au ririvana ina pasi-naiei.* <sup>8</sup> *Waguvaranaina tagogina tau siana ai moniana au tepana ina apui, ma palawa eḡa *yist* maiteni ma sipeni viviḡorai maiteni ina ani*

<sup>11</sup> *Anatapumi wenanare ona am, vaḡai vigara ona vigarei: Ami ae uma ona oteni, ami jiḡona au urami, Ma ona am laḡilaḡina. Wei lamna BADA ana Raḡona torelana.*

<sup>12</sup> *—Wei waguvaraina, Tau Egypt ana naeni ma ḡamoḡamo da rava natuevoui ororotoi anatapui ana viraḡeni, ma Egypt ai god anatapui ana tuvaidoedoei. Tau BADA.* <sup>13</sup> *Wate tara au metaeta ina vimataira da taumi kampa o mamae. Ma maranai wei matairana ana inana, ana raḡonimi. Ma eḡa aiwai apoapoena awarimi ina tupua maranai mai Egypt ana kovoḡi,* <sup>14</sup> *Wei torelana ona nota-nonoei madeḡana patapatana, da TAU BADA aiwai a kauei nuanuami eḡa melanai ina vuru. Ami epaepaia anatapui wei marana ina vivirei ai mara au anatapuna.”*

### *Palawa eḡa *yist* maiteni ana torela*

<sup>15</sup> *“Au pom 7 au orana Palawa eḡa *yist* maiteni ona ani. Ma torela au karena, au numa *yist* anatapui ona tawanei. Aiai da palawa *yist* maiteni i apui ma i ani, wei ravana anina da mai Israel ai damei ona viopuni.* <sup>16</sup> *Au pom tagogi torela au karena ona vitagogiemi ma nanare torela au damona, ma BADA ona voepaepai ma ona viborumei. Wei au marai eḡa aiai ina nola dadana, Wate ami lam ava ona lauvoa.*

<sup>17</sup> *—Taumi palawa eḡa *yist* maiteni torelana ona kauei da eḡa nuanuami ina vuru aubaina wei au marana, mai Israel au Egypt a taravaina-opunei. Am epaepaia wei torelana ina kaukauei madeḡana au patapatana.”*

### *Raḡona*

<sup>21</sup> *Ma Moses Israel dam nununai babadai i kwatuei ma i riwei, “Ona nae ma sipu bo *gote* natuna orotona ona vunui ma ami numa ravai maiteni Raḡona torelana ona ani.* <sup>22</sup> *Rugurugu ona turautuvi sipu au tarana au aboma ma ami numa metaetana au tepana ma au adana ona pasi. Ma eḡa aiai numa ina opu-tawanei da ubaubanai.* <sup>23</sup> *Ma waguvarai BADA Egypt anatapuna ina naeni ma mai Egypt ai natuevou ina viraḡeni. Wate maranai tara ina inana metaeta au tepana ma au adana, BADA wei numana ina raḡoni ma iraḡe-anelana ina viḡaei da eḡa ina rui da ina viraḡenimi.*

<sup>24-25</sup> *—Ma maranai BADA dobu i paripari-vainuaḡanimi ona ḡeta, taumi eḡa nuanuami ina vuru da madeḡana patapatana Raḡona torelana ona kaukauei. Taumi natunatumi maiteni wei tarawatuna ona vojijina-nonoei.* <sup>26</sup> *Maranai natunatumi ina paridadana, ‘Wei torelana anona aiwai?’* <sup>27</sup> *Ma taumi ona paribelei, ‘Wei torelana lamna Raḡona vieḡualau pulona BADA awarina, aubaina wariḡa au Egypt BADA mai Israel ai numa i raḡoni, ma*

\* **12:2:** Ai madeḡa iavana (Calenda) weka i vikarei

mai Egypt ai natuevou i pupuni, ma tauai natunatuia i voterei.” Ma mai Israel i mae-ġaira au doa ma BADA i raudunelei. <sup>28</sup> Ma mai Israel i nae ma BADA aiwai Moses ma Aaron i riweia i kauēi.

### *Natuevou nelarai i 'raġe*

<sup>29</sup> Waguvarai nubautuva BADA natuevou nelarai anapui i viraġeni au Egypt. Pharaoh natuna, ana epaia awarina i vikarei, ma i ġaira da panipani ai natuevou nelarai awari. Ma ġamoġamo ororotoi natuevou anapui maiteni i pupuni. <sup>30</sup> Waguvara au pouna Pharaoh ma ana gabemani babada ma mai Egypt anapui i vomairi. Numa tagotagogi ava au Egypt tevera tagogi i 'raġe, ma tou ma tarakwatu ġaeġaena i ġae. <sup>31</sup> Pharaoh wei waguvaraina Moses ma Aaron ai riwa i paritawane da i nei awarina ma i egari, “Ami rava mai Israel maiteni ona vomairi ma au dobu ona oputawane! O vivibaġei nanare ona nae ma ami BADA ona voepapai! <sup>32</sup> Taumi ami ġamoġamo anapui ona vaia ma ona opu, ona nae, wate ami God ona vibaġai da ina viaiainiu.”

<sup>33</sup> Mai Egypt anapui mai Israel i egari da ina vipaparana ma Egypt ina opu-tawane ma i riwa, “Mepa da eġa ona nae tauai anapui ana iraġe.”

<sup>37</sup> Mai Israel dobu Rameses i netawane ma i babara-nae au Sukoth. Nelara anapui 600,000 nanare, waivine ma roaroa eġa ita iavi. <sup>38</sup> Patara ġaeġaena ġelauna i vomairi mai Israel maiteni. Taui ġamoġamo boruna ġaeġaena maiteni i nae. <sup>39</sup> Maranai mai Egypt i viaġaġana-opune taui eġa ai tamaina ita vokaukauei ma laġilaġina i opu, taui palawa pasipasi nonoana eġa yist maiteni i vaia ma palawa bagibagina i apui.

<sup>40</sup> ✧ Mai Israel madeġa 430 i mae au Egypt.

### *Raġona torelana ana tarawatu*

<sup>43</sup> Ma BADA Moses ma Aaron i riwei,

Raġona torelana ana tarawatu wenanare:

Dobu ġela wei torelana eġa ina ani.

<sup>44</sup> Ami taunola gimagimarana ma inibori i vaia wei torelana ina ani.

<sup>45</sup> Taomana ma taunola maia aubaina e nolnola taui eġa ina ani.

<sup>46</sup> Raġona sipuna numa tagogiava au orana ona ani, ma eġa sia aiwaina ona opune au doa ma gelamina eġa ona gai.

<sup>47</sup> Mai Israel anapui Raġona torelana ina ani.

## 13

### *Natuevou vovivirana*

<sup>1</sup> BADA Moses i riwei, <sup>2</sup> “Natuevou nelarai au Israel anapui ona vovivirei Tau awariu. Roaroa ma ġamoġamo natuevou ororotoi au Israel anapui, Tau ġariuei.”

*Moses mai Israel i riwei,* <sup>11</sup> “BADA ina ruiemi mai Canaan ai au dobu ma dobuna ina veremi, noinoimi i paripari-vainuaġani nanare. <sup>12</sup> Natuevoumi nelarai ma ami ġamoġamo natuevou ororotoi anapui BADA ona verei, <sup>13</sup> Wate sipu orotona BADA ona verei ma awarina *donki* natuevou ona gimara-melei, ma mepa da eġa ona gimara-melei, lamna *donkina* uana ona gomui. Taumi natunatumi nelarai natuevou ona gimara-melei.

<sup>14</sup> —Ma mara au murina, natunatumi ina vitara-viravira, ‘Aiwai aubaina wei ta kaukauei?’ Tam ma paribelei, ‘BADA urana vivirewapanane i taravaina-opunelai, panipani numane au Egypt. <sup>15</sup> Pharaoh orana i bagibagi ma eġa mai Israel ita voterei da

ita nae. Lamna aubaina BADA natuevou anapui au Egypt i viraḡeni, rava ma ḡamoḡamo anapui. Lamna aubaina tau ḡamoḡamo natuevouna BADA a vereveri ma natuevou orotona a gimagimara-melei.' <sup>16</sup> Wei gimara melanana lamna me mataira au uram ma au muruam e oteoteni ma wei e vivimataira da BADA urana vivirewapananei Egypte i taravaina-opunelai."

<sup>20</sup> Mai Israel Sukoth i voterei ma mutulua au giana au Etham i mae-gubai. <sup>21</sup> Ma marai BADA i vinoa me apau maimairina ma waguvarai BADA i vinoa me tuatua araratana maimairina ma lalalainei tau i rau-etaraveni. Ma lamnei, tau marai ma waguvarai i bababara.

## 14

### *Pharaoh mai Israel i viaḡaḡana-opunei*

<sup>5</sup> Maranai riwa i ḡeta Pharaoh awarina, da mai Israel i ruba. Pharaoh ana gabegabe-manī maiteni ai nota i virai ma i riwa, "Tauta aiwai ta kauēi? Ma ata taunola ta voterei da i nepai!" <sup>6</sup> Anina ma Pharaoh ana chariot i vokaukauēi, ma ana sorodia i vaia ma i nae. <sup>7</sup> Ana sorodia anapui 600 vinevinei ai au chariot i geru, ma chariot ḡelau i Egypt maiteni i nae. <sup>8</sup> BADA, i kauēi da Pharaoh, Egypt ai gulau nuanuana i vopotai ma mai Israel i viaḡaḡana-taḡoei, Mai Israel ana tepatorai i nenaē. <sup>9</sup> Mai Egypt ana sorodia i viaḡaḡa, Pharaoh ana horse ma chariot anapui ma horse babada i ma ana sorodia anapui, maiteni i viaḡaḡa da au gera i mamaelana, i votani dobu Pi-Hahiroth, Baal-Sephon au baba ḡelauna.

<sup>10</sup> Maranai Pharaoh i tuturiai, mai Israel i taepai da i 'nanai ma i rovo kaukaua da orai i sisi, ma BADA awarina i garara agu aubaina. <sup>11</sup> Ma mai Israel Moses awarina amloi i ḡaiḡai i pa, "Au Egypt eḡa kokoaga da u taravaina-opunelai da weka au mutulua ana iraḡe bo? Aiwai u kauēi awariai? <sup>12</sup> Tauai au Egypt a riwem, 'Ma voterelai ma ana mae ma Egypt ai taunola!' I ai kaua da tauai ata mae Egypt ai panipani, ma eḡa au mutulua ata iraḡe."

<sup>13</sup> Moses ana rava i paribelei, "Eḡa ona rovo! Ona mairi jijina ma ona inana menanarena BADA ina vilawanimi amadodo. Mai Egypt amadodo o inainanai eḡa melanai ona inana-melei. <sup>14</sup> BADA aubaimi ina viḡavia. Taumi ona mae-genuatau."

### *Israel boga au pouna i babara damana*

<sup>15</sup> Ma BADA, Moses i riwei, "Aiwai aubaina awariu agu e toutouēi? Mai Israel ma riwei da ina vidagu. <sup>16</sup> Am jiḡona ma voepai da ma viloloi boga au tepana ma boga ina vilamonei, ma mai Israel boga au pouna doa au alalana ina babara damana. <sup>17</sup> Tam ma raubiga, Tau mai Egypt a vitepatorai da mai Israel ina viaḡaḡe. Maranai Pharaoh ana vovaiubai, ana sorodia, chariot ma ana horse sorodiai, rava Tau ina voepaepaiu. <sup>18</sup> Tau Pharaoh ana vovaiubai, ana chariot ma ana horse sorodiai da mai Egypt ina vivivireu ma ina aramanei da TAU BADA."

<sup>19</sup> Anina ma God ana anela, mai Israel ai eta tauravenia i nae ma mai Israel au muri i mairi. Ma apau maimairina au naoi i nei ma tau i muri i mairi. <sup>20</sup> Apau mai Israel ma mai Egypt au poui i mairi, ma maranai au i pom, apau lalalaina mai Israel i verei ma mai Egypt au waguwaguvareina i mae. Ma lamna aubaina mai Israel ma mai Egypt ai au gabu i mae-genuatau.

<sup>21</sup> Moses ana jiḡona i viloloi boga au tepana ma BADA kariwabu ḡaeḡaena i paritawanei, ma boga i vilamonei, kariwabu i ruba da mara i tom da doa boga au pouna i alala. <sup>22</sup> Ma mai Israel boga i damani doa au alalana, Ma boga olana i mairi au oiei ma au kelakelau.

<sup>23</sup> Anina ma mai Egypt, Pharaoh ana horse ḡelau, chariot ma taurubeina mai Israel i votaḡoi da au boga i rui, mai Israel au murii. <sup>24</sup> Ubaubanai boiboḡi BADA apau maimairina ma ai tuatwana araratana au orana ma i 'nana ḡaira ma mai Egypt i viaiḡoaḡoi. <sup>25</sup> Ma chariot ana aniruba i viapoapoeni da ruba i kauana-avei. Ma mai Egypt i riwa, "BADA mai Israel e vovoagui, ma e viviviḡavieta, lamna aubaina tana ruba-tawanei!"

<sup>26</sup> Ma BADA Moses i riwei, "Am jiḡona ma viloloi boga au tepana da boga ina nememei, mai Egypt au chariot ma sorodia horse au tepana anatapui ina puru-pai." <sup>27</sup> Madeḡa i ḡoḡoḡo ma Moses urana i viloloi boga au tepana, ma laḡilaḡina boga i naeme ana au gabu. Mai Egypt ita ruba wate BADA tau i viorereni. <sup>28</sup> Boga i naeme ana au gabu ma mai Egypt sorodia anatapuina i ruirui au boga i monu. Eḡa aiai tagogi ita lawana.

<sup>31</sup> Maranai mai Israel i 'nanai da BADA wei kauana vivirewapanana i kauai mai Egypt awarii, tau BADA i vivirana-kauai ma i vitumaḡanei ana taunola Moses maiteni.

## 15

### *Moses ana wela*

<sup>1</sup> Anina ma Moses mai Israel maiteni wei voepaepa welana i ravi BADA awarina: Tau ana wela BADA awarina ma ana voepaepai, aubaina ana ḡavia i vipupui, ma horse ma chariot taugeruii au boga i viorerena-naiei,

<sup>2</sup> BADA au rewapana ḡaeḡaena, ma welei ana voepaepai;

Tauna i vilawaniu Tauna au God ma ana voepaepai, Amamau ai God ma lamna aubaina ana vimae-ḡaeḡaeni ma ana voepaepai.

<sup>3</sup> Tauna wavana BADA. Tauna ḡavia ravana.

<sup>4</sup> Pharaoh ana chariot ma ana sorodia au boga i viorereni; Ana sorodia vinevinei au Boga Lebalebarina i monui.

<sup>5</sup> Gabinou i wanaiwaḡi da tau i purui; ma i monu boga au gabaurina me ḡaima.

<sup>6</sup> Oo BADA ura-oiem vivirewapanana kaukauana, ura-oiem am ḡavia e viviaimutumutui.

<sup>7</sup> Tam ḡeḡetelaram ma tau i viḡaviem u vovaiubai.

Am meji araratana u paritawanei da tau i aragibui me ai ragorago.

<sup>8</sup> Boga au tepana u uvena ma boga olana i mairi, i mairi genuatau me biribiri, ma gabinou i alala.

<sup>9</sup> Am ḡavia i riwa, "Ana viaḡaḡei, ana vojijini, ai purapura ma ai maura anatapui ana ḡutai, ma aiwai a ḡoḡoḡoi ana vaia, Au sod ana lavui ma ana vipupui."

<sup>10</sup> Wate lavutumei u uvena, ma gabinou tau i purui; i monu me ḡaima rabama au ḡaeḡaena.

<sup>11</sup> BADA, mepa god ḡelau me tam bo eḡa? Eḡateni! Tam anina vivivirem, am rewapana i rata dewadewa da tauai a rovorovoem,

Tam kaua babai ma viREWAPANAI taukaueina.

<sup>12</sup> Tam uraoiem u viloloi,  
ma doa am ġavia i lawani.

<sup>13</sup> Am rava u vaimelai ma u rauetaraveni am nuavaina patupatutunei,  
Ma am rewapanei u taravaina-naiei am au animae vivivireina.

<sup>14</sup> Dobu ġelau wei riwana i nonori ma orai i sisi kaua.  
Mai Philistia orai rovo ina vioai.

<sup>15</sup> Edom gulagulau ina rovo kaukaua,  
Moab nelara rewapana ini ina sisi.  
Canaan maemaei anapui inii i wanagwadai.

<sup>16</sup> Rovo ġaeġaena anapui orai i oai,  
uram ana rewapanei tau i mairi kwakwa me kokoitau,  
ma am rava ina verautua BADA,  
da ravai u vaivai-melei ina verautua.

<sup>17</sup> BADA ma taravaina da am au ola ina raunuma,  
Gabu u vinevineiana,  
tam uramei voavoaina.

<sup>18</sup> BADA ina vibada nonoa.

<sup>19</sup> Mai Israel doa au alalana i babara damana. Wate maranai mai Egypt ai horse ma ai chariot taugerui i rui au boga, BADA waira i neiana-meleiai da anapui i purui *Lamna aubaina Moses ana rava maiteni wei welana i ravi.*

### *Miriam ana wela*

<sup>20</sup> Peroveta Miriam, Aaron novuna tambourine i vaia ma waivine anapui, tauna i votaġotaġoi ma tambourine i vikalokaloei ma i ara. <sup>21</sup> Miriam wei welana i ravi, “Tana raua BADA awarina, aubaina tauna ġavia i vilamolamonei ma horse ma chariot taugerui au boga i viorereni.”

### *Waira viviġorana i aii*

<sup>22</sup> Anina ma Moses mai Israel i taravaini da Boga lebalebarina i netawanei ma i nae au Shur mutuluana. Aupom tonuġa au mutulua i babara wate waira eġa ita nelaġai. <sup>23</sup> Maranai au waira vuvura Marah i ġeta da ita uma wate wairana umana i viġora da eġa ita uma, lamna aubaina wei dobu wavana Marah. \* <sup>24</sup> Ma rava Moses awarina i pariġai i pa, “Aiwai tana umai?”

<sup>25</sup> Anina ma Moses i paritou BADA awarina agu aubaina, ma BADA ai tupona i viatataiei. Ma wei aina i tawanei au waira ma waira i viaini aniuma aubaina.

Nai au gabuna BADA ana tarawatu rava i verei ai lawana aubaina, ma ai votelatela i raudadani. <sup>26</sup> BADA i riwa, “Mepa da riwau ona nonora-kauei ma kaua aiaii ona kauei au matau ma riwau anapuna ona voteletelei, da kovoġa mai Egypt a vereverei, eġa ana veremi. Tau BADA tauvilawanimi.”

<sup>27</sup> Muri ai tau i nei au Elim kampa vuvura 12 ma mutulua ai me pa 70 i maimairi ma kampa waira au adana i mae mara aburuna.

## 16

### *God Israel lam i verei*

<sup>1</sup> Anina ma mai Israel Elim i netawanei ma i nae au mutulua wavana Sin, wei dobuna lamna Elim ma Sinai au poui. Egypt i opu-tawanei nawaravi tagogi ma wiki ruaġa i kwa ma wei au dobuna i ġeta. \* <sup>2</sup> Mai Israel Moses ma Aaron awarii i ġaiġaiawa. <sup>3</sup> Ma i riwei,

\* **15:23:** Au Hebrew pona Mara nonorana me viġora.

\* **16:1:** Mai Israel au pom 15 nawaravi tagogi (madeġa weka iavana i vikarei) ma Egypt i opu-tawanei.

“BADA boiboḡi au Egypt ita viraḡeniai! Kampa sia nauui a kiala kwaviviroi ma ai ḡoanei a amam, wate taumi o taravaina-opunelai au mutulua da am-iraḡe ana iraḡelei.”

<sup>4</sup> Anina ma BADA Moses i riwei, “Lam marei ana paritawana-ḡaireiai me garewa. Au pom patapatana rava ina opu ma lam au pom tagogi ruvana ava ina vaia. Wei taunei rava ana raudadani da riwau bagibagina ina voteletelei bo eḡa.” <sup>5</sup> Au pom <sup>vi-6-na</sup> au pom ruaḡa ruvana ina tami da ina vokaukauei.

<sup>11</sup> BADA Moses i riwei, <sup>12</sup> “Mai Israel ai ḡaiawa a nonori. Ma riwei, ‘Raviraviai taumi sia ona ani, ma ubaubanai lam ona maurei.’ Ma lamna maranai ona aramanei da Tau BADA ami God.”

<sup>13</sup> Raviraviai kiu iviki boruna i nei da tau i maemae lana gabuna i vioai. Ma ubaubanai ḡelauna doa anatapuna turuvani i vioai. <sup>14</sup> Maranai turuvani i paira ma purapura avavai me palawa nanare doa au tepana i mae. <sup>15</sup> Maranai mai Israel wei purapurai i ’nanai ma i vinuanaina ma i vitara-viravira vivira i pa, “Wei aiwai?”

Ma Moses rava i riwei, “Wei aniam BADA i veremi.” <sup>16</sup> BADA riwana bagibagina lamna wei, “Rava tagogi lam ana au ruva ina tuarui. Nau muomuoi ruaḡa† ruvana ona tuarui, rava tagogi au numa aubaina.”

<sup>17</sup> Aiwai i ririweia nanare mai Israel i kauei, ḡelau ruva ḡaeḡaena i tami ma ḡelau ruva aburuna i vaia. <sup>18</sup> Wate maranai i ruvai ma i ’nanai da rava anatapui ruva i vaia da tago-tagogina, Tau i ruva ḡaeḡaena i tami eḡa aiwai ita mae-terei ma tau i aburuna i tami ma i nelaḡai da lamna tagotagogina tau aubaii. Numa nununai ravai lam ruvaruvana i vaia.

<sup>19</sup> Anina ma Moses i riwa, “Eḡa aiai lam ina tereriei da au maratam aubaina.”

<sup>20</sup> Wate rava ḡelau Moses eḡa ita rautaniḡanei ma lam ḡelau i tereriei ma ubaubanai motamota lam i oai ma i bova, ma Moses amlona i ḡaiḡai tau awarii.

<sup>21</sup> Ubaubanai patapatana tau lam ai au ruva i tuarui, ma maranai madeḡa i vibola ma lam i viwaira da i amoa. <sup>22</sup> Ma au pom <sup>vi-6-na</sup> tau au pom ruaḡa ruvana nanare i tuarui, ma melagai babadai i nei da Moses i parivere. <sup>23</sup> ✧Moses tau i riwei, “BADA riwa bagibaginei wenanare i riwa, ‘Maratam lauvitau vivireina Sabate ana mara, Tau aubaiu. Aiwai apuna o ḡoeḡoeia amadodo ona apui ma aiwai vitavana o ḡoeḡoei amadodo ona vitavi. Ma aiwai i mae-terei, ona tereriei au maratam aubaina.”

<sup>24</sup> Ma tau lam i tereriei ma eḡa ita bova ma ita motamota me Moses i ririwa nanare, <sup>25</sup> Moses i riwa, “Wei lamna amadodo ona ani, aubaina amadodo Sabate, lauvitau ana mara vivivireina i terei BADA aubaina. Ma amadodo amapo lam au doa eḡa ona nelaḡai.”

<sup>26</sup> Au pom 6 lam ona tuarui, wate au pom <sup>vi-7-na</sup> Sabate, amapo lam eḡa ona nelaḡai.”

<sup>27</sup> Ma au pom <sup>vi-7-na</sup> rava ḡelau i opu da lam ita tuarui wate eḡa aiwai ita nelaḡai.

<sup>28</sup> Anina ma BADA, Moses i riwei da rava i riwei i pa, “Mara biaḡa au tarawatu ma au viararamana ona rau-aḡaiḡaiei? <sup>29</sup> Ona notai da Tau BADA, Sabate a veremi, ma au pom <sup>vi-6-na</sup> lam a veremi da au pom ruaḡa aubaina. Ma rava anatapui au numa ita mae ma avena ita opu.” <sup>30</sup> Ma au pom <sup>vi-7-na</sup> rava i vilauvitau. <sup>31</sup> Rava mai Israel wei lamna i ḡorei “*manna*.”

<sup>35</sup> ✧Ma mai Israel manna i amam da madeḡa 40 i kwa. Tau manna i amam da Canaan ana au parata i ḡeta.

## 17

### *Waira kirei i opu*

† 16:16: Hebrew ai ponei 1omer ana ruva lamna 2 Ltr ruaḡa wei lamna ruva tagogi ana ruva. ✧ 16:23: Exo 20:8-11 ✧ 16:35: Jos 5:12



<sup>1</sup> ✠ Mai Israel mutulua Sin i netawanei, ma mepa BADA i ririweia nanare kampa i mae-nae. Tau i au Rephidim i rauḡaravu, wate kampa eḡa waira da rava ita uma. <sup>2</sup> Anina ma tau i Moses maiteni i viparipariniḡai i pa, “Waira ma verelai da ana uma!”

Ma Moses i paribelei, “Aiwai aubaina o paripariniḡai? Aiwai aubaina BADA o raraudadani?”

<sup>3</sup> Wate rava nuanuai i arelana-kauei waira aubaina ma Moses i eni i pa, “Aiwai aubaina Egypte i tere-opunelai da natunatuia ma ai ḡamoḡamo maiteni nuarelana ana iragelei?”

<sup>4</sup> Ma Moses i paritoutou BADA awarina i pa, “Aiwai ana kauei wei ravai awarii? Tau i ḡaimai marina ina viraḡeniu.”

<sup>5</sup> BADA Moses i paribelei, “Israel babadai ḡelau ma taravaini ma kwapu taunei Nile u raviravia ma vaia ma ma vinoa. <sup>6</sup> Tau kampa au naom au kira ana maimairi au Horeb. Kira ma ravi da waira ina opu da rava ina uma.” Ma Moses nanare i kauei Israel babadai au matai. <sup>7</sup> Moses wei dobuna i ḡorei Massah \* ma Meribah, † aubaina weka mai Israel Moses maiteni i viparipariniḡai ma BADA i raudadani maranai i riwa, “BADA weka tauta maiteni bo eḡa?”

### *Mai Israel ma mai Amalek i viḡaiḡaiawa*

<sup>8</sup> Mai Amalek i nei ma Mai Israel maiteni i viḡaiḡaiawa au Rephidim. <sup>9</sup> Moses Joshua i riwei, “Rava ma vinei da ona nae mai Amalek maiteni ina viḡaiḡaiawa. Au maratom tau ola au tepana ana mairi ma God ana kwapu ana vovojijini.”

<sup>10</sup> Ma Joshua mai Amalek maiteni i viḡaiḡaiawa me Moses i ririweia nanare. Moses, Aaron ma Hur i ḡae ola au tepana. <sup>11</sup> Maranai Moses urana ana kwapuna i voepai mai Israel i vivirewapana wate maranai urana i teretere-ḡairei mai Amalek i vivirewapana. <sup>12</sup> Moses urana i garigari ma Aaron ma Hur ḡaima i neiai da i terei ma au tepana Moses i kiala. Aaron ma Hur, Moses au ririvana i mae, tagogi au navanavana ma ḡelauna au navanavana ḡelauna ma urana i voepai ma i vojijini da madeḡa i neulai. <sup>13</sup> Ma Joshua ana sorodia maiteni Amalek ai sorodia sodiei i vovaiubai.

## 18

### *Jethro poiana Moses i raugenari*

<sup>1</sup> Moses poiana Jethro, mai Midian ai pirisi pulo tauapuna i nonori aiwai anatapuna BADA i kaukaueia Moses ma mai Israel awarii; ma menanare Egypte i taravaina-opunei.

<sup>5</sup> Moses poiana - Jethro, Moses awana ma natunatuna nelarai ruaḡa i nei da Moses ita raugenari au mutulua. Weka Moses ana rava maiteni i rauḡaravu God ana ola au ḡereḡerena. <sup>6</sup> Jethro riwa i paritawanei Moses awarina da tau i nenei. <sup>7</sup> Ma Moses i opu da poiana ita nebelei. Tauna i mae-ḡaira ma poiana i raudunelei ma i vigia-laḡolaḡonei. Tau i vieḡalau vivira ma i rui Moses ana au numagara. <sup>8</sup> Ma BADA aiwai i kaukaueia Pharaoh ma mai Egypt awari mai Israel aubai; ma apoapoe anatapui au eta i nebelei; ma menanare God tau i vilawani; anatapui poiana i pariveri. <sup>9</sup> Ma Jethro nuanuana i ai kua maranai i nonori menanare BADA aiwai anatapuna aiaii i kauei mai Israel aubai maranai Egypt urai vivirewapanana awariei i tere-opunei.

<sup>10</sup> Jethro i riwa i pa, “Voepaepa BADA awarina. Tauna Pharaoh ma mai Egypt awarii i vai-tawanemi. Ee, Egypt urai vivirewapanana awariei i vai-tawanemi. <sup>11</sup> Marina a aramanei da BADA i ḡetelara eḡa me god ḡelau nanare. Aubaina BADA ḡoḡogulagulai mai Egypt ai kua apoapoe mai Israel awarii aubaina i kovoḡi.”

✠ 17:1: Num 20:2-13 \* 17:7: Hebrew ponanei, Massah anona raudadana † 17:7: Pona Hebrew, Meribah anona viparipariniḡai

*Jethro Moses i vinua-terenei*

<sup>13</sup> Ma marana i tom, Moses ana au anikiala i kiala da ita rauetara. Ma rava Moses i mairi-kwaviviroi ma i vipaipai ubaubanai da madeğa i ġaira. <sup>14</sup> Maranai Jethro i 'nanai aiwai anatapuna Moses i kaukauei rava aubaii. Tauna i vitara-viravira i pa, "Wei aiwai rava awarii e kaukauei? Aiwai aubaina ainelam wei e kaukauei, ma wei ravai e maimairi pompom da am riwa ita nonori?"

<sup>15</sup> Moses i paribelei i pa, "Tau wei a kaukauei aubaina rava e nenei awariu da ita aramane aiwai God e ġoeġoei da ita kaui. <sup>16</sup> Maranai rava ruağa e viviamparipari. Tau i nenei awariu da a teretere-vaijijimani; ma God ana riwa ma ana tarawatu a ririwei."

<sup>17</sup> Moses poiana i riwa i pa, "Aiwai tam e kaukauei lamna eğa ita ai. <sup>18</sup> Nola e kaukaueia i vitai kaua da tam ainelam eğa tagotagogina uta kaui. Tam ma rava ona voirairaġe. <sup>19</sup> Ma rautaniġana ma ana vinuaterenem; ma God awarim ina mae. Tam anina da rava ma raviepaiai God au naona ma ai viamparipari ma neiai awarina. <sup>20</sup> God ana parivai-araramana ma ana tarawatu ma viararamani ma tau i viatataiei da menanare ita maenei ma aiwai ita kaui. <sup>21</sup> Wate am patara awariei nelara ġelau araramanii ma God e viviborumei ma eğa amkwalakwalai ma vinei da rava ina vibadei: ġelau rava 1,000 ina vibadei; ma ġelau rava 100; ma ġelau rava 50; ma ġelau rava 10 ina vibadei. <sup>22</sup> Tau i rava ai viamparipari ina tere-vaijijimani. Wate aiwai da i piripiri, ina neiai awarim. Tau i ina voaguim da am vita ina avarai ma ina votelatelai. <sup>23</sup> Mepa da God i ririweia ma kaui amapo eğa ma voirairaġe ma rava anatapui ana nuaiaii ina nae ai au numa."

<sup>24</sup> Moses, poiana i rautaniġane i aiwai anatapuna i ririweia i kaui <sup>25</sup> Ma Moses mai Israel araramani i vinei da rava 1,000 i vibadei, ma 100, ma 50 ma 10 i vibadei. <sup>26</sup> Wei babadai, rava ai viamparipari i teretere-vaijijimani ma aiwai da i piripiri i neneiai Moses awarina. Ma kaua telatelai i teretere-vaijijimani.

<sup>27</sup> Anina ma Moses, poiana Jethro i vieġalau, ma Jethro i naeme ana au dobu.

**19***BADA i vieġana-melei au ola Sinai*

<sup>2</sup> Mai Israel Rephidim i netawane i nae au mutulua wavana Sinai. Ma kampa ola au karena i rauġaravu.

<sup>3</sup> Ma Moses i ġae au ola da God ita nebelei. Ma BADA ola au tepana ma Moses i ġorei i pa, "Wei mai Israel Jacob noinoina ma riwei.

<sup>4</sup> —Taumi matamiei o inana aiwai mai Egypt awarii a kaui ma me manubada natu-natuna au papena e avavarai nanare a avaraimi ma a neiana-melemi awariu. <sup>5</sup> ✧ Mepa da ona voteleteleu ma au parivainuaġana bagibagina ona vojijina-kau, lamna dam anatapui au dobu awariei taumi ana vinemi nuuanu pouna. Avena da dobu anatapuna Tau ġariuei. <sup>6</sup> Wate taumi aubaiu ona vipirisi, ma ami dam ona vovivirei tau ainelau aubaiu, wei babani mai Israel ma riwei."

<sup>7</sup> Ma Moses i ġaira me ma dogadogara i kwatuei ma aiwai anatapuna BADA i ririwei i parivere. <sup>8</sup> Ma rava anatapui i paribelana gogona i pa, "Tauai aiwai anatapuna BADA i ririwei ana kaui." Ma Moses ai paribelana i ġaiana-melei BADA awarina.

<sup>9</sup> BADA, Moses i riwei, "Tau apau potopotona au orana ana nei, da rava ina nonoriu Awarim ana babani da ina vitumaġana-nonoem." Anina ma aiwai rava i ririwei Moses BADA i riwei.

<sup>10</sup> Ma BADA Moses i riwei, "Ma ġaira ma rava ma voagui amadodo ma au maratoma da orai ina oġai da tau ina viborumeu. Ma ai gara ina oġai. <sup>11</sup> Ma ina vokaukaia au pom vitonuina aubaina. Nai maranaina Tau ana ġairai au Ola Sinai, rava anatapui au matai. <sup>12</sup> Parata ma tere-kwaviviroi au ola. Ma riwa bagibaginei ma riwei ma pa, 'Ona inana-kaua

da eġa au ola ona ġae bo ola ona tapedadani. Aiai da ola i tapedadani ina irage.' <sup>13</sup> Mepa da rava bo ġamoġamo wei paratana i voraġoni, taumi eġa nai ravana bo ġamoġamona ona vodadani wate ġaime i bo aierei ona viraġeni. Wate maranai taure ponana i rarata lamna rava ina ġae au ola."

<sup>14</sup> Ma Moses olei i ġaira memei ma ana rava i riwei da orai i vokaukauei da God ina viborumei ma ai gara i oġai. <sup>15</sup> Ma i riwei, "Ona vokaukauei mara vitonuina aubaina, marina da nai marana eġa ona viawawana."

<sup>16</sup> Ubaubanai au pom vitonuina, waiparara, namanamara ma apau potopotona ola i purui, ma taure i tou. Maratagogi rava anatapai kampa i mamae i rovo kaukauei ma i sisi. <sup>17</sup> Ma Moses rava i ravana-opunei da God ita nebelei. Taui ola au karena i mairi. <sup>18</sup> BADA ai araratanei i ġairai ola Sinai au tepana. Ma bau potopotona olana i puru-pai. Bau kampa i ġeġae me modu potopotona e ararai nanare, ma olana anatapuna i vigugui. <sup>19</sup> Ma taure ponana i rarata. Ma Moses i babani ma God i paribelei ponana nonorana me waiparara. <sup>20</sup> BADA i ġairai ola Sinai au tepana ma Moses i kwatuei da ita ġei ola au tepana. Ma Moses i ġae.

## 20

### *God ana tarawatu 10*

<sup>1</sup> Ma God i babani ma wei riwai i latoni,

<sup>2</sup> TAU BADA ami God, panipaniei au Egypt a taravaina-opunemi.

<sup>3</sup> Taumi eġa god ġelau i ona raudunelei, Tau ainelau ona rauduneleu.

<sup>4</sup> Taumi eġa aiwai au mara bo au dobu bo boga au orana dobu au gabaurina kokoitai ona kau i da ona raudunelei. <sup>5</sup> ✧ Taumi eġa kokoitai ona raudunelei bo ona viborumei, aubaina TAU BADA ami God ununurana. Ma taui i gedugeduaieu ana kovoġi da kimta au <sup>vi-4-na</sup>. <sup>6</sup> Wate taui aiavoi nuanuau e vaivaini ma au tarawatu e vovojijini au nuavaina maemae-nonoana ana verei da kimta tausan nanare.

<sup>7</sup> Taumi eġa BADA ami God wavana ona vinamei. Aiai da BADA wavana e vivinamei ina kovoġi.

<sup>8</sup> ✧ Sabate eġa nuanuami ina vuru ma ona notanotai ma ona vovivirei tau awariu.

<sup>9</sup> Aupom 6 ami nola ona kau i. <sup>10</sup> Wate au pom <sup>vi-7-na</sup> lamna Sabate, lauvitau marana, i vovivirei BADA ami God aubaina. Wei au marana eġa aiai ina nola: eġa tam, natum orotona bo wavinena, am taunola orotona ma wavinena, bo am ġamoġamo, ma dobuġela ravai awarim e mamae. <sup>11</sup> ✧ Aubaina au pom six au orana BADA mara ma dobu i kau i; boga ma anatapai au orana. Wate i vilauvitau au pom au <sup>vi-7-na</sup>. Lamna aubaina BADA Sabate i viaiaini ma i vovivirei.

<sup>12</sup> ✧ Amam ma alom ma vivirei, da am lawana ina manawa au dobu, BADA am God e vereverem.

<sup>13</sup> ✧ Eġa ma viraġena.

<sup>14</sup> ✧ Eġa ravaġela awana ma viawawanei.

<sup>15</sup> ✧ Eġa ma danene.

<sup>16</sup> ✧ Eġa ma viwavu-moru

<sup>17</sup> Eġa ravaġela ana numa ma vikwinei. Eġa ravaġela awana ma vikwinei, bo ana taunola orotona bo wavinena, ana bulumakau, ana donki, bo aiwai ġelau i ġarinei.

## 21

### *Rau iviapoapoe ai Tarawatu*

12 “Aiai rava ġelauna i ravi da i viraġeni, nai ravana ina viraġeni. 13 ✨Wate mepa da i vunu-boai da i viraġeni. Tauna ina ruba dobu a vinevineia kampa. 14 Wate rava i vioga da i viraġena, ma ana lawana aubaina i ruba pulo au aniapuna, ravana ina taravaina-opunei ma ina viraġeni.

15 —Aiai amana bo alona i ravi, nai ravana ina viraġeni.

16 —Aiai da rava ġelauna i danenei da i gimarei bo awarina ma i nelaġai, nai ravana ina viraġeni.

17 ✨—Aiai da amana bo alona e parivai-apoapoeni nai ravana ina viraġeni.”

## 22

### *Tarawatu am lawana aubaina*

16 “Mepa da oroto wavine matatapu i gwalai da i viawawanei, ma eġa aiai wei wavinena ita rautani da ita ravaġi. Nai orotona wavine mataopana ina vimaiei ma ina ravaġi. 17 Wate mepa da amana i viġa, lamna maranai oroto matatapu ana mataopa ina vimaiei wavine amana awarina. 18 ✨Aiai wavinena e paraparauma lamna ina viraġeni.

19 ✨—Aiai ġamoġamo i viawawanei lamna orotona ina viraġeni.

20 —Aiai pulo i apui god ġelauna awarina ma eġa tau BADA awariu lamna nai ravana ina viraġeni.

21 —Eġa dobuġela ravai ona ġoa-boai, ona notai da taumi mara tagogi o mae dobuġela ravami au Egypt.

22 —Eġa kaikaiababa ma kedakeda ona ġoa-boai. 23 Mepa da nanare ona kauei ma tau i tou awariu agu aubaina, Tau BADA, ai tou anina ana nonori ma ana voagui. 24 Ma Tau ana meji guratana ma ġavia au orana ana viraġenimi. Awawami ina vikaiababa ma natunatumi eġa amamai.

25 —Mepa da mane u unelei molamolakana awarina, lamna eġa mane ġelauna au tepana ma vibaġei. 26 Mepa da rava ġelauna ana kwama u vaia da manena ina veremelem ma muriai ma vere-melei, ana kwama ma vere-melei muriai da madeġa ina ġaira. 27 Kwamana lamnei e purupurui da inina e vivibola. Bo aiwai ġelauna e mamae da ina vipuruei? Mepa da kwama eġa uta veremelei ma tauna awariu i tou agu aubaina ma Tau ana paribelei aubaina Tau rau-nuapoapoeu.”

## 23

### *Rau-nuapoapoe*

1 ✨Eġa riwa moru ma vituai. Ma eġa au numa-etara moruei kua apoapoe ravana ma voagui. 2 Eġa patara ma ġovaivaitei ma ġo'apoapoe ma kaukauei. Maranai au numa etara e maimairi eġa moruei ġo'apoapoe patara ma voagui.

## 24

### *Israel BADA ana parivainuaġana i vianinei*

3 Moses i nae mai Israel awari ma BADA ana viararamana ma ana tarawatu anatapui i riwei ma rava anatapui pona tagoginei i paribelei i pa, “Tauai BADA aiwai i ririwei anatapuna ana kauei.”

4 Ma Moses, BADA aiwai i ririwei anatapuna i girumi. Ubaubanai boiboġi i vomairi ma pulo aniapuna i voai ola au karena ma ġaima ġaeġae 12 i vimairini Israel ana dam 12 i vimatarei. 5 Anina ma Israel laralaragai i paritawanei da ġamoġamo i vununaiei ma pulo

i apui BADA awarina ma bulumakau gēlauri i vunui da ai viturana ma mae-kaua pulona. <sup>6</sup> Moses gāmoḡamo tarai navanavana i ḡunaiei au aboma ma navanavana gēlauna pulo aniapuna au tepana i voiwaiwaḡi. <sup>7</sup> Ma parivainuaḡana bagibagina bukana i vaia ma rava awarii i 'avi. Tau i paribelei, "Tauai aiwai anapuna BADA i ririwei ana kauēi, ana babani ana voteletelei."

<sup>8</sup> ✧ Ma Moses aboma i vaia ma tara i voiwaiwaḡi rava au tepai. Ma i riwa i pa, "Wei taranei ata tarawatu i vovai-virewapani ma i vianinei.

—Maranai BADA tarawatu i veremi, Tauna parivainuaḡana bagibagina taumi maiteni i kauēi." <sup>12</sup> BADA, Moses i riwei, "Ma ḡei awariu au ola ma weka ma mae, ma ḡaima dabadabai ruaḡa au tepai, riwau ma au tarawatu a girugirumia ana verem da mai Israel ma viararamani."

<sup>13-14</sup> Ma Moses ana taunola Joshua maiteni i vokaukaua da ita ḡae au ola. Ma Moses babada awarii i babani i pa, "Weka ona painiai da ana opu-memei. Aaron ma Hur e mamae, mepa da ami paripariḡai aiwai da ona nae awarii."

<sup>15</sup> Ma Moses i ḡeḡae au ola ma apau ola i purui <sup>16</sup> Ma BADA ana boruma i peu au ola Sinai. Ma au pom six apau ola i purui, ma au pom au <sup>vi-7-na</sup> BADA apau au orana ma Moses i ḡorei. <sup>17</sup> Mai Israel i taepai ma ola au tepana BADA ana boruma i 'nanai me ai arata ḡaeḡaena ai menamenana ma bauna potopotona. <sup>18</sup> Ma Moses i ḡae au ola ma apau au orana i rui. Ma au ola i mae au pom 40 ma waguvarai 40.

## 25

### *God ana numagara vivivireina*

*God Moses i riwei da rava ita parivere i da ai ḡoanei ita verena, kaua maḡamaḡaie i da God ana numagara vivivireina aubaina.*

<sup>8</sup> "Rava Numa Gara Vivivireina ina voai, da tau i maiteni ana mae. <sup>9</sup> Numa gara ma orana purapurai ana viatataiem nanare ona voai."

### *Parivainuaḡana bokisina*

<sup>10</sup> "Ma bokisi ai *acaciei* ina voai, ana manawa 110 cm, ma ana dabora 66 cm, ma ana ḡae 66 cm. <sup>11</sup> Ma gold aiainei ma viaitani au orana ma au doa, ma au tepana ana via goldei ma tere-kwaviviroi. <sup>12</sup> Ma ana loji 4 ma vokaukauei ma au aena 4 ma terei; ma au baba ḡelauna loji ruaḡa ina mae ma au baba ḡelauna loji ruaḡa ina mae. <sup>13</sup> Ma ai *acaciei* anipawe ma kauēi, ma goldei ma viaitani. <sup>14</sup> Ma anipawe au loji bokisi au babana ma ravai, da ina pawei. <sup>15</sup> Anipawe au loji ina mae, eḡa ina taina-lavui. <sup>16</sup> Ma au tarawatu ḡaima dabadabai ruaḡa au tepai a girugirumia bokisi au orana ma terei.

<sup>17</sup> —Ma uḡu\*, gold aiainei ma kauēi, ana manawa 110 cm, ma ana dabora 66 cm. <sup>18</sup> Ma Cherub ruaḡa ma kauēi gold gudagudanei ma uḡu au giana ruaḡa ma terei. <sup>19</sup> Ma Cherubim ḡelauna au ḡia ḡelauna ma Cherubim ḡelauna au ḡia ḡelauna ma kauēi da uḡu maiteni ina vitagogi. <sup>20</sup> Ma Cherubim papei au aidamo ina viloloi, ma ina vinoa vereverena, da ḡo'apoapoe tauvaitawaneina uḡuna ina gagaloei. <sup>21</sup> Uḡu au tepana ma terei, ma ḡaima dabadabai ruaḡa bokisi au orana ma terei. <sup>22</sup> Ma uḡu au tepana, Cherubim ruaḡa au poui kampa tana vinenebelana da au tarawatu ana verem rava mai Israel aubaii."

## 28

*Ma God nanare Moses i riwei da wei purapurai i voai, kepakepa vinevinena ma incense aniapuna goldei, ma rampa anivojijinana rampa seven aubaii. Ma i viararamani menanare BADA ana numagara vivivireina ina voai ma au orana gara ḡamoḡamo opinei ina babalaraḡi*

✧ 24:8: Mrk 14:24 \* 25:17: uḡu ḡo'apoapoei e viviaitani

*da gabu ruaḡa, ma gabuna ana gari ina kauē da wei gabuna ina gari-kwaikwaipipini. Ma wate maiteni i riwei da pulo aniapuna bronzei, ma aboma ḡaeḡaena ina kauē anioḡa aubaina.*

### *Pirisi ai gara*

<sup>1</sup> Ma God i riwa, Tuam Aaron natunatuna Nadab, Abihu, Eleasar ma Ithamar maiteni mai Israel awariei ma tereriei. Ma ma viaiaini da Tau aubaiu ina vipirisi pulo tauapuina. <sup>2</sup> Ma pirisi ana ḡara vivivireina ma popoi vareim aubaina da inanana ina vinualaulauna ma rava ina vivirei, <sup>3</sup> Rava rarau-ḡaroḡaro ma nuaulaulai, ma ḡoreiai da Aaron ana pirisi garana ina popoi da ina oteni ma ina viaiaini da aubaiu ina vipirisi.

## 31

### *God ana numagara taukaueina*

<sup>1</sup> Ma BADA Moses i riwei, <sup>2</sup> “Ma inana, Tau Besalel, Judah ana damei a vinei, tauna Uri natuna, ma Hur ḡoḡana, <sup>3</sup> ma Aruau Vivivireina a verei. Ma nuaulaulaula ma nota ma aramana a verei da rau-ḡaroḡaro anapui awari tauna tagotagogina. <sup>4</sup> Tauna taurauḡaroḡaro amai, *Gold*, *Silver* ma *Bronze* taunoleina aiaina. <sup>5</sup> Tauna i ai kaua ḡaima e boribori ma e laḡalaḡai, ma amtai awarina. Tauna rau-ḡaroḡaro anapuna awarina tagotagogina. <sup>6</sup> Ma nanare Oholiab a vinei, tauna Ahisamak natuna, Dan ana au dam da ana tauagu. Ma nanare taurauḡaroḡaro nuaulaula ma aramana a verei da aiwai anapuna a ririwem ina kauē. <sup>7</sup> Numagara Vivivireina ma parivainuaḡana bokisi ma uḡu ma numagara ana purapura: <sup>8</sup> kepakepa ma ana purapura; rampa gold aiainei ma purapura ḡelau ma incense aniapunana. <sup>9</sup> Pulo aniapuna ḡamoḡamo taputapuna apuna aubaina. <sup>10</sup> Ma gara vinualaulaunai ina popoi, gara vivireina ina popoi Pirisi Ḣeḡetelarana Aaron aubaina ma natunatuna pirisi nolana aubaina aubaii, <sup>11</sup> monamona viaiaina aubaina ma incense BADA ana numa aubaina. Taurauḡaroḡaro wei purapurai ina rauḡaroḡaroē me a ririwei nanare.”

## 32

### *Bull natuna goldei*

<sup>1</sup> ✧ Maranai rava i 'nanai da Moses barana i uama au ola, tau i nei Aaron awarina ma i riwei, “Ma nei ma god ma voai da ina painita. Wei ravana Moses, Egyptei i neiaita weka, eḡa ata aramane aiwai i tupua awarina.”

<sup>2</sup> Aaron i paribelei, “Awawami ma natunatumi waivinei ma nelarai ai loji goldei ona nei ai awariu!” <sup>3</sup> Anina ma rava anapui ai loji i votawatawanei ma i nei ai Aaron awarina. <sup>4</sup> ✧ Tauna i vaia ma ai au menamenana i apui da i wanagwadai ma bull natuna kokoitauna i voai. Maranai rava wei i 'nanai ma i riwa, “Oo mai Israel wei ami god, Egyptei i tere-opunemi.”

<sup>5</sup> Maranai Aaron wei i 'nanai ma pulo aniapuna i voai bull au naona ma i vinolanola i pa, “Au maratoma tana torela BADA aubaina.” <sup>6</sup> Ma Ubaubana boiboḡi rava i vomairi da ḡamoḡamo taputapuna i apui ma viturana maiteni pulona i terei. Muriai i kiala da i am gogona ma i uma-bua guratana da i kaua labalababa.

<sup>7</sup> Anina ma BADA Moses i riwei, “Ma ḡaira ma am rava Egyptei u tere-opunemi. Tau i geduaieu ma kaua apoapoena i kauē. <sup>8</sup> Tau i me marana au tarawatu i geduaiei ma bull natuna kokoitauna i kauē. Ma i raudunelei ma pulo i apui awarina ma i riwa, “Wei ami god, Oo Israel, Egyptei i tere-opunemi.”

<sup>9</sup> Ma BADA Moses i riwei, “Wei ravai a inanai ma a aramanei tau i kolai bagibagii, ma nuapoui eġa. <sup>10</sup> Ma votereu da au meji ana vikwai tau i awarii ma ana pupuni. Ma tam Moses ana terem da am epaepaia maiteni dam patarai ġaeġaena ona vitupui.”

<sup>11</sup> Wate Moses God i vigigimanei i pa, “Oo BADA am rewapana ġaeġaenei am rava Egyptei u tere-opunei lamna aubaina eġa am rava awarii ma meji ma ma pupuni. <sup>12</sup> Mepa da ma pupuni, Mai Egypt ina riwa, ‘Ana nota apoapoena maranai i tere-opunei da au ola anatapui ita pupuni.’ Meji avena, oram ina uba, ma eġa ma vipupui. <sup>13</sup> ☆ Am taunola Abraham, Isaac ma Israel ma notai, tam wavamei u parivainuaġani, ‘Tau am epaepaia ana vimaġai me ubona au mara ma wei dobuna a paripari-vainuaġani ami epaepaia ana vere-nonoei.’ <sup>14</sup> Anina ma BADA orana i uba ma eġa apoapoena ita neiai awarii.

<sup>15</sup> Ma Moses i ġaira me, au urana ġaima ruaġa dabadabai. God ana tarawatu wei ġaimai au naoi ma au murii i girumi. <sup>16</sup> Ġaima dabadabai lamna God ana kaua. Tauna ainelana i girumi.

<sup>19</sup> Maranai Moses i turiai mepa rava i rauġaravu ma bull natuna goldei i ’nanai i maimairi ma rava i arara i ’nanai. Tauna meji orana i oai ma ġaima dabadabai ruaġa i viorereni au doa. I viaigimagimai ola au karena. <sup>20</sup> Moses bull natuna goldei i vaia ma i apui ma i tutu-gwadagwadai da i vipokau ma au waira i tawanei ma mai Israel i egari da i uma.

<sup>21</sup> Ma Aaron i riwei, “Rava aiwai i kau i awarim da u kau da kau apoapoe kaukauna i kau i kau.”

<sup>22</sup> Aaron i paribelei, “Au bada eġa ma ġaiawa, rava ai kau u aramanei, kau apoapoe ai ġai. <sup>23</sup> Ma i riweu, ‘god ma kau da ina ravenita. Ma wei ravana Moses, Egyptei i tere-opunelai, tauai eġa ata aramanei aiwai awarina i tupua.’ <sup>24</sup> Lamna aubaina rava a riwei, ‘Aiaia awarina via goldei ona votawanei ma i vereu.’ Ma ai au menamenana a tawana-ruiei ma wei bull natuna i opui!”

<sup>25</sup> Moses i ’nanai da Aaron eġa tagotagogina da rava ita vibadei, ma ana ġavia ai anivinama i kau i kau. <sup>26</sup> Lamna aubaina ai rauġaravu au metaetana i mairi ma i garara, “Aiaia da BADA au murina, ona nei awariu!” Ma Levi ana dam i nae Moses au murina.

<sup>27</sup> Ma Moses tau i riwei, “BADA, Israel ana God e ririwa. Nelara *sod* ona lavui ma ona nae ġaravu au giana da ona nenememei ma dam turam ma vareim ma mae-turam ma viraġeni.” <sup>28</sup> Levi ana dam Moses i voteletelei ma nai au marana nelara 3,000 i viraġeni. <sup>29</sup> Ma Moses i riwa, “Amadodo BADA taumi i voviviremi ma i viaiainimi da aubaina ona vipirisi pulo tauapuina, aubaina taumi BADA o voteletelei da natunatum i ma varevareimi o viraġeni.”

<sup>30</sup> Ma maratamna Moses rava i riwei, “Taumi ġo’apoapoe ġaeġaena o kau i wate ana ġae BADA awarina da ana kauana dadanei da ami ġo’apoapoe ina nota-tawanei.”

<sup>31</sup> Anina ma Moses i ġae me BADA awarina ma i riwa, “Au rava kau i apoapoe ġaġa i kau i kau. Tau i ai god goldei i kau i kau ma i raudunelei! <sup>32</sup> Wate marina BADA a vivibaġaim da ai ġo’apoapoei ma nota-tawanei ma mepa da eġa lamna avena ma wavau am au buka ma boa-tawanei.”

<sup>33</sup> Ma BADA Moses i paribelei, “Aiavo i ġo’apoapoei i kau i awariu, Tau wavai au buka ana boai. <sup>34</sup> Marina ma nae, rava ma naiei dobu a ririweia ma au anela ina ravenim. Wate mara ina ġeta da ana kovoġa, tau i ai ġo’apoapoe aubaina ana kovoġi.”

<sup>35</sup> Ma BADA doria apoapoenei rava i kovoġi aubaina tau i god bull natuna Aaron i voai i raudunelei.

## 34

### *Ġaima ruaġa*

<sup>1</sup> BADA, Moses i riwei, “Ġaima ruaġa dabadabai ma bori inanana me ruaġa u wamawamaia, ma au tepana riwana tagogina ana girumi me au naona. <sup>2</sup> Ma vokaukaua ma ubaubanai ma ġei ola Sinai au tepana ma nebeleu.”

<sup>4</sup> Ma Moses, ġaima ruaġa i bori me au naona nanare. Ubaubanai boiboġi ġaimai i voai ma i ġae au ola BADA i ririwei nanare. <sup>5</sup> Ma BADA apauei i ġairai ma au ririvana i raumairiei, ma wavana i latoni, “BADA!” <sup>6</sup> ✨ Ma Moses au naona i babara ma i viġoreġore, “TAU MAEMAE NONOANA! Tau rarau-nuapoapoeu ma iviu aiaina, tau eġa laġilaġina amlou ita voġaiġai. <sup>7</sup> Au nuavaina maemaena ina mae au rava awarii da kimta tausan ina kwa ma kaua apoapoe, mae-ġaeġae ma ġo’apoapoe ina nota-tawanei. Wate tauna eġa kaua apoapoe taukauei ita inana-tawanei, natunatui ma ġoġoġai, amamai i kaukauei kovoġana e vaivaia da kimta vitonuina da vi-four-na.”

<sup>8</sup> Moses maratagogi i mae-peu au doa ma BADA i viborumei. <sup>9</sup> I riwa, “Au bada mepa da riwa kaua da tam nuanuau u vaia, a vivibaġaim da uta vinoa ma tata nae. Wei rava i orai badobadoi, wate ai kaua apoapoe ma ai ġo’apoapoei ma nota-tawanei, ma ma vai-meleiai am buderi.”

#### *Parivainuaġana bagibagina i ravivouni*

<sup>10</sup> BADA, Moses i riwei, “Ma rautaniġana! Au parivainuaġana bagibagina tam maiteni a kaukauei am patara Israel maiteni. Ma au matami kaua ġaeġae aniba kauai ana kauai. Eġa melanai ai ai wenanare ita kauai au dobu. Rava anatapu i au ririvami e mamae, au rewapana ina inanai da tau, BADA kaua ġaeġae ana kauai aubaimi.”

<sup>28</sup> Moses kampa i mae BADA maiteni au pom 40 ma waguvarai 40, eġa ita am ma eġa ita uma nai au marana. Ma BADA ġaima au tepana parivainuaġana riwai - Tarawatu 10 i girumi.

#### *Moses naona i lalai*

<sup>29</sup> Moses ġaima ruaġa au tepai parivainuaġana riwai i vinimavoei ma ola Sinaiei i ġairai. Wate eġa malana ita vaia da naona i lalalai aubaina tauna BADA maiteni i babani. <sup>30</sup> Aaron ma Israel patarai i ’nanai da Moses naona i lalalai ma awarina naena i rovoei. <sup>31</sup> Wate Moses tau i ġorei, ma Aaron ma dogadogara i nei awarina, ma awarii i babani. <sup>32</sup> Ma mai Israel i riei Moses awarina ma tarawatu ola au tepana i vereveri rava i pariverei.

<sup>33</sup> Moses naona garei i purui maranai awari i babani-vorovei. <sup>34</sup> Maranai Moses e ruirui au numagara da BADA maiteni ina babani, ġarana naona i purupurui lamna, e vovotawanei. Ma e opuopu memei ma BADA aiwai i riwei mai Israel e paripariverei, <sup>35</sup> ma mai Israel, i ’nanai da Moses naona i lalalai. Lamna maranai Moses naona i puru-melei da ina rui me da BADA awarina ina babani.

## 40

*Ma Moses rava i vibaġai numa voa purapurai BADA ana numa ġara vivivireina voana aubaina, ma wate purapura vivivirei numa au orana bada vimae-ġaeġaenana aubaina, ma pirisi ai gara popona aubaina, ma rava i amverena da tagotagogina da nola ita vikwai. Bezalel ma Oholiab ma rava nolanolai nelara ma waivine wei purapurai i kauai me BADA i ririwei nanare.*

#### *Numa gara vivivireina i vikwai*

<sup>1</sup> Ma BADA Moses i riwei, <sup>2</sup> “Au Numa Gara Vivivireina ma vimairini aupom tagogi, madeġa au vouna. <sup>3</sup> Tarawatu 10, Parivainuaġana bokisina au orana ma poai, ma au naona anitereġaġara ma teretaġonei da numa garana ina babalaraġi. <sup>4</sup> Teibol ma ruiei ma au tepana aiwai i kaukauei aubaina ma terei. Ma rampa anivojijinana ma ruiei, ma rampa

✨ **34:6:** Exo 20:5-6; Deu 7:9-10



ma terei<sup>5</sup> Ma incense aniapuna goldei ma terei bokisi au naona ma aniteregāgara gēlauna ma terei da BADA ana numa gara vivivireina ina gudui. <sup>6</sup> Numa gara au metaetana, au doa, pulo aniapuna ma terei. <sup>7</sup> Anirauoġa numa gara ma pulo aniapuna au poui ma terei ma waira ma vioai. <sup>8</sup> Numa gara ma pulo aniapuna aniteregāgara ma tere-kwaviviroi da dobuna ma gari. Ma au anirui aniteregāgara ma vidawei.

<sup>9</sup> —Ma oil viaiainana ma vaia ma numa gara ma purapura anatapai au orana ma buloi ma ma vovivirei da vivivireina. <sup>10</sup> Ma pulo aniapuna ma ana purapura maiteni ma buloi ma ma vovivirei da vivivireina. <sup>11</sup> Anioġa abomana ma ana animairi maiteni ma buloi ma ma vovivirei da vivivirei.

<sup>12</sup> —Aaron natunatuna ma neiai numa gara vivivireina au metaetana ma wairei ma oġai. <sup>13</sup> Ma Aaron pirisi ana gara vivivireina ma vioteni ma oilei ma vovivirei da aubaiu ina vipirisi pulo tauapuina. <sup>14</sup> Ma natunatuna ma neiai ma pirisi pulo tauapuina ai gara ma vioteni. <sup>15</sup> Ma ma buloi me amai u buloi nanare da ina vipirisi pulo tauapuina. Wei viaiainana Aaron ana epaepaia i vovivirei da mara nonoa kimtana patapatana awari ina vipirisi pulo tauapuina. <sup>16</sup> Moses anatapura i kauana-paiei me BADA i ririwa nanare.

<sup>17</sup> —Anina ma madeġa au viruaina au pom tagogi nawaravi tagogi, taui numa gara vivivireina i vimairini. <sup>18</sup> Moses dogo i ġarai ma tuatua i tonei ma terewaba ma anitapejijinana i ragini. <sup>19</sup> Ma gara ġamoġamo opinei i ġauġauri au tepana i ebani, BADA i ririwei nanare.”

<sup>20</sup> Anina ma Moses ġaima dabadabai ruaġa bokisi au orana i terei. Ma anipawe loji au orana i vionaġi bokisi au adana, ma uġuna i viaitani. <sup>21</sup> Ma bokisi i ruiei God ana au numa gara vivivireina ma aniteregāgara i terei da bokisi i mae-ġaġari, BADA i ririwei nanare.

<sup>22</sup> Ma nanare teibol i ruiei God ana au numa gara, aniteregāgara i mae ma au doi, au laubadei i terei <sup>23</sup> ma teibol au tepana palawa i pulopuloei BADA awarina i terei, BADA i ririwei nanare.

<sup>24</sup> Rampa aniterenana i vaia ma au numa gara teibol au naona, au babaġela au rauanaġei i vikialai. <sup>25</sup> Ma rampa i apui BADA awarina, me i ririwei nanare.

<sup>26</sup> Incense aniapuna goldei aniteregāgara au naona i terei numa gara vivivireina au orana. <sup>27</sup> Anina ma au tepana incense ġabuġabui i apui, BADA i ririwei nanare. <sup>28</sup> Ma aniteregāgara i terei da aninae au numa gara vivivireina i gudui.

<sup>29</sup> Pulo aniapuna BADA ana numa gara vivivireina au metaetana. Au tepana ġamoġamo ma palawa i apui me BADA i ririwei nanare.

<sup>30</sup> Ma aboma ġaeġaena numa gara ma pulo aniapuna au poui i terei, ma au orana waira i waġi anioġa aubaina, <sup>31</sup> ma kampa Moses ma Aaron ma natunatuna urai ma aei i oġai. <sup>32</sup> Tau i aei ma urai e oġaoġai maranai e ruirui au numa gara bo e nena pulo au aniapuna.

<sup>33</sup> Ma Moses Numa gara ma Pulo aniapuna i gari-kwaviviroi. Ma aniteregāgara i terei au anirui. Anina ma Moses ana nola i kwa.

### *BADA ana Numa Gara Vivivireina viborumana*

<sup>34</sup> \*Ma apau BADA ana Numa Gara Vivivireina i purui ma ana boruma numana i vioai. <sup>35</sup> Apau numa gara vivivireina au tepana i kiala ma BADA ana boruma numana i vioai ma lamna aubaina Moses eġa tagotagogina da ita rui. <sup>36</sup> Ma apau i vovoepa lamna maranai mai Israel ina vaġai au dobuġela. <sup>37</sup> Ma mepa da apau eġa ita voepa lana tau i eġa ina nae. <sup>38</sup> Maranai mai Israel e vaġavaġai, BADA ana animae apau au orana numa gara vivivireina au tepana ma waguvarai tauna ai apau au orana e ararata.

## Leviticus Levi ai kua

Wei bukana wavana Leviticus, aubaina Levi ana dam e bababaniei. Tau i pirisi pulo tauapuna i vovoagui. Ma BADA ana Numa Gara Vivivireina i paipaini.

### *Pulo taputapuna apuna*

<sup>1</sup> BADA au Numa gara Vivivireina ma Moses i kwatuei ma i riwei i pa, <sup>2</sup> “Wei au pariverena pulo apunana aubaina. Mai Israel ma riwei ma pa, ‘Aiai da BADA awarina gamoḡamo e apuapui, lamna bulumakau tagogi bo sipu bo gote i gamoḡamoi ina neiai ana pulo.

<sup>3</sup>—‘Mepa da gamoḡamo taputapuna e apuapui am pulo, ma inanai da gamoḡamo orotona aiaina ma eḡa ana apoapoe aiwai. Ma neiai Numa gara Vivivireina ana au anirui, da BADA ina vianinem.’ <sup>4</sup> Ma uram gamoḡamona au kolana ma terei, wei e vivimataira da gamoḡamo i raviepaiam da ina iraḡe am ḡo’apoapoe ina oḡa-tawanei. <sup>5</sup> Ma bulumakau BADA au naona ma viraḡeni, ma pirisi Aaron natunatuna tara, ina neiai da pulo aniapuna au adana ina voiwaiwaḡa-naiei. <sup>6</sup> Anina ma Gamoḡamo ma opai ma ma api. <sup>7</sup> Ma Aaron natunatuna, ai ina viviri pulo aniapuna au tepana. <sup>8-9</sup> Tau i sia apiapina ai araratana au tepana ina terei da ina arai, kolana da monamona maiteni. Wate amoamo da ganigani ma sia aei wairei ina oḡai, ma pirisi siana anatapuna ina apui. Wei pulona apuapunana lamna ḡabuna aiaina BADA ina vinuaiaini.”

*Wate God Moses i riwei da rava sipu bo gote, gabubu bo bunebune ita puloei me pulo e apuapui nanarena. Tauna wate Moses i riwei da menanare wei ina puloana-nei.*

## 3

### *Vieḡualau pulona*

<sup>1</sup> BADA Moses awarina i babani i pa, “Aiai da nuauba amna aubaina ana pulo bulumakau e apuapui, ma inana-kauei da burumakauna orotona bo wavinena, aiaina ma eḡa ana apoapoe aiwai. <sup>2</sup> Ma urana gamoḡamo au kolana ina terei ma ina viraḡeni Numa Gara Vivivireina ana au anirui. Ma pirisi Aaron natunatuna tara pulo aniapuna au adana ina voiwaiwaḡa-naiei. <sup>3-4</sup> Ma amoamo monamona ava ma kaina monamona ma ganigani ana monamonana, pirisi ina verei da ina apui nuauba pulona. <sup>5</sup> Ma Aaron natunatuna wei monamonai sia taputapuna e ararai au tepana ina terei ma ina apu-tagogiei, pulo aniapuna au tepana. Wei amgogona pulona ma ḡabuna i ai kua BADA awarina.”

*Ma gamoḡamo taupuloina ana numa ravai maiteni ma ai rava ḡelau sia mae-terenai e aniani. Wei lamna BADA ana babani bulumakau aubaina ma riwana tagogina sipu ma gote aubaii amgogona pulona.*

## 13

### *Opi dorianana ana tarawatu*

<sup>1</sup> BADA Moses ma Aaron i riwei i pa, <sup>2</sup> “Mepa da aiai kero bo paramaitua i vaia bo opina i lebara ma e notanotai da wei keronana e viviopidoriana, lamna ana rava tauna ina naiei pirisi Aaron bo natuna tagogi awarina. <sup>3</sup> Pirisi kero vioana ina inanai. Mepa da apara au kero e vivimairiana i arapoirana ma dogona i ḡaira lamna opidoriana. Ma pirisi ina riwa da tauna eḡa aiaina BADA au matana.

<sup>45</sup> —Rava aiai opidoriana i vaia, tauna gara wanasikasikana ina oteni, aparana eḡa ina jinai ma naona ina purui ma ina kwatu ina pa, ‘Tau eḡa aiiai! Eḡa ona nei au ririvau!’

46 Maranai dorianana awarina e mamae lamna tauna anina miramirana, Tauna ainelana ina mae au tano.”

## 17

### *Tara ana tarawatu*

10 ✧ Aiai Israelieina bo jentail maiteni o mamae, sia taratarana e aniani, BADA tauna ina mae-puputei ma ana rava awariei ina bori-tawanei. 11 Aiwai anatapui da lawalawaii ai lawana au tarai e mamae ma lamna aubaina BADA i riwa da tara pulo au aniapuna ona voiwaiwaği da rava ai ġo’apoapoe ina vaitawanei. Tara lamna lawana, ma lamnei ġo’apoapoe e vaivai-tawanei.

## 18

### *Viawawana ana tarawatu*

1 BADA Moses i riwei i pa, 2 “Mai Israel awari ma babani ma ma riwei, ‘TAU BADA ami God.’ 3 Mai Egypt ai kaua eġa ona ġovaivaitei, Wariaga kampa o mae, marina a tarataravainanaieimi au Canaan ma ai kaua eġa ona ġovaivaitei. Eġa ai lawana ona votaġotaġoi. 4 Taumi au tarawatu ona voteletelei ma riwau ona votaġotaġoi. Tau BADA ami God. 5 Mepa da au tarawatu ma riwau ona voteletelei taumi lawana ona nelaġai. TAU BADA a riwa.”

6 TAU BADA wei au babani bagibagii a vereveremi, “Eġa aiai novuna bo vareina ina viawawanei.

19 —Maranai wavine nawaravi i vunui tauna miramirana, eġa maiteni ma viawawana.

20 —Eġa oroto ġelauna awana maiteni ma viawawana, lamna tam u vimira-melem.

21 —Natunatumi eġa ona puloei god Molek\* awarina, aubaina TAU BADA ma vinimala e neineiawariu.

22 —Eġa aiai orotona, oroto ġelauna ina viawawanei, me oroto waivine e viawawanei, wei lamna ġo’apoapoe kaukauana God au matana.

23 ✧—Eġa aiai orotona ġamoġamo ina viawawanei bo wavine ina verena-melei da ġamoġamo ina viawawanei. Mepa da wei u kauai tam u vimira-melem.

24 —Eġa wei kauai ona kauai da ina vimiramiraimi. Dam au Canaan maemaiei anatapui wei kauai i kauai ma i vimira-melei. Lamna aubaina ana viaġaġana-opunei ma taumi ona rui.”

## 19

### *Apoapoe terevai-jjimanina riwai*

1 Ma BADA Moses i riwei i pa, 2 “Dam Israel anatapui ma tuarui ma ma riwei, ‘Taumi lawana vivivireina ona maeni. Aubaina Tau BADA ami God vivivireiu.’

17 —Eġa oram ina raviapi ai kaua apoapoena ravana awarina, wate maiteni ona kiala da kaua ona tere-vaijjimani, da eġa ġo’apoapoe ona kauai.

18 ✧—Eġa ma raubiwa am rava awarii, eġa aiai ma ġoaġaiei, wate rava turam nuanuam ina vaia me tam nuanuam e vaivai-melei. TAU BADA.”

## 20

### *Konaġa riwana*

✧ 17:10: Gen 9:4 \* 18:21: Molek lamna mai Ammon ai god ✧ 18:23: Exo 22:19 ✧ 19:18: Mrk 12:31

<sup>6</sup> Aiai ravana i ḡoei da kaua anoi ita aramanei, lamna Tau ina vibaḡaiu. Eḡa vinuaterena aubaina ina nae konakonāḡa awarii ina bababani. Mepa da aiai wei i kauei, nai ravana ana mae-puputei, ma au rava awariei ana viopuni.

## 24

### *Vimaimaia riwana*

<sup>19</sup> Mepa da aiai turana i vikeroi, aiwai i kaukaueia awarina nanare ina kauei. <sup>20</sup> Mepa da gelama i viaigai, gelamina tagogi ina wanagai, mepa da mata tagogi i viapoapoeni, matana tagogi ina apoapoei. Mepa da ivo tagogi i viaigai, ivona tagogi ina wanagai. Aiwai keronā rava ḡelauna i verei, tauna nanare ina kero. <sup>21</sup> Aiai ravana ḡamoḡamo i viraḡeni ina vimaiei, wate aiai da rava i viraḡeni, tauna ina iraḡe. <sup>22</sup> Wei tarawatuna taumi anapapumi aubaimi, mai Israel ma dobu ḡela ravai, aubaii TAU BADA ami God.

## Numbers Au Mutulua

### *Pariverena*

Wei bukana wavana *Numbers*, aubaina au kapita 1 da kapita 4 e ririweta da Israel ana dam 12 ma ai dam nelara biaga sorodia. Wei bukana nanare Mai Israel ai mae au mutulua madega 38 i kwa, ma aiwai i kaukauei bo ai babara au Sinai i vikarei da i nae au Canaan lamna e bababaniei.

## 6

### *Aaron natunatuna maiteni ai Viaiaina*

<sup>22</sup> BADA Moses i riwei i pa, <sup>23</sup> “Aaron ma natunatuna ma riwei da wenanare mai Israel ina viaiaini ina pa,  
<sup>24</sup> ‘BADA ina viaiainimi  
ma ina gagaloemi.  
<sup>25</sup> BADA ivina ina ai awarimi  
ma ina paina-kauemi.  
<sup>26</sup> BADA ana nuaiaina ina mae-tavirei awarimi  
ma nuuba ina veremi.’  
<sup>27</sup> Ma nanarena, maranai Aaron ma natunatuna Tau wavauei mai Israel e viviaiani, ma Tau ana viaiaini.”

## 13

### *Taurauivu Canaan i tuvirevirei*

<sup>1</sup> BADA Moses i riwei i pa, <sup>2</sup> “Mai Israel ai dam 12 au orai rewapana tagotagogi ava ma vinei, da ma paritawanei da Canaan dobuna ina ivui, wei dobuna mai Israel a vereverei.”  
<sup>3</sup> Ma BADA i ririweia nanare Moses i kauei. Mai Israel ai dam 12 babadai i paritawanei. Tai ai garavu au mutulua Paran i voterei da i nae au Canaan.

<sup>17</sup> Maranai Moses ravai i paritawanei da dobuna ita ivui ma i riwei i pa, “Au Negev ona virautua da dobu violaolana ona naeni da au navanava gelauna. <sup>18</sup> Dobu ona tuvirevirei, ma ana patara ona inanai menanare, rava ai maga ma ai rewapana bo ai gokokokara? <sup>19</sup> Doa maumaurana bo ega? Ai melagai ona tuvirevirei, garigarina bo e mamae lota? <sup>20</sup> Doa maumaurana bo ega? Ai e gogogo bo ega? Ma ona kauana-guratei da ai anoi gelai ona purai da ona neiai.”

<sup>21</sup> Anina ma tau i dobuna i naeni, au mutulua Zin\* i vikarei ma dobuna i naeni da au gia dewadewana au Rehob, wei lamna Lebo Hamath au geregerena.

### *Taurauivu i nememei*

<sup>25</sup> Au pom 40 taurauivu dobu i tuvirevirei ma i nememei, <sup>26-27</sup> I nei Moses, Aaron ma Israel patarai awari au Paran mutuluana au Kadesh ma ai anoi au dobuna i vaivaia i viatataiei. Ma i pariverei i pa, “U paritawanelai da dobuna a ivui, marina grape ana gou marana ma a inanai da ani ipi gabuna aiaina ma doa maumaurana, ma aina anoi gelai a neiai da ona inanai. <sup>28</sup> Wate kampa rava gaiagaiawai e mamae, ma ai melagai i rata kaua ma i gari-kwaviviroi da ega gavia ina rui. Ma kampa mai Anak a inanai. <sup>29</sup> Mai Amalek au mutulua Negev e mamae, ma mai Hitti mai Jebus ma mai Amori au ola e mamae ma mai Canaan au gera, Jordan wairana au ririvana e mamae.”

\* **13:21:** Wei lamna dobu gaegaena Negev au paratana i vikarei da i nae da ola Hermon au geregerena ma Hamath melagaina.

<sup>30</sup> Ma Caleb, rava i riwei da i genuana ma i riwa i pa, “Tana nae dobuna ravai tana virubai ma dobuna tana vaia!”

<sup>31</sup> Wate taurauivu maiteni i gēgāe i pa, “Egā! Ravai i virewapana kaua egā me tauta. Egā tana viġaviei.” <sup>32</sup> Ma nanare tau i nai dobuna ana apoapoe riwana i vibabarai mai Israel awari i pa, “Nai egā ani ipi doana aiaina ma rava manamanai ma ġaiġaiawai kampa e mamae. <sup>33</sup> Ma kampa rava ġaiġaiawai Mai Nephili† a inanai (Mai Anak noinoii) tauai a inana-meleiai lamna me kapau ma nanare tau i matai lamna tauai me kapau.”

## 14

### *Mai Israel Moses ma Aaron i viġaviei*

<sup>1</sup> Ma nai waguvaraina rava anatapui i tou mara. <sup>2</sup> Tau i anatapui Moses ma Aaron i viġaviei i pa, “Airake au Egypt ata iraġe ota! Bo weka au mutulua. <sup>3</sup> Aiwai aubaina BADA e nainaieta wei au dobuna da ravai sodei ina viraġenita ma awawata ma natunatuta ina pani-naiei. I ai kaua da tata wanaviraita au Egypt.” <sup>4</sup> Ma tau i babani vivira i pa, “Bada tana vinei da ina naiana-meleta au Egypt.”

<sup>5</sup> Anina ma Moses ma Aaron i mae-ġaira da naoi au doa Israel patarana au matai. <sup>6</sup> Nun natuna Joshua ma Jephune natuna Caleb ruaġai, tau i maiteni dobu i tuvirevirei, ai gara i sikai, <sup>7</sup> ma mai Israel anatapui i riwei, “Dobuna anatapunana a naeni ma a tuvirevirei ma dobu maumaurana. <sup>8</sup> Mepa da BADA nuanuana ina ai awarita ma ina ruieta dobuna maumaurana awarina, weka sia ma lam egā anibaiana. <sup>9</sup> Wate BADA egā ona viġaviei. Ma ravai dobuna e maemaeni egā ona rovoei, tana viaġaġana-opunei. Tau i ai agu egā. Tauta BADA maiteni ta mamae! Ravai egā ona rovoei!”

<sup>10</sup> Mai Israel Caleb ma Joshua ġaime i ita viraġeni wate BADA ana borumana i egā numagara au tepana.

*God Moses i riwei da ita wanavirai ma ana rava ita taravaina-naiei au mutulua da etanai e nenaie au Boga lebalebarina ita naeni.*

### *God i riwa da rava ina kovoġi*

<sup>26</sup> BADA Moses ma Aaron i riwei, <sup>27</sup> “Wei ravai apoapoe ai beura awariu a nonora, iauei! Mai Israel ai pariviravira awariu a nonori.” <sup>28</sup> Wenanare ma paribelei, “BADA i riwa, ‘Tau wavauei a ririwa da aiwai o vivibaġei, nanare ana kauei.’” <sup>29</sup> Taumi au mutulua tupuami urabovai ina nae. O pari-virevireu aubaina taumi ami madeġa 20 ma e gēgāe ona iraġe. <sup>30</sup> A parivainuaġami da wei au dobuna ota mae wate egā ai ai tagogi wei au dobuna ina rui anina Jephune natuna Caleb ma Nun natuna Joshua.

<sup>31</sup> Ma o ririwa da natunatumi ina vaia ai panipani, wate tau i kampa ana ruiei da dobuna o gedugeduaieia ina maeni. <sup>32</sup> Wate taumi patarami tupuami au mutulua ina bova-nae. <sup>33</sup> \*Egā ota vipatutu ma lamna aubaina natunatumi ina vinuapoapoe au mutulua ma ina kovoġi da ina viġamoġamo-nae da madeġa 40 ina kwa nai maranaina taumi kimta magurimi ona iraġe-pai. <sup>34</sup> Aupom 40 dobuna o tuvirevirei lamna aubaina ana kovoġimi da madeġa 40, au pom tagogi maiana madeġa tagogi. Ami ġo’apoapoei aubai au kovoġa malana ona vaia. <sup>35</sup> TAU BADA, A riwa! Tau wei ana kauei taumi ġo’apoapoe ravami anatapumi awarimi. Ami rava maiteni o vitagogiemi ma o viġavieu. Taumi anatapumi au mutulua ona kwa, taumi weka ona iraġe.

## 20

### *Miriam i ’raġe*

† 13:33: Mai Nephili egā tata aramana-kauei, wate tau i rava gogogobui. Gen 6:4 e ririweta da tau i meiei i nei. \* 14:33: Act 7:36

<sup>1</sup> Nawaravi au vouna mai Israel anapui au mutulua Zin iġeta ma au Kadesh i rauġaravu. Weka Miriam i 'raġe da i doboi.

*Mai Israel Moses maiteni i viparipariniġai*

<sup>2</sup> ✧Kampa Waira eġa ma lamna aubaina tau i vitagogiei ma Moses ma Aaron ai ġavia i vomairi, <sup>3</sup> ma Moses maiteni i viparipariniġai i pa, “Rorova varevareiai maiteni ata iraġe tagogi BADA au matana!” <sup>4</sup> Aiwai aubaina BADA ana rava u neiai au mutulua ana ġamoġamoi da ina iraġe <sup>5</sup> Aiwai aubaina Egyptei u tere-opunelai ma u neiai wei dobuna apoapoena awarina? Weka eġa ani ipi doana aiaina da witi da damala aina bo grape warami bo *Pomegranates* aina ina gogo, ma eġa waira aniuma!

<sup>6</sup> Moses ma Aaron, patara i voterei ma i nae BADA ana numagara au metaetana ma i mae-peu au doa ma i raudune. Ma BADA ana borumana i eġa. <sup>7</sup> Ma BADA Moses i riwei, <sup>8</sup> “Am jiġona ma vaia ma tuam Aaron maiteni rava ona vitagogiei. Ma au matai kira awarina ma babani ma ana waira ina veremi. Nanare waira kirei ina opu da Israel patarana ina uma ai ġamoġamo maiteni. <sup>9</sup> Anina ma Moses jiġona BADA au naona i vaia, i ririwei nanare.”

*Moses kira i ravi*

<sup>10</sup> Ma Moses ma Aaron dam Israel i vitagogiei kira au naona ma Moses i riwa, “Ora potapotami! Ona genuana! Tauai waira kira au orana ana tere-opuniai aubaimi!”

<sup>11</sup> Ma Moses ana jiġona i voepai ma kira i ravi mara ruaġa. Ma waira ġaeġaena i ruba-opu da rava ma ġamoġamo i uma.

<sup>12</sup> Anina ma BADA, Moses ma Aaron i riwei, “Taumi eġa ota vitumaġana-kaueu da Tau vivivireu ami dam Israel au matai, ma lamna aubaina taumi eġa wei ravai ona ruiei dobuna a vereveremiana awarina.”

*Aaron i 'raġe*

<sup>23</sup> Au ola Hor, Edom ana au parata, kampa BADA Moses ma Aaron i riwei, <sup>24</sup> “Taumi riwau o rauaġaiġaiei au Meribah ma lamna aubaina, dobu mai Israel a verevereia, Aaron kampa eġa ina rui. Tauna noinoina ina votaġoi. <sup>25</sup> Aaron ma natuna Eleasar ma taravaia ma ma ġaei au ola Hor. <sup>26</sup> Kampa Aaron ana pirisi garana ma votawanei ma natuna Eleasar ma vioteni. Aaron kampa ina iraġe ma noinoina ina votaġoi.”

<sup>27</sup> Moses BADA i ririwei i kauei. Tau i ola i ġaeni, mai Israel anapui au matai. <sup>28</sup> Moses Aaron ana pirisi garai i votawanei ma natuna Eleasar i vioteni. Ma kampa ola au tepana Aaron i 'raġe. Ma Moses ma Eleasar i ġaira memei.

<sup>29</sup> Maranai patarana i aramanei da Aaron i 'raġe ma i touei da au pom 30.

## 21

*Mota bronzei i kauei*

<sup>4</sup> Tau i ola Hor i netawanei ma boga lebalebarina etanaina i vaia da Edom ita vorei. Au etanai rava amloi i ġaiġai aubaina ai vaġai i manawa, <sup>5</sup> ma Moses ma God i eni i pa, “Aiwai aubaina Egyptei o taravaina-opunelai da au mutulua ana iraġe? Ai lam eġa! Ai waira eġa! Ma wei lam tagogina manna a amgeduaiei.”

<sup>6</sup> Ma BADA mota ġaiġaiawai i paritawanei awari ma maġamaġau i ani ma i 'raġe. <sup>7</sup> Rava i nei Moses awarina ma i riwa, “Tauai ġo'apoapoena a kauei maranai BADA ma tam a parivireviremi. Ma raupari da BADA mota ina vaitawanei.” Ma Moses i raupari rava aubaii.

<sup>8</sup> Ma BADA Moses i riwei i pa, “Mota ġaiġaiawana kokoitauna ma kauei ma ai au damona ma raġini. Maranai mota, rava ai i ani ma i taepai da mota kokoitauna i 'nanai, ma

tauna ina lawana.” <sup>9</sup> ✧ Ma Moses mota bronzei i kauēi ma ai au damona i raḡini. Maranai mota aiai i ani ma ravana i taepai da mota i ’nanai ma i lawana!

### *Au Ola Hor da i nae au Moab*

<sup>10</sup> Mai Israel i nae ma au Oboth i rauḡaravu. <sup>11</sup> Ma Oboth i netawanei ma i nae au Iye-Abarim i mae, wei lamna mutulua, Moab au naona au maramatanei. <sup>12</sup> Kampa da i nae Zered au wapuna i rauḡaravu. <sup>13</sup> Ma wei dobuna i netawanei ma i nae waira Arnon au baba ḡelauna au mutulua mai Amori ai au parata. (Moab ma Amori ai dobu au poui wei wairana e viviparata).

### *Mai Israel, gulau Sihon i vovaiubai*

<sup>21</sup> Ma mai Israel taupariverena i paritawanei da Sihon mai Amori ai gulau i parivere i pa, <sup>22</sup> “Tauai a ḡoei da am au dobu ata verautua. Tauai eḡa ana deḡa ami au wapu bo grape wapuna, bo ami au waira dogona waira ana umai. Tauai gulau ana au etanai ava ana babara da am dobu paratana ana opu-tawanei.”

<sup>23</sup> Wate gulau Sihon mai Israel eḡa ita vianinei da ana au dobu ita verautua. Ma ana sorodia anatapui i tami ma i nae au mutulua da Israel ita nebelei. Au Jahas i ḡeta da Israel maiteni i viḡaiḡaiawa. <sup>24</sup> Wate mai Israel i virewapana ma gulau Sihon i viubai ma ai dobu waira Arnon i ḡae da waira Jabok ana parata i vaia, wei kampa mai Ammon au dobu e viviparata. Mai Ammon ai parata i gagaloana-kauēi ma lamna aubaina mai Israel eḡa ai au dobuna ita rui. <sup>25</sup> Ma mai Israel i viḡavia da, mai Amori ai melagai i vaipai da i maeni, taon Heshbon ma melagai ḡelau kampa maiteni i vaia.

### *Mai Israel gulau Og i vovaiubai*

<sup>31</sup> Nanare mai Israel mai Amori ai dobu i vaia ma kampa i mae <sup>32</sup> Ma Moses tauivu i paritawanei da Jaser taon i tuvirevirei, ma muriai mai Israel i nae ma ai melagai anatapui i vaia ma mai Amori kampa maemaēi i viaḡaḡana-opunei. <sup>33</sup> Ma mai Israel i vira ma etanaiei i ḡae au Bashanei. Ma Bashan ai gulau Og ai sorodia anatapui maiteni i opui da tau i nebelei au Edrei. <sup>34</sup> Ma BADA Moses i riwei i pa, “Eḡa tauna ma rovoei, aubaina tauna, ana rava anatapui, ma ai dobu maiteni au uram a tereterei. Aiwai u kauēi Amori ai gulau Sihon awarina, au Heshbon taon, nanare gulau Og awarina ma kauēi.” <sup>35</sup> Ma gulau Og i viraḡeni natunatuna nelarai ma rava anatapui i viraḡena-pai, eḡa aiai ita mae. Ma mai Israel dobuna i vaia da ai dobu.

## 22

### *Balaam Israel ḡaḡalana i geduaiei*

<sup>1</sup> Ma mai Israel i vomairi da Moab au wapuna, Waira Jordan au adana i rauḡaravu, ma au baba ḡelauna Jeriko taon. <sup>2</sup> Ma mai Israel aiwai i kauēi mai Amori awari, Zippor natuna Balak anatapuna i ’nana-pai. <sup>3</sup> Mai Israel i maḡa kua ma lamna aubaina mai Moab i rovo kaukua, rovo ita iraḡelei. <sup>4</sup> Ma mai Moab mai Midian babadai i riwei i pa, “Aburuna ava ma wei patarana aiwai anatapuna au ririvata ina pupuna-pai, me bulumakau au wapu modu e amam.”

<sup>5</sup> Anina ma Moab ai gulau Balak, Beor natuna Balaam ana riwa i paritawanei au Pethor, waira ḡaeḡaena wavana Euphrates au ririvana. Ana riwa wenanare, “Dam tagogi Egyptei i opu, ma dobu anatapuna e vaivaia ma marina au ririvau i rauḡaravu. <sup>6</sup> Tau i virewapana kua eḡa me tau, ma nei ma ravai ma parivai-iviapoapoeni, mepa da tau ravai ana vovaiubai ma wei dobunei ana viaḡaḡana-opunei. Aramanei da maranai tam rava e viviaiai tauna viaiaina e vaivaia ma maranai u parivai-apoapoeni tauna ina apoapoe.”



<sup>7</sup> Ma Midian ma Moab babadai mane i vaia Balaam vimaiana aubaina ma i vomairi. Ma i ġeta Balaam awarina ma Balak ana riwa i pariveri. <sup>8</sup> Balaam ravai i paribelei i pa, “Weka ona matave ma au maratoma BADA aiwai ina riweu ana pariveremi.” Ma babadai kampa Balaam maiteni i mae. <sup>9</sup> God i nei ma Balaam i vitara-virevirei i pa, “Aiavoi i nei awarim?”

<sup>10</sup> Balaam i paribelei, “Zippor natuna Balak, Moab ai gulau wei riwana i paritawaneiai i pa, <sup>11</sup> ‘Ma rautaniġana dam ġaeġaena Egyptei i opui ma dobu anatapuna e vivioai. Ma nei ma aubaiu ravai ma ġaġalei, da maiteni ana viġaiġaiawa ma ana viagagei da ina vinelana.”

<sup>12</sup> Wate God Balaam i riwei i pa, “Eġa maiteni ma nae. Eġa wei ravai ma ġaġalei aubaina Tau au viaiaina awarii.”

<sup>13</sup> Ubaubana Balaam i nae ma Balak ana taupariverena i riwei, “Ona nae me ami au melaġai! BADA eġa ita vianineu da maitemi tana nae.”

<sup>14</sup> Ma Moab babadai i nae me ai bada Balak awarina ma i riwei i pa, “Balaam eġa ita goei da ita nei.”

*Anina ma Balak babada ġaeġaei i paritawanei Balaam awarina. Ma i riwei da pulo ġaeġaena ita verei mepa da tauna ita nei da mai Israel ita ġaġalei. Ma marina God Balaam i riwei da babadai maiteni ita nae Balak awarina ma God aiwai i riwei lamna ava ita kauai.*

<sup>21</sup> Ma ubaubana Balaam i vomairi ana donki i vokaukauei ma Moab babadai maiteni i nae. <sup>22</sup> Wate God amlona i ġaiġai kaua da Balaam i nena, ma ana anela i paritawanei da ana etanai i mae-tomeni. Balaam donki i gerui ma ana taunola ruaġa maiteni i nena. <sup>23</sup> Ma maranai donki BADA ana anela i 'nanai ana sodna au etanai i maimairi ma i tawana-ruiei au ririva. Balaam donki i kwakwapui da ita opu me au etanai.

<sup>24</sup> Ma BADA ana anela etanai ġuriġuririna i mae-potai, Grape ġoroġorovai epaepana ruaġa ġaime i garigaria au poui. <sup>25</sup> Maranai donki BADA ana anela i 'nanai ma ita deġa lamna Balaam aena au gari i viairaturatui. Ma Balaam donki i kwapu-melei. <sup>26</sup> Ma BADA ana anela i nae ma etanai au ġuriġuririna i mairi, weka eġa gabu ita mamae-dadana da tau i ita deġa. <sup>27</sup> Maranai donki anela i 'nanai, i mae-ġaira da i kiala, Balaam amlona i ġaiġai kaua ma ana jiġonei donki i kwapui.

<sup>28</sup> Anina ma BADA donki gamona i votawanei da i babani i pa, “Aiwai apoapoena a kauai awarim da mara tonuġa u kwapui?”

<sup>29</sup> Balaam donki i riwei i pa, “Tam u vikalokalo u me bua! Awariu sod lamna marina ata viraġenim.”

<sup>30</sup> Ma donki Balaam i riwei i pa, “Tau donkina tagogina marana patapatai u gerugerui bo? Wenanare a kauana dadanei awarim bo eġa?”

Balaam i riwa, “Eġa!”

<sup>31</sup> Ma BADA Balaam matana i vikalai da ana anela i 'nanai ana sodna i maimairi au etanai. Ma i mae-ġaira au doa ma i raudune.

<sup>32</sup> Ma BADA ana anela i riwa i pa, “Aiwai aubaina am donki mara tonuġa u ravi? Ma nonori am vaġai lamna eġa aiaina, Tau a nei da ata viġaem.

<sup>33</sup> —Mara tonuġa am donki i 'nanai ma mara tonuġai i deġeu. Mepa da eġa, lamna tau ata viraġenim ma donki ata voterei.”

<sup>34</sup> Ma Balaam BADA ana anela i riwei i pa, “A kauana-boai. Eġa ata aramanei da tam au etanai u maimairi da uta viġaeiu. Marina mepa da u notai da eġa ita ai au matam, tau ana nae me.”

<sup>35</sup> BADA ana anela i riwa i pa, “Ravai maiteni ma nae, wate aiwai ana riwem lamna ava ma latoni.” Anina ma Balaam, Balak ana babadai maiteni i nae.

## 23

*Mara tonuġa Balak pulo i apui Balaam ana god awarina da mai Israel ita ġaġalei. Wate marana patapatai Balaam eġa mai Israel ita ġaġalei. Ma God aiaina ita kauai mai Israel*

*awarii lamna ava i babaniei. Balaam mara 4 God ana babani mai Israel awarii i babaniei. Wei lamna ana babani viruaina.*

- <sup>18</sup> Ma Balaam wei riwana i riwei i pa,  
 “Balak, Zippor natuna ma vomairi;  
 ma Ma rautaniġana kaua.  
<sup>19</sup> God eġa rava ota, Tauna eġa ita morumoru.  
 Bo ana nota ita viravirai.  
 Tauna aiwai i babaniei,  
 nanare ina tupua  
 Aiwai i parivainuaġani;  
 nanare ina kauai.  
<sup>20</sup> I riweu da wei ravai ana viaiaini;  
 maranai God e viaiaina, tau eġa tagotagogina da ana virai.  
<sup>21</sup> BADA ai God  
 tau maiteni e mamae, ma tau e vovoepepai da Tauna ai gulau.  
 Tauna eġa nuabola bo apoapoe ita neinei ai Jacob ġoġoġana - mai Israel awari.  
<sup>22</sup> God tau i Egypte i tere-opunei,  
 Aubai i viġavia me bulumakau moduei.  
<sup>23</sup> Eġa aiai Israel ina ġaġalei,  
 bo ina baravui.  
 Marina rava ina riwa,  
 ‘Ona inana i God aiwai i kauai mai Israel aubai.’  
<sup>24</sup> Mai Israel lamna me Lion vivirewapanana.  
 E vovomairi da ana ġavia e viviraġeni  
 ma tarana e umaumai,  
 Anina ma ina raupapai da ina matave.”

## 24

*Anina ma Balaam mara vi-four-na God riwana i babaniei, i pa:*

- <sup>17</sup> “God i viatataieu da rava muriai e nenei,  
 a inana i wate eġa laġilaġina ita nenei,  
Jacob ana damei gulau ana jiġona  
 Ana borumana me ubona gamrina Israelie e opuopu.  
Moab muruai ma Seth natunatuna  
 anatapai kolai ina viaigwadagwadai.  
<sup>18</sup> Ana ġavia Edom ina vovaiubai  
 ma ai dobu ina vaia,  
 ma mai Israel ina virewapana guratana.  
<sup>19</sup> Gulau, Jacob ana damei ina nei  
 ma mai Moab mae-tereterei ai au melagai ina pupuni.”

## 25

*Mai Israel, Baal i raudunelei*

- <sup>1</sup> Maranai mai Israel au Shittim i mamae, nelara i vikarei da Moab waivinei i viawawanei.  
<sup>2</sup> Wei waivine, nelara i riwei da i nei da ai god awarii puloi i apuapui.\* Ma anatapai i am gogona ma ai godna i raudunelei. <sup>3</sup> Wei kauanei mai Israel Baal-Peor i voepapai ma lamnei BADA ana meji i vikalai.

\* **25:2:** Wei kauai lamna god ġelauna i raudunelei, ma lamnei Moab waivinei ai vitumaġana nanare i eraerawa. Maranai Israel nelara i waivinei maiteni i viviwawana, tau ai god Baal i raudunelei ma i vovogui da ai dobu ita viaiaini da ita maura.

<sup>4</sup> BADA Moses i riwei i pa, “Babadai anata-pui ona vaia ma madegai BADA au matana ona viraġena-naiei, da tau au meji awarimi ina dauva.”

<sup>5</sup> Ma Moses Israel babadai i riwei i pa, “Taumi tagotagoga ava ami au dam anata-pui da Baal-Peor i raudunelei ona viraġeni.”

<sup>6</sup> Moses ma Israel patarana BADA ana numa gara au metaeta i toutou, ma au matai oroto Israeliei wavine Midianei i taravaina-ruiei ana au numa gara. <sup>7</sup> Maranai Aaron ġoġana pirisi wavana Phineas wei kauana i 'nananai, boru i voterei ma pawasi i lavui, <sup>8</sup> ma Israel iei i votaġoi da ana au numa gara ma pawasiei uporana i tonai da wavine au uporana i opu-vivira. Ma dorianana apoapopena au Israel i kwa. <sup>9</sup> Wate wei gimna rava 24,000 i viraġeni.

<sup>10</sup> BADA Moses i riwei i pa, <sup>11</sup> “Aaron ġoġana pirisi Phineas au meji mai Israel awari i viubai; da tau i eġa ata pupuni aubaina tauna ana nota me tau au nota, rava eġa god ġelau i ina voepaepaei anina Tau ava. <sup>12</sup> Lamna aubaina tauna ma riwei da maiteni parivainuagana bagibagina ana kauei da ata ruaġa tana viturana vivira. <sup>13</sup> Tau aubaiu ina vipirisi nonoa.”

## 27

### *God Joshua i vinei*

<sup>18</sup> ✨ Muriai BADA Moses i riwei i pa, “Aruau Nun natuna - Joshua awarina, lamna aubaina ma taravaini ma uram au tepana ma terei da ma vovivirei au nola aubaina. <sup>19</sup> Ma naei Pirisi Eleasar awarina, Israel patarana anata-pui au matai ma ma viaiaini da ina raviepaiem. <sup>20</sup> Ma vovai-virewapani da Israel patarana tauna ina rautaniġane. <sup>21</sup> Tauna Pirisi Eleasar maiteni ina nola da ġaima e ġoreġorei *urim*, \* awarinei au nota ina vaivaia. Wei taunei Eleasar, ma Joshua ina agui Israel ai au lawana.”

<sup>22</sup> Ma BADA aiwai i ririwei, Moses nanare i kauei. Joshua i taravaini ma Pirisi Eleasar ma Israel patarana au naoi i vimairini. <sup>23</sup> Ma urana au tepana i terei ma i vinei da ana raviepaia.

## 33

### *God mai Israel i egari da Canaan ina vaia*

<sup>50</sup> Mai Israel Moab au wapuna, waira Jordan au ririvana i mamae ma, mai Jeriko au baba ġelauna. Ma BADA Moses i riwei, <sup>51</sup> “Wei riwai mai Israel ma riwei, ‘Maranai Jordan o damani da au Canaan, <sup>52</sup> Dobuna taumaenina anata-pui ona viaġaġana-opunei. Ai gana da ai kokoitau anata-pui ona rika-viamoamoai. <sup>53</sup> Dobu a veremi ona vaia, ġariemi da ona maeni. <sup>54</sup> Doa ona ġutai dam damai awarii, au ġaima ina viatataiemi nanare. Doa vounaina dam vounaina ona verei ma dam voaburuna nanare ana ġuta voaburuna. Wate ġaime i ana pariveremi metauna damna, metauna doana ina vaia. Dam anata-pui doa ina vaia.

<sup>55</sup> —‘Wate mepa da nai dobuna taumaenina eġa ona viaġaġana-opunei ma o vianinei da ina mae, tau i lamna me vunavuna au matami bo donadona au ririvami maemaena, ma wei vita ġaeġaena ina veremi wei au doana. <sup>56</sup> Mepa da ravai eġa ona viaġaġana-opunei. Lamna taumi ana pupunimi me a vioge i da tau i ana pupuni.”

✨ **27:18:** Exo 24:13      \* **27:21:** Urim lamna ġaima aburuna. Ma nai ġaemana pirisi e viviatataiei da God ana nota i ririweta. Tauta eġa tata aramanei 29-30 Exodus ma inanai.

## 35

### *Anigagalo melagii*

<sup>9</sup> Ma BADA Moses i riwei i pa, <sup>10</sup> “Mai Israel ma riwei, ‘Maranai Waira Jordan o damani da au Canaan o rui, <sup>11</sup> melagai ḡelau i ona vinei da rava ai anigagalo. Maranai rava turana i vunu-boai da i ’raḡe, tui weka ina ruba da ina gagaloei.’ <sup>12</sup> Ona riwei, ‘Weka ma mae da raubiwa ravai eḡa ina vodadanim ma rauetara ma paini.”

## Deuteronomy Tarawatu Viruaina

### *Pariverena*

Moses wei au *bukana* mai Israel i pariveri menanare ina kauanei maranai au Canaan ina rui da ina vaia da ina viġariei. Moses eġa maiteni au dobuna ina rui ma lamna aubaina i vitauririwei muriai da tauna ita irage. I parivainotai menanare God tau i Egyptei i taravaina-opuneiai ma au mutulua i 'nana-vaitetei. I riwana-melei menanare God ina voteletelana-kauei maranai i rui au Keinan.

Mai Greece ai ponei, wei *bukana* wavana\* anona Tarawatu Viruaina, aubaina Moses marina mara viruaina God ana tarawatu mai Israel e vereveri. Wei lamna eġa tarawatu vouna bo tarawatu tapuna ma tagogina.

## 4

### *Moses mai Israel i egari da God ina voteletelei*

<sup>1</sup> Ma Moses, Israel i riwei i pa, “Mai Israel Ona rautaniġana kua! Au Tarawatu ma au viararamana anapui ona votelatelana-kauei da ona lawana da BADA, noinoita ai God, dobu i vereveremi, ona vaia da ina viġarimiei. <sup>2</sup> BADA ana tarawatu a ririwemi, eġa tarawatu ġelau i tepana ona viruini ma eġa ona vaitawanei. Anina ona voteletelei.”

<sup>6</sup> Tarawatu ona vojijina-kauei da dam ġelau ami nuaulaula ma ami aramana ina inanai. Ma tarawatu ina nonori ma ina riwa, “Riwa kua da dam Israel lamna dam nuanu-aulaulai ma araramani. <sup>7</sup> Ata BADA au ririvata ma e vovoaguita maranai ta raraupari awarina. Metauna damna ġelau, ġaeġae bo muomuoi, ai God nanare ai rava awarii e kaukauei. <sup>8</sup> Tarawatu aiiai ma jijimani anapui amadodo a ririwemi, Eġa mepa dam ġelauna aburuna bo ġaeġaena ana tarawatu jijimanina me wei.”

<sup>32-34</sup> Maranai BADA urana vivirewapananei Egypt ei i tereopunemi, tauna kua babai ma virewapanai i kauei. Mai Egypt i vipupui aubaimi. Ma i vainimi da natunatuna, ma au ola Sinai o nonori awarimi i babani, ma o nonori ai menamena au orana ma awarimi i babani, ma lawalawaimi o mae! Wenanare wariage i tupua dadana awarii bo eġa? Eġa! Ona nae me da au karena, maranai God oroto ma wavine i kauei da marina; ma dobu au giana da dobu ġela au giana ona baiei. Kua wenanare aniba i tupua-dadana bo eġa?

<sup>39</sup> Amadodo ona aramanei ma eġa melanai nuanuami ina vuru da BADA lamna God au mara ma au dobu. Eġa god ġelauna ita mamae. <sup>40</sup> Ana tarawatu amadodo a vereveremi anapuna ona voteletelei. Da aiwai anapuna ina ai taumi ma ami epaepaia au murimi ma ami mae ina manawa wei au dobuna BADA e verevere-nonoemi.

## 6

### *BADA ami God nuanuami ina vaia*

<sup>4</sup> “Ona rautaniġana Oo Israel! BADA ata God, Tauna ava BADA. <sup>5</sup> Nuanuami ina vaia orami anapunei ma aruami anapunei, ma ami rewapana anapunei. <sup>6</sup> Wei tarawatuna amadodo a vereveremi ona vojijina-kauei. <sup>7</sup> Natunatumi ona viararamani. Ona babaniei maranai o viboruboru numa au orana bo o bababara-nae, bo muriai da ona matave bo o matave-vomairi.”

\* :: Deuteronomy ☆ 6:4: Mrk 12:29 ☆ 6:5: Mrk 12:30 ☆ 6:6: Deu 11:18-20

## 7

*BADA ana rava vinevinei mai Israel*

<sup>1</sup> ✧ Ma Moses mai Israel i riwei, “Maranai BADA ami God i ruiemi dobuna i vereveremiana; Tauna au naomi ami ġavia anapui ina viaġaġana-opunei: mai Hitti, mai Girgash, mai Amori, mai Canaan, mai Perisi, mai Hivi, ma mai Jebus. Dam seven ġaeġaei ma vivirewapana kauai eġa me taumi. <sup>2</sup> Ma maranai BADA ami God tau i terei ma o vovaiubai lamna taumi wei ravai ona pupuni. Eġa maiteni aiwai babanina ona kauai; ma eġa ona rau-nuapoapoelei. <sup>3</sup> Eġa awarii ona tavine. Eġa natunatumi gugunii bo laragai ona verei da ina ravaġi. <sup>4</sup> Aubaina natunatumi ina raveni da BADA ina voterei ma god ġelau i raudunelei. Ma BADA ana amloġaiġai awarimi ina nei ma ina pupunimi. <sup>5</sup> Wenanare awari ona kauai. Ai pulo aniapuna ona viairikarikai ma ganai ona viaigwadagwadai; ma Asherah kokoitau i viaigaiġai ma ai au menamenana ona apui. <sup>6</sup> ✧ Aubaina BADA taumi i vinemi ma i viaiainimi Tauna aubaina. BADA rava maġamaġai au dobu ma taumi i vinemi da ġarinei.

<sup>7</sup> —Ma BADA eġa ita rauoġarem ma ita vinem aubaina taumi dam patarana ġaeġaena, eġa me dam ġelau. Riwa kaua da taumi dam aburuoia au dobu. <sup>8</sup> Wate BADA nuanuami i vaia ma parivainuaġana bagibagina noinoimi maiteni i kauai. Ma lamna aubaina urana virewapananei panipani au orana i vai-melemi, Pharaoh - mai Egypt ai gulau awarina. <sup>9</sup> ✧ Ona aramana-kauai da BADA ami God. Tauna ava God ma tauna God vipatutuna ma aiwai e ririwei e kaukauai. Tau i nuanuana e vaivaia ma ana babani e vovoteletelei, Tauna tau i nuanuana e vaivai-kauai ma e viviaiaina-kauai i parivainuaġani nanare da kimta tausan. <sup>10</sup> Wate taumi da BADA o rauaġaiġaiġai; Tauna eġa ina volatelatemi ma ina pupunimi. <sup>11</sup> Nanare taumi ona inana-kauai da tarawatu ma viararamana anapui amadodo a vereveremi ona voteletelei.”

## 8

*BADA ami God eġa nuanuami ina vuru*

<sup>2</sup> Moses ana rava i riwei i pa, “Nuanuami eġa ina vuru; menanare BADA ami God au mutulua i ravenimi da madeġai 40 da volaġota ota aramanei ma orami ana rewapana ita inana. Ma ita aramanei ana tarawatu ona voteletelei bo eġa. <sup>3</sup> Ee nanare! I vaimiraġenimi da o volaġota ma mannei i viambagibagim. Amamami maiteni manna o vinuanainei; eġa mepa ota amdadani. I kauai da ita viararamaniami da rava eġa lam ava awarinei ita mamae, wate riwa anapui BADA gamonei e opuopu.

<sup>12</sup> —Maranai o amam kaua, ma numa aiaii o maemaeni, <sup>13</sup> ma maranai ami bulumakau ma sipu borui e maġamaġa, ma e vivipurapura; ma e maumaura-kaua. <sup>14</sup> Ona inana-kaua da eġa ona mae-ġaeġae, ma nuanuami ina vuru! Da BADA menanare Egypt ei panipani au dobuna i tere-opunemi. <sup>15</sup> I taravaina-naieimi au mutulua ġaeġaena ma vi'nirovovona mota ġaiġaiawai ma tanara ai dobu. Dobu paipairana ma eġa waira. Wate i kauai da kira i ravi ma waira i ruba-opu taumi aubaimi. <sup>16</sup> Au mutulua *manna* i veremi da o am; amamami nai lamna eġa ita am-dadani. Wei lamnei i raudadaniami da ota volaġota; da au damona ami lawana ita ai. <sup>17</sup> Ona inana-kaua da eġa au nuanuami ona riwa, ‘Tauai ai rewapanai ma ai egolei a vipurapura ma a maura.’ <sup>18</sup> Wate BADA am God eġa nuanuami ina vuru aubaina tauna tepanei ta maumaura, ma lamnei parivainuaġana bagibagina noinoimi maiteni i kaukauai e rarauano.”

## 11

### *God aiwai i kaukaueia ona notai*

<sup>18</sup> ✧ Moses mai Israel i riwei, “BADA riwana eġa nuanuami ina vuruvuru ma ae-tuġuna ona rereġi. Ona girumi da au urami ona raġini ma ġelau i au muruami ona raġini ami mataira. <sup>19</sup> Natunatumi ona viararamani, ona babaniei: ami au viboruboru bo maranai o bababara bo o vivilauvitau ma maranai o vovobagibagi.

<sup>26</sup> —Ona inana! Au naomi viaiaina ma kovoġa a tereterei, ma tam am ġoana. <sup>27</sup> Marina BADA ami God ana tarawatu a vereveremi. Mepa da Ona votaġotaġoi; tauna ina viaiainimi. <sup>28</sup> Mepa da ana tarawatu ona geduaiei ma ona mae-taviremi ma god ġelau i ona viborumei; BADA ina kovoġimi. <sup>32</sup> Lamna aubaina tarawatu ma viararamana a vereveremi, ona kauana-kauei da ona voteletelei.”

## 17

### *Gulau vinena*

<sup>14</sup> ✧ “Maranai BADA ami God dobu e vereveremia o ruiruiana, ma o vaia, ma numa o voanaiei da o maeni. Ma ona riwa, ‘Dam ġelau i ai gulau e mamae ma tauta menanare?’ <sup>15</sup> Ona inana-kauei da BADA ami dam nununai awariei ami gulau ina vinevinei, ma eġa dobu ġela ravai ona vinei. <sup>16</sup> Ma tauna eġa ana horse maġamaġau i na ġamoi. Ma eġa rava ina paritawanei au Egypt da horse ina gimarai. Aubaina BADA i riwa da natunatumana eġa melanai ina naeme kampa. <sup>17</sup> ✧ Ma gulau eġa awawana ina maġa, ma eġa gold ma silver ina maurei da nuapouna ina vinua-raġaraġai. <sup>18</sup> Ma maranai i vigulau, tauna pirisi Levi ana damei maiteni ina kiala da nimanei tarawatu bukana ina giruma tauna aubaina. <sup>19</sup> Wei bukana au ririvana ina mae ma ina iava-nonoei ma lamnei BADA ina vivirei ma ana tarawatu ina vipatutuei. <sup>20</sup> Ma lamnei eġa ina terepa-melei ma ana rava ina inana-ġairei bo eġa tarawatu ina mae-puputei ma ina deġa au kelakelauna bo au oiena. Ma tauna ma ana epaepaia ina mae gulau au Israel da kimta maġamaġau i na kwa.”

## 18

### *BADA wei kauai i geduaina-kauei*

<sup>9</sup> Maranai BADA dobu i vereveremiana o ruirui, eġa dobuna taumaeni ai kaua apoapoe ma vinimalamai ona ġovaivaitei. <sup>10</sup> ✧ Eġa melanai:  
 aiai tam natum orotona bo wavinena ma verenei da pulo aubaina ina apui;  
 bo ma vimata gangam, mataira aiwai ma inainanai ma muriai aiwai ina tupua, rava ma ririwei;  
 bo ma parauma;  
 bo ma ġaġala;  
 bo ma vigwerigweri;  
<sup>11</sup> ma eġa konaġa bo arua maiteni ma babani bo arua ma ġorei da ina rui awarim.  
<sup>12</sup> BADA tau i da wei kauai apoapoe e kaukauei, i geduaina-kauei. Ma lamna aubaina aburuna ava Tauna rava wei dobuna maemaiei ina viaġaġana-opunei au naomi. <sup>13</sup> Marana patapatana BADA ami God ona voteletelei. <sup>14</sup> Wei ravai barabaravui ma paraparaumi. Wate aburuna ava da ai doa anatapuna ona kwalei. Ma BADA ami God e viviġaemi da wei ravai eġa ai kaua ona ġovaivaitei.

### *God Peroveta me Moses ina paritawaneiai*

15 ✨BADA ami God, Peroveta me tau ami damei ina paritawaneiai. Taumi nai ravana ona rautaniġanei. 16 Aubaina taumi wei lamna o vivibaġei maranai o vitagogiemi ola Horeb au karena ma o riwa, “Eġa BADA ponana tana nonori bo ai ġaeġaena menamenana tana inana-melei da tana vi’raġeraġelana.”

17 BADA i riweu, “Ai vibaġa i ai. 18 Tau ai damei peroveta ana terepai me tam nanare, Ma riwau au gamona ana terei, da aubaiu ina vitau-vibabani. 19 ✨Tauna wavauei ina jima, ma pariviravirai ana kovoġi. 20 Wate maranai peroveta i mae-ġaeġae ma e ririwa da wavauei e jimajima wate tau eġa babani ata verei, bo god ġelauai aubai e nolanola, Nai perovetana ona viraġeni. 21 Mepa da o vinuanaina, ‘Menanare tana aramanei da lamna eġa BADA ita babani?’ 22 Wenanare ona aramanei. Maranai peroveta i babani BADA au wavanei ma anona eġa ita tupua lamna nai babanina tauna ana babani ma eġa BADA. Lamna tauna ana vinuanotanota, nai ravana eġa ona rovoei.”

## 31

### *Joshua Moses i raviepaiai*

7 Ma Moses Joshua i kwatuei da i nei. Ma Israel patarai au matai i riwei i pa, “Ma virewapana ma tepam ina tora. Tam wei patarai ma ruiei dobu BADA noinoim i verevereiana. Dobuna ma ġutai da Israel dam ma patai ma ma voagui da ina viġariei. 8 ✨BADA Tauoina awarim ina mae ma am etanai ina raveni. Eġa melanai ina netawanem bo ina voterem. Lamna aubaina eġa ma rovo bo oram ina peu!”

## 34

### *Moses i ’raġe*

1 Ma Moses Moab wapuna i netawanei ma ola Nebo i ġaeni da au tepa dewadewana e ġoreġorei Pisgah, ma au navanava ġelauna lamna Jeriko. Weka au Pisgah BADA Moses dobu anatapuna i viatataiei, au Gilead i vikarei da i ġae au Dan. 2 Ma dobu Naphtali, dobu Ephraim ma dobu Manasseh, dobu Judah, ma i nae da au Mediterranean bogana. 3 Ma BADA Moses mutulua e ġoreġorei Negev i viatataiei; ma Jordan gaubana da i nae da au Jeriko da i nae da au uama Zoar melagaina. 4 ✨Ma BADA i riwa, “Wei dobuna lamna Abraham, Isaac ma Jacob a parivainuaġani da ‘ami epaepaipaia ana verei.’ A voterem da dobu matamei u inana, wate au dobuna eġa ma rui.”

5-9 Muriai Moses urana Joshua, Nun natuna au kolana i terei ma i viaiaini ma nuaulaula orana i ruini. Ma lamna aubaina mai Israel Joshua i voteletelei Moses i ririweia nanare. Ma BADA ana taunola Moses, i ’raġe mai Moab ai au dobu, BADA i ririwei nanare.



# Joshua

## *Pariverena*

Wei *bukana* e ririweta da menanare mai Israel i rui au Canaan da rava kampa maemaei i vovaiubai. Ma nanare e ririweta da mai Israel menanare dobu i ġutanei ai dam 12 awari. Wei *bukanawavana* Joshua aubaina bukana au karena e ririweta da aiwai aubaina da Joshua i terei da mai Israel ai bada, maranai Moses i 'raġe.

## *BADA, Joshua i vinei*

<sup>1</sup> Maranai BADA ana taunola Moses i 'raġe; ma Joshua, Nun natuna ma Moses ana tauagu i riwei, <sup>2</sup> “Au taunola Moses i 'raġe. Marina mai Israel maiteni ona vokaukua ma Jordan ona damani da dobu a vereveremiana kampa ona ġeta. <sup>3</sup> Metaui dobu ae-lapalapami o terei, lamna ina viġarimie, Moses wenanare a parivainuaġani. <sup>4</sup> Ami dobu lamna mutulua Negev da Lebanon; au waira Euphrates (au maramatanei) da mai Hitti ai dobu anatapuna da i ġaira madeġa e arearere lana Mediterranean au bogana. <sup>5</sup> ✧Eġa aiai ina vobelem bo ina viubaim am au lawana. Tau awarim ana mae, me Moses awarina a kaukauei nanare. Tau eġa melanai ana tere-ġairem bo ana voterem.

<sup>6</sup> ✧—Parivainuaġana bagibagina a kauie wei ravai noinoii maiteni da wei dobuna ana verei. Lamna aubaina ma virewapana ma tepam ina tora ma am rava ma ruiei wei au dobuna. <sup>7</sup> Anina ma virewapana ma tepam ina tora; ma nuanuam eġa ina vuru da tarawatu Moses i verem, anatapuna ma voteletelei. Ma ma vojijina-kauie da awarina eġa ma deġa au oiem bo au kelakelaum da aiwai anatapuna e kaukauei ina ai. <sup>8</sup> Marana patapatai wei tarawatuna ma iaiavi. Ma marai da waguvarai ma vinua-notenotei; wei lamnei tarawatu anatapuna ma aramanei. Mepa da wenanare ma kauie lamna tam ma maura ma nuaiai ġaeġaena ma nelaġai kaua au anatapuna.”

## 5

### *Raġona naona au Canaan*

<sup>10</sup> ✧Mai Israel au Gilgal i mae Jeriko au wapuna. Ma Aupom vi-14-na aubigai nawaravi naona tau i raġona torelana i apui. <sup>11-12</sup> ✧Ma ubaubanai ġelauna, raġona au murina, tau i witi au wapu i tuarui ma palawa dabadabai i apui ma i am. Ma ubaubanai ġelauna Manna raua i voterei, tau i wei lamna eġa ita am-melei, ma ai lam wapuei i tuarui. Mai Israel eġa manna ita am-melei, lam ai au doa au dobu Canaan i vaia da i amam.

## 24

*Muriai Joshua ma mai Israel mai Canaan maiteni i viġaiġaiawa, dobu au giana da au giana. Ma dobuna ravai i viragēni, wate ġelaui eġa ita viragēni ma maiteni i mae. Muriai Joshua dobu i ġutai Israel ana dam twelve awari. Tau i nae ma ai doa i maeni melagai nonoana mai Canaan i voavoai. Madeġa maġamaġai i kwa ma Joshua mai Israel i vitagogiana-melei.*

### *Mai Israel i riwa da BADA ina vitaunolei*

<sup>1</sup> Muriai Joshua dam anatapui i ġorei da au Shekem ita vitagogiei. Maranai kampa i ġeta Joshua, dogadogara, dam babadai ma melagai babadai i ġoreiai da ita nae BADA au naona ita mairi.

<sup>2</sup> Joshua rava anapui i riwei i pa, “BADA mai Israel ai God e ririwa, ‘Wariağa noimi Terah ma natunatuna Abraham ma Nahor waira Euphrates au baba ġelauna i mae, ma god maġamaġai i reraudunelei. <sup>3</sup> ✧Wate noimi Abraham nai dobune i a vaitawane i ma i naiei da Canaan doana ana tapuna a viatataiei, ma ana epaepaia a vimaġai. Ma natuna Isaac a verei.

<sup>13</sup> —‘Tau dobu a veremi ana debagauna ma ana peipeina, doana eġa ota nolei ma taon gaeġaei a vereoimi, marina o maemaeni, eġa ota voai, ma grape ma olive o amam wate eġa, taumi ota paewi.’

<sup>14</sup>—Lamna aubaina BADA ona voteletelei ma orami taputapune i ona vipatutu. Noinoimi god morumorui kokoitau, i reraudunelei au Egypt bo au waira Euphrates ona kwajiei au modu ma BADA ainelana ona viborumei. <sup>15</sup> Wate mepa da BADA viborumeina o geduaiei, lamna amadodo ona vine da noinoimi ai god waira Euphrates au baba ġelauna bo marina ravai ai au dobu o mamae mai Amori ai god ona nolei. Wate tau au numa ravai maiteni BADA ana viborumei.”

<sup>16</sup> Ma rava i paribelei, “Tauai eġa melanai ai BADA ana voterei ma god ġelau ana viborumei. <sup>17</sup> BADA ata God tauoia au Egypt i tere-opuneta noinoita maiteni maranai au Egypt ta vilaraga. Ma kua vivirewapanai ma aniba i kauei au mataiai. Ma ai au vaġai manamanaina i painiai dam ġelau au poui da wei au paratana. <sup>18</sup> Mai Amori ma dam ġelau wei au dobuna i mamae wate BADA aubaiai ravai i viaġaġana-opune. Lamna aubaina tauai BADA ana borumei, aubaina tauna ainelana ata God.”

## Judges Taurauetara

### *Pariverena*

Wei au bukana Joshua ana iraḡe marana ma i nae da Samuel ana tupua marana e ririweta.

### **Vinevinena**

Joshua au murina aiwai i tupua (Jdg 2:7-19).

## 2

### *Joshua au murina*

<sup>7</sup> Mai Israel BADA i viborumei maranai Joshua lawalawaina i mamae ma i 'raḡe ma kimtana magumagurii biaḡa i mamae i 'raḡe-pai, wei ravai BADA kua gaeḡae i kauai i vimatemei.

<sup>8</sup> Nun natuna - Joshua BADA ana taunola ana madeḡa 110 ma i 'raḡe. <sup>9</sup> Ma doa i vereverea au Timnat Herek i doboi, Ephraim au olana, wei lamna Ola Gaash ana au laubadei.

<sup>10</sup> Anina ma wei kimtana i nepai amamai awarii ma kimta ḡelauna ai gabu i vaia. Wate tau BADA eḡa ita aramanei ma nanare aiwai i kauai mai Israel aubai. <sup>11</sup> Ma kua apoapoei i kauai BADA awarina ma Baal kokoitau i raudunelei. <sup>12</sup> Tau BADA amamai ai God i votere-tawanei; Wei Godna tau Egypte i taravaina-opunei. Ma i nae ma dobuḡela ravai au ririvai maemaei ai god i viborumei. Wei kauana BADA i viamlo-ḡaiḡaini. <sup>13</sup> Tau BADA i voterei ma Baal ma awana Ashtoreth kokoitau i viborumei. <sup>14</sup> Ma BADA amlona i ḡaiḡai kua mai Israel awari, da i veredamanei ai ḡavia awari ma tau ai purapura i tama-naiei. Ma i voterei ai ḡaviai maḡamaḡau ai ririvai awari, ma tau eḡa tagotagogina da ita vobei. <sup>15</sup> BADA mai Israel i viḡaviei maranai i opuopu viḡavia aubaina. Lamna aubaina eḡa ita vovaiuba BADA i ririwei nanare. Ma tau i vinuabola kua.

<sup>16</sup> Anina ma BADA taurauetara bo ḡavia babadai i terepai, da i voagui da ai ḡavia i vovaiubai. <sup>17</sup> Wate tau ai taurauetara i parivirevirei ma god ḡelau i erawei ma i raudunelei. Tau laḡilaḡina amamai i bababara lana i voterei ma BADA i rau-aḡaiḡaiei. <sup>18</sup> BADA mai Israel ai tou i nonori menanare ai ḡavia tau i rau-iviapoapoei. BADA taurauetara i terei ma i voagui ma i gagaloei. Maranai taurauetara i mae, BADA mai Israel i raunuapoapoei. <sup>19</sup> Wate maranai taurauetara i 'raḡe, rava, BADA i mae-puputei ma i apoapoe kua eḡa me amamai nanare ma god ḡelau i vitaunolei ma i raudunelei. Tau i geduai kua da ai kauai apoapoei ma ai ora pota ita voterei.

*Mai Israel kua apoapoei i kaukauei lamna ai parivainuaḡana bagibagina BADA maiteni i kaukauei i viviaigai. BADA amlona i ḡaiḡai ma ana nota i terei da mai Israel ita raudadani da ita voagui da dobuḡela ravai ita viaḡaḡana-opunei. Dobuḡela ravai mai Israel i raudadani da tau BADA ina votaḡotaḡoi bo eḡa me amamai i kauai nanare.*

# 1 Samuel

## Samuel ana buka tagogi

### Pariverena

Buka 4 ma Samuel ana buka i vinoa da Israel ma Judah ai vigulau riwana i parivereta, Samuel tauna wavana naenaena wei bukana tagogi au orana. Tauna mai Israel ai *taurauetara* damona. Tauna, Saul ma David au kolai monamona i waği da i vigulau, lamna aubaina wei bukana i viwavai Samuel. Wei bukana mai Israel ai kaua e bababaniei i nae da Saul ana au iraġe.

#### Vinevinei

Samuel ana tupua (1; 2:1-11; 3:1-21)

Mai Israel gulau i vibaġei (8:1-22a)

Samuel Saul i buloi (9:1-3, 15-16, 10:1-2, 5-24)

Saul i vivibada (11:14-15; 13:13-14; 15:1-4)

BADA Saul i geduaiei (15:7-23, 27-29, 34-35)

Samuel David i buloi (16:1-7)

Saul David i unurei (18:7-9)

David Saul i ruba-tawanei (21:1-6)

Saul ana iraġe (31:1-5)

#### *Samuel i tupua*

<sup>1</sup> Oroto tagogi wavana Elkanah, ana dam Ephraim ma ana melaġai Ramah, Ephraim au olana i mae. Elkanah amana Jeroham, ġoġana Elihu ma noina Tohu, ma ai bariawa Zuph, ai dam Ephraim. <sup>2</sup> Tauna awawana ruaġa Hannah ma Peninah. Peninah i vinatuna ma Hannah aipoi.

<sup>3</sup> Madeġana patapatana Elkanah Ramah i netawanei ma i nae au Shiloh da BADA VIVIREWAPANA KAUKAUANA ita voepaepai ma pulo ita apui awarina. Weka Eli natunatuna Hophni ma Phineas BADA ana pirisi pulo tauapui i mae. <sup>4</sup> Maranai Elkanah pulo i apuapui ma sia sikasikana i ġutai da awana Peninah ma natunatuna i patai. <sup>5</sup> Wate awana Hannah sia vinevinena i verei aubaina awana nuanuana i vai-kauei avena da BADA i kauei da tauna aipoi. <sup>6</sup> BADA Hannah manawana i gudui ma lamna aubaina turana i vivinamei ma i vivijiboġa-nonoei da ita vinuabolai. <sup>7</sup> Wei kauana i mae madeġana patapatana. Maranai Hannah i nae BADA ana au numa, Peninah tauna i vivinuabolai ma i vitoutouni da eġa ita amam. <sup>8</sup> Maranai Elkanah awana Hannah i paripari-dadanei, “Hannah aiwai e toutouei? Aiwai aubaina eġa uta amam? Aiwai aubaina e vivinuabola, natunatum eġa lamna e vivinuabolei bo? Tau weka! Natunatum nelarai 10 epai!”

<sup>9-10</sup> Mara tagogi maranai tau i am vorovei BADA ana au numa au Shiloh, Hannah orana i viara kaua ma ana toutouna BADA awarina i raupari. Pirisi Eli kampa ana au gabu tempol au metaetana i kiakiala. <sup>11</sup> Ma i parivainuaġana i pa, “Oo BADA VIVIREWAPANA KAUKAUAM. Ma inanaiu am taunola au ora-tou uta inanai! Ma uta notaiu ma eġa nuanuam ina vuru. Mepa da natu orotona uta vereu lamna teverana ana veremelem da ina vilaragem ana au lawana au anapapuna, ma aparana eġa ina bori-dadanei.”

<sup>12</sup> Ma i raraupari BADA awarina ma Eli tauna ipirina i 'nainanai. <sup>13</sup> Hannah au nuanuana i raraupari ma ipirina ava i vidagudagu wate eġa babani ita opuopu. Ma Eli i notai da tauna i uma-bua, <sup>14</sup> ma awarina i riwa, “Ina baem bo, uma bua ma voterei!”

<sup>15</sup> Wate Hannah i paribelei, “Eġa nanare au bada tau eġa waira bagibagina ata umai, tau au nuabola i rata kaua ma lamna aubaina a toutou BADA awarina. <sup>16</sup> Wenanare a raraupari aubaina nuanuau i bola-kauei ma eġa ma notai da tau wavine apoapoeu.”

<sup>17</sup> Eli i paribelei, “Ana nuaubam ma nae! Ma BADA Israel ana God am vibaġa ina kauei.”

<sup>18</sup> Tauna i paribelei, “Au bada egualau kua ma eġa ma nota-boaiu.” Ma i nae ma i am da orana i uba.

<sup>19</sup> Ma ubaubanai boiboġi Elkanah ana numa ravai i vomairi ma i nae da BADA i raudunelei ma i ġaira me au Ramah. Elkanah awana Hannah maiteni i matave ma BADA wavine ana pari i paribelei. <sup>20</sup> Hannah i duama ma natuna orotona i ġuni ma wavana i ġorei Samuel ma i riwa, “Wei lamna aubaina BADA a vibaġai.\*”

### *Samuel i puloei BADA awarina*

<sup>21</sup> Ma madeġa ġelauna i ġetai ma Elkanah ana numa ravai maiteni i ġae au Shiloh da pulo ita apui BADA awarina ma pulo ġelauna BADA i parivainuaġani ita kauei. <sup>22</sup> Hannah eġa maiteni ita nae ma awana i riwei, “Maranai tevera ina eda ma ana ġaiei BADA ana au numa ma kampa ina mae-nonoa.”

<sup>23</sup> Elkanah i paribelei, “Ee nanare aiwai e notanotai da i ai ma kauei, ma weka ma mae da tevera ina eda. Ma BADA ina voaguim da am parivainuaġana anona ina tupua.” Ma wavine au numa i mae da natuna i eda.

<sup>24</sup> Maranai tevera i viedai ma alona i naiei au Shiloh, bulumakau orotona ana madeġa tonuġa, palawa baikena tagogi ma wine wagina ġaeġaena maiteni. Avena da tevera melamelana ma alona i naiei da Eli au urana i terei. <sup>25</sup> Ma burumakauna i apui God awarina ma tevera i naiei Eli awarina. <sup>26</sup> Ma Hannah i riwa, “Oo BADA e notanotai rorova tau weka a raraupari BADA awarina. <sup>27</sup> BADA a vibaġai wei teverana aubaina ma a vivibaġei i vereu. <sup>28</sup> Lamna aubaina marina natu a vereveri BADA awarina. Ana lawana anapuna BADA ina verei.” Ma kampa tau BADA i voepaepai.

## 2

### *Hannah ana voepaepa*

<sup>1</sup> Ma Hannah i raupari BADA awarina i pa,  
Tau a vinuai ai kua BADA awarina;  
Tauna rewapana i vereu.

A vinuai ai aubaina Tam u vilawaniu  
ma lamna aubaina au ġavia a vivinamei.

<sup>2</sup> Oo BADA eġa aiai ġelauna vivivireina me tam;  
eġa mepa god ġelau i anina tam ava;  
eġa taugagalo ġelauna me tam, ai God.

<sup>3</sup> Tau a ririwa, “Vogulagulau ma pari-gulagulau ona voterei;  
Mae-ġaeġae babanina ona voterei.  
Aubaina BADA ami kua anapui e araramanei  
ma ina kovoġimi.”

<sup>4</sup> BADA Tam sorodia vivirewapanai ai pidu u viaigaigai;  
wate vovokokarai u vovai-virewapani

<sup>5</sup> Amam iauai marina ina nola da ina am;  
am-irairaġei eġa am ina iraġe.

Wavine aipoina roaroa 7 i ġuni;  
wate roaroa maġamaġau aloi i netawanei ma tauna ava e mamae.

<sup>6</sup> BADA, iraġe ma lawana e neinei ai;  
Tauna rava au kokoaga e teretere-ġairei ma e vovovai-mairini.

<sup>7</sup> BADA rava ġelau i vivimaurai ma ġelau i vivigomari;  
ma ġelau i teretere-ġairei ma ġelau i teretere-ġaiei.

<sup>8</sup> Tam rava molamolakai pokau au orana e sinasina-epai;

\* **1:20:** Samuel pona Hebrewi nonorana me God awarina agu i vibaġei.

ma rava vigigimanai loḡiloḡi au orana e sinasina-epai; da gulagulau maiteni e kiakiala ma vigulau tau i ina viḡariei.

Dobu anapuna tam ḡarime; ma aiwai anapuna ana au animae u terei

<sup>9</sup> Tam am rava patupatutui e gagagaloei; ma apoapoe taukauei e amoamoā au iraḡe Rava eḡa ai rewapanei ita vovaiuba;

<sup>10</sup> Tam am ḡavia ma pupuni; am meji ina viarapawa me waiparara

BADA tam dobu ma rauetarei ma am gulau ma vovai-virewapani, ma am vinevine bulobulona ina virewapana kaua.

<sup>11</sup> Elkanah natuna Samuel i voterei ma i nae me ana au melagau au Ramah. Samuel pirisi Eli au urana i mae au Shiloh ma BADA aubaina i vitaunola.

*Maranai Samuel i rarata tauna au numa gara i vovoagu da God ana nola i kaukauei. God ma rava Samuel ana nola i ḡoana-kauei. Eli natunatuna ruaḡa pulo tauapui, pirisi apoapoei. Maranai rava i nei da ai ḡoa apoapoe aubaina pulo i apui BADA awarina, tau i wei siai vovivirana i voviviri da i amam. Ma lamna aubaina Bada peroveta i paritawanei da Eli i riwei da tauna natunatuna eḡa ita vinua-terenei aubaina ḡo'apoapoe i kaukauei, ma natunatuna ina viraḡena ruaḡei. Wei au murina Eli ana epaepaia laragai ma anapui ina iraḡe-pai.*

### 3

#### *BADA Samuel i ḡorei*

<sup>1</sup> Wei au marai BADA eḡa rava awari ita bababani bo ai au rauboni bo ai au inana ita vivieḡana-melei, mara tagotagogi ava wei i tuputupua. Tevera Samuel Eli i voagui ma BADA awarina i vitaunola.

<sup>2</sup> Eli matana i apoapoe kaua ma eḡa ita inainana kaua. Ma waguvara tagogi ana au gabu i matamatave. <sup>3</sup> Ma Samuel BADA ana au numa i matamatave Parivainuaḡana bokisina au ririvana ma God ana rampa au Gabu vivivireina i ararata. <sup>4</sup> Ma BADA Samuel i ḡorei, “Samuel!”

Ma Samuel i paribelei i pa, “Ee tau weka!”

<sup>5</sup> Ma i vomairi ma i ruba Eli awarina ma i riwa, “U ḡoreu da a nei.”

Eli i riwa, “Eḡa ata ḡorem, ma nae me da ma matave.”

<sup>6</sup> Ma BADA i viḡore me, “Samuel!”

Samuel i vomairi me ma i ruba Eli awarina ma i riwa, “U ḡoreu da a nei.”

Eli i riwa, “Natu tau eḡa ata ḡorem ma nae me da ma matave.”

<sup>7</sup> BADA eḡa Samuel awarina ita babani dadana lamna aubaina ponana eḡa ita aramanei.

<sup>8</sup> Anina ma mara vitonuina BADA i viḡore ma Samuel i vomairi ma i nae Eli awarina ma i riwei, “U ḡoreiu da a nei.”

Anina ma Eli i aramanei da lamna BADA tevera i ḡoreḡorei. <sup>9</sup> Ma Samuel i riwei, “Ma nae me da ma matave. Mepa da ina viḡore me lamna wenanare ma riwei, ‘BADA ma babani, am taunola a rarautaniḡana.’”

Anina ma Samuel i nae me da i matave.

<sup>10</sup> Ma BADA i nei ma i mairi ma i viḡore me au naona i kaukaueia nanare, “Samuel, Samuel!”

Samuel i paribelei i pa, “Ma babani am taunola a rarautaniḡana.”

<sup>11</sup> Ma BADA Samuel i riwei, “Tau kaua vivi-inirovorovo kaukauana ana kauei mai Israel awarii ma maranai rava riwana ina nonori tau i orai ina sisi. <sup>12</sup> Rorova a riwa nanare, Eli

ana numa ravai maiteni ana kovoḡi. <sup>13</sup> A riwana-guratei da ana numa ravai ana kovoḡa-nonoēi aubaina natunatuna i vijiboḡiu ma i vinimalamalaiu ma tauna natunatuna i vibae-naenaēlei. <sup>14</sup> Riwa bagibaginei a ririwa da Eli ana numa ravai ai ḡo'apoapoe eḡa melanai ana nota-tawanei. Avena da pulo ina apui awariu."

<sup>15</sup> Samuel ana au aravi i mae da mara i tom ma BADA ana numagara metaetai i votawatawanei. BADA aiwai Samuel i riwei tauna i rovo da Eli ita parivere. <sup>16</sup> Wate Eli Samuel i ḡorei i pa, "Samuel natu."

Ma i paribelei i pa, "Tau weka."

<sup>17</sup> Eli i paridadana, "BADA aiwai i riwem? Anatapuna ma riweiu ma eḡa lamna BADA ina kovoḡa-guratem!" <sup>18</sup> Anina ma Samuel anatapuna i riwei, eḡa aiwai ita tajijini. Ma Eli i riwa, "Tauna BADA, ma aiwai awarina i jijimana ina kauēi."

<sup>19</sup> BADA Samuel i mae-ratui maranai i rarata ma Samuel aiwai i ririweia ma nanare i tuputupua. <sup>20</sup> Ma Israel au giana da au giana, au Dan i vikarei da au Beersheba, anatapui i aramane i da Samuel lamna BADA ana peroveta. <sup>21</sup> Mara i maḡa BADA au Shiloh Samuel awarina i eḡa ma i babani.

## 8

### *Mai Israel Gulau i vibaḡei*

<sup>1-2</sup> Samuel natunatuna ruaḡa, natuevou wavana Joel ma umauna Abijah. Maranai Samuel i magura ma natunatuna i vinei taurauetara au Israel ma i terei da au Beersheba i nola. <sup>3</sup> Wate tau i eḡa amai ana kua ita vaia ma ai nuavaina mane ma lamna aubaina mane i gwalai ma rauetara i vibarai.

<sup>4</sup> Ma lamna aubaina Israel babadai i riei Samuel awarina au Ramah. <sup>5</sup> ✧ Ma i riwei, "Ma rautaniḡana bada! Tam u magura ma natunatum eḡa am kua ita ḡovaivaitei. Ma lamna aubaina tauai a ḡoei da gulau ma verelai da ina raveniai, me dobu ḡelau i ravai e kaukauei nanare."

<sup>6</sup> Wate maranai wenanare i riwa Samuel eḡa ita vinuai i dadana, ma i raupari BADA awarina. <sup>7</sup> BADA i paribelei i pa, "Aiwai anatapuna ravai e ririwem ma kauēi, tau i eḡa tam ita geduaiem wate Tau ai gulau i geduaiēu. <sup>8</sup> Maranai Egypte i teretere-opunei da wei paratana, tau i marana patapatana i mae-puputeu ma god ḡelau i raraudunelei; marina nanare tam awarim e kaukauei. <sup>9</sup> Ai ḡoana ma verei wate riwa bagibaginei ma riwei menanare gulau ina kauanei tau i awari."

<sup>10</sup> Samuel BADA ana babani anatapuna tau i gulau i vivibaḡei i riwei <sup>11</sup> i pa, "Maranai gulau ina vibademi lamna awarimi wenanare ina kauēi. Tauna natunatum i ina tama-naiei sorodia da ana chariot ma ana horse ina gerui ma ḡelau ana chariot au naona ina ruba. <sup>12</sup> ḡelau sorodia 1,000 ma ḡelau 50 ina vibadei. ḡelau ana wapu ina ipiei ma ana lam ina tuarui. ḡelau ḡavia apiai iramei ma chariot iramai ina kaukauei. <sup>13</sup> Gulau, natunatum i guguinii ina egari da ana monamona ḡabuḡabui ina kaukauei ma ḡelau ana palawa ina apuapui ma ana taulauvoa. <sup>14</sup> Am wapu ma grape wapu ma nanare olive wapu aiiai avavai ina vaia da ana gabemani babadai ina verei. <sup>15</sup> Ma maranai ami witi ma grape ma olive o tuarui ma ḡuta 10 ona terei ma tauna ḡuta tagoḡi ina vaia ma ana gabemani babadai ina ḡutei. <sup>16</sup> Ami laraga nelarai ma guguini ma am bulumakau ma donkey vinevinei ina vaia tauna aubaina. <sup>17</sup> Ma ami sipu ma gote ḡuta 10 o terei ma tauna ḡuta tagoḡi ina vaia tauna aubaina, ma taumi ina vainimi ana taunola. <sup>18</sup> Maranai wei kauai i tupua ma ona tou guratana BADA awarina da gulau taumi o teretere i awarimi ina vaitawanei, wate BADA eḡa ina voaguimi."

✧ 8:5: Deu 17:14

<sup>19</sup> Wate rava Samuel ana babani bagibagina eġa ita rautaniġanei. Tau i riwa, “Tauai anapupiai a ġoei da gulau ina vibadelai, <sup>20</sup> da tauai me dobu ġelau ravai nanare ma ai gulau ina raveniai ma ana opu viġavia aubaina.”

<sup>21</sup> Anina ma Samuel BADA i riwei aiwai ravai i ririweia <sup>22</sup> ma BADA i paribelei i pa, “Ai ġoana ma kauei, gulau ma verei.”

Ma Samuel ravai i paritawanei ai au numa.

## 9

### *Samuel, Saul i buloi gulau*

<sup>1</sup> Benjamin ana au dam rava tagogi wavana naenaena ma manemanena i mae wavana Kish. Tauna amana Abiel, ġoġana Zeror ma noina Bekorath ma ai magura Aphiah, Benjamin ana damei. <sup>2</sup> Kish natuna Saul i tupua kua ma laraga inanana aiaina eġa me laraga ġelau au Israel, ma tevera ae manawa.

<sup>3</sup> Maratagogi Kish ana donkey i kwako ma natuna Saul i riwei, “Am taunola ma taravaini ma ona nae donkey ona baiei!”

*Saul ma ana taunola donkina i baiana-guratei wate eġa ita nelaġai ma i nae da peroveta Samuel ita raugenari da ita vibaġai da mepa donkey ita baiei.*

<sup>15</sup> Ma maratamna da Saul ana taunola maiteni ita ġeta Samuel awarina, BADA Samuel i riwei, <sup>16</sup> “Wenanare marana au maratam oroto laragana Benjamin ana damei ana paritawaneiai. Olive monamonanei kolana ma buloi da ina vimataira da tauna a tereriei da au rava Israel ina vibadei. Tauna mai Israel ina voagui da mai Philistia ina vovaiubai. Au rava mai Israel a inanai i vinuapoapoe ma ai tou awariu agu aubaina a nonori.”

## 10

<sup>1</sup> Ma Samuel olive monamonana wagina i vaia ma monamona i waġi Saul au kolana. Ma i vigia-laġolaġonei ma i riwei, “Wei a kaukauei aubaina BADA i terem ana rava vinu-alauna Israel ma vibadei. <sup>2</sup> Amadodo rava ruaġa ma nebelei Rachel ana kokoaga au ririvana au Zelsah, Benjamin ana au dobu. Tau i riwem, ‘Donkina o baibaiei i nelaġai. Ma marina amam eġa donkey ita baibaiei wate tam e vivinuabolem, e pariparidana, Menanare natu ana nelaġanei.’

<sup>5</sup> —Ma ona nae God ana au Gibeah ola aburuna, weka mai Philistia ai sorodia i rauġaravu. Ma ona ruirui au taon ma Peroveta borui olei ina ġaiġairai. Tau i gitar\* ma harp, tambourine ma duraio ina vikalokaloei ma BADA ana babani ina garagararei. <sup>6</sup> BADA Aruana Vivivireina ana rewapanana oram ina naeni da ina vibadem, ma tau i maiteni BADA ana babani ona jimei. Ma oram ina ravivouni da tam me rava ġela. <sup>7</sup> Maranai wei kau i i tupua, aiwai BADA e viviatataiem ma kauei.”

<sup>8</sup> Samuel i riwa, “Tam ma vnao au Gilgal, ma kampa ana nebelem da ġamoġamo ana vunui ma taputapuna ana apui ma ġamoġamo ġelau ana apui viturana pulona. Wate kampa ma vipaipai aupom 7 da ana ġetai ma riwa ġelau ana riwei.”

### *Saul i terei gulau*

<sup>9</sup> Ma Saul i mae-tavirei da i nena ma God ana nota i ruini ma orana i ravivouni. Wei marana aiwai anapupuna Samuel i ririwei i tupua. <sup>10</sup> Maranai Saul ana taunola maiteni au ola Gibeah i ġeta, peroveta borui i ’nanai i nenei awarii. Anina ma God Aruana Saul i ruini ma i vibadei da tauna maiteni God ana babani i garagaraei. <sup>11</sup> Maranai ravai Saul i araramaneia Saul i ’nanai peroveta au borui i jimajima tau i orai i auepai ma ai rava i ririwei, “Riwa kua bo aiwai i tupua Kish natuna awarina? Saul i viperoveta bo?”

\* 10:5: Eng. lyre



<sup>12</sup> Ma nai dobuna ravana i paribelei i pa, “Amana aiai lamna avena aubaina maraḡela ravarava ota e viviperoveta.” Anina ma wei babanina i mae kampa, “Moina riwa kaua da Saul peroveta?” <sup>13</sup> Ma Saul jima i voterei ma i ḡae au ola au dobu vivivireina.

<sup>14</sup> Muriai maiana Saul ana taunola maiteni i nelaḡai ma i paridadanei i pa, “Mepa o nae?” Saul i riwa, “Donkey a baibaiei ma a baiana-avei da a nae Samuel awarina da ata paridadanei ḡamoḡamoi mepa.”

<sup>15</sup> Maiana i riwa i pa, “Ma riweu Samuel aiwai i riwem.”

<sup>16</sup> Saul i paribelei, “I riwelai da donkina i nelaḡai.” Wate maiana eḡa ita riwei Samuel aiwai i riwei, da tauna ina vigulau Israel aubaii.

<sup>17</sup> Muriai Samuel mai Israel anatapui i ḡorei da ita riei au Mispa da BADA riwana ita nonori. <sup>18</sup> Ma Samuel i riwa, “BADA Israel ai God wei e ririwemi, ‘Tau noinoimi mai Egypt vivirewapanai au urai a vaitawanei. Ma a neiaimi wei au dobuna ma nanare ami ḡavia au ririvami a vovaiubai. <sup>19</sup> Wate amadodo tau ami God o geduaiei, i kauana-guratei ami au nuabola ma ami au piripiri.’ Ma o riwa, ‘Eḡa! Tauai gulau a ḡoeḡoei da ina vibadelai! Lamna aubaina dam damai ona opui tau ami BADA au naou.”

<sup>20</sup> Maranai Samuel damdamai i neiai BADA au naona ma BADA Benjamin ana dam i vinei. <sup>21</sup> Ma Benjamin ana dam i neiai au naona ma BADA Matri ana epaepaia i vinei ma kampa BADA Kish natuna Saul i vinei. Ma maranai i baibaiei tauna kampa eḡa. <sup>22</sup> Ma lamna aubaina i raupari BADA awarina, “Tauna mepa?”

BADA i paribelei, “Tauna kampa purapura au orai e raraugovaḡa.”

<sup>23</sup> Tau i nae da i taravaini da i neiai, tauna rava aena manamanaina ma i mairi ma rava anatapui i votani. <sup>24</sup> Samuel rava anatapui i riwei, “BADA rava i tereriei da ami gulau, o inainai bo eḡa? Eḡa aiai ḡelauna au orata me wei orotona.” Ma rava anatapui i garara, “Gulau ana lawana ina manawa.”

## 11

### *Saul ana vigulau i vianinei*

<sup>14</sup> Muriai Samuel mai Israel i riwei, “Ona nei ma anataputa tana nae au Gilgal ma Saul ana vigulau tana vianinei ma tana amei. <sup>15</sup> Anina ma anatapui i nae au Gilgal ma BADA i voepaepai ma i riwei da Saul lamna tau ai gulau. Ma tau viturana ma mae-kaua pulona i apui Bada awarina ma mai Israel siana i am ma i uma ma i vinuaiai-kaua.”

*Saul ana madeḡa 30 maranai i vigulau. Tauna sorodia mai Israel i rau-etaraveni da mai Ammon maiteni i viḡaiḡaiawa da i vovaiubai. Muriai tau mai Philistia maiteni i viḡaiḡaiawa, Wate nai ravai ai sorodia i maḡa guratana aubaina da mai Israel i rovo. Saul i vipaipai da Samuel ita nae da BADA ita puloi ma muriai ita nae ita viḡaiḡaiawa. Wate Samuel eḡa laḡilaḡina ita nei. Lamna aubaina Saul pulo i apui BADA awarina. Ma BADA i viamlo-ḡaiḡaini. Ma muriai Samuel i ḡetai.*

## 13

### *Saul BADA i rau-aḡaiḡaiei*

<sup>13</sup> Samuel Saul i riwei, “Tam u bual! Tam Eḡa BADA ana tarawatu uta voteletelei. Uta votelatela lamna am epaepaia maiteni ita teremi da ota vigulau nonoa au Israel. <sup>14</sup> ✧ Wate marina tam am vibada eḡa ina mae; BADA rava notanotana me tauna nanare i vinei ma i terei da ana rava ina vibadei, aubaina tam BADA eḡa uta voteletelei.”

## 15

*BADA Saul i geduaiei*

<sup>1</sup> ✧ Muriai Samuel Saul i riwei, “BADA tau i paritawaneu da a buloim da u vigulau Israel aubaii. Lamna aubaina BADA ana riwa ma nonora-kauei. <sup>2</sup> ✧ BADA Vivirewapana Kaukauana i riwa i pa, “Tau mai Amalek ana kovoği aubaina amamai mai Israel i viğaviei maranai Egyptei i opu da i nenei. <sup>3</sup> Marina ona nae mai Amalek ona viğaviei ma ona pupuni, eğa tagogi ona voterei, nelara, waivine, roaroa melamelai, bulumakau, sipu, kamel ma donkey.”

<sup>4</sup> Ma Saul ana sorodia ai riwa i paritawanei da ita nei. Ma anapui au Telaim taon i vinenebelana. Sorodia 10,000 Judah ana damei i nei ma 200,000 mai Israel ġelauiei i nei.

<sup>7</sup> Ma Saul ana sorodia maiteni i opu ma Amalek i vunu-naiei ma i vovaiubai, i viğavia au Havilah ma au Shur i vikwai Egypt au ġereġerena. <sup>8</sup> Agag mai Amalek ai gulau lawalawaina i vojijini wate rava anapui i viragēni. <sup>9</sup> Wate Saul ana sorodia maiteni Agag eğa ita viragēni ma ai sipu ma bulumakau vinevinei ma bulumakau ma sipu natunatuī aiiai eğa ita viragēni. Tau i ġamoġamo kirakirama i ava i viragēni.

<sup>10</sup> Ma BADA Samuel i riwei, <sup>11</sup> “Tau orau i viara kua da Saul a terei Gulau aubaina tauna i mae-puputeu ma riwau i rau-aġaiġaiei.” Samuel nuanuana i bola-kauei maranai wei riwana i nonori ma BADA awarina i tou-maratom.

<sup>12</sup> Ubaubana boiboği Samuel i nae da Saul ita inanai wate i riwei da Saul i nae au Carmel taon. Kampa gana i vidamni da rava ita nei weka da tauna ita voepapai, ma i ġaira me au Gilgal.

<sup>13</sup> Ma Samuel i ġeta Saul awarina, Saul, tauna i viegualauie ma i pa, “Samuel, BADA ina viaiainim. Tau BADA riwana a voteletelei.”

<sup>14</sup> Samuel i paribelei, “Aiwai aubaina sipu ma bulumakau e vivitouana a nononori?”

<sup>15</sup> Saul i pa, “Sorodia mai Amalek awarii i vaia, bulumakau ma sipu vinevinei i vojijini da ina puloei BADA am God awarina wate ġelauie anapui a viragēna-naiei.”

<sup>16</sup> Anina ma Samuel Saul i riwei, “Ma genuana! Waguvarai BADA awariu i babani ana riwem.”

Saul i paridadanei, “Ma riweu!”

<sup>17</sup> Samuel i paribelei, “Avena da u nota-melem da tam rava labalababa, tam marina mai Israel ai rauetaravena. BADA i tereriem da mai Israel ai gulau. <sup>18</sup> Riwa bagibagina i riwem ma i paritawanem da taniġa potapotai mai Amalek uta viğaviei da anapui uta pupunapai. <sup>19</sup> Aiwai aubaina BADA eğa uta voteletelei? I riwem da eğa purapura i rairagē-tawanei ona tami, wate tam vipurapura u ġoei ma u vai-labalababai da u nuanei, wei lamna kua apoapoe BADA au matana.”

<sup>20</sup> Saul i paribelei, “Tau, BADA a voteletelei! I egariu da ana nae, da mai Amalek ana pupuni ma ai gulau Agag a neiai. <sup>21</sup> Wate au sorodia sipu ma bulumakau aiiai eğa ita viragēni wate i neiai weka au Gilgal da ita apui pulo BADA am God awarina.”

<sup>22</sup> Anina ma Samuel i riwa,  
“BADA metauna e vinuaiaiei?”

Votelatela bo pulo ma ġamoġamo apuapunana.

Votelatela i ai-telara, eğa me pulo apuapunana;

Ma rautaniġana i ai-telara, eğa me sipu monamonana.

<sup>23</sup> Pariviravira BADA awarina lamna me parauma  
ma mae-ġaeġae lamna me god ġelauie e viviborumei

Ma tam BADA riwana u geduaiei;

lamna aubaina BADA am vigulau i geduaiei,

Tam am vigulau i vai-tawanei.”

<sup>27</sup> ✧ Ma Samuel i mae-tavirei da ita nae ma Saul i ġoei da ita viġaei ma ana kwama adana i vojijini ma i sikai. <sup>28</sup> Samuel i riwa, “Me au ġara u sikasikai nanare amadodo BADA am vibada mai Israel awarii i vai-tawanei ma rava ġelauna aiaina eġa me tam i verei. <sup>29</sup> Israel ai God vinualaulaunana eġa morumoruna bo nuanuana ita viravirai. Tauna eġa rava da nuanuana ita viravirai.”

<sup>34</sup> Ma Samuel i nae au Ramah ma Saul i nae me ana au numa au Gibeah. <sup>35</sup> Samuel eġa Saul ita inana-melei da i 'raġe wate Saul i vinuabolana-maelei. Ma BADA nuanuana i bolakauei da Saul i terei mai Israel ai gulau.

## 16

### *BADA David i terei gulau*

<sup>1</sup> BADA Samuel i riwei, “Amapo da Saul ma mogumogoei bo? Tau Saul a vaitawanei mai Israel ai gulau. Wate olive monamonana ma vaia ma ma nae au Bethlehem ma Jesse ma inanai. Natunatuna awarierie gulau a vinei.”

<sup>2</sup> Wate Samuel i paribelei, “Menanare ana naenei? Saul riwana ina nonori ma ina viraġeniu.”

BADA i riwa, “Cow ġaubona ma vinimavoei ma ma nae da ma riwa, ‘Tau a nei viturana pulona ana apui BADA awarina.’ <sup>3</sup> Jesse ma rauġorei viturana pulona aubaina ma ana viatataiem aiwai ma kauei, rava ana viatataiem ma buloi Tau aubaii.”

<sup>4</sup> BADA Samuel i ririwei nanare i kauei. Samuel au Bethlehem i ġeta ma taun babadai ana sisisi i nebelei. Ma i paridadanei, “Ana nuaubam u nei bo?”

<sup>5</sup> Samuel i paribelei, “Ee! A nei da pulo ana apui BADA awarina. Anapapumi ona vokaukauana-melemi ma tana nae pulo aubaina. Ma Jesse natunatuna maiteni i viaiaini ma i paritawanei da i nae pulo apuna aubaina.”

<sup>6</sup> Maranai tau i ġeta ma Samuel Jesse ana natuevou Eliab i 'nanai ma ana au nota i riwa i pa, “Wei teverana e maimairi BADA au naona lamna anina ana vinevine.”

<sup>7</sup> Wate BADA Samuel i riwei, “Tau ravana a geduaiei, eġa inananana bo ana manawa ma notanotai. BADA aiwai e inainanai, rava eġa ita inananai. Rava tupua e inainanai wate Tau nuapou a inainanai.”

<sup>10</sup> Nanare da natunatuna anapapui 7 i nei, ma Samuel i riwa, “BADA eġa aiai ita vinei.”

<sup>11</sup> Ma Jesse i paridadanei, “Natunatum anapapui weka bo?”

Jesse i riwa, “Natu umau e mamae wate tauna sipu e paipaini.” Samuel Jesse i riwei, “Riwa ma paritawanei da ina ġetai da tana am.”

<sup>12</sup> Ma Jesse riwa i paritawanei da i nei. Tauna i tupua karawata, tevera inananana aiaina ma matana namanamarana. BADA Samuel i riwei, “Wei tauna! Ma nae ma au kolana olive monamonana ma iwaġi.”

<sup>13</sup> Anina ma Samuel olive monamonana i vaia ma David au kolana i waġi, kampa tau i au matai, ma nai au marana da i nena BADA ana Arua Vivivireina David maiteni i mae. Ma Samuel i nae au Ramah.

<sup>14</sup> Ma BADA Aruana Saul i opu-tawanei ma BADA arua apoapoei i paritawanei i rui au orana da i virovorovoi.

*David marina Gulau Saul ana sorodia.*

## 18

### *Saul David i unurei*

<sup>5</sup> Saul, David ġavia au anapuna i paripari-tawanei ma i kaukauana-kauei ma ġavia i vovovaiubai ma lamna aubaina i terei da ai sorodia ai bada ġaēgaena. Ma wei kauana patara ma sorodia babadai i vinuaiaiei. <sup>6</sup> David oroto Philistiei ġaēgaena ma inanana vi'nirovovona i viraġeni ma i nenememei ma waivine taon anapauiei i nei ma ketake-tara ma gita i vikalokaloiei ma i arara ma gulau Saul i nebelei. <sup>7</sup> Waivine i vikalokalo ma i welawela i pa;

“Saul ġavia tausan i vunui  
ma David tausan dam viriviri i vunui.”

<sup>8</sup> Wei welana Saul i vimeji-kauei ma ana au nota i pa, “Tau David e vovoepepai ma e ririwa da tauna rava tausan dam viriviri i vunui ma tau tausan ava.” Ma marina ina terei ai gulau. <sup>9</sup> Ma lamna aubaina tauna David i unurana-kauei ma i 'nana-vaitetei.

*Wei au marana Saul David i viviġaviei ma i goei da ita viraġeni. Saul natuna Jonathan, David i vibenabenamei. Lamna aubaina i rovorovo-nae ma i rauraugovaġa-nae.*

## 21

*Wei marana au murina Saul David i viġaviei ma i goei da ita viraġeni. Saul natuna - Jonathan David i vibenabenamei ma David i ruba au dobu ġela da Saul ita raugovaġei.*

*Ahimelek David i voagui*

<sup>1</sup> ✧ David i nae au Nob da Pirisi pulo tauapuna Ahimelek ita inanai. Tauna ana rovona i opu da David i viegualauei, ma i riwa, “Aiwai aubaina u nei, ma am rava mepa?”

<sup>2</sup> David pirisi Ahimelek i paribei i pa, “Gulau Saul nola tagogi aubaina i paritawaneu wate wenanare i riweu, ‘Eġa aiiai ina aramane aiwai a kaukauei.’ Au sorodia a riwei da e paipainiu. <sup>3</sup> Awarim lam da uta veru? Palawa apuapunana 5 ma veru bo aiwai ġelauna kampa.”

<sup>4</sup> Wate pirisi i riwa, “Awariai eġa palawa ota ita mamae, wate vovivirana BADA awarina. Wei palawana ma vaia mepa da am sorodia aupom biaġa eġa waivine maiteni ita viawawana.”

<sup>5</sup> David i paribelei, Riwa kua tauai eġa waivine maiteni ata matamatave, maranai a opuopu ġavia aubaina au nelara e ujiuji. Amadodo lamna gulau ana nola a kaukauei ma wei nolana aubaina a vokaukaua kua. <sup>6</sup> Nai marana palawa waduboi i votawanaei ma palawa voui i terei BADA au naona au tempol. Kampa eġa lam ġelauna ita mamae ma pirisi palawa vovivirana David i verei.

*Anina ma David rava i tama-naiei ma nai au dobuna i raugovaġa nae ma i terei ai bada. Maranai Saul i nonori da pirisi ġeġetelarana Ahimelech David i voagui, Tauna pulo tauapui pirisi i vunu-pai ma Abiathar lawalawaina i voterei, ma tauna i ruba govaġa da David awarina i ġeta. Maranai dobuġela ai sorodia Israel i viġaviei, lamna David ana sorodia maiteni tau i viġaviei ma Israel i gagaloiei. Saul ana sorodia maiteni dobuna i naeni ma David i baiei da ita viraġeni, wate eġa ita nelaġai. Mara tagogi David Saul ita viraġeni wate lamna eġa ita kauei aubaina tauna God ana vinevine. Wate Saul amapo i goei da David ina viraġeni.*

## 31

*Saul ana iraġe*

<sup>1</sup> Mai Philistia mai Israel i viġaviei au ola Gilboa ma tau i mai Israel i virubai ma maġamaġau i viraġeni. <sup>2</sup> Mai Philistia Saul ma natunatauna i viaġaġei da natunatauna Jonathan, Abinadab ma Malki-Shua i viraġeni. <sup>3</sup> Ġavia i potopoto kua Saul au ririvana ma ġavia ana piduei Saul i tonai ma i vikero-kauei.

<sup>4</sup> Ma Saul ana apia tauavaraina i riwei, “Am sodei ma viraġeniu. Eġa ata goei da Philistia-eteni ina vijiboġiu ma ina virageniu.”

✧ 21:1: Mrk 2:25-26

Wate tauna i rovo da viragēnana i kauana-avei. Ma Saul ana sod i lavui da au manawana i tonei ma au tepana i peu da i 'raḡe. <sup>5</sup> Maranai ana apia tauavaraina wei i 'nanai ma tauna nanare ana sod au tepana i peu ma gulau au ririvana i 'raḡe.

## 2 Samuel

### Samuel ana buka viruaina Pariverena

Wei bukana lamna David ana vibadana marana e ririweta. Kapita 1 da au 4 e ririweta da David menanarena Judah au rauanaḡei lamna ava i vibadei. Ma kapita 5-24 Israel au lavaratei maiteni i vibadei. Wei girumana e ririweta da menanare David ana ḡavia Israel au orana ma dobu ḡelauiei i viḡaviana-nei ma e viviatataieta menanare David God nuanuana i vaia ma i vitumaḡanei, wate maiteni ana ḡo'apoapoe ma ana ḡokokokara ḡelau i viatataieta. Tauta ta inana menanare God David i kovoḡi marana ana ḡoa i apoapoei, wate maiteni ta inana menanare David i rupena-nei ma God tauna ana ḡo'apoapoe i notatawanei. David piripiri maḡamaḡau i nelaḡai marana Israel i vibadei wate God tauna i gagaloei ma parivainuaḡana awarina ma ana epaepaia awarii i vojijini.

#### Vinevinei

David mai Israel ai gulau (5:1-4)

God ana parivainuaḡana bagibagina David awarina (7:1-5, 8-17)

David Bathsheba maiteni i matave (11:1-17, 26-27)

Peroveta Nathan ana pariverena (12:1-25)

## 5

### *David mai Israel ma Judah ai gulau*

<sup>1</sup> Israel dam damai i nei David awarina au Hebron ma i pa, “Tauta tara tagoḡi <sup>2</sup> Au naona marana Saul ata gulau, tam sorodia u rauetaraveni ma o viḡavia.

—Ma BADA i riwem, “Tam au dam Israel ma paini me sipu taupaini ai sipu e paipaini ma aubai ma vibada.”

<sup>3</sup> Marana dam babadai i ḡeta gulau David awarina au Hebron, David parivainuaḡana bagibagina tau maiteni i kauē BADA au matana. Ma olive monamonanei David i buloi da Israel ai gulau.

<sup>4</sup> ✧ David ana madeḡa 30 ma i vigulau ma i vibada da madeḡa 40 i kwa.

*Ma David ana sorodia i egari ma Jerusalem mai Jebu awariei i vaia. Kampa David ana gulau numana i voai. Anina ma rava i tami ma i nae ma God ana parivainuaḡana bokisina i vaia ma i nae au Jerusalem ma kampa au numagara i terei.*

## 7

### *BADA parivainuaḡana i kauē David maiteni*

<sup>1</sup> Ma BADA David i gagaloei ma nanare ana ḡavia anatapui i vovaiubai. Ma ana nuaubana i mae. <sup>2</sup> Ma David peroveta Nathan i riwei i pa, “Tau numa vigulauna, ai cedei voavoana a maemaeni wate God ana parivainuaḡana bokisina au numa gara e mamae.”

<sup>3</sup> Nathan i paribelei, “Aiwai e notanotaia ma kauē aubaina BADA i mae-ratuim.”

<sup>4</sup> Wate lamna waguvaraina BADA Nathan i riwei i pa, <sup>5</sup> “Ma nae ma au taunola David ma riwei ma pa, BADA wei e ririwei ‘Eḡa tam numa ma voai da Tau au animae.”

<sup>8</sup> BADA i riwa me, i pa, “Au taunola David ma riwei, ‘BADA VIVIREWAPANA KAUKAUANA wei i riwei:

Tam au naona ravarava ota sipu u paipaini au wapu, wate Tau a terepaim da mai Israel ai bada. <sup>9</sup> Mepa u nenelana, Tau tam a mae-ratuim ma au matam am ḡavia anatapui a pupuna-pai. Ma marina wavam ana voepai, me rava wavai naenaē au dobu. <sup>10-11</sup> Ma au rava Israel dobu ana verei da ina raunuma ma ana nuaubai ina mae. Au naona i vivikareiana da marina babada a terei da mai Israel ita vibadei, wate rava apoapoei tau

✧ 5:4: 1Ki 2:11

i viġaviei ma marina amapo ega ina kauana-melei. TAU BADA a ririwem da am epaepaia ana vimaġai ma tam ma am epaepaia ona vivigulau.

<sup>12</sup> ✧Ma am epaia tagogi ana vinei, tam natuoim tagogi da ina vigulau maranai tam am mara damona ina ġetai da amamam ma votagoi. Ma tauna ana kauei da ina vibada ġaeġaena, <sup>13</sup> ma ega aiai ana vigulau ina vaitawanei. Ma tauna tempol ina voai Tau aubaiu, <sup>14</sup> Tau ina viamaneu ma tauna ana vinatunei. Ma maranai i kauana-boai, ana kovoġi me ama natuna e kovokovoġi nanare. <sup>15</sup> Wate eġa melanai au nuavaina awarina ana vaitawanei me Saul awarina a vaitawanei, tauna ana vigulau a vaitawanei ma epaiana tam a terem. <sup>16</sup> Am numa ravai rereġana eġa melanai ina kwa ma am epaepaia ina vigulau ma ina vibada nonoa.”

<sup>17</sup> Ma BADA aiwai Nathan ana au rauboni i riwei anapuna David i pariverei.

## 11

### *David turana awana i kwalei*

<sup>1</sup> Omra e tomtom maranaina gulagulau e opuopu ġavia aubaina. David sorodia ai bada Joab ma Israel ana sorodia i paritawanei da mai Ammon ai sorodia ita vipupui. Ma ai taon Rabbah etanaina i matave-potai da ravai eġa ita rui bo ita opu, David eġa ita nae ma au Jerusalem i mae.

### *David ma Bathsheba*

<sup>2-4</sup> Mara tagogi aubigai David i matave-vomairi ma ana au poewa vatavatarana i bababara-nae. Ma i'nana damana da wavine i'nana i toatoa, i oġaoġa-melei aubaina marina ana nawaravi doriani i kwa, wavine inanana aiai kaukauana anina ma David, rava i paritawanei da ita aramanei tauna aiai. Ravana i ġeta memei ma i pariverei i pa, “Wavine wavana Bathsheba, Eliam natuna ma Uriah Hitti ei awana.” Ma David ana taunola i paritawanei da wavinena i neiai awarina ma tauna maiteni i matave ma i nae me au numa. <sup>5</sup> Wavinena i duama ma riwa i paritawanei David awarina i pa, “Tau a duama.”

<sup>6</sup> David riwa i paritawanei Joab awarina i pa, “Uriah Hitti ei ma paritawanei awariu.”

Ma Uriah i paritawanei David awarina. <sup>7</sup> Maranai i ġeta David awarina ma David tauna i paridadanei, “Joab ana sorodia maiteni menanare, anina bo eġa? Ma ġavia menanare?”

<sup>8</sup> Ma David Uriah i riwei, “Ma nae au numa ma ma vilauvitau.”

Ma Uriah gulau ana numa i opu-tawanei da i nae ma au murina David ana pulo i paritawanei Uriah ana au numa. <sup>9</sup> Wate Uriah eġa ita nae ana au numa, ma kampa ana au metaeta ana bada ana taunola maiteni i vimatave lana.

<sup>10</sup> Ma tau David i riwei, “Uriah eġa ita nae au numa.” David Uriah i riwei, “Tam u vaġavaġai da u nei. Aiwai aubaina eġa uta nae am au numa?”

<sup>11</sup> Uriah David i riwei i pa, “Parivainuaġana bokisina, mai Israel ma Judah ai sorodia au numa gara e matamatave. Au bada Joab ana sorodia maiteni au wapu i rauġaravu, wei lamna aubaina eġa ata nae au numa da ata am ma ata uma ma awau maiteni ata matave. Lamna eġa ana kauei, eġateni!”

<sup>12</sup> Anina ma David Uriah i riwei, “Weka ma mae amadodo ma au maratam ana paritawana-melem.”

Uriah au Jerusalem i mae da au pom ġela. <sup>13</sup> Ma David Uriah i rauġorei da maiteni i am ma i viuma-buai. Wate waguvarai Uriah i opu David ana taunola awarii da ana au aravi i matave; eġa ita nae ana au numa.

<sup>14</sup> Ma ubaubanaina David pepa i girumi ma i paritawanei Joab awarina. <sup>15</sup> Pepa au orana i giruma i pa, “Mepa g̃avia potopotona kampa Uriah ma terei ma am sorodia ma tere-opunei da tauna ava ina mae ma ina kero ma ina iraḡe.”

<sup>16</sup> Joab Rabbah taona i vivineneḡanei da i aramanei mepa g̃avia i virewapana kaua ma kampa Uriah i terei. <sup>17</sup> G̃avia taonei i opui ma Joab ana sorodia maiteni i viḡavia ma David ana sorodia ḡelau i viraḡeni. Tau Uriah oroto Hitti ei maiteni i viraḡeni.

<sup>26</sup> Ma Uriah awana riwana i vaia da awana Uriah i 'raḡe ma i touei ma i moguei. <sup>27</sup> Maranai i mogu-vorovei David rava i paritawanei da i neiai ana au numa da awana ḡelauna, ma tauna David natuna orotona i ḡuni. Wate David aiwai i kauai, BADA eḡa ita vinuaiaiei.

## 12

### *Peroveta Nathan David i eni*

<sup>1</sup> ✧ Anina ma BADA peroveta Nathan i paritawanei David awarina ma i riwei i pa, “Nelara ruaḡa au taon tagogina i mae, oroto tagogi manemanena ma maumaurana ma gelauna molamolakana. <sup>2</sup> Ravana manemanena awarina sipu ma bulumakau maḡamaḡau. <sup>3</sup> Wate ravana molamolakana sipu natuna wavinena i gimarai, ma natunatuna maiteni i ḡamoi da i rata, molamolakana ana sipu tagotago. Ana lam momoḡina sipu i aniani ma waira ana au kelaka i umaumai ma au arona i matamatave, wei lamna me tauna natuna gugunina.

<sup>4</sup> –Marina taomana i nei oroto manemanena ana au numa, ma oroto manemanena eḡa ita ḡoei da ana sipu bo bulumakau ita vunui da ana taomana ana lam ita vokaukauei. Eḡa, tauna oroto molamolakana ana sipu natuna wavinena i vunui ma i vitavi ma ana taomana i verei.”

<sup>5</sup> Nai maranaina David i meji guratana ma Nathan awarina i ḡaiawa, “BADA lawalawaina wavanei a ririwa da aiai wei kauana i kauai anina ina iraḡe! <sup>6</sup> Kaua apoapoe kaukauana i kauai lamna aubaina sipu ḡaubona 4, orotona molamolakana ina verei.”

<sup>7</sup> Anina ma Nathan David i riwei, “Tam nai ravana! Wei lamna aiwai BADA Israel ana God i riwei, ‘A vinem da Israel ana gulau ma Saul au urana a vaitawanem. <sup>8</sup> Ma am bada Saul ana vibadana ma ana buderi a vere-tawanem ma awawana au uram a terei. Ma nanare a terem da Israel ma Judah u vibadei. Mepa da wei anatapui i muomuo ḡuratana awarim, tagotagogina au tepana ata viaitepatepani. <sup>9</sup> Aiwai aubaina riwau bagibagina u rau-aḡaiḡaiei? Aiwai aubaina wei kauana apoapoena u kauai? Uriah Hitti ei sodei u piaḡi; awana mai Ammon ai sodei u viraḡeni. Ma awana u vaia da awam. <sup>10</sup> U rau-aḡaiḡaieu ma Uriah awana u vaia da awam lamna aubaina am au numa viḡaiḡaiawa ina mae-nonoa.’

<sup>11</sup> –BADA wei e ririwei, “Tau aburuna ava da apoapoena ana neiai am au numa. Au matam awawam ana vaia ma oroto au ririvam ana verei. Ma tauna awawam maiteni ina matave, patara au matai. <sup>12</sup> Tam u kauana-ḡovaḡei wate tau madeḡai ana kauai, mai Israel au matai.”

<sup>13</sup> David Nathan i riwei, “Tau, BADA awarina a kauana-boai!”

Nathan, David i riwei, “Ee wate God am apoapoe e vaivai-tawanei. Tam eḡa ma iraḡe. <sup>14</sup> Wate kaua apoapoena u kauai ma lamnei BADA u vijiboḡa-kauai lamna aubaina natum ina iraḡe.”

<sup>15</sup> Nathan i nae ana au numa. Ma BADA doria i paritawanei David ma Uriah awana, natui awarina ma i doria kaua. <sup>16</sup> David i raupari guratana God awarina natuna aubaina. Am i voterei ma i rui ana au numa ma au debidebi i matamatave. <sup>17</sup> Ana numa babadai i nei awarina, da au debidebi ita voepai ma maiteni ita am, wate i geduai.



<sup>18</sup> Aupom 7 au murina tevera i 'raġe ma ana numa babadai i rovo da David eġa ita pariverei. Tau i ava i babani vivira i pa, "Maranai tevera lawalawaina David eġa ita rautaniġaneta ma marina menanare tana riwanei da natuna i 'raġe? Mepa da ina viapoapoena-melei!"

<sup>19</sup> David i 'nanai ana taunola i pari-ararava ma i aramanei da natuna i 'raġe.

Ma i paridadana, "Tevera i 'raġe bo?" Ma tau i paribelei, "Ee tauna i 'raġe."

<sup>20</sup> Anina ma David debidebiei i vomairi ma i toa ma i vigara ma monamona gabugabui i toai ma i nae au numa gara da i voepaepa. Ma i nae me au numa ma lam i vibaġei da i neiai ma i am.

<sup>21</sup> Ana numa babadai i baiei ma i riwa, "Maranai tevera lawalawaina, tam u uji ma u mogu, ma tevera i 'raġe, tam u vomairi da e amam!"

<sup>22</sup> David i paribelana, "Ee tau a uji ma a mogu maranai natu lawalawaina. A notai da BADA ina rau-nuapoapoeleu ma natu ina lawana. <sup>23</sup> Wate marina i 'raġe aiwai aubaina ana u uji? Ana neiana-melei bo? Amapo ana nae awarina wate tauna eġa ina nei awariu."

<sup>24</sup> Anina ma David awana Bathsheba i vinuaubai ma maiteni i matave. Ma tevera orotona i ġuni ma David i ġorei Solomon. BADA tevera nuanuana i vaia, <sup>25</sup> ma lamna aubaina BADA peroveta Nathan i paritawanei da tevera wavana i ġorei Jedidiah\*.

---

\* 12:25: Wei anona Bada ana nuavainana

# 1 Kings

## Gulagulau Naona

### *Pariverena*

Wei bukana ana ġuta tonuġa, ġuta tagogi (Kapita 1-2) lamna gulau David ana irage i bababaniei ma natuna Solomon tauna ana gabu i viaia da i vigulau. Ġuta viruaina (Kapita 3-11) Solomon ana vibada mai Israel awari lamna e vivieġeta ma menanare ana vibada nai au dobuna i tua-nae ma i rata. Ma maiteni e ririweta da tauna menanarena God ana tempol i voanei au Jerusalem. Ma ġuta damona (Kapita 12-22) e ririweta da menanare mai Israel i kai da navanava ruaġa, Israel ana dam ma Judah ana dam. Ma dam tagotagogi ava ai gulau i mae. Wei bukana lamna nai gulau ai virarautua e bababaniei ma e viviatataieta da metau i gulau Bada riwana i vogaġotaġoi me David i kauei nanare, ma metau i gulau Bada i mae-puputei ma god ġelau i raudunelei.

### **Wei bukana au orana.**

Gulau David i'rage ma natuna Solomon i vigulau (2:10-12)

Solomon God i vibaġai da nualaula ma nota aiaina ita verei (9:3-5, 7-4, 16-18)

Solomon ana vibada i tua nae (4:20-21, 25)

Solomon God ana tempol i voai ma i raupariei (5:1-6, 6:1-7, 11-14, 8:1, 3-6, 10-11, 22-23, 27-30, 41-43)

Mai Sheba ai gulau wavinena Solomon i raugenari (10:1-9)

Solomon God i mae-puputei (11:1-5, 7-13, 26-33, 35, 40)

Solomon i'rage ma natuna Rehoboam gabu i vaini (11:42-43)

Rava i kai da dam ruaġa, Israel ma Judah (12:1-20)

Israel ai Gulau Ahab God i mae-puputei ma god ġelau i raudunelei (16:30-33)

Peroveta Elijah kaiababa ma natuna orotona i voagui (17:1, 8-16, 17-24)

Bada Baal ana peroveta i vovaiubai au ola Kamel (18:1-2, 17-46, 19:1-21)

## 2

### *David i'rage*

<sup>10-11</sup> \*David Israel i vibadei madeġa 40; au Hebron madeġa 7 ma au Jerusalem madeġa 33. David ana mara i kwa ma au Jerusalem au kokoaga noinoina au ririvai i vimataveni. <sup>12</sup> Ma Solomon amana ana gabu i vaia da Israel ai gulau ma God i kauei da ana vibada i virewapana.

## 3

### *Solomon nuaulaula i vibaġei*

<sup>3</sup> Solomon, BADA nuanuana i vaia ma lamna aubaina amana David ana tarawatu i vojijina-kauei. Wate kua tagogi i kaukauana-boai lamna pulo i apuapu labalababai nai dobuna ravai ai pulo ai au aniamapuna.\* <sup>4</sup> Wei lamna pulo aniapuna gabuna, wavana naenaena i mae au Gibeon. Solomon i nae weka da ġamoġamo 1,000 i apu-tapui BADA awarina. <sup>5</sup> Waguvara tagogi BADA, Solomon ana au rauboni i riwei i pa, "Aiwai e ġoġoġoi, ma vibaġei ma ana verem?"

<sup>7</sup> Solomon i paribelei, "BADA au God, tam u tereu da amau a raviepaiai da gulau, wate tau tevera ota ma eġa ata aramanei menanare ana vibadanei. <sup>8</sup> Ma tau weka am rava u vinevineia au poui, tau i maġa dewadewa da eġa aniavana. <sup>9</sup> Eġa aiai ainelana

☆ **2:10-11:** 2Sa 5:4-5 \* **3:3:** Eng. High places Weka ola muomuou au tepai pulo aniapuna i voa-naiei Canaan

tagotagogina am rava, u vinevineia ina vibadei. Lamna aubaina nuaulula ma vereu da ana aramanei metauna aiaina ma metauna apoapoena.”

<sup>10</sup> BADA i vinuaiiai da Solomon nuaulaula i vibaḡei. <sup>11</sup> Ma Solomon i riwei, “Tam eḡa lawana manamanaina bo mane, uta vibaḡei bo uta vibaḡaiu da am ḡavia ata viraḡeni. Eḡa! Tam u vibaḡaiu nuaulaula aubaina da au rava ma vibaḡana-kauei. <sup>12</sup> Aiwai u vibaḡei ana verem! Nota aiaina ma nuaulaula ana verem, eḡa me aiai ḡelauna au naona nanare bo aiai ḡelauna muriai ina vaia nanare. <sup>13</sup> Avena da mane ma vipurapura ma wavam vimae-ḡaeḡaenana aubaina, eḡa uta vibaḡei, wate ana verem, da am au lawana eḡa aiai gulauna am vigulau ina votani. <sup>14</sup> Ma mepa da ma rautaniḡaneu ma au tarawatu ma voteletelei me amam David i kaukauei nanare, tam am lawana ina manawa.”

### *Solomon ana nuaulaula i vieḡai*

<sup>16</sup> Muriai etanai waivinei ruaḡa i ḡeta gulau awarina da tauna ai ḡaiawa ita okei. <sup>17</sup> Wavine tagogi i riwa, “Au bada tauai airuaḡa ai numa tagogi. Ma tau tevera orotona a vinatunei au numa, maranai noi wavinena kampa. <sup>18</sup> Ma aupom tonuḡa au murina wavine viruaina nanare tevera orotona i vinatunei. Eḡa aiai ḡelauna au numa anina airuaḡa ava.

<sup>19</sup> —Ma waguvara tagogi wavine natuna i matave-jijini da i ’raḡe. <sup>20</sup> Ma waguvarai au pouna i vomairi, ma natu au ririvau i matamatave i vaia. Tauna natuna irairaḡena au ririvau i vimataveni ma tau natu lawalawaina i vaia da au ririvana. <sup>21</sup> Ubaubanai a vomairi da natu ata viḡuḡui, lamna a baei da natu i ’rairaḡena. Ma mara i tom kaua ma ata inana-kauei lamna eḡa tau natu.”

<sup>22</sup> Wate wavinena ḡelauna i riwa, “Eḡa! Tau natu lawalawaina; tam natum irairaḡena.”

Ma wavine au naona i vinatuna i riwa bagibagi i pa, “Tevera irairaḡena lamna tam natum ma lawalawaina lamna tau natu! Ma nanare airuaḡa i viḡeḡae.”

<sup>23</sup> Anina ma gulau Solomon i riwa, “Wei tauna e ririwa, ‘Tau natu lawalawaina ma tam natum irairaḡena.’ Ma noi tauna e ririwa, ‘Eḡa! Tam natum irairaḡena ma tau lawalawaina.”

<sup>24</sup> Ma gulau i riwa, “Sod ona neiai.” Ma i neiai gulau awarina.

<sup>25</sup> Ma i eḡara, “Tevera lawalawaina au pouna ona viailaraḡi da navanava tagogi wavine tagogi ma navanava ḡelauna wavine ḡelauna.”

<sup>26</sup> Tevera lawalawaina alo oina, nuanuana i bola-kauei ma gulau i riwei, “Au gulau a vivibaḡaim da tevera lawalawaina noi wavinena ma verei! Eḡa ma viraḡeni!”

Wate wavinena ḡelauna i riwa, “Eḡa tam bo tau teverana tana vaia. Tevera au pouna ma viailaraḡi!”

<sup>27</sup> Anina ma gulau ana paribelana i tere-ḡairei i pa, “Eḡa tevera ona viraḡeni ma wavine au naona i vivinatuna ona verei, tauna tevera alo oina.”

<sup>28</sup> Maranai mai Israel Solomon ana etara riwana i nonori, marina tau Solomon ina vivirei, ma i aramanei da God, Solomon nuaulaula i verei da lawana ina tere-vaijijimani.

## 4

### *Solomon i vibada kaua*

<sup>20</sup> Mai Judah ma mai Israel ai patara i maḡa dewadewa me bubu au gera. Tau ai lam ma ai uma tagotagogina ma i vinuaiiai kaua. <sup>21</sup> Ma Solomon dobuna anatapuna i vibadei. Ana parata au waira Euphrates i vikarei da i ḡaira au Philistia ma kampa da i ḡaira Egypt ana au parata. Wei ravai tax i vivimaiei gulau Solomon awarina ma i voteletelei maranai lawalawaina.

<sup>25</sup> Maranai Solomon i vibada mai Judah ma Israel ana nuubai i mae, ai nuabola eġa aiwai. Au lavaratei Dan ana dam ai au dobu i vikarei da i ġaira au Beersheba au rauanaġei, numa nununai ravai anatapui ai numa ma ai wapu i mae.

## 5

### *Solomon Tempol voana aubaina i vokaukaura*

<sup>1</sup> Maranai David maemaeninai, tura-kauana lamna Gulau Hiram, Tyre ai gulau. Maranai gulau Hiram riwana i vaia da Solomon i vigulau au Israel, amana David epaiana, Tauna ana taunola i paritawanei da gulau vouna i viegualauei.

<sup>2</sup> Ma gulau Solomon wei riwana i paritawanei gulau Hiram awarina i pa:

<sup>3</sup> Tam u aramanei da amau dam maġamaġai au ririvaiai i mae-kwaviviroi ma maiteni i viġaiġaiawa nonoa. Ma lamna aubaina eġa tagotagogina da tempol ita voai Bada ana God, viborumana aubaina. Wate i vivipaipai da au naona Bada ana aguei ana ġavia ita vipupui. <sup>4</sup> Wate marina Bada nuuba i vereu. Au ġavia ma au nuabola eġa. <sup>5</sup> ✧ A vinua-notanota da tempol ana voai, Bada God viborumana ma vimaie-ġaeġaenana aubaina. Me Bada amau i ririwei nanare maranai i riwa i pa, “Natum orotona ana terei gulau, am au gabu, ma tauna numa ina voai tau viborumau aubaina.”

<sup>6</sup> Lamna aubaina am taunola ma paritawanei au ola Lebanon, da aubaiu ai bag-ibagi cedar ina tarai. Tam am nelara ai tarana i aramana-kauei. Tau au nelara ana paritawaneiai da ina tara agui. Am nelara ana vimaie, biaġa e vivibaġei nanare ana vimaia.

*Anina ma gulau Solomon ai cedar i vimaie. Ma mai Israel nelara 30,000 i vaia ma i voagui da ai ma purapura ġelau numavoa aubaina i vivaneiai au Jerusalem.*

*Solomon wate nanare nelara 150,000 i terei da i nola, wei ravai ai nola da ġaima ina wamawamai ma ina boribori numa voa aubaina.*

## 6

### *Solomon tempol i voai*

<sup>1</sup> Solomon mai Israel i vibadei da madeġa tonuġa ma au vi-4-na, nawaravi au viruaina e ġoreġorei Ziv, tauna BADA ana tempol voana i vikarei. Wei lamna madeġa 480 i kwa maranai mai Israel, Egypt i opu-tawanei.

<sup>7</sup> Ġaima ġaeġaei numa voana aubaina anatapui au weia i ġarai ma kampa i bori-naiei, da eġa irama bo aniambori gugurai numavoa gabuna ita vitaniġa-potai.

<sup>11</sup> Ma BADA Solomon i riwei, <sup>12</sup> “Wei Tempolna voana aubaina ana riwem, mepa da riwau ma rautaniġanei, ma au tarawatu anatapui ma votaġotaġoi, ma aiwai a ririwem ma kaukauei, Tau aiwai amam David a parivainuaġani ana kauei aubaim. <sup>13</sup> Ma tau au rava mai Israel maiteni ana mae, ma eġa melanai ana netawanei.”

<sup>14</sup> Anina ma Solomon tempol i voa-pai.

## 8

### *BADA ana Parivainuaġana bokisina i ruiei au tempol*

<sup>1</sup> BADA ana parivainuaġana bokisina au Zion, David ana taon\* ita vaia da ita neiai au Tempol. Gulau Solomon, Israel babadai ma dam nununai babadai anatapui i ġoreiai awarina au Jerusalem.

✧ 5:5: 2Sa 7:12-13 \* 8:1: Zion lamna melagai aburuna, Jerusalem taon garina au orana.

<sup>3</sup> Maranai Israel babadai i ġetai, pirisi parivainuaġana bokisina i voepai. <sup>4</sup> Pirisi ma Levi ana dam ravai parivainuaġana bokisina ma numa gara ma ana purapura vivivirei i avara-naiei au Tempol. <sup>5</sup> Gulau Solomon ma mai Israel anapui parivainuaġana bokisina au naona; sipu da bulumakau i vunuvunu-naiei, ġamoġamo i maġa guratana da iavana i kauana-avei.

<sup>6</sup> Ma pirisi parivainuaġana bokisina i ruiei tempol au orana da ana au gabu vivivira dewadewana cherub† ruaġa papei au gabaurina i vikialai.

<sup>10</sup> ✨Maranai pirisi gabu vivivireina i opu-tawanei, bau potopotona i ġairai, ma ana boruma numana i purui. <sup>11</sup> Pirisi eġa tagotagogina da ai nola ita kauēi aubaina bau potopotona; BADA ana boruma, tempol i vioai.

### *Solomon Israel aubaina i raupari*

<sup>22</sup> Ma Solomon pulo aniapuna au naona i mairi, ma au murina Israel patarana. Urana i voepai au mara, <sup>23</sup> ma i raupari i pa, “Oo BADA, Israel ana God, eġa mepa God ġelauna me tam nanare, au tepana au mara bo au gabaura au dobu! Tam am parivainuaġana anapuna e kaukauei, ma mara nonoa am rava nuanuai e vaivaia maranai orai taputapune i e votaġotaġoim.

<sup>27</sup> —Wate amapo God au dobu ina mae bo eġa? Eġateni! Mara, ma nanare mara ġedewadewa eġa tagotagogina da tauna ina vojijini. Wei tempolna a voavoia lamna anina bo eġa?

<sup>28</sup> —Wate au pari ma nonori. BADA au God, tau am taunola ma aiwai amadodo a vivibaġei ma vereu. <sup>29</sup> Am tempol ma inana-vaitetei, marai ma waguvarai, wei gabuna aubaina u riwa u pa, ‘Tau wavau kampa.’ Lamna aubaina au pari weka ana pariparitawaneiai ma i rautaniġanei. <sup>30</sup> Au pari ma nanare am rava mai Israel ai pari ma nonori, maranai naoi i tereiai weka ma i raupari. Au mara ai pari ma nonori ma ai apoapoe ma nota-tawanei.

<sup>41-42</sup> —Ma maranai jentail aueia maemaēi, riwam ma am rewapana ma kaua ġaeġaei u kaukaueia riwai ina nonori; ma ina nei da ina vimae-ġaeġaenim. Ma am numa au naona ina mairi ma ina raupari <sup>43</sup> am au animae au mara, ai pari ma nonori ma ai ġoana ma kauēi. Ma jentail wavam ina aramanei ma ina vimae-ġaeġaenim me am rava oina mai Israel. Ma jentail ina aramanei da wei tempolna a voai. Tam vimae-ġaeġaenam aubaina.”

## 10

### *Sheba ai Gulau wavinena Solomon i raugenari*

<sup>1</sup> Solomon ana vigulau wavana naenaena ma lamnei Bada i vimae-ġaeġaeni. Ma Sheba ai gulau wavinena, wei riwana i nonori ma i ġei au Jerusalem da paridadana piripirinei Solomon ana nuaulaula ita raudadani. <sup>2</sup> Wavine ana taunola ma kamel maġamaġai ai pulo i vigerui ma ana borui i derirui. Tai ai pulo lam tauvidagiai, ġaima mai ai ġaeġaei ma gold ġaeġaena. Wavine i nei Solomon awarina ma kaua maġamaġai i vinua-notenotei Solomon i paridadanei. <sup>3</sup> Solomon ana paridadana anapuna i paribelei, kampa eġa aiwai tagogi ita piripiri guratana awarina. <sup>4</sup> Sheba ai gulau i aramanei da Solomon nuanuana i ulaula kaua ma; i ’nanai ana gulau-numana, vigulauna i voai, <sup>5</sup> lam au kepakepa, ana gabemani babadai ai gara, ana wine taupainii, ma pulo i apuapui Bada ana au tempol. Ma wavine ana nota i kwa.

† **8:6:** Cherubwei purapurai lawalawaii wate ruaġa ai Olivei i tai ma i vimairini (4 mtr) ma papei i terei da numa au giana da ġia ġelauna i tonei. ✨ **8:10:** Exo 40:34-35

<sup>6</sup> Ma Solomon i riwei, “Am kua anatapuna ma am nuaulaula au au dobu a nononoria lamna anatapuna riwa kua! <sup>7</sup> Au naona ega ata vitumaḡanei wate marina a nei da matauei a inanai da a vitumaḡana. Ma a inanai da aiwai a nononoria lamna ega. Tam am vigulau i rata dewadewa. <sup>8</sup> Am taunola\* i vinuai ai kua! Am gabemani babadai au naom e maimairi marana patapatai ma am nuaulaula e rarautaniḡanei. <sup>9</sup> Bada am God ana voepapai, i vinuai aiem ma i terem Israel ai gulau. Bada ana nuavaina maemaena mai Israel aubai i terem gulau, da riwa kauai ma kua jijimaninei ma vibada.”

<sup>13</sup> Solomon, Sheba ai gulau aiwai anatapuna i rarau-oḡarei ma i vivibaḡei, i verei, wate ḡelau i verei. Anina ma gulau wavinena i wanavira-melei ana au dobu ana taubagibagi maiteni.

## 11

### *Solomon Awawana*

<sup>1</sup> ✧ Gulau Solomon, Egypt ai gulau\* natuna i ravaḡi ma nanare jentail waivinei i ravaḡanaiei, ḡelau mai Moab, mai Ammon, mai Edom, mai Sidon ma, mai Hitti. <sup>2</sup> ✧ Au naona BADA mai Israel i riwana-guratei i pa, “Jentail waivinei ega ona ravaḡi aubaina tau nuanuami ina vovirai da ai god ona voepapai.” Wate Solomon nai ega ita rautaniḡanei, ma awawana nuanuai i vai-kauai. <sup>3</sup> Tauna awawana 700, anatapui gulagulau natunatu, wate awawana ḡelau 300 lamna me ana taunola. Tau Solomon ana vitumaḡana BADA awarina i vikwaki.

<sup>4</sup> Maranai Solomon i magura, awawana ana nota i virai da god ḡelau i votaḡotaḡoi, ma ega BADA awarina ita vipatutu me amana David. <sup>5</sup> Tauna mai Sidon ai god wavinena Ashtoreth, ma mai Ammon ai god apoapoe kaukauana Milkom† i viviborumei.

<sup>7</sup> Au Ola Olive au Jerusalem kampa Solomon voepaepa gabuna i voai mai Moab ai god apoapoe kaukauana, Chemosh aubaina ma ḡelauna mai Ammon ai god apoapoe kaukauana, Molek aubaina. <sup>8</sup> Voepaepa gabui wenanare i voanaiei awawana anatapui aubai da tau weka incense ma ai pulo ita apuapui ai god awarii.

<sup>9-10</sup> Maraotai BADA, Solomon awarina mara ruaḡa i ega ma i riwana-guratei da god ḡelau viborumai ina voterei. Wate tauna ega ita voteletelei, ma Israel ai God viborumana i voterei. Lamna aubaina BADA amlona i ḡaiḡai kua Solomon awarina. <sup>11</sup> Ma i riwei i pa, “Wei kauai i visina-viraviraim ma au parivainuaḡana bagibagina ma au tarawatu ega uta votaḡotaḡoi, lamna aubaina vibada au uram ana vaitawanei ma am taunola tagogi ana verei. <sup>12</sup> Wate amam David notanei wei ega ana kauai maranai tam lawalawaim. Wate natum au urana ana vaitawanei.”

### *Jeroboam ma Solomon ai virarautua*

<sup>26</sup> Solomon ana gabemani taunoleina wavana Jeroboam maiteni gulau Solomon i viḡaviei. Tauna Nebath natuna, ana taon Zeredah au Ephraim, ma alona kaiababa wavana Zeruah.

<sup>27</sup> Jeroboam ana virarautua wenanare: Solomon ana taunola doa i taratarai da gwagwa i purupurui ma Jerusalem taon garina ḡaimei gavogavoi i vopotapota-naiei. <sup>28</sup> Jeroboam oroto araramanina ma maranai Solomon i 'nanai da tauna i nola kua, ma i terei da Joseph noinoi dam Ephraim ma Manasseh, ai taunola i vibadei.

\* 10:8: Giruma ḡelau e ririwa awawana ✧ 11:1: Deu 17:17 \* 11:1: Pharaoh ✧ 11:2: Deu 7:3-4 † 11:5: Hebrew Milkomwate giruma ravai maḡamaḡau e notanotai da wei lamna mai Ammon ai god wavana ḡelauna Molek

<sup>29</sup> Mara tagogi, Jeroboam Jerusalem i voterei da i nena ma au mutulua peroveta Shilohei wavana Ahijah maiteni airuağa ava i vinenebelana, Jeroboam kwama vouna i oteoteni. <sup>30</sup> Ahijah, Jeroboam ana kwama vouna i vojijini ma i sikanaiei da 12. <sup>31</sup> Ma i riwei, “Wei garai sikasikai 10 ma vaia aubaim, BADA Israel ana God e ririwa, ‘Tau Israel ana vibadana Solomon au urana ana sikatawanei ma ana dam 10 au uram ana terei.’ <sup>32-33</sup> Solomon Tau i geduaieu ma mai Sidon ai god wavinena, Ashtoreth, Moab ai god, Chemosh ma mai Ammon ai god, Milkom i vovoepaepai ma eğa au iviu ita babara bo ita kauana-kauai au matau bo riwau bo au tarawatu ita votağotağoi me amana David i kaukauei nanare. Wate au taunola David ma Jerusalem notaiei, Jerusalem a vinei da Tau ġariuei, lamna aubaina Solomon dam tagogi ana verei da ina vibadei.

<sup>35</sup> —‘Wate Solomon natuna au urana Israel ana dam 10‡ ana verem.”

<sup>40</sup> Solomon i ġoei da Jeroboam ita viraġeni, wate tauna i ruba au Egypt, ai gulau Shishak awarina ma kampa i mae da Solomon i ’raġe.

<sup>42</sup> Solomon au Israel i vigulau da madeğa 40 i kwa.

## 12

### *Rehoboam*

<sup>1</sup> Mai Israel anatapui i nae au Shekem ma i vipaipai da Rehoboam ita nei ma ita terei ai gulau. <sup>2</sup> Maranai au Egypt, Nebath natuna Jeroboam, wei riwana i nonori ma Egypt i voterei ma i naeme. (Tauna au naona Solomon i rovoei da kampa i ruba nae.) <sup>3</sup> Ma Israel babadai riwa i paritawanei da Jeroboam i nei ma anatapui i nae Rehoboam awarina ma i riwei, i pa, <sup>4</sup> “Amam nola vitaikaukauai au tepai ai terei, wate ai vita marina uta votelatelai, ma ana vitaunolem.”

<sup>5</sup> Rehoboam i paribelei i pa, “Ona nae ma aupom vitonuina ona nememei ma ana paribelei.” Ma rava i vilamonei.

<sup>6</sup> Ma gulau Rehoboam, dogadogara awari vinuaterena i vaia, tau amana Solomon ana taunola maranai lawalawaininai. I paridadanei i pa, “Wei ravai menanarena ana paribelana-nei?”

<sup>7</sup> Tau i paribelei i pa, “Mepa da u ġoei da rava ma voagui, ai vibağa ma vianinei, ma tau aubaim ina vitaunola nonoa.”

<sup>8</sup> Wate Rehoboam dogadogara ai vinuaterena i geduaiei ma i nae ana kimta awarii, maiteni i rata tagogi, ma marina tauna e vivitaunolei <sup>9</sup> Tauna i paridadana, “Ami nota aiwai? Menanare tana kauanei, wei ravai e ririwa da ai vita tana viaburui?”

<sup>10</sup> Ma ana kimta i paribelei i pa, “Nai ravai awarim i ririwa, ‘Amam vita ġaeğaena i vereverelai marina ai vita ma viaburui.’ Wenanare ma riwei, ‘Tau vita ġaeğaena ana veremi eğa me amau! <sup>11</sup> Amau vita ġaeğaena i veremi wate tau ġaeğaetana ana terei au tepana! Tauna kwapuei i ravimi wate tau ġoroğorova donadonanei ana kwapuiimi.”

<sup>12</sup> Aupom tonuğa au murina i riwa nanare Jeroboam ana babada maiteni i nememei Rehoboam awarina. <sup>13</sup> Gulau Rehoboam dogadogara ai vinuaterena eğa ita vaia ma pona bagibaginei rava awari i babani. <sup>14</sup> Tauna ana kimta ai vinuaterena i rautaniġanei ma nanare i riwa, “Amau vita ġaeğaena i veremi; wate tau ana viaitepatepani. Amau i ravimi wate tau ġoroğorova donadonanei opimi ana sikai.”

‡ 11:35: Dam ruağa Judah ma Benjamin i voterei

15 Au naona God ana peroveta Ahijah, Shilohei aiwai Nebath natuna Jeroboam i pariverei marina anona i tupua. Gulau rava ai vinuaterena eġa nonorana ita ġoei, wate lamna BADA i kaukauei da aiwai peroveta i ririwei nanare ina tupua\*.

16 Maranai Israel patarana i 'nanai da gulau tau i babani i parivirevire, ma gulau i riwei i pa:

“Tauta eġa Jesse natuna David ana damei!

Eġa ana dam ravai!

Oo Israel ona naeme me ami au numa

Oo David am dam oina ma inanai!”

Anina ma mai Israel i nae ai au numa. 17 Wate Rehoboam mai Israel au Judah maemaei i vibadei.

18 Adoniram, mai Israel anapui ai taunola i vibadei. Gulau Rehoboam, Adoniram i paritawanei au Israel da ai taunola ita neiai au Jerusalem wate tau i ġaime i viraurei da i viraġeni. Gulau Rehoboam laġilaġina ana chariot i gerui ma i nae me au Jerusalem. 19 Ma wei marana da i nae mai Israel David ana dam ma ai vigulau i geduaiei ma i parivirevirei.

20 Maranai mai Israel anapui i aramane i da Jeroboam Egypte i nememei, tau i riwa i paritawanei da i nei awarii ma i terei Israel dam anapuna ai gulau. Dam tagogiava, Judah ava, i mae David maiteni.

### *Jeroboam bulumakau goldei i kauēi*

25 Ma ġavia rovona aubaina Jeroboam Shekem taon ġaime i gari kwaviviroi ma kampa i mae. Wei lamna dobu violaolana, dam Ephraim ai dobu. Muriai i nae ma nanare Penuel taon i gari-kwaviviroi.

26-27 Mara tagogi gulau Jeroboam wenanare i vinua-notanota, “Mai Israel anapui e ġeġae au Jerusalem da au tempol pulo e apuapui BADA awarina. Ma mepa da nuanuai ina virai ma ina audamana Judah gulauna Rehoboam awarina amapo tau ina viraġeniu.” Ma wei vigulauna ina nae me David ana epaepaia awarii.

28 ✨Ma ana dogadogara maiteni i babani da i vinua-terenei ma bulumakau ruaġa goldei i kauēi ma ana rava i riwei, “Jerusalem ġaena i vinigarigari, Oo Israel wei ami god, tauna Egypte i tere-opunemi.” 29 Ma bulumakau goldei tagogi au Bethel ma ġelauna au Dan i terei.† 30 Wei lamnei i ġo'apoapoe; aubaina rava ġelau uama ġaeġaena i naeni da au Dan da burumakauna i voepapai.

31 Jeroboam maiteni voepaepa gabui ma pulo aniapuni i voanaiei ola au tepai ma rava labalababa eġa mai Levi i vinei da pirisi, pulo tauapuna.

*Rehoboam au Judah i vigulau, ma i vigulau da madeġa 17 i kwa. Maranai tauna gulau i maemae, mai Judah god morumorui i reraudunelei. Ma mai Egypt i nei da Judah i viġaviei ma ai tempol purapurai maiai ġaeġaei ma gulau ana numa purapurai maiai ġaeġaei anapui i pupuni da i vivanei.*

*Rehoboam ma Jeroboam i viġaiġaiawa nonoa. Maranai Rehoboam i 'raġe, natuna Abijah au Judah i vigulau madeġa tonuġa i kwa. Tauna maiteni Jeroboam i viġaviei. Maranai Abijah i 'raġe, natuna Asa au Judah i vigulau da madeġa 41 i kwa. Tauna gulau aiaina, ma God*

\* 12:15: ...da vigulau Solomon natunatuna awariei ina vaitawanei ✨ 12:28: Exo 32:4 † 12:29: Mai Israel ai nota da Dan ma Bethel lamna dobu vivivirei. Bethel lamna au Israel (dam 10) au laubadei ma lamna 16 kilometer ota Jerusalem au kolanana. Wei eġa uama, ma wei lamna Jerusalem e teretere-ġairei ma rava e ririwei da au Bethel ina voepaepa. Dan lamna Israel au kolana au lavaratei.



*i raudunelei ma mai Judah ai god morumorui i viparipariei. Tauna mara nonoa mai Israel ai gulau Baasha maiteni i viḡaiḡaiawa. Maranai Asa i 'raḡe natuna Jehoshaphat i vigulau mai Judah awari.*

*Au Israel Jeroboam natuna Nadad lamna gulau apoapoena, ma nanare aiavoi da tauna au murina i vivigulau anatapui gulau apoapoei. Nadab mai Israel i vibadei da madeḡa ruaḡa i kwa ma Baasha tauna i viraḡeni, ma Jeroboam ana dam mamae-terenani maiteni. Wate rava wavana Baasha i vigulau da madeḡa 24 i kwa ma i 'raḡe. Ma natuna Elah i vigulau da Israel i vibadei da madeḡa ruaḡa i kwa ma ana sorodia badana tagogi, wavana Zimri, tauna i viraḡeni ma i terepa-melei da i vigulau. Wate wiki tagogi au murina mai Israel ai sorodia Omri i terei da gulau, anina ma Zimri i viraḡena-melei. Omri i vigulau da madeḡa 12 i kwa, anina ma natuna Ahab tauna Israel ana gulau ma i mae da madeḡa 22 i kwa.*

## 16

### *Israel ana Gulau Ahab*

<sup>30</sup> Omri natuna Ahab, ana ḡo'apoapoe i rata guratana BADA awarina eḡa me gulau anatapui au naona i vivibada nanare. <sup>31</sup> Tauna i notai da lamna kaua labalababa da i ḡo'apoapoe me Nebath natuna Jeroboam i kaukauei nanare. Wate tauna i kauana-guratei maranai mai Sidon ai Gulau Ethbaal natuna Jezebel i ravaḡi ma i vikarei da ai god Baal i raudunelei. <sup>32</sup> Ma Baal ana voepaepa gabuna pulo tauapuna au Samaria i voai ma au orana pulo aniapuna i voai. <sup>33</sup> Ahab god wavinena Asherah kokoitauna i vituremairini\*. Ma kaua maḡamaḡau i kauai da BADA, mai Israel ai God ita viamloḡaiḡaini, me mai Israel ai gulau au naona i kaukauei nanare.

## 17

### *Elijah ma Ahab*

<sup>1</sup> Peroveta Tishbelei wavana Elijah\* ana dobu Tishbe au Gilead, Ahab i riwei, "Riwa kaua! BADA Israel ana God lawalawaina, ma tauna a vivilaragei. Wavanei a riwa da turuvani eḡa ina peu ma garewa eḡa ina atuna madeḡa biaḡa da tau ana riwa da nanare.†" *Ma nanare i mae. Madeḡa biaḡa garewa eḡa ita atuna, marapoi i ḡetai ma eḡa lam.*

<sup>8</sup> Ma BADA Elijah i riwei <sup>9</sup> "Laḡilaḡina ma nae au taon Zarephath, Sidon au ḡereḡerena‡ ma kampa ma mae. Kampa kaiababa e mamae, a riwei da ina viambagibagim."

<sup>10</sup> Ma Elijah i nae au Zarephath. Maranai i ḡetai taon ana au anirui, ma kaiababa i 'nanai ai i ḡunaḡuna, ma i riwei, "A vivibaḡaim da waira aburuna uta neiai da ata uma!"

<sup>11</sup> Ma i nenaie vainana aubaina ma orotona i garara me i pa, "Ma palawa apuapunana aburuna maiteni uta neiai."

<sup>12</sup> Kaiababa i paribelana i pa, "Riwa kaua! Am BADA God lawalawaina ma wavanei a ririwa, tau awariu eḡa palawa apuapunana. Awariu palawa aburu kaimojina ma monamona aburuna. Ai a ḡunaḡuna da ana nae au numa ma lam damona ana vitavi da natu maiteni ana am ma au murina ana raumolaḡau da ana iraḡe."

<sup>13-14</sup> Wate Elijah kaiababa i riwei, "Eḡa ma vinuabola! BADA Israel ana God e ririwa, 'Am palawa abomana eḡa ma monamona wagina eḡa ina kwakwava ma BADA garewa

\* **16:33:** Asherah lamna god wavinena, Baal awana; mai Canaan, mai Egypt ma Phonisia anatapui wei godna e viviborumei. † **17:1:** Elijah anona BADA lamna God. † **17:1:** Mai Canaan e vivitumaḡana da ai god Baal garewa e vibadei, wate maraḡela god ḡelauna wavana Mot anona iraḡetauna Baal i viraḡeni. Mepa da Baal i lawana me, lamna tauna dobu ina vituvanei. Lamna aubaina, Elijah Baal i vimarumarui ma i ririwa da tauna God lawalawaina awarina i vitaunola, ma God garewa ma iraḡe i vibadei, muriai tana inanai maranai ina vomairi da kaiababa natuna ina vilawana-melei ‡ **17:9:** BADA Elijah i paritawanei au Sidon - kampa rava Baal i raudunelana-guratei. Wei lamna Ahab poiana orotona Ethbaal ana gabu, ma wei au marana, Elijah Ahab i raraugovaḡei.

ina paritawaneiai da wapu ina gogo me!’ Anina ma nae au numa ma u ririwa nanare ma kauēi, wate au naona palawa aburuna ma apui aubaiu. Ma mae-terenana ma apui aubaimi.”

<sup>15</sup> I nae ma menanare Elijah i ririwei, nanare i kauēi. Ma awari lam i mae da aupom biaġa i kwa. <sup>16</sup> Ma me BADA Elijah i parivainuaġani nanare palawa au aboma eġa ita kwa ma monamona au wagi eġa ita kwa.

<sup>17</sup> Muriai kaiababa natuna i doria ma ana doria i vovoguratei anina ma i ’raġe. <sup>18</sup> Ma wavine Elijah awarina i riwa, i pa, “God ana taunola, Aiwai aubaina wei u kauēi awariu? U nei weka da au ġo’apoapoe uta vieġai ma natu uta vi’raġeni bo?” §

<sup>19</sup> Elijah i paribelei i pa, “Natum ma vereu.” Elijah taubeu, alona au urana i vaia ma i avara-ġaiei au vatavatara mepa i mamae lana ma ana au animatave i vimataveni. <sup>20</sup> Anina ma ponana i rata ma i raupari BADA awarina, “Oo BADA au God, aiwai aubaina kaua apoapoe kaukauana u kauēi kaiababa awarina? Tauna i taravainiu da ana au numa a mamae, ma u kauēi da natuna i ’raġe?” <sup>21</sup> Anina ma Elijah i taduru ma mara tonuġa taubeu au tepana i matave ma ponana i rata ma i raupari BADA awarina i pa, “Oo BADA au God, A vibaġaim da tevera ana lawana ma veremelei!”

<sup>22</sup> BADA Elijah ana pari i nonori ma tevera lavutu i vikarei ma i lawana. <sup>23</sup> Elijah tevera i voepai ma i avara ġairei alona awarina ma i riwei, “Ma inanai natum lawalawaina.”

<sup>24</sup> Wavine i riwa, “Marina aramana-kauēi da tam God ana taunola, ma BADA ana riwa gamomei e opuopu lamna riwa kaua!”

## 18

### *Elijah ma Baal ana peroveta*

<sup>1-2</sup> Madeġa tonuġa garewa eġa ma gomara ġaeġaena i mae. Madeġa au vitonuina BADA Elijah i riwei, I pa, “Ma nae gulau Ahab ma inanai. Ma tau garewa ana paritawaneiai.” Ma Elijah i nae da gulau Ahab ita inanai.

<sup>17</sup> Maranai tauna Elijah i ’nanai ma i riwa, “Wei tam bo, mai Israel rauaġaiġai amai?”

<sup>18</sup> Elijah i paribelei, “Tau eġa ata rauaġaiġai au Jerusalem, wate tam, ma amam ana numa ravai maiteni o rauaġaiġai. Taumi BADA ana tarawatu o geduaiei, ma Baal kokoitai o viviborumei.” <sup>19</sup> Marina mai Israel anapui ma ġorei da ina nae au ola Carmel ina nebeleu. Baal ana peroveta 450 ma Asherah god wavinena ana peroveta 400 Jezebel ana au aboma e amam, anaputapui ma neiai.

<sup>20</sup> Ma Ahab mai Israel anapui ma Baal ana peroveta i ġorei da au ola Carmel ina vinenebelana. <sup>21</sup> Elijah patara au naoi i mairi ma i riwei, “Wei vinua-raġaraġai mara aiwai ina kwa, ona vinuanaina nae ma ona vianuanaina nei, metauna notana ona vaia? Mepa da BADA God, tauna ona raudunelei. Mepa da Baal god, tauna ona raudunelei.” Wate rava eġa aiwai ita riwei.

<sup>22</sup> Ma Elijah tau awarii i riwa, “BADA ana peroveta anina tau a mamae. Wate Baal ana peroveta 450.\* <sup>23</sup> Aubaita bull ruaġa ona neiai, ma tau ai sia ina rautani ma ina bori muomuoi ma ai au tepana ina terei, wate eġa ina ravivoai. Ma tau nanare ana kauēi. <sup>24</sup> Ma taumi ona raupari ami god awarina, ma tau ana raupari BADA awarina. Metauna godna ai araratanei i paribelana tauna God ririwa kauana!” Ma rava anapui i vianina.

§ **17:18:** Nai marana rava i vitumaġana da doria ma iraġe lamna God ana kovuġa ġo’apoapoe aubaina. Kaiababa i vitumaġana da Elijah tauna ana au numa i mamae ma lamna BADA matana i taini awarina ma lamna i kauēi da natuna orotona i ’raġe. \* **18:22:** Elijah ana babani lamna gulau wavinena Jezebel e ririwei, tauna i ġoei da God ana peroveta anapuna ina virāġeni. Ahab ana taunola Obadiah i voagu da God ana peroveta ġelau i guba i tere-govaġi ma waira ma lam i vereverei wate eġa tata aramanei biaġa lawalawaii e mamae.

<sup>25</sup> Elijah Baal ana peroveta i riwei, “Taumi o maḡa aubaina ona vinoa, Bull tagogi ona vinei ma ona vokaukauei. Ami god awarina ona raupari ma eḡa ai ona ravivoai.” <sup>26</sup> Ma tau i ai bull i vaia ma i vokaukauei. Anina ma Baal awarina i raupari, ubaubanai i vikarei da i raviaubenai. Tau i garagarara, “Oo Baal, ma paribelelai!” Ma pulo aniapuna i arara kwaviviroi, Wate eḡa paribelana; eḡa aiai ita paribelei.

<sup>27</sup> Aubenai Elijah i vikarei da i vimarumarui i pa, “Ona raupari guratana! Tauna god! Mepa da e rarauboni bo i nae au ririva bo e vaḡavaḡai bo e matamatave! Ona ravidagudagui!” <sup>28</sup> Ma tau i garara i voguraguratei ma me ai au kua nanare, naipiei ma aierei tupuai i boribori-melei ma tara i toitoi. <sup>29</sup> Tau i garagarara da i garagarara da aubigai pulo apuna ana mara. Wate amapo da eḡa paribelana, eḡa aiai ita paribelei, eḡa aiwai ita nonori.

<sup>30</sup> Ma Elijah rava i riwei, “Ona nei awariu.” Ma anatapui i nei ma Elijah i mae-kwaviviroi, tauna BADA ana pulo aniapuna i voavoa-melei. <sup>31</sup> ✨Elijah ḡaima 12 i vaia, ḡaima tagogi da Israel ana dam tagogi aubaina. Wava Israel BADA tau i noii Jacob i verei. <sup>32</sup> Ma ḡaimanei pulo aniapuna i voa-melei BADA viborumana aubaina. Ma au adana doba i ḡarai da waira ana ruva 14 Ltr nanare ina vojijini. <sup>33</sup> Pulo aniapuna au tepana ai i vatari, bull i bori-naiei ma siana ai au tepana i terei. Ma i riwa, “Nau 4 ḡaeḡaei waira ona vioai, ma sia ma ai au tepana ona iwaḡi.”

<sup>34</sup> Ma nanare i kauei, ma i riwei, “Ona kauana-melei.” Ma nanare i kauei. Ma i riwei, “Mara vitonuina ona kauana-melei.” Ma nanare mara vitonuina i kauei. <sup>35</sup> Waira i toi ḡaira da dogo maiteni i vioai.

<sup>36</sup> Ma aubigai pulo apuna ana mara i ḡetai, Elijah i babara-ḡae pulo aniapuna au ririvana ma i raupari i pa, “Oo BADA, Abraham, Isaac ma Jacob ai God, amadodo rava ma viatataiei da tam God au Israel ma tau am taunola, ma anatapuna u ririwei a kauei. <sup>37</sup> BADA ma paribeleu, Oo BADA ma paribeleu da rava ina aramei da tam, au BADA, tam anina God, ma marina rava orai e taitaina-melei awarim.”

<sup>38</sup> Maratagogi BADA ana ai marei i ḡairai ma pulo bull, ai, ḡaima ma doa i aragibui. Ma waira i 'waiwaḡia i ḡuḡuva-pai.

<sup>39</sup> Maranai rava wei i 'nanai tau i mae-ḡaira au doa da i matave-taitaina ma i garara BADA awarina, “BADA anina God! BADA ainelana anina God!”

<sup>40</sup> Ma Elijah rava i egari, “Baal ana peroveta ona vojijini; Eḡa tagogi ona voterei da ina ruba!” Peroveta anatapui i vojijini ma Elijah tau i riwei da i ḡairei au Kishon gau-gaubana ma anatapui i virāḡeni.

<sup>41</sup> Ma Elijah gulau Ahab i riwei, “Ma nae da ma am ma garewa ḡaeḡaena gugurana a nononori.” <sup>42</sup> Ma Ahab i nae da ita am ma Elijah i ḡae ola Carmel au tepana, ma i mae-ḡaira au doa ma kolana au ae-tutuna ma i raupari.

<sup>43</sup> Ma ana taunola i riwei, “Ma nae ma au bogei ma inana.” Ana taunola i nae da i nememei Elijah awarina ma i riwei, “Eḡa aiwai ata inana.” Anatapuna mara 7 i paritawanei da inana.

<sup>44</sup> Ma mara vi-7-na i nememei ma i riwa, “Apau aburuna ana rata me oroto urana a inana bogei i ḡeḡae.”

Ma Elijah i riwa, “Ma nae ma Ahab ma riwei, ‘Am chariot ma gerui ma ma ḡaira muriai da garewa ina rautomenim.”

<sup>45</sup> Ma aburuna ava ma lada i ḡei ma dobu i waguverei ma ivena i ruba ma garewa ḡaeḡae otana i toi. Ahab ana chariot i gerui ma i ruba au Jesreel. <sup>46</sup> Ma BADA ana rewapana i rui Elijah awarina; ma ana gara giana i taini da ana au jigoraḡita i raḡita-jijini ma i lavui da Ahab i votani da i aiḡeta au Jesreel.

## 19

### *Elijah i ruba govaḡa au Sinai*

<sup>1</sup> Ma Ahab awana Jezebel i vibenabenamei, aiwai anata-puna Elijah i kaukauei ma menanarena Baal ana peroveta anata-pui i vununaiei. <sup>2</sup> Ma Jezebel taupariverena i paritawanei Elijah awarina ma i pa, “Wenanarena marana au maratomi, tau ana viraḡenim me au peroveta u viraḡenanei nanare. Mepa da wenanare eḡa ana kauēi, a raraupari da god ina kovoḡa-kauēu bo ina viraḡeniu.”

<sup>3</sup> Elijah i rovo ma ana lawana aubaina i ruba. I nae au Beersheba au Judah, ma kampa ana taunola i voterei. <sup>4</sup>✧ Ma tauna ainelana i nae aupom au mutulua, ma i ḡeta ai *brum* au ḡouna ma i kiala ma i raupari da ita iraḡe. I riwa i pa, “BADA, tau malau a vai-avei. Au lawana ma vaitawanei marina, tau irairaḡe, me noinoiu.” <sup>5</sup> Ma i mae-ḡaera ai *brum* au karena ma i matave. Ma maratagogi BADA ana anela Elijah i vodadani ma i riwa, “Ma vomairi, ma am.” <sup>6</sup> I nana viravira ma i matamatave lana au kolanei palawa apuapunana ma waira aniuma. I am ma i uma ma i matave me.

<sup>7</sup> BADA ana anela i nememei, i vodadani ma i riwei, “Ma vomairi ma ma am aubaina am vaḡai ina manawa guratana.” <sup>8</sup> Elijah i vomairi da i am ma lamnei rewapana i vaia da ina babara aupom 40 ma maratomi 40 da au Sinai\*, BADA ana au ola i ḡeta. <sup>9</sup> Ma kampa i ḡeta au guba ma i matave. Wate BADA i riwa, “Elijah weka aiwai e kaukauei?”

### *BADA Elijah awarina i eḡa*

<sup>10</sup> Elijah i paribelei, “Oo BADA vivirewapana kaukauam, Tau mara nonoa tam a viborumem - tam ainelam. Mai Israel am parivainuaḡana bagibagina i viaigai, am pulo aniapuna i viairikarikai, ma am peroveta i viraḡena-pai, tau ainelau i votereu, ma marina i ḡoei da tau maiteni ina viraḡeniu!”

<sup>11</sup> BADA i riwa, “Ma opu au ola ma au naoi ma mairi.”

Ma Elijah kampa i maimairi ma labu ḡaeḡaena olana i ravi, da i gunevi, wate bada eḡa nai kojikojirana au orana. Ive au murina lolo, wate BADA eḡa nai lolona au orana.

<sup>12</sup> Lolo au murina ai araratana, wate BADA eḡa nai aina au orana. Ma ai au murina pariararava jinajinana i nonori. <sup>13</sup> Maranai Elijah wei i nonori ana kwama i vaia da naona i purui† ma i opu guba au naona i mairi. Ma pona i riwa, “Elijah weka aiwai e kaukauei?”

<sup>14</sup> I paribelei, “Oo BADA God, vivirewapana kaukauam, mara nonoa tam ainelam aubaim a vivilaraḡa. Wate Israel ravai am parivainuaḡana bagibagina i geduaiei, am pulo aniapuna i rikanaiei, ma am peroveta anata-pui i viraḡeni. Tau ainelau a mamae. Ma marina i ḡoei da tau maiteni ina viraḡeniu.”

<sup>15</sup> BADA i riwa, “Meiei e nenei nanare ma nae me, ma ma-rui au mutulua Damaskas, maranai u ḡeta au taon, Hasael ma buloi, mai Syria ai gulau; <sup>16</sup> Nimshi natuna Jehu ma buloi Israel ai gulau, ma Shaphat natuna Elisha, ana taon Abel-Mehola ma buloi peroveta da am gabu ina vaia. <sup>17</sup> Aiavoi da Hasael i rovoei da e rubaruba, Jehu tau i viraḡeni ma aiavoi da Jehu i rovoei da e rubaruba, Elisha tau i viraḡeni!‡ <sup>18</sup> Wate mai Israel ai maḡa 7,000 eḡa melanai Baal ita raudunelei bo kokoitau ita vigia-laḡolaḡonei, ina lawana!”

### *BADA Elisha i kwatuei*

<sup>19</sup> Ma Elijah i nae da Shaphat natuna Elisha i viaroni doa i uauatai, bulumakau 12 ruaruagei ava raḡiraḡitai aniuata i taitaini ma i uauata. § Elisha ana bulumakau, au

✧ **19:4:** Jon 4:3 \* **19:8:** Sinai wavana ḡelauna lamna Horeb Weka BADA i viatataiana-meiei mai Israel awarii ma ana tarawatu i verei. (Exo 19:20) † **19:13:** Mai Israel i vitumaḡana da eḡa aiai BADA ita inanai ma lawalawaina ita mae. (Exo 3:6) ‡ **19:17:** BADA ana rava ina kovoḡi ana parivainuaḡana bagibagina i gai aubaina. § **19:19:** Mai Israel burumakauei ipa iramei e taitaini da e uauata.

murioina i nolanola. Elijah i ġaira awarina ma ana kwama i votawanei ma Elisha i vioteni.\*  
<sup>20</sup> Elisha bulumakau i votere-tawanei ma Elijah i rubei, ma i riwa, “Au naona ma votereu da ana nae amau ma alou ana inana ma ana vigia-lagolagonei ma tana nae.”

Elijah i paribelei, “Anina ma nae wate aiwai a kauei awarim ma vinuanotenotei!”

<sup>21</sup> Ma Elisha i nae da ana bulumakau ruaġai i viraġeni, pawe bulumakau au uai i viaigaigai da ai i viviri da sia i apui ma rava i verei da iam. Anina ma i opu da Elijah i votagotagoi.

---

\* **19:19:** Wei lamna mataira da Elisha Elijah ana gabu i vaia da peroveta.

## 2 King Gulagulau Viruaina

### *Pariverena*

Gulagulau ai buka viruaina lamna mai Israel e bababaniei. Gulau David ana vibadana au murina, aiwai i tupua lamna wei bukai ruağa gulagulau naona ma viruiaina e ririweta. Gulagulau bukana naona e ririweta David au murina Solomon menanarena da i vigulau.

Solomon i'rağe ma au murina Israel i kai da baba ruağa. Dobuna au rauanağei i ġorei Judah ma au lavaratei i ġorei Israel. Maranai mai Judah ma mai Israel gulagulau, God i voteletei lamna nuauba i mae. Wate marağela gulagulau God i rawağaiğaei ma god ġelau i raudunelei. Anina ma nuabola i tupua.

Maranai mai Israel God votelatelana i voterei, Tauna peroveta i paritawanei awari. Ma Gulagulau bukana viruaina au orana lamna peroveta wavana naenaena Elisha. Tauna God ana rewapanei kaua ġaeğaei i kaukauei, ma rava awari i jimajima da ita mae-tavirei God awarina.

Elisha i'rağe ma au murina, gulagulau mağamağau i apoapoe kaua. Anina ma God ana rava i kovoği ma lamnei ai ġavia tau i vovaiubai ma i pani ma i naiei. Au naona mai Israel awari i tupua ma muriai mai Judah awari i tupua. God ana rava mai Judah eğa ita vianinei da ita nae me ai au dobu da madeğa 70 i kwa.

### **Virarautua rereğ**ana

Israel i kai da Vibadana ruağa, Israel ma Judah 1:1–17:41

Peroveta Elijah ana virarautua 1:1–13:20

Judah gulagulau ma Israel gulagulau ai virarautua 8:16–17:4

Assyria gulauna Samaria i vovaiubai ma Israel i pupuna-naiei ma ana vibadana i kwa 17:5-40

Judah gulagulau ai virarautua 18:1–21:26

Gulau Hezekiah ana au vibada i raukarei ma i nae da gulau Josiah ana au vibada 18:1–21:26

Judah gulagulau damona ai virarautua 23:31–24:20

Babilon gulauna Jerusalem i vovaiubai da Judah ana vibadana i vikwai 25:1-30.

## 2

### *Elijah i ġaiei au mara*

<sup>1</sup> Ma mara i ġetai da BADA Elijah labuei ita ġaiei au mara. Elijah ma Elisha Gilgal i voterei ma i nena. <sup>2</sup> Ma Elijah, Elisha i riwei i pa, “Weka ma mae ma BADA i riweu da ana nae au Bethel.”

Wate Elisha i paribelei, “Riwa kaua da BADA lawalawaina ma nanare tam lawalawaim, tau nanare eğa melanai ana voterem.” Anina ma airuağa i ġaira au Bethel.

<sup>3</sup> God ana peroveta borui au Bethel maemaei i opui Elisha awarina ma i riwei i pa, “Tam u aramanei da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eğa ona babaniei.”

<sup>4</sup> Ma Elijah, Elisha i riwei, “Weka ma mae, BADA i riweu da ana nae au Jeriko.”

Wate Elisha i riwa, “Riwa kaua da BADA lawalawaina ma nanare tam lawalawaim, tau nanare eğa melanai ana voterem.” Anina ma tau i nae au Jeriko.

<sup>5</sup> Ma God ana peroveta borui kampa au Jeriko maemaei i opui ma Elisha i nebelei ma i riwei, “Tam u aramanei bo da BADA am bada amadodo awarim ina vaitawanei?”

Elisha i paribelei, “Ee a 'ramanei, wate lamna eğa ona babaniei.”

<sup>6</sup> Ma Elijah i riwei, “Weka ma mae, BADA e paripari-tawaneu au Waira Jordan.”

Wate Elisha i paribelei i pa, “Riwa kua da BADA lawalawaina ma nanare tam lawalawaim, tau nanare eġa melanai ana voterem.” Ma airuaġa i babara nae.

<sup>7</sup> God ana peroveta 50 tau i votaġotaġoi, ma au muri i tumairi maranai Elijah ma Elisha Waira Jordan au adana i tumairi. <sup>8</sup> Elijah ana kwama i votawanei ma i piri ma lamnei waira tepana i ravi. Da i vilamonei au oiena ma au kelakelauna ma tau i pouna au alalana i babara damana.

<sup>9</sup> Maranai au baba ġelauna i ġeta Elijah, Elisha i riwei, “Ma riweu aiwai ana kauei aubaim muriai da ina ġaieiu.”

Ma Elisha i paribelei, “Tau am gabu ana vaia da peroveta ai bada lamna aubaina a ġoei da am rewapana ġaeġaena, ma viaitepatepani ma ma veredamaneu.”

<sup>10</sup> Elijah i riwa, “Lamna kua piripirina e vivibaġei, wate mepa da u inanai ina ġaiġaieiu, lamna u vivibaġei u vaia ma eġa, lamna eġa.”

<sup>11</sup> Ma airuaġa i bababara ma i vibababani ma hosi araratana, chariot araratana i taina ġetei ma tau i raviġori. Ma Elijah ma Elisha au poui i ruba ma BADA Elijah labuei i ġaieiu au mara. <sup>12</sup> Elisha wei i ’nanai ma i garara, “Amau! Amau! Mai Israel taugaga-loeina vivirewapana! Tam u nae!” Ma Elijah eġa ita inana-melei. Nuanuana i bola-kauei ma ana kwama au pouna i sikai.

<sup>13</sup> Ma Elisha i nae ma Elijah ana kwama au doa i vivipeunia, maranai i ġaiġaieiu au mara, i voepai ma i nae me waira au adana. <sup>14</sup> Ma kwamana i peupeu i vaia ma waira tepana i ravi ma i riwa, “BADA Elijah ana God mepa?” Maranai waira i ravi, waira i vilamonei ma au pouna au alalana i babara damana.

<sup>15</sup> Jeriko ai peroveta boruna 50 au weia ma i ’nanai aiwai i tupua ma i riwa, “Elijah ana rewapana i damana Elisha awarina.” Ma i nae da ita nebelei ma i mae-ġaira au doa ma i raudune. <sup>16</sup> Ma i riwa i pa, “Tauai rewapana 50, ma paritawanelai da am bada ana baiei. Mepa da BADA Aruana, Elijah i voepai da mepa au ola bo au gaugauba i teretawanei.”

Elisha i paribelei, “Eġa! Eġa ona nae.”

<sup>17</sup> Wate tau i voiġiriġiri da tauna i vinimala da i paritawanei i pa, “Anina ona nae.” Wate tau 50 aupom tonuġa i baia ma eġa ita nelaġai. <sup>18</sup> Maranai tau i nememei au Jeriko, Elisha tau i riwei, “A riwemi da avena ota nae!”

## 4

### *Elisha wavine Shunemei i voagui*

<sup>8</sup> Mara tagogi Elisha i nae au Shunem taon. \* Weka wavine manemanena i mae, ma Elisha i vibaġa-guratei da ita mae da ita am. Ma maranai Elisha wei au dobuna e vaġavaġai, tauna weka i amam. <sup>9</sup> Wavine awana i riwei, “Aramanei da orotona weka e nenei lamna BADA ana peroveta vivivireina. <sup>10</sup> Ana numa aburuna au poewa† tana voai ma ani matave, kepaġepa, ani kiala ma rampa tana terei au orana tauna aubaina. Ma kampa ina mae maranai e nenei.”

<sup>11</sup> Mara tagogi Elisha i nei ma i ġae ana au numa da i raupirai.

<sup>14</sup> Muriai Elisha ana taunola wavana Gehasi i paridadanei, “Aiwai ana kauei wavinena aubaina.”

Ma Gehasi i paribelei, “Tauna eġa natuna orotona ma awana i magura.”

<sup>15</sup> Ma Elisha i riwa, “Ma ġoreiai.” Ma Gehasi wavine i ġoreiai ma i nei da au metaeta i raumairiei. <sup>16</sup> ✨Ma Elisha wavine i riwei, “Wenanare marana madeġa au ġelauna tam natum orotona ma ġuniġuni.”

\* 4:8: Shunem taun 50 Km da au Samaria taun. † 4:10: Mai Israel ai poewa dabadabai. ✨ 4:16: Gen 18:14

Wavine i paribelei, “Eġa au bada. Tam peroveta ma tau am taunola, eġa ma morui!”

<sup>17</sup> Wate wavine i raumanawa. Ma marana wenanare madeġana au ġelauna wavinena natuna orotona i ġuniġuni, Elisha i ririweia nanare.

### *Elisha rava 100 i viambagibagi*

<sup>42</sup> Mara ġelauna, oroto tagogi melagai Baal-Shalishahei i nei. Tauna nai madeġana witina naona i labai ma palawa i apui da iavana 20. Ma witi majiġai baikena maiteni i neiai da Elisha i verei. Elisha ana taunola i riwei, “Rava lam‡ ma verei da ina am.”

<sup>43</sup> Ma ana taunola i garara, “Aiwai! Wei lam eġa tagotagogina da rava 100 tana viambagibagi?” Wate i paribelei i pa, “BADA i riwa da rava ma verei da ina am ma lam ina mae-terei.”

<sup>44</sup> Ma lam au naoi i terei ma tau i am ma lam i mae-terei, BADA i ririweia nanare.

## 5

### *Elisha Namaan i vilawani*

<sup>1</sup> Namaan lamna mai Syria ai sorodia badana. BADA, Namaan awarina i mae ma lamnei ai ġavia i vovovai-ubai. Ma lamna aubaina ai gulau, tauna i vivirana-kauei ma i vitumaġanei. Namaan sorodia wavana naenaena wate doria lepera i vaia.

<sup>2</sup> Marana patapatai mai Syria i nenei au Israel i viviġavia. Mara tagogi tevera guguinina i pani da i naiei da ai bada Namaan awana i verei da ana taunola. <sup>3</sup> Mara tagogi guguinina ana bada wavinena i riwei, “Au bada, am bada uta riwana-dadanei mepa da ita nae perovetana au Samaria maemaena awarina. Tauna ana doria ita inanai ma ita vilawani.”

<sup>9</sup> Ma Namaan ana hosi ma chariot borui i nae ma Elisha ana au metaeta i raumairiei. <sup>10</sup> Wate Elisha taupariverena i paritawanei da i riwei i pa, “Ma nae da au waira Jordan ma oġa-melem mara seven ma lepera dorianana ina voterem ma opim ina ai-me.”

<sup>11</sup> Wate Namaan amlona i ġaiġai kua ma i riwa i pa, “Tau au nota ġaeġaena da peroveta ita opui da ita inanai da urana, opiu au tepana mataira ita kauei ma ana BADA God awarina ita raupari da ata lawana. <sup>12</sup> Wate waira Amanah ma Pharpar au Syria i ai telera eġa me Israel wairai. Tau kampa ata toa ma ata lawana.” Ma Namaan i mae-tavirei ma ana amloġaiġaina i nae.

<sup>13</sup> Ana laralaraga i nae awarina ma i riwei, “Au bada mepa da ita riwem da aiwai piripirina uta kauei, lamna uta kauei tapa? Wei lamna kua telatelana i ririwei nanare, ‘Ma toa ma ma lawana.’ <sup>14</sup> Ma Namaan i ġaira au waira Jordan ma mara seven waira au orana i ġaira, me peroveta i ririwei nanare. Ma opina i ai me da me tevera tupuana nanare ma lepera dorianana i kwa.

<sup>15</sup> Ma Namaan ana laralaraga maiteni i nae me Elisha awarina ma i riwa, “Marina aramanei da au dobu, god eġa ita mamae anina Israel ana God tauna ava; lamna aubaina au bada pulo a vereverem ma vaia.”

<sup>16</sup> Wate Elisha i paribelei, “Riwa kua da BADA a vivitaunolei lamna BADA lawalawaina, ma wavanei a ririwa tau eġa pulo ana vaia.” Ma Namaan i babani bagibagi da Elisha pulona ita vaia, wate tauna pulona i geduaiei.

<sup>17</sup> Ma Namaan i riwa, “Mepa da nanare lamna ma vianineu da donki ruaġa ai vita ruvana Israel doana ana vigerui da ana naiei au numa. Ma marina da e nena, eġa melanai pulo ana apui bo sia taputapuna ana apui god ġelau awarii, anina BADA ainelana awarina. <sup>18</sup> Tau am taunola ma a ġoei da BADA au ġoa apoapoei ina nota-tawanei, kua tagogi ava awarinei; maranai au gulau a ruiuei ana au tempol ma tauna au urau e vovojijina ma maiteni a mamae-ġaira ma Syria ai god Rimmon a viviborumei.”

‡ 4:42: Peroveta ġelau Elisha maiteni i mamae, kampa gomara i peu ma rava i vinuapoapoe.



<sup>19</sup> Elisha i riwa, “Ana nuaubam ma nae.” Ma Namaan i nae.

*Mai Israel ai gulau Ahab au 851 BC. i'raḡe. Au murina gulagulau ḡelau i mae ma tau i au Samaria i mae. Maranai Hoshea i vigulau. Au 724 BC. mai Assyria ai sorodia Israel i viḡaviei.*

## 17

*Samaria i peu*

*Mai Israel ai gulau damona lamna Hoshea. Tauna i mae gulau au Israel madeḡa 9, wate Assyria ai gulau i paripariniḡaiei ma lamna aubaina i pani.*

<sup>5-6</sup> Assyria ai gulau Israel anapuna i naeni, da i ḡeta da Samaria taon I mae-kwaviviroi, ma i gudu-tomeni da madeḡa tonuḡa i kwa. Maranai Hosea ana vigulau madeḡana 9 i ḡetai, Mai Assyria Samaria taon i ruini mai Israel i pupuna-naiei au Assyria. Ma au Halah, taon, waira Habor au ririvana ma mai Mede ai au taon nununai i verei da i raunuma.

<sup>7-8</sup> Wei kovoḡai i nei mai Israel awari aubaina tau i god ḡelau i viviborumei. Tau i ai ḡoa apoapoe i rata kauaBADA ai God awarina, Wariḡa Tauna Egypt ai gulau Pharaoh au urana Israel i vai-tawanei ma aiaii i ravena-opunei. Mai Israel ai God eteni i pupuna-opunei ai kaua i votaḡotaḡoi da i kaukauei ma kaua waduboi ḡelau Israel ai gulagulau i kaukauei. <sup>9-10</sup> Mai Israel kaua apoapoe i kaukauei BADA ai God awarina ma BADA wei kaua eḡa ita vinuaiaiei. Tau i voepaepa gabui i voanaiei god morumorui voepaepaei aubaina au taon nununai, melagāi aburuoina da au taon ḡaeḡaei. Ola muomuoi anapui au tepai ma ai anapui au ḡoui gana vinualaulau i terenaiei ma Asherah ana tuatua ma kokoitau i vituramairini.

*BADA mai Israel ai ḡoa apoapoe aubaina i viopuni*

<sup>24</sup> Assyria ai gulau taon nununai ravai mai Babilon, Cuthah, Awa, Hamath ma Sepharvaim i vivaneiai da Samaria, ana au taon nununai kampa i terei da i mae. Tau i mai Israel numa i ruba-tawanei i raunumei. <sup>25</sup> Vouvounai wei ravai eḡa BADA ita viborumei, lamna aubaina lion ḡelau i paritawaneiai da rava i viviraḡeni. <sup>26</sup> Ma rava Assyria ai gulau ana riwa i paritawanei i pa, “Rava au Samaria u terenaiei, dobuna Godna ana tarawatu eḡa ita aramanei. Lamna aubaina ma dobuna ana God, lion i paritawanei ma ravai e viviraḡeni.”

<sup>27</sup> Ma mai Assyria ai gulau rava i egari, i pa, “Pirisi tagogi au Samaria o panipania, ona paritawana-melei ma, dobuna ana God, ana kaua ravai voui ina viararamani.” <sup>28</sup> Anina ma pirisi tagogi au naona i naenaiei au Assyria i neiana-melei da au Bethel i mae. Kampa rava i viararamani da BADA viborumei.

<sup>29</sup> Wate jentail ravai nununai ai god morumorui kokoitau i kaukauei ma metauna au taona i mamae, kampa ola au tepai au naona mai Israel au Samaria ai voepaepa gabui i voavoailana, kampa i terenaiei.

## 18

*Hezekiah i mae mai Judah ai gulau*

<sup>1</sup> Elah natuna Hosea i vigulau au Israel madeḡa tonuḡa i kwa. Wei maranaina au Judah Hezekiah, Ahaz natuna i vigulau. <sup>2</sup> Tauna ana madeḡa 25 ma i vibada au Jerusalem da madeḡa 29 i kwa. Alona Abi, Zekariah natuna. <sup>3</sup> Tauna kaua aiaii avai i kaukauei BADA awarina me noina David nanare. <sup>4</sup> ✧ Ma god morumorui ai ani voepaepa gabui anapui i votawatawanei. Ma kokoitau i viairikarikai ma Asherah tuatua i taratuituina-naiei. Ma wariḡa Moses mota bronzei, kokoitau i kaua, i viviborumei. Hezekiah motana kokoitauna maiteni i viaigimagimai. (Mai Israel motana i ḡorei Nehushtan.)

✧ 18:4: Num 21:9

<sup>5</sup> Hezekiah BADA, Israel ana God i vitumaġanana-kauei. Eġa gulau ġelauna au Judah nanare me tauna, ma eġa aiai ġelauna nanare au naona i mae bo muriai i mae. <sup>6</sup> I vipatutu BADA awarina au anatapuna ma i vovoguratei da God ana tarawatu Moses i vereverei anatapuna i vovotaġotaġoi. <sup>7</sup> BADA tauna awarina i mae ma ana nola anatapuna i davudavu. Tauna Assyria ai gulau i parivirevirei ma eġa aubaina ita vilaraga. <sup>8</sup> Ma mai Philistia anatapui i vovaiubai, melaġai da taon ġaimei garigarina anatapuna i pupuni da au Gaza i ġeta.

*Maranai Hezekiah i'raġe, Manasseh amana i raviepaiai da i vigulau.*

## 21

### *Manasseh i vigulau au Judah*

<sup>1</sup> Manasseh ana madeġa 12 ma i vigulau au Jerusalem, ma i vibada madeġa 55. Tauna alona Hephsibah. <sup>2</sup> Wariaġa BADA eteni ravai i virubai ai kaula vinuamedamedai aubaina maranai mai Israel i ruirui au Canaan. Manasseh wei ravai ai kaula i votaġotaġoi da i kaukauei ma ana ġoa apoapoe i rata BADA au matana, <sup>3</sup> Manasseh ola muomuoi au tepai god morumorui awari voepaepa gabui amana i viairikarikai, i voa-melei. Ma nanare pulo aniapuna i voanaiei Baal awarina, ma Asherah tuatuna i tonanaiei me Israel ana gulau Ahab. Manasseh wate nanare ubona i viviborumei. <sup>4</sup> ✧ Tauna god morumorui ai pulo aniapuna i voanaiei BADA ana tempol au orana, wei gabuna aubaina BADA i riwa i pa, "Wavau au tempol ina mae." <sup>5</sup> Tempol au metaetana, gabu garigarina au orana Pulo aniapui ruaġa i voai ubona god aubaii. <sup>6</sup> Manasseh natuna orotona ai au araratana i apui ana pulo,\* ma parauma ma baravu ma gweri da ginauri ravai i rautaniġanei. Kaula maġamaġau apoapoe kaukauai i kauei ma BADA amlona i ġaiġai kaula.

<sup>10</sup> Ma lamna aubaina BADA ana peroveta awariei i babani i pa, <sup>11</sup> "Gulau Manasseh kaula maġamaġau vinuamedamedai i kaukauei, ma tauna i apoapoe kaula eġa me mai Amori, tui wei dobuna i maeni muriai da mai Israel. Ai kokoitau mirimirai awariei mai Judah i raveni da i ġo'apoapoe. <sup>12</sup> Lamna aubaina BADA Israel ana God wenanare e ririwa, 'Kovoġa ġaeġaeotana ana neiai Judah ma Jerusalem awarii da maranai rava anatapui riwana taniġaiei ina nonori ma orai ina auepai. <sup>13</sup> Ruvana tagoginei Samaria a kovoġi ma ruvana tagoginei Jerusalem ma Israel ai gulau Ahab ana epaepaia maiteni a kovoġi. Jerusalem ravai ana amaġa-tawanei, me aboma ita amamaġi, ma i vitaragabubui. <sup>14-15</sup> Au rava i ġo'apoapoe awariu, maranai noinoii Egypt i opu-tawanei da marina. Wei e viviamloġaiġainiu. Ma rava mamae-terenai ana inana-tawanei, ma ana veredamanei ġavia awarii ma tau i vovaiubai ma ai purapura ina kwalei."

<sup>16</sup> Manasseh mai Judah i raveni da god morumorui i viborumei ma BADA i vijiboġi; wate eġa lamna ava ma rava aiaii i virage na labalababai da tara i kororo da Jerusalem etanaina i vioai au giana da au giana:

<sup>18</sup> Manasseh i'raġe ma ana numa au ririvana dobu wavana Uzza ana au wapu i doboi, Ma natuna Amon ana gabu i vaia da i vigulau.

### *Amon i vigulau au Judah*

<sup>19</sup> Amon ana madeġa 22 ma i vigulau. Ma i vibada madeġa ruaġa au Jerusalem. Tauna alona Meshulemeth, oroto Jotbahe wavana Harus natuna <sup>20</sup> Tauna ana ġo'apoapoe,

✧ 21:4: 2Sa 7:13 \* 21:6: I apui mai Canaan ai god Molek awarina.

i rata kaua BADA awarina me amana nanare. <sup>21</sup> Amana i ġovaivaiti ma god moru-morui i viborumei. <sup>22</sup> Tauna noinoii ai God, BADA i rawaġaiġaiei ma ana tarawatu eġa ita votaġotaġoi.

<sup>23</sup> Ana gabemani babadai Gulau Amon i viogei da ana au gulau numana i viraġeni. <sup>24</sup> Wate mai Judah, rava gulau Amon viraġenana i viogatarei anatapui i viviraġena-naiei ma natuna Josiah i terei da i vigulau.

## 22

### *Josiah i vigulau au Judah*

<sup>1</sup> Josiah ana madeġa 8 maranai i vigulau au Judah ma i vibada au Jerusalem madeġa 31. Tauna alona Jedidah, oroto Boskathei Adaiah natuna. <sup>2</sup> Tauna BADA au matana aiwai ana tapuna i kauana-kauai ma noina David au ivina i tua ma BADA ana tarawatu ana tapuna i votaġotaġo-kauai.

*Josiah nelara ġelau i terei da BADA ana tempol i voavoa-virai lamna maranaina Moses ana tarawatu au buka i girugirumi i nelaġai da i neiai Josiah awarina.*

<sup>11</sup> Maranai gulau i nonori aiwai Tarawatu au bukana i girumi, ma ana gara i viaisikasikai. <sup>12</sup> Ma gulau Josiah ana taunola pirisi Hilkiah, Saphan natuna Ahikam, Micaiah natuna Akbor, Shaphan gulau ana taugiruma ma Asaiah gulau ana tauvinuaterena i riwei i pa, <sup>13</sup> “Noinoita wei bukana riwana eġa ita votaġotaġoi, ma aiwai i ririwei eġa ita votaġotaġoi, lamna aubaina BADA amlona i ġaiġai awarita. Lamna aubaina ona nae au tempol ma BADA awarina ona raupari tau ma wei dobuna ravai aubaii ma Judah ravai ġelau aubai. Ma ona paridadana wei au bukana aiwai i girumi.”

*Josiah ana taunola babadai i nae BADA ana peroveta tagogi awarina. Wei perovetana lamna wavine ma riwa i paritawane i nae me gulau awarina.*

<sup>16-17</sup> BADA wenanare i riwa, “Tau wei dobuna ma dobuna taumaenina ana kovaġa kauai.” I girugirumia nanare, ma lamna gulau awarimi i ’avi, BADA wenanare i riwa, “Tui i geduaieu ma god ġelau i viviborumei ma lamna i viamloġaiġainiu. Jerusalem awarina orau amapo da e ararai ma amapo eġa ina dauva.” <sup>18</sup> Wate ona naeme Judah gulauna, i paritawanemi awarina da ona riwei, “BADA Israel ana God e ririwa da <sup>19</sup> Maranai u nonori menanare Jerusalem ma taumaenina ana kovoġane. Tam u rupena ma u vilamolamona tau BADA awariu, am gara u viaisikasikai ma u tou, Tau ana kauai da ina apoapoe kaua, rava ma dobu ana kovoġi da eġa aiwei doana ina maeni. <sup>20</sup> Ma kovoġana a neneiai au Jerusalem eġa ina nei da am iraġe au murina. Ana voterem da ana nuaubam ma iraġe.”

Ma wei pariverena i naiei ma gulau i riwei. Josiah god morumorui viborumai i viġaei.

## 23

### *Josiah i parivainuaġana da ina votelatela*

<sup>1</sup> Gulau Josiah babada anatapui au Judah ma Jerusalem i ġoreiai. <sup>2</sup> Ma pirisi ma peroveta ma rava molamolakana da manemanena, anatapui i ġae BADA ana au tempol. Kampa gulau parivainuaġana bagibagina bukana tempol au orana i nenelaġaia i iava-tapui awarii. <sup>3</sup> Gulau ana au gabu i mairi tempol tuatuaana au naona ma BADA maiteni parivainuaġana bagibagina i ravivouni da tauna BADA ana tarawatu ma ana riwa bagibagina orana ma aruana taputapunei ina vojijini, i ririwei nanare au bukana. Ma rava anatapui nanare i parivainuaġana.

<sup>4</sup>✧Ma gulau, pirisi ġetelarana Hilkiah, ana pirisi babadai ma tempol taupainii i egari da BADA ana tempol au orana aiwaiei Baal ma god wavinena Asherah ma ubona godna

morumorui i viviborumei anapui ita opuneiai. Gulau wei purapurai anapui i naiei da gaugauga Kidron au ririvana i apu-naiei, ma lapukarei i vivanei au Bethel.

*Anina ma Josiah mai Judah ma mai Israel ai dobu i naeni ma mepa rava kokoitau i raudunelei ola muomuoi au tepai anapui i pupuni ma pirisi kokoitau tauduneleina anapui i viraeni.*

*Ma gulagulau aiavoi Josiah i votaotaotaui BADA ega ita vivirei ma ai goa i apoapoei BADA awarina.*

## 2 Chronicles Vinolanola Viruaina

### Pariverena

Wei bukai Chronicles 1 ma 2 virarautuana tagogina Samuel 1 & 2 ma gulagulau ai au buka 1 & 2 e mamae. Chronicles 1, gulau David e virarautuei ma ana oga tempol au Jerusalem aubaina. David nola ogana pirisi i verei. Tauna i ġoei da rava anatapui BADA ina viborumana-kauei. Chronicles Viruaina mai Israel ai gulagulau ai nola i babaniei, menanare Solomon ana taunola BADA ana tempol i voai au Jerusalem. Solomon iraġe ma au murina menanare ana dobu i kai da ruaġa. Chronicles 2, gulagulau ruaġa ai kua e babaniei. Gulau ġelau aiiai tau i BADA i viviborumei wate gulau maġamaġai i apoapoe kua. Tau i eġa BADA ana tarawatu ita votaġotaġoi. Tau i god morumorui i votaġotaġoi. Wei gulau nuabola ai rava i verei. Ma BADA ai ġavia i vianinei da i nei ma dobu i ruaġai i viġaviei da i pupuni. Ma muriai BADA Judah mamae terenai i neiana-meleiai.

## 36

### *Judah e vovoapoapoe*

<sup>14</sup> Ma pirisi ai babada ma rava anataputapui, BADA ana parivainuaġana bagibagina eġa ita vojijini ma jentail au ririvai maemaiei ai kua apoapoei kaukauai ma ai bua i ġovaivaitai. Ma lamnei BADA ana Tempol vivivireina au Jerusalem i vimiramirai.

<sup>15</sup> Mai Judah ġoġoġai ai God BADA, ana rava ma ana tempol nuanuana i bolai ma lamna aubaina ana peroveta nununai i paripari-tawanei da rava ai ġoa apoapoe ita rupeni.

<sup>16</sup> Wate tau i God ana peroveta i vijiboġi ma eġa ita vivirei ma au damona BADA ana amloġaiġai i rata guratana da menanare ita viubanei.

### *Mai Babilon Jerusalem i vipupui*

<sup>17</sup> Anina ma BADA mai Babilon ai gulau i paritawanei da Jerusalem i vipupui. Ai sorodia nelara voui tempol au orana i viraġena-naiei. Tau i mai Judea eġa ita rau-nuapoapoelei ma waivine ma laraga ma rava magumaguri ma doridoriai. BADA mai Judea anatapui i verenei Babilon ai gulau Nebuchadnezzar au urana. <sup>18</sup> Tauna Tempol ana purapura ġaeġaei da muomuoi ma mane anatapui i pupuna-naiei. Gulau ana gabemani babadai ai numa i viairikarikai ma mane ma purapura i pupuna-naiei au Babilon. <sup>19</sup> Ma God ana Tempol i apui ma Jerusalem garina i viairikarikai; ma gulau ana numa ma numa ġelau anatapui ma purapura mae-terenana anatapui i viairikarikai ma i apu-naiei, eġa aiwai ita mae.

<sup>20</sup> Ma aiavoi lawalawaii i mamae, anatapui i paninaiei au Babilon da i vitaunola. Ma muriai mai Persia nai dobuna Babilon i pupuni ma i vibadei. <sup>21</sup> Mai Israel ai doa ipipipiei tau i madeġa au vi-7-na ai doana eġa lauvitau ita verei, lamna aubaina i kovoġi, da i pupuna-naiei au Babylon da madeġa 70 i kwa. BADA ana peroveta Jeremiah i ririweia nanare i tupua.

<sup>22</sup> Au Persia gulau Sairas ana vibada madeġana tagoġi, ma BADA ana peroveta Jeremiah aiwai i ririweia marina i tupua, Persia ai gulau orana i ravi-dagudagui da i giruma ma i vibabarai ana au vigulau au anatapuna.

<sup>23</sup> Mai Persia ai gulau Sairas, wei i riwei,

“BADA, Aidamo ana God, dobu anatapuna vibadana au urau i terei. Ma i vineu da ana Tempol au Jerusalem, Judah au paratana ana voa-melei. Ma taumi aiavoi BADA ana rava, o ġoġoġei da ona nae me kampa, lamna anina da ona nae. Ma BADA ami God ina gagaloemi.”

## Ezra

### *Pariverena*

Wei bukana Ezra e ririweta da menanare mai Judea au Babilon i mae ma ġelau i naeme ai au dobu au Jerusalem da BADA ana Tempol ina voa-melei.

### 3

#### *Pulo aniapuna i voa-melei*

<sup>1</sup> Mai Israel ai au dobu i mae nawaravi <sup>v<sub>i</sub>7<sup>n</sup><sub>a</sub></sup> ma marina tau i anatapui i netagogiai au Jerusalem. <sup>2</sup> Nai maranai Josadak natuna Jeshua ana rava pirisi ġelau maiteni, ma Shealtiel natuna Zerubabel ana dam ravai maiteni; pulo aniapuna i voai Israel ana God awarina. Me God ana peroveta Moses, ana Tarawatu i ririweia nanare. <sup>3</sup> Avena da tau i nai dobuna taumaeni i rovorovoei; wate pulo aniapuna ana au gabu wadubona i voai. Ma i vikarei da ubaubanai ma aubigai patapatana pulo i apuapui BADA awarina.

#### *Tempol i voa-melei*

<sup>7</sup> Gulau Sairas i riwa da wenanare ita kauei. Tau i mane ġaima taubori ma kamda ravai ita verei. Ma lam, wain ma oil mai Sidon ma mai Tyre ita verei da ai cedar au Lebanon bogei ita towana-neiai au Joppa.

<sup>8</sup> Ma Madeġa viruaina nawaravina au viruaina Zerubabel ma Jeshua ma varevarei (pirisi ma mai Levi ma rava ġelau maiteni i vivipanipani i nememei au Jerusalem) ma BADA ana Tempol voana i vikarei. Ma Levi ana damei nelara ai madeġa 20 da nore i ġeġae i terei da nola i vibadei.

*Rava i nola da God ana Tempol i voa-melei madeġa 21 au orana.*

### 6

#### *Tempol i viaiaini*

<sup>16</sup> Anina ma Mai Israel piripirisi ma dam Levi ravai ma rava anatapui panipaniei i nenememei ana nuaii God ana Tempol i vovivirei God voepaepana aubaina.

## Nehemiah

### *Pariverena*

Nehemiah Wei au bukana e ririweta, menanare mai Judea ġelaui au Babilon i mamae, i naeme ai au dobu Jerusalem da garina ina voai-melei.

## 8

### *Ezra tarawatu bukana-rava awari i 'avi*

<sup>1</sup> Rava anatapui Jerusalem ana au anirui e ġoreġorei Samaim,\* i vitagogiei. Ma tau i tarawatu badana Ezra i riwei da Moses ana tarawatu bukana ita neiai, wei tarawatuna BADA mai Israel i verevereia.

<sup>2</sup> Ma aupom naona au nawaravi au vi-7-na, pulo tauapuna pirisi Ezra tarawatu bukana i neiai patarana i vitagogieina awari, nelarai ma waivinei ma roaroa awari metaui da iava i aramanei. <sup>3</sup> Ma Ezra au deba i mairi ma ponana ġaeġaenei bukana i 'avi rava awarii, maratomtomi i vikarei da aubenai ma anatapui i rautaniġana kauga.

<sup>5</sup> Ezra vatara au tepana i mairi rava au matai ma maranai buka i votawanei, rava anatapui i vomaimairi. <sup>6</sup> Anina ma Ezra BADA God ġaeġaena i voepaepai; ma rava urai i voepai ma i paribelei i pa, "Amen, Amen!" Ma i raudune au doa ma BADA i voepaepai.

<sup>8</sup> Ma Levi ana dam ravai, bukana rava awari i 'avi ma i viararamani† da tau i riwana anona i aramanei.

<sup>9</sup> Anina ma Gavena Nehemiah, ma pirisi, taugiruma Ezra ma dam Levi ravai, rava awari i viararamana. Marina rava awarii i riwa i pa, "Wei marana tana vovaiivirei BADA ata God awarina. Lamna aubaina eġa ona vinuabola ma ona tou."

<sup>10</sup> Ma Nehemiah i riwa, "Ona nae ami au numa ma ona am kauga ma ona uma-kauga ma rava eġa ita lauvoa, ona taraiġuei. Wei marana lamna mara vivivireina BADA awarina. Lamna aubaina BADA ina vinuaiainimi, eġa ona vinuabola, aubaina BADA ana nuaiai awarimi lamna ami rewapana!"

---

\* **8:1:** Wei metaetana lamna Jerusalem garina ana anirui tagogi e ġoreġorei Samaim wate ata ponei Waira. Wei aniruina lamna waira dogona au ġereġerena au maramatanei. † **8:8:** Bible pona Hebrewi i girumi ma wei ravai pona arama i aramanei lamna aubaina viararamana maiteni i kaukauei.

## Job

### *Pariverena*

Rava jijimanina tagogi vinuabola apoapoei maḡamaḡau i nenelaḡai lamna au bukana e vivirarautuei. Job ana nota ma ana rava ai nota wei nuabolai awari lamna e viviatataieta. Ana rava e notanotai da Job kua apoapoei i kauai aubaina God, tauna e kovokovogi. Job i aramanei da wei eḡa riwa kua. Tauna, God i vivitumaḡanei, wate i ḡoeḡoei da ita aramanei aiwai aubaina wei nuabolana e tuputupua. God, Job ana vinuapoapoe anona eḡa ita vieḡei, wate God ana rewapana ma ana nuaulaula i rata guratana au baina rava eḡa tagotagogina da ina aramanei aiwai e viviatataieta. Maranai i aramanei da God ana rewapana ma ana nuaulaula i rata guratana, tauna God vitaraviravirana i voterei ma i voepaepai. Wei virarautuana au damona God Job i vilawani ma natunatuna i vimaḡai ma i vimaura-melei. God Job ana rava tonuḡa i ena-guratei aubaina tau i eḡa ita aramana-kauai aiwai i latolatoni ma Job i vinuapoapoe.

### *Job ana virarautua*

<sup>1</sup> Oroto wavana Job au Uz i mae. Tauna rava jijimana kaukauana ma ḡo'apoapoei i geduaiei. Tauna God i vivirei ma ḡoa aiiai ava i kaukai. <sup>2</sup> Tauna natunatuna nelarai 7 ma waivinei tonuḡa, <sup>3</sup> ma ana sipu 7,000; kamel 3,000; uata bullna 1,000 ma donkey waivinei 500 ma ana taunola maḡamaḡau. Ma i vipurapura ma i maura kua eḡa aiiai ḡelauna nanare nai au dobuna, au maramatanei.

<sup>4</sup> Ai mara i tereterei nanare Job natunatuna nelarai nununai ai au numa i toretorela, ma varevarei ma novunovui i rauḡoreiai ma anapui i amam ma i umauma gogona. <sup>5</sup> Aupom biaḡa nanare torela au murina, Job ubaubanai boiboḡi ina vovomairi ma natunatuna nununai ina rauḡoreiai ma epaiiai ḡamoḡamo taputapuna ina apuapui BADA awarina da natunatuna ina viaiaini. Tauna i notanota da, "Mepa da roaroa i kauana-boai ma au orai God i parivaipoapoeni."

### *Satan Job ana tumaḡana i raudadani*

<sup>6</sup> Marina mara i ḡetai da anela au mara i ḡeta BADA awarina ma tauviwavu - Satan tau i votaḡoi da i ḡeta. <sup>7</sup> BADA Satan i paridadanei, "Tam meiei e nenei?"

Satan i paribelei i pa, "Tau were ma nare a nenei, dobu a tetetei."

<sup>8</sup> Ma BADA i paridadana, "Au taunola Job u inanai bo eḡa? Tauna rava aiiai kaukauana, eḡa aiiai ḡelauna au dobu nanare. Tauna rava jijimanina ma patupatutuna. E vivivireiu ma e paipaina-melei da eḡa kua apoapoe ita kaukai."

<sup>9</sup> Satan i paribelei, "Tam Job e paipaina-kauai lamna aubaina e voepaepaim! <sup>10</sup> Marana patapatai tauna ana numa ravai ma ana purapura e gagaloei, ma anapuna uranei e vodadani e viaiaini, ma bulumakau u verei da wapuna i oai. <sup>11</sup> Wate uram ma viloloi ma anapuna ḡarinei ma vaitawanei, ma au matam ina parivai apoapoenim."

<sup>12</sup> BADA i riwa i pa, "Anina, ana purapura anapuna au uram a tereterei, wate eḡa tupuana aiwaina ma vodadani." Ma Satan BADA i netawanei.

<sup>13</sup> Mara tagogi, Job natunatuna nelarai ma waivinei i toretorela, tuai ana au numa, <sup>14</sup> ma taupariverena i ḡeta Job awarina ma i riwei i pa, "Am taunola burumakauai doa i uauatai ma au ḡereḡerei donkey modu i amam, <sup>15</sup> ma mai Sabea i ruba-ḡairai ma ḡamoḡamo anapui i kwalei, am taunola anapui i viraḡena-naiei, ma tau ainelau a ruba da ata pariverem."

<sup>16</sup> I bababani ma taupariverena ḡelauna i ḡetai ma i riwa, "Namanamara marei i ḡairai da sipu ma taupainii i viraḡena-pai, ma tau ainelau a rubai da ata paripariverem!"



<sup>17</sup> Ravana i bababani ma taupariverena ġelauna i ruba ġetai ma i riwa, “Mai Caldia boru tonuġa ana melaġina i ġairai ma am kamel i viaġaġana-naiei ma taupainii i viraġena-pai, tau ainelau a ruba da ata paripariverem!”

<sup>18</sup> Amapo i bababani ma wate taupariverena ġelauna i ruba ġetai ma i riwa, “Natunatum nelarai ma waivinei, natuevou ana au numa i toretorela, <sup>19</sup> ma maratagogi kojikojira mutuluei i opui ma numa i vipeuni au tepai ma anatapui i viaijijini, tau ainelau a ruba da ata pariverem!”

<sup>20</sup> Anina ma Job i vomairi ma ana kwama i sikai. Kolana i ġari ma i peu ġaira au doa ma BADA i voepaepai. <sup>21</sup> Ma i riwa,

“Ana kovakovau a nei;  
ana kovakovau ana nae.

BADA i verena ma i vai-melei;

BADA wavana ana voepaepai ma ana viborumei.”

<sup>22</sup> Wei anatapuna au orana, Job eġa ġo’apoapoe aiwaina ita kauei bo God ita viwavui.

## 2

### *Satan Job i raudadana-melei*

<sup>1</sup> Mara ġelauna, anela au mara i ġeta me, BADA awarina ma tauviwavuna - Satan tau i votaġoi. <sup>2</sup> Ma BADA Satan i paridadanei, “Tam meiei e nenei?”

Satan i paribelei i pa, “Tau were ma nare a nena ma a nenei, dobu a tetetei.”

<sup>3</sup> Ma BADA i paridadana, “Au taunola Job u inana bo eġa? Tauna rava aiaii kaukauana eġa aiaii ġelauna au dobu nanare. Tauna rava jijimanina ma patupatutuna. Ma e vivivireiu ma ġo’apoapoe e gedugedaiei. Ana lawana anina jijimanina e maemaeni avena da orau u taini da a kovoġa labalababai.”

<sup>4</sup> Tauviwavu BADA i paribelei, “Tauna ana lawana ava e vinuabolei, me rava ana purapura anatapuna ina verenei da eġa ina kero. <sup>5</sup> Wate uram ma viloloi ma tupuana ma ġelamina ma ravi, ma au matam ina parivai-apoapoenim!”

<sup>6</sup> BADA i riwei, “Anina, tauna au uram a tereterei wate eġa ma viraġeni.”

<sup>7</sup> Ma Satan BADA i netawanei ma i nae da Job kero apoapoei i verei, au loulouna da i ġaira au ae lapalapana. <sup>8</sup> Ma Job nau gebona i vaia da kerona i kakakaroi ma au lapukare i kiakiala.

<sup>9</sup> Awana Job i riwei i pa, “Amapo da am lawana jijimanina ma vovojijini bo? God ma parivai-apoapoeni ma ma iraġe!”

<sup>10</sup> Wate Job i paribelei i pa, “Tam opaopam! Eġa nanare ma babani. Tauta God kua maġamaġau ma aiaii e verevereta, ma apoapoei e paripari-tawaneiai, maiteni tana vaia.”

Wei kauai maġamaġau apoapoe Job awarina i tupua, wate tauna ana babani awarinei eġa ġo’apoapoe ita kauei.

### *Job ana rava i nei da i raugenari*

<sup>11</sup> Maranai ana rava tonuġa riwana i vaia da Job wenanare ma menanare i vinu’apoapoeni, tau i vitagogiei ma i nae Job ita raugenari ma ita vinuabai. Tau i wavai Eliphas tauna Temanei, Bildad tauna Shuahei ma Zophar tauna Naamah ei. <sup>12</sup> Tau i tapunei Job i ’nanai ma i vinuanaini da lamna Job. Maranai i ’nana-kauei. Tau i vitouana, ma ai kwama i viaisikasikai ma pokau au tepai i tawatawanei. <sup>13</sup> Ma aupom ma waguvarai 7 tau i au doa i vikiakialei, Job i mae-vereverei. Ma i ’nanai da ana nuabola i rata guratana ma gamoi i pota ma i kiala genuatau.

## 3

### *Job ana tupua marana i parivaiapoapoeni.*

- 1 Wiki tagogi au murina Job gamona i laḡi ma ana tupua marana i parivaiapoapoeni.  
 2 I pa,  
 3 Au tupua marana ma boai,  
   ma waguvaraina i vinolanola da tevera orotona i tupua.  
 4 Nai marana ina waguwarei!  
   Ma God au aidamo wei marana ina nota-tawanei,  
   ma au tepana eḡa ina rarana.  
 5 Waguvara ma gimtona potopotona wei marana ina vibadei;  
   ma lada marana ina purui  
   ma gimtona lalalaina ina purui.  
 6 Gimtona nai waguvaraina ina viamoai  
   wei marana eḡa ma iava-melei;  
   madeḡana bo nawaravina.  
 7 Nai waguvaraina eḡa aiai ina tupua,  
   ma eḡa nuai ai gararana ina nonori.  
 8 Vijiboḡa amamai,  
   mepa da ai vijiboḡa boga bariawana ina vidagui;  
   taui wei marana ina vijiboḡi.  
 9 Maratomtom ubonana ina ḡuvai  
   ma mara karena ina paina-avei  
   ma madeḡa vuduna eḡa ina inanai.  
 10 Aubaina taui manawa metaetana eḡa ita gudui  
   ma vita maḡamaḡau i vereu.  
 11 Airake, boiboḡi ita gomui!  
   Bo ata i 'raḡe maranai a tuputupua.  
 12 Aiwai aubaina au arona i vimataveniu  
   ma ḡuḡunei i viḡuḡui?  
 13 Maranaina a tupua, matau ita pota;  
   ma ata matave ma ata vilauvitau.

## 4

### *Eliphas i babani*

- 1 Ma Eliphas rava Temanei Job i paribelei i pa,  
 2 Job eḡa amlom ina ḡaiḡai ma ana babani,  
   tau ata genuana ava, ana babani!  
 3 Rava maḡamaḡau u viararamani  
   ma ḡokokokarai u vovaivirewapani.  
 4 Riwam, rava peupeui u duḡui,  
   ma ae tutui viviarai u duḡui.  
 5 Wate marina nuabola i nei awarim, ma am nota i peu  
   i vodadanim ma u rovo-kaua.  
 6 Am vitumaḡana God awarina,  
   ma am lawana jijimanina.  
   Lamna, am rewapana, tapa?  
 7 Ma tumairi ma ma vinua notanota!  
   Rava jijimani e irairaḡe bo?  
   Mara aiwai rava jijimani i kero ma i'raḡe?  
 8 A inanai rava ḡoa apoapoe i paewi

ma nuabola i tuarui.  
*Job ana rava amapo da i ririwa-giriḡiri da tauna kaua apoapoei i kauai aubaina wei nu-abolana e nenelaḡai. Wate Job e ririwa da tauna eḡa aiwai apoapoena ita kauai.*

## 38

### *BADA Job i paribelei*

- <sup>1</sup> Ma BADA labu au orana ma Job i paribelei, i pa,  
<sup>2</sup> “Tam aiai e bababani labalababa,  
 ma au nuaulaula e paripari-virevirei?  
<sup>3</sup> Ma mairi jijimana me oroto,  
 ana vitaravirevirem  
 ma ma paribeleu!
- <sup>4</sup> Tam mepa maranai dobu tuatuana i tonei?  
 Ma riweu, mepa da u aramanei?  
<sup>5</sup> Aiai dobu ana manawa ma ana dabora i terei?  
 U aramanei tapa? Ma aiai i ruvai?  
<sup>6</sup> Aiwai dobu tuatuana e vovojijini?  
 Ma aiai dobu tuatuana i tonei,  
<sup>7</sup> maranai maratmtom ubonai i wela tagogi,  
 ma BADA ana anela ana morelanai i voepaepa ma i vigaragaraei?
- <sup>8</sup> Aiai boga ana au parata i terei  
 maranai boga manawana ana goba i wanaiwaḡi?”

## 40

- <sup>1</sup> Ma BADA Job i riwei i pa,  
<sup>2</sup> “Tam, God Vivirewapana Kaukauana e viviwavui;  
 Aiai God e viviwavui, ina paribelei.”  
<sup>3</sup> Anina ma Job BADA i paribelei,  
<sup>4</sup> “Tau rava labalababa, menanare ana paribelananem?  
 Gamou ina pota.  
<sup>5</sup> Boiboḡi a babani guratana.  
 Eḡa aiwai ḡelauna ana latoni.”

## 42

### *Job i babani me*

- <sup>1</sup> Ma Job i babani me, i pa  
<sup>2</sup> “Tau a aramanei da tam aiwai anapuna e kaukauei;  
 Eḡa aiai am oga ina viḡaei.  
<sup>3</sup> ✧ U paridadaneu, “Tam aiai e bababani labalababa,  
 ma au nuaulaula e pari-virevirei?  
 Riwa kaua am boruma vivinualaulaunana eḡa ata aramanei,  
 da a voḡana guratana.”
- <sup>4</sup> ✧ “U riweu, ‘Ma rautaniḡana, ma ana babani,  
 Ana paridadanem ma tam ma paribeleu.’  
<sup>5</sup> Taniḡau ava riwam i nonori

Wate marina matau i 'nanaim.

<sup>6</sup> A vinimala, ma au lapukare ma au debidebi ana kiala.

A ruperupena ma a mae-tavireu awarim ma au gō'apoapoe ma nota-tawanei.”

### *Damona*

<sup>7</sup> BADA i babani vorovei Job awarina ma marina Eliphaz rava Temanei awarina ina pa, “Amlou i gāigāi awarim am rava ruaḡa maiteni, taumi eḡa riwa kaua ota babaniei me Job nanare. <sup>8</sup> Lamna aubaina, bull 7 ma sipu ororotoi 7 ona vaia ma ona nae au taunola Job awarina ma siai taputapuna ona apui awariu. Tauna aubaimi ina raupari ma ana pari ana nonori da eḡa ana vinimalaimi ami kaua apoapoei aubaina. Taumi eḡa riwa kaua ota babaniei me au taunola Job nanare.” <sup>9</sup> Anina ma Eliphaz, Bildad ma Zophar BADA aiwai i ririweia nanare i kauei, ma BADA Job ana pari i nonori.

<sup>10</sup> ✧ Ma maranai Job i raupari-vorovei, BADA ana maura i veremelei ma raviai-tepatepani.

<sup>11</sup> Varevareina ma novunovuna ma ana rava waduwaduboi i nei ana au numa ma maiteni i am ma i uma gogona. Ma Job i vinuaubai aubaina BADA vita ḡaeḡaena Job i verei. Ma tau i anatapui kampa i ḡeḡeta mane ma loji goldei Job i verei.

<sup>12</sup> BADA, Job i viaiaina-kauei eḡa me au naonei. Awarina sipu 14,000; kamel 6,000; uata bullna 2,000 ma donki waivine 1,000. <sup>13</sup> Ma nanare, natunatuna nelarai seven ma waivinei tonuḡa. <sup>14</sup> Natuna wavinena magurina wavana Jemimah<sup>\*</sup>, ma keikeina wavana Keziah<sup>†</sup> ma vitonuina Keren-Hapuk. ‡ <sup>15</sup> Job natunatuna guguinii inanai i ai dewadewa eḡa me guguini ḡelau nai au dobuna. Ma Job natunatuna nelarai ma waivinei ai buderi i terei da anatapui ruvana tagogina ina vaia.

<sup>16</sup> Job i mae madeḡa 140 ḡelauna; da ḡoḡoḡana ma nonoina da i nae kimta au <sup>vi-4</sup>na<sup>-</sup>inanai. <sup>17</sup> Anina ma i magura kaua ma i'raḡe.

---

✧ **42:10:** Job 1:1-3    \* **42:14:** Heb. wei wavana anona Gabubu    † **42:14:** Heb. wei wavana anona Cassia. bo kaidara talana.    ‡ **42:14:** Heb. wei wavana anona mata penitana.

## Psalm Wela ma Pari

### *Pariverena*

Mara manamanaina i netawanana rava maḡamaḡau taputapunei ava wela ma pari i girumi wei au bukana. Mai Israel wei welai ma pari i tami ma i teretagogiei da lamnei God i viviborumei.

Wei au bukana wela ma pari tapuna ma tapuna. Ġelau God e viviborumei ma e vovoepaepai ma ana iviaiai aubaina e viviegualauei. Ġelau e vivibaḡa agu ma gagalo aubaina, bo notatawanana aubaina. Wela au ḡelau, rava e raraupari ai gulau aubaina ma god e vivibaḡai da ai ḡavia ita kovoḡi. Ma wela au ḡelau tauamgiruma ana apoapoe ma ana nuabola aubaii God awarina i beubeura.

Ma maraḡela Iesu riwa wei au parii i vaia da i viararamana. Kerisiana wei welai ma parii i welewelei ai au viboruma ma i jimajima.

### **Wela vinevinei**

Psalm 1, 10, 23, 27, 34, 51, 67, 90, 95, 1-11, 100, 103, 110, 103, 110, 119, 9-16 ma 139.

## Buka Tagogi

### 1

#### *Nuaiiai ririwa-kauana*

<sup>1</sup> Rava viaiainana, lamna eḡa ḡo'apoapoe ravai ita votaḡotaḡoi,  
ma ponai eḡa ita rarautaniḡanei;  
ma vivijiboḡai eḡa awarii ita kiakiala.

<sup>2</sup> Wate BADA ana tarawatu i vinuaiaiei,  
aupom ma marai e notanota-vaitetei.

<sup>3</sup> ✧ Tauna me ai, waira au adana gogogona,  
ana au mara e rarauano;  
ma rugurugui eḡa ita poipoi.

Wei ravanana, aiwai anatapuna e kaukauana-kauei.

<sup>4</sup> Wate ḡo'apoapoe ravai eḡa nanare!

Tau me rugurugu, ive i kapupuana-naiei;

<sup>5</sup> Lamna aubaina ḡo'apoapoe taukauei BADA ana au etera ita mairi ava,  
ma nanare ḡoa apoapoei ta kauei rava jijimani ai au dam ita mae ava.

<sup>6</sup> BADA ḡoa aiiai ravai e rarauetaraveni ma e paipaini;  
wate ḡo'apoapoe ai etanai au damona, pupui.

### 23

#### *Bada taupainiu\**

David ana wela

<sup>1</sup> BADA taupainiu

ma eḡa aiwai ana voladaḡei.

<sup>2</sup> Gidagida majimajiḡai au tepana i vimataveniu,  
ma i raveniu waira au raraunairina au adana.

<sup>3</sup> Au rewapana e raviravivouni  
ma wavana aiaina aubaina etanai jijimaninei i raveniu.

<sup>4</sup> Avena da gwagwa waguwaguvareina ana naeni,  
wate eḡa aiwai apoapoena ana rovoei.

✧ 1:3: Jer 17:8 \* 23:: Taupainiu me sipu taupainina.

Aubaina tam au ririvau da am kwapuei ma jīgonei e gagaloeru ma e vivinuaubaiu.  
<sup>5</sup> Aubaiu torela e vokaukauei au ġavia au naoi.  
 Oilei kolau u volaġolaġoi da tam u vinuavaineu,  
 ma au kelaka i oa-karagelai.  
<sup>6</sup> Ee! Riwa kaua da am iviaiai ma am raunuapoapoe maemae nonoana awariu ina mae,  
 da au mara au damona.  
 Ma BADA ana au numa ana mae-nonoa.

## 27

### *Voepaepa parina*

David ana wela

<sup>1</sup> BADA au lalalaina ma au tauvilawana,  
 aiwai ana rovoei!  
 BADA au taugagagalo  
 aiwai ana rovoei!  
<sup>2</sup> Maranai ġo'apoapoei ravaii i ġetai  
 da ita vunuiu,  
 au ġavia  
 aei ina pakana-melei da ina peu.  
<sup>3</sup> Avena da sorodia borui ina mae-gariġuruviiu,  
 tau eġa ana rovo dadana.  
 Maranai au ġavia i vomairi,  
 tau anina da God ana vivitumaġanei.  
<sup>4</sup> Kaua tagogi ava aubaina a vivibaġa.  
 Au ġoana ġaeġaena da,  
 BADA ana au numa, boruborumana ana mae,  
 ma ana voepaepai. Au lawana au anatapuna.  
<sup>5</sup> Nuabola au marana  
 ina tereġaġariu.  
 Ana gabu au vivivireina, ina teregovaġiu.  
 Ma ola au tepana ina tereu  
 da ġavia eġa ina vodadaniu.  
<sup>6</sup> Ma au ġavia i garigari kwaipipiniu, ana tuvaideoeoi.  
 Da au tempol ana morelanau pulo ana apui BADA awarina.  
 Ana vinuaiai ma welei ma arei ma ana voepaepai.  
<sup>7</sup> BADA ma rautaniġaneu maranai awarim a kwatukwatu,  
 ma raunu'apoapoleu ma ma paribeleu.  
<sup>8</sup> Au orau u riwa, u pa, "Ma nei da ma rauduneleu."  
 Tau a paribelem a pa, "BADA a nenei."  
<sup>9</sup> Eġa ma raugovaġeu,  
 eġa awariu ma ġaiawa.  
 Am taunola eġa ma inana geduaiei,  
 au anatapuna tam, au tauagu.  
 Eġa ma netawaneu,  
 au God, tam au tauvilawana.  
<sup>10</sup> Avena da amau ma alou ita teretawaneu,  
 wate BADA ina paina-kauu.  
<sup>11</sup> BADA, ma viararamaniu da am ġoana ana kauei.  
 Ma etanai au ġadaġadarana ma taravainiu aubaina au ġavia i maġa  
<sup>12</sup> Tau moruei ma parivairovorovei e vunuvunuiu.  
 Lamna aubaina, eġa ma teretawaneu awarii  
<sup>13</sup> A 'ramanei da BADA ana viaiaina ana inanai,

weka lawalawai ai au dobu.  
 14 BADA ma vitumaḡaneī,  
 da ma virewapana ma tepam ina tora.  
 Anina BADA ma vitumaḡaneī!

## 34

### *BADA ma viborumei*

- 1 BADA ana vimaēḡaeḡaeni marana patapatai,  
 ma ana viborumana-nonoei.  
 2 Orāu taputapuneī BADA ana voepaepai;  
 Vilamolamonai riwau ina nonori ma ina vinuaiai.  
 3 Ona nei ata BADA tana vimaēḡaeḡaeni  
 wavana tana voepae-gogonei.  
 4 A raupari BADA awarina ma i paribeleu,  
 awariu rovo anatapui i vaitawaneī.  
 5 Aiavoi awarina e inainana,  
 tauī naoi ina ravilalai  
 ma eḡa melanai ina vitepa-ubaubai.  
 6 Au nota i kwa da a ḡorei, ma i nonori  
 ma nuabola au orāu i vaitawaneī.  
 7 Aiāi da BADA e vivivirana-kauei,  
 ana anela tauī e inana-vaitetei, ma e vivilawani.  
 8 Taumi ona raudadani ma ona aramaneī da BADA i aii.  
 Tauī BADA au ḡouna maemae nuaiai ḡaeḡaena awari.  
 9 Taumi vivitumaḡanami eḡa aiwai ona voladaḡei.  
 Lamna aubaina, BADA ona vivirei.  
 10 Lion ḡauboi mara ḡela am e irairaḡe,  
 wate aiavoi da BADA awarina e vitumaḡana eḡa ina voladaḡa.  
 11 Natunatu, ona nei, ona rautaniḡana,  
 ma ana viararamanimi da BADA ona vivirei.  
 12 Taumi o ḡoei da ami lawana ina aii  
 ma ina manawa bo?  
 13 Nanare, lamna menami ona paina-melei da eḡa babani apoapoe bo moru ona babaniei.  
 14 Ḡoa apoapoe ona geduaiei ma kaua aiāi ona kaukauei,  
 ma ona voguratei da nuauba lawanana ona maeni.  
 15 BADA, matana ḡoa aiāi ravai awari e tereterei,  
 ma taniḡana e tonetonei mepa da agu e toutouei.  
 16 Wate tauna ḡo'apoapoei ravai e mamae-puputei  
 tauī ina iraḡe ma rava nuanuai ina vuru.  
 17 Rava jijimanii agu aubaina e viviḡore BADA awarina  
 tauna e rarautaniḡana ma ai vita e vaivaitawaneī.  
 18 Tauna rava peupeui, rovorovoi, ma vinuabolai e vivilawani,  
 tauna rava orana i peu kaua e vovoepai.  
 19 Rava jijimanii ai nuabola i maḡa  
 wate BADA tauī e vovoagui ai au nuabola.  
 20 E inainana-vaitetei da eḡa gelamina tagogi ina wanagai.  
 21 Ḡoa apoapoe ravai ai apoapoe ina vunumelei,  
 ma aiavoi da ḡoa aiāi ravai e gedugeduaiei, ina kovogī.

22 BADA ana taunola e gagaloei,  
aiai da e nenei BADA au ġouna, kovoġa ina vorei.

## 51

### *David ana rupena*

Mara tagogi, Gulau David ana taunola Uriah awana Bathsheba i tavimatanei da maiteni i matave.

1 Oo God, ma raunu'apoapoeleu. Tam nuavaina maemae-nonoana amai.

Tam raraunuapoapoei amai  
au ġo'apoapoe ma notatawanei.

2 Au rauaġaiġai ma oġai  
ma au ġo'apoapoe ma oġa-tawanei.

3 Au rauaġaiġai a aramanei  
marana patapatai a notanotai.

4 Kaua apoapoei a kauei.  
Tam ainelam awarim Ġoa apoapoei a kauei,  
ma am viwavu lamna riwa kaua.  
Amapo anina da ma kovoġiu.

5 Tau rauaġaiġai, melamelauei da marina  
Au manawa da marina tau ġo'apoapoe taukaueina.

6 Wate tam u ġoei da riwa kaua au ora-dewadewau ina mae.  
E viviararamani da nuaulaula orau ina oai.

7 Au ġo'apoapoei ma oġa-tawanei,  
ma oġaiu da ana arapaira da gonu rovena arapoirana ana ġetawanei.

8 Ma riweu da au ġo'apoapoe u nota-tawanei  
da ana vinuaiaii ma ana morelana  
avena \* da gelamiu u viaiġaiġai, marina ana vinuaiai.

9 Au ġo'apoapoe ma inana-tawanei  
ma au apoapoe mirai ma boai.

10 Oo God nuanua ma ravivouni  
da ana vipatutu kaua awarim.

11 Eġa au naom ma tawana-opuneu  
ma awariu eġa Aruam Vivivireina ma waitawanei.

12 Vilawana nuaiaina ma ravivouni me au naona nanare  
aruau ma viaiaini da ana voteletelem.

13 Lamnei, ġo'apoapoei taukauei am kaua ana viararamani,  
da ina mae-tavirei awarim.

14 Oo God, vi'raġena vitana awariu ma waitawanei,  
da am kaua jijimanii ana welei.

15 Oo Bada ipiriu ma votawanei da gamou ina vimaeġaeġaenim.

16 Au pulo, ġamoġamo ata apui awarim,  
wate tam pulo apuapunana eġa uta vinuaiaiei.

17 Bada, pulo e ġoeġoei lamna vilamolamona.  
BADA, eġa au vilamolamona ma au rupena ma geduaiei!

18 Am nuavaina Jerusalem ma viaiaini,  
ma ana gari ma voa-melei.

19 Anina ma ai pulo nota aiainei ina vikarena-melei da ina kaukauei ma ma vinuaiaiei.  
Tau pulo tapuna ma tapuna ina apui awarim.  
Bull maġamaġai am au aniamapu ina apuapui.

\* 51:8: Au vinuabola lamna me gelamiu wanagaina



## 67

### *Viegualau welana*

- 1 Oo God ma raunu'apoapoelelai ma ma viaiainiai,  
ma naom weka ma tereiai da ma voaguiiai!
- 2 Da au dobu am kauga ina aramanei,  
da rava anapui au dobu ina aramanei da tam ai tauvilawana.
- 3 Rava ina voepaepaim Oo God,  
rava anapui ina vimaegaegeaenim.
- 4 Rava anapui au dobu ina vinuaiiai ma ana morelanai ina wela,  
aubaina tam rava anapui au dobu, kauga jijimaninei e vivibadei  
ma e paipaini.
- 5 Rava ina voepaepaim Oo God.  
Rava anapui ina voepaepaim.
- 6 Anina ma doa maura gaegeaena ina vereta  
ma God ina viaiaina-kaueta
- 7 Riwa kauga, God ina viaiainita  
ma rava anapui au dobu tauna ina vivirei.

## 90

### *God ana taunola Moses ana pari*

- 1 Bada ai animae  
kimta wariaga da marina.
- 2 Tam God maemae nonoana  
muriiai da ola  
ma dobu uta kauei.
- 3 Tam rava e ririwei da e vipokau, ma e ririwei,  
"Rava ona wanaviraimi"
- 4 Tam awarim madega 1,000 lamna me aupom tagogi, i tupo kauga  
me raviravi, ega ita manawa dadana.
- 5 Rava ai lawana e vaivaitawanana lagilaginei me rauboni damona.  
Tau me modu, ubaubanai e raraupairei,
- 6 da e rarata ma e talatalai,  
wate aubigai e giviigivi.
- 7 Nanare am meji tauai e lagulagurii ma  
maranai e gaiagaiawa tauai a rovorovo kauga.
- 8 Ai go'apoapoe anapui au naom u lavaei,  
ai go'apoapoe govagovašana, wate anapuna e inainanai.
- 9 Am meji ai lawana i vitupoi,  
ma ai madega lagilagina e kwakwa, a lavutu-tawanana.
- 10 Madega 70 i vereta da tana mae,  
mepa da tana virewapana lamna 80;  
Wate wei lamna nuabola ava ina vereta,  
ega tana mae-pora ma tana nae.
- 11 Ega aiai am gaiawa malana ita vai-kauei.  
Mepa da am gaiawa ata aramana-kauei, lamna tauai ata vivirana-kauem.
- 12 Ma nanare, ma viararamaniai da ai lawana i tupo kauga,  
ma lamna aubaina awarim nuaulaula ana vaia.
- 13 Oo BADA! Ma nememei awariai.  
Ma mae-tavirem, ma vinuabolelai, tauai am taunola.
- 14 Ubaubanai marana patapatai am nuavaina maemaena ma verelai,

- da ana morelanai ana logoiai ma ai au mara anatapuna ana vinuaiiai.
- <sup>15</sup> Madeġa biaġa u kovoġiai, nuaiai ma verelai  
da madeġana biaġa a vinuapoapoe ina kovoġi.
- <sup>16</sup> Tauai am taunola, am nola vivirewapanana ma viatataielai.  
Ma natunatuiai am boruma ma viatataiei.
- <sup>17</sup> Ma Bada ata God ana vianina ina viatataieta  
ma ina kauei da aiwai anatapuna ta kaukauei anona ina tupua.  
Nanare ai nola ma viuai.

## 91

### *God ata rawena*

- <sup>1</sup> Aiai ravana e nenaē Aidamo Telarana awarina agu aubaina,  
lamna Vivirewapanana Kaukauana au ririvana ina mae.
- <sup>2</sup> BADA au God awarina ana riwa ana pa, “Tam au anigagalo ma au tauviġavia.  
Tam au God, a vivitumaġanem.”
- <sup>3</sup> Aubaina tauna, ġavia ana waro govagovaġai  
ma numa rarauabubu awarinei ina gagaloemi.
- <sup>4</sup> Tauna papenenei ina tereġovaġimi ma papena au gabaurina ina gagaloemi;  
ana vipatutu, am rawena ma am anigagalo.
- <sup>5</sup> Waguvara kauai vi’ni-rovorovoi eġa ona rovoei,  
bo ġavia madeġai e viviġavia,
- <sup>6</sup> bo numa rarauabubu waguvara e viviġavia,  
bo doria madeġai e viviraġena.
- <sup>7</sup> Avena da rava tausan au ririvam i peu,  
bo ten tausan au oiem i peu;  
wate tam ita vodadana-avem.
- <sup>8</sup> Matamiei ona inana ma ona inanai  
ġo’apoapoe ravai ai kovoġa.
- <sup>9</sup> Aubaina BADA o vaia ami rawena; Ġetelarana ami taugagalo.  
<sup>10</sup> Eġa aiwai apoapoena awarimi ina tupua bo au numa ina ġeta.
- <sup>11</sup> God ana anela ina terei da ina painimi  
ma ina gagaloemi ami au babara.
- <sup>12</sup> Tau i uraiei ina voepaim  
da aem eġa ġaima au tepana ma rauei.
- <sup>13</sup> Taumi lion ma mota ona vovaiubai,  
lion ġaiġaiawai ma mota viviwaiawai ona tugwadagwadai.
- <sup>14</sup> God i riwa i pa, “Aiai nuanuau e vaivainonoei, ana vilawani;  
ma ana gagaloēi, aubaina i aramana-kauei.
- <sup>15</sup> Maranai i kwatu awariu, ana paribelei.  
Tau kampa ai au nuabola,  
ana taravaini ma ana voepaepai.
- <sup>16</sup> Ai lawana ana vimanaini,  
ma au vilawana mamae-nonoana ana viatataiei.”

## 95

### *BADA tana welei*

- <sup>1</sup> Ona nei! Tana wela BADA awarina.  
Ana nuaiaita tana wela God ata tauvilawana vivirewapana awarina.
- <sup>2</sup> Tana nei au naona ma tana viegualaei  
ma welei tana voepaepai.
- <sup>3</sup> Aubaina BADA lamna God virewapana kaukauna,

- ma god anatapui e inainana-gāirei.  
<sup>4</sup> Dobu anatapuna au urana,  
 guba gāeḡaei doa au orana da ola gāeḡaei au tepai.  
<sup>5</sup> Boga tauna ḡarinei, tauna i kauei  
 ma nanare tauna uranei dobu alalana i tere-kauei.  
<sup>6</sup> Ona nei ma tana raudune ma tana vimaēḡaeḡaeni,  
 ae tututa tana tapeḡaroei taukaueta BADA awarina.  
<sup>7</sup> Aubaina tauna ata God.  
 Tauta natunatuna. Ana sipu ma e ḡamoḡamoita ana au wapu.

Mepa da ponana o nonori amadodo,

- <sup>8</sup> ✧E riwei i pa “Eḡa orami ona gudui me amamami au Meribah;  
 me au mutulua au Massah.  
<sup>9</sup> Kampa amamami i ’nanai, kauababai a kauei  
 wate eḡa ita vitumaḡaneu, ma i raudadaniu.  
<sup>10</sup> Madēḡa 40 wei kimtana awari amlou i ḡaiḡai ma a riwa,  
 ‘Wei ravai orai i bagibagi ḡaḡa!  
 Eḡa ita rarautaniḡaneu.’  
<sup>11</sup> Ana mejiu a parivainuaḡani,  
 ‘Gabu a vokaukauei ami lauvitau aubaina wate kampa eḡa melanai ona rui.”

## 100

### *Voepaepa welana*

- <sup>1</sup> Rava anatapumi au dobu ona logoimi BADA awarina!  
<sup>2</sup> Ana nuaiami BADA ona voepaepaei,  
 ona nei au naona ma ona welei.  
<sup>3</sup> Ona aramanei da BADA anina God.  
 Tauna i kaueta.  
 Ma tauta tauna ḡarinei. Tauta tauna natunatuna. God ana sipu ma e gagaloeta me  
 sipu taupainina.  
<sup>4</sup> Ana welami ana au gari ona rui ma voepaepami  
 ana au aniviboru ona rui,  
 ma ona vimaēḡaeḡaeni.  
<sup>5</sup> Aubaina BADA i aii;  
 natunatuna e vivinuavaina-nonoei,  
 ana vipatutu e mamae-nonoa, kimta au anatapui.

## 103

### *BADA ana nuavaina*

David i girumi

- <sup>1</sup> Orau taputapunei BADA ana voepaepai.  
 Wavana vivivireina ana voepaepai.  
<sup>2</sup> Orau taputapunei BADA ana voepaepai,  
 kaua aiaii i kauei aubaiu eḡa nuanuau ina vuru.  
<sup>3</sup> Au ḡo’apoapoe anatapui e notanota-tawanei,  
 ma doria awarinei e vivilawaniu.  
<sup>4</sup> Ata iraḡe ma i sinaepaiu  
 ma nuavainei ma raunuapoapoelei e vivigulaueu.  
<sup>5</sup> Au lawana au anatapuna

- purapura aiaii avai i verevereu, au vilaraga marana i raviravivouni me \*manubada.
- <sup>6</sup> BADA ana kaua anatapuna jijimanina.
- <sup>7</sup> Ana oga Moses i viatataiei,  
ma mai Israel BADA ana kaua vivirewapanai i 'nanai.
- <sup>8</sup> BADA raraunuapoapoena ma ivina aiaina,  
Eġa laġilaġina amlona ita voġaiġai. Ana nuavaina maemae-nonoana.
- <sup>9</sup> Eġa mara nonoa ina enita,  
ma ana amloġaiġai eġa ita mamae-nonoa.
- <sup>10</sup> Anina da ita kovaġa-kaueta,  
wate i raunu'apoapoleta da kovoġa eġa ġaeġaena ita verevereta.
- <sup>11</sup> Dobu weka ma mara nore au tepadewadewana.  
Nanare, BADA ana nuavaina i rata guratana tau i da BADA e vivivirei awarii.
- <sup>12</sup> Mepa madeġa e gogogolana da mepa e ġaiġairalana, lamna uama,  
ma nanare ata ġo'apoapoe vinimalana e vaivaitawana-naiei aueia.
- <sup>13</sup> Me ama natunatuna e rarau-nuapoapoelui,  
nanare BADA natunatuna e rarau-nuapoapoelui.
- <sup>14</sup> Aubaina i aramanei da tauta pokauei i kaueta.
- <sup>15</sup> Ata mara au dobu lamna me modu.  
Ta gogogo ma ta rarata me berana moduei;
- <sup>16</sup> Anina ma ive i uvena-kapupuei,  
eġa ita mamae, ana gabu i kwakwava.
- <sup>17</sup> Tau i da BADA e voepaepai ana nuavaina maemae-nonoana  
awarii ma nanare noinoi ma ai epaepaia awarii
- <sup>18</sup> tau i aiaivoi da ana parivainuaġana bagibagina e vovojijini  
ma ana patupatutui tarawatu e vovojijini.
- <sup>19</sup> BADA ana vigulau anikialana au mara i terei,  
ma kampa ana vigulau e vivibadei.
- <sup>20</sup> BADA ana anela, vivirewapanami,  
BADA riwana o rarautaniġanei ma o kaukauei,  
BADA ona voepaepai.
- <sup>21</sup> Anina BADA ana anela marei,  
BADA ona voepaepai taumi ana taunola ma ana ġoana anatapuna o kaukauei.
- <sup>22</sup> Taumi anatapumi BADA uranei i kauei, ana au vigulau maemaei, BADA ona voepaepai.  
Tau nanare orau taputapunei BADA ana voepaepai.

## 110

### *Gulauna vinevinena*

David ana wela

<sup>1</sup> ✧ BADA au bada wenanare i riwei,

“Au oieu ma kiala

da am ġavia

au ae karem ana terei da ma tuvaidoedoei.”

<sup>2</sup> BADA, am gabemani vivirewapanana Zion \* ana parata ina viratai,

da am ġavia ma vibadei.

<sup>3</sup> Am laraga ana nuaii ina verena-melei da ina visorodia,

ma ona ġae BADA ana ola au tepana viġavia aubaina,

ma ami rewapana ina ravivouni ubaubanai patapatana me ubaubanai turuvanina.

<sup>4</sup> BADA i parivainuaġanim ma eġa nuanuana ina virai;

\* **103:5:** Manubada tawarana waduboi e peupeu ma vouii e gogogo. Me manubada tawarana voui e gogogo nanare tam au lawana e raviravivouni. ✧ **110:1:** Mrk 12:36; Act 2:34-35 \* **110:2:** Jerusalem wavana ġelauna.

“Tam piri si maemae nonoana me Melkisedek.”

- <sup>5</sup> BADA au oiem e maimairi da e paipainim;  
tauna gulagulau ina piaḡi maranai amlona ina ḡaiḡai.
- <sup>6</sup> Dobu nununai ai ḡoa apoapoe ina kovoḡi,  
ma taubeu dobuna ina vioai  
ma dobu gulagulau i anatapui kolai ina viaigwadagwadai.
- <sup>7</sup> Wate au etanai au vuvura ina uma  
ma rewapana ina verei ma ina vovaiuba.

## 119

*BADA ana tarawatu boruborumana*

- <sup>9</sup> Rava vouna menanare lawana aiaina ina maeni?  
Tauna riwamei ina paina-melei.
- <sup>10</sup> Lamna aubaina a baibaie m orau taputapunei;  
eḡa ma votereu da riwam ana geduaiei.
- <sup>11</sup> Riwam a iaiavi ma au nuanuau a tereterei,  
da eḡa ḡo'apoapoei awarim ana kau ei.
- <sup>12</sup> BADA, a voepaepaim!  
Am tarawatu ma viararamaniu.
- <sup>13</sup> Ipiriuei ana bababani ma  
am tarawatu anatapui u verevereiu ana jime i.
- <sup>14</sup> Am tarawatu votelatelana a vinuaiainana-kau ei,  
eḡa me vipurapura bo vimane.
- <sup>15</sup> Riwam ana iavi  
ma ana vinuanotenotei.
- <sup>16</sup> Am tarawatu a vinuaiaina-kau ei,  
eḡa riwam ana voteretawanei.

## 139

*Bada anatapuna i aramanei.*

- David ana wela
- <sup>1</sup> BADA orau u inanai ma au kaua anatapui u aramanei.
- <sup>2</sup> U aramanei mara aiwai a kiala ma a vomairi.  
Avena au uama wate au nota e araramanei.
- <sup>3</sup> E inainanai maranai a babara bo au numa a vivilauvitau.  
Anatapuna a kaukau ei e araramanei.
- <sup>4</sup> Muri ai da ata babani tam e araramanei aiwai ana latoni.
- <sup>5</sup> Tam e garigari-kwaipipiniu,  
ma uram virewapananei e paipainiu.
- <sup>6</sup> Lamna riwa kauana, awariu i aii kaua  
ma i ḡe-dewadewa da kolau i kwauna-kau ei.
- <sup>7</sup> Mepa ana nae da Aruam ana raugovaḡei?  
Mepa ana ruba da ana raugovaḡem?
- <sup>8</sup> Ata ḡae au mara da tam kampa;  
mepa da i 'rairaḡei ai au dobu ata rauviraiu, tam kampa.
- <sup>9</sup> Mepa da ana lave nae au maramatanei,  
bo mepa madeḡa e neneulai,
- <sup>10</sup> avena kampa ma uram ina raveniu,  
ma am rewapana ina painiu.
- <sup>11</sup> Mepa da ana riwa, “Gimtona ina tereḡovaḡiu  
ma lalalaina ina gimtona.”
- <sup>12</sup> Wate avena da gimtonana amapo eḡa ana raugovaḡem.

Tam awarim gimtona ina rarana me marai, aubaina tam awarim gimtona ma lalalaina lamna tagogina.

13 Tam tupuau anatapuna u voai da alou au manawana u teretagogieu.

14 A viviegualauem aubaina tam am nuavainei ma am borumei u voa-kaueu! Am rauḡaroḡaro i aii,

A voepaepaim aubaina a aramana-kauei.

15 Tam u vivineneḡaneu maranai a tuputupua au govagovaḡana, alou au manawana, tam ainelam anatapuna u aramanei.

16 Tam u inanaiu muriai da a tupua.

Aupom biaḡa u vereu da ana mae

lamna au buka u girumi,

muriai da aupom naona i ḡotai.

17 God! I piri-piri guratana da am nota ana aramanei.

Am nota kolau i kwauni, eḡa aiwai ḡelaunei am kaua ana aramanei.

18 I maḡa guratana eḡa me bubu, iavana ana kauana-avei,

avena da ata iava-pai, tau amapo da tam ana vivinuanainem.

19 Oo God! A ḡoei da ḡo'apoapoei ravai uta viraḡeni.

Tauviraḡena uta viaḡaḡei da eḡa ina nei awariu.

20 Aubaina e vivijiboḡim,

ma wavam eḡa ita vivivirei.

21 BADA, rava e gedugeduaiem, tau ravai a gedugeduaiei.

Tau i eḡa ita voteletem lamna aubaina tau i au ḡavia.

22 Tau i a geduaiana-kauei,

anina tau i au ḡavia.

23 Ma tuvirevireu, ma orau ma inana-pai.

Ma raudadaniu da nuanuau ma aramanei.

24 Mepa da ḡoa apoapoe au orau, ma viatataieu,

ma ma raveniu etanai e nenaē au lawana maemaē-nonoana awarina.

## Proverbs Nuaulaula Riwai

### *Pariverena*

Wei au bukana awanaina maḡamaḡai, ma God ana rava e viwararamani da ina mae-kaua. Gulau Solomon maḡamaḡai i girumi ma rava ḡelai ruaḡa ota i girumi. Orotō e ḡoreḡorei Agur ḡelai i girumi ma gulau Lemuel ḡelai i girumi.

Viararamana ḡaeḡaena tagogi wei au girumana lamna nuaulaula anapui pulo Godei. Rava nuanuaulaulana au naona God ina vivirei.

Mara au anapuna ata au animae wei nuaulaulana e vovoaguita, au melagai, au gabemani ma au nola.

Ma maiteni wei girumana e viwararamanita da lawana aiaina tata maeni, ma kaua aiaini tata kaukaui. Ma avena tata gogulagulai ma tata nola guratana ma ivita ita ai molamolakai awari.

### *Vinuatereana etana*

<sup>7</sup> BADA vivirana, lamna aramana karena,  
Wate opaopai, nuaulaula ma aramana e gedugeduaiei.

<sup>8</sup> Natu, amam ma alom ai vinuatereana anapui ma voteletelei.

<sup>9</sup> Ai vinuatereana lamna me kunuteia au kolam,  
bo gadogado au uam  
da inanam ina ai.

## 5

### *Wavine matana maḡamaḡauna ma vorei*

<sup>8</sup> Wavine matana maḡamaḡauna ma ruba-tawanei!  
Eḡa ma nae dadana ana au metaeta!

<sup>9</sup> Mepa da nanare lamna rava eḡa ina vivivirem.  
Tam am vilaraga ma am lawana aiaina ma vitupoi.

<sup>21</sup> BADA rava ai kaua anapui e inainanai,  
Metauna etanaina e vaivaia, tauna kampa da e inana-vaitetem.

<sup>22</sup> Taniḡapota ravana ana ḡo'apoapoelei ina waro-melei.  
Ana ḡo'apoapoe tauna ina tupajijini.

<sup>23</sup> Tauna opaopana ma eḡa ita paina-melei,  
Ana kaua opaopai aubaii i'raḡe.

## 6

### *Amam ma alom ai vinuatereana*

<sup>20</sup> Natu, amam ma alom ai vinuatereana anapui ma voteletelei.

<sup>21</sup> Ma vojijina-kauai au nuanuam; marana patapatai au uam ma gadoi.

<sup>22</sup> Maranai e bababara, ai vinuatereana am etanai ina rauḡadaḡadari.  
Maranai e matamatave, ai vinuatereana ina matave-painim.

Maranai u vomairi, ai vinuatereana awarim ina babani.

<sup>23</sup> Aubaina wei tarawatui lamna rampa.

Wei viararamana lamna ravilala, etanaina e lalalai.  
Nuaterena bagibagina lamna lawana aiaina etanaina.

- 24 Tau i na aguim da wavine matai maḡamaḡau ma vorei,  
ma wavine tavitavinena ana gwalameru.
- 25 Eḡa wavinena inana aiaina ma erawei.  
Eḡa! Ma voterei da matanei oram ina taini da ina waroim.

## 8

### *BADA nuaulaula i terei*

#### *Nuaulaula e ririwa,*

- 22 “Au karena, BADA tau i tereu.  
Muriai da aiwai ḡelau i kauei.
- 23 Tau kampa au kare oina,  
muriai da dobu.
- 24 Tau a tupua muriai da BADA gabinou i kauei,  
muriai da waira vuvura i kwakwa-ḡetai.
- 25 Tau a tupua muriai da ola,  
muriai da ola muomuoi ai au gabu i terei, tau kampa.
- 26 Muriai da dobu bo wapu  
bo doa pokauna.
- 27 Tau kampa maranai mara ana au gabu i terei,  
maranai parata i taini da mara au tepana ma boga au gabaura.
- 28 Maranai apau i terei au mara  
ma vuvura doa au orana i votawanei.
- 29 Tau kampa, ma boga ana parata i terei  
ma i egari da nai paratana eḡa ina raḡoni.  
Tau kampa, maranai dobu oḡona i tonana-naiei.
- 30 Nai marana tau BADA au ririvana a mamae me tauvioga,  
marana patapatai a vinuaiaini ma tau a vinuaiai.
- 31 A vinuaiai kua maranai dobu i kaukaueia a inanai,  
a vinuaiai kua maranai rava a inanai.”

## 9

### *Nuaulaula ma opa*

- 1 Nuaulaula ana numa i voai  
tuatua ḡaeḡae 7 i tai ana numa aubaina.
- 2 Torela ḡaeḡaena i apui,  
sia i api ma wain aiiai i’waḡi ma kepakepa i vokaukauei,
- 3 ma ana taunola ḡelau i paritawanei,  
au deba da i viḡoreḡore,
- 4 i riwa i pa, “Taumi eḡa notanota kauami ona nei!”  
Ma opaopai i riwei,
- 5 “Ona nei au lam ona ani  
ma wine a viravirai ona umai.
- 6 Ami lawana opaopai ona voterei  
ma ona lawana,  
ma aramana lawanana ona maeni.”

## 13

- 1 Tevera nuaulaulana Amana ana vinuaterena e nonori,  
wate tevera maeḡaeḡaena vinuaterena e gedugeduaiei.



<sup>4</sup> Mata-galagalawana purapura e raurauōgarei eā ina vaia,  
wate egoegolana ana gōana aiwai anapui ina vaia.

<sup>24</sup> Aiai natuna ora-potapotana eā ita kwapukwapui, lamna natuna nuanuana eā  
ita vaivaia.  
Wate aiai da natuna nuanuana e vaivaia lamna ina viararamani.

## 17

<sup>21</sup> Ama tevera opaopana i vinatunei lamna nuabola ava e vivitupui,  
laragana amana awarina eā nuaiai.

## 20

<sup>4</sup> Rava mata galagalawana e paepaewa labalababa, eā iri ita votaōgōtaōgoi;  
tuaruta ana mara e baibaia ma eā aiwai.

## 22

<sup>6</sup> Natunatumi lawana aiaina ona viararamani, da maranai i vorata,  
nai lawanana eā ina voterei.

## 23

<sup>13</sup> Natum e viviorapota eā ma inana-tawanei,  
boreborelei u kwapui Amapo eā ma virāgeni.  
<sup>14</sup> U raukwapui  
lamna iraē awarinei u gagaloei.

## 24

<sup>30</sup> Rava mata-galagalawana ana wapu adanei a nae,  
ravana opaopana ana grape wapuna au ririvana.  
<sup>31</sup> A inanai da modu i gogo-nae,  
ma donadona wapuna i vioai.  
Ma ana gari, i wanaririkai.  
<sup>32</sup> Lamna a inanai ma a vinua-notanotei.  
A tuvirevirei ma wei i viararamaniu.  
<sup>33</sup> Matam ma potai, ma rauviraim.  
Wapu nolana avena, uram au nuanuam ma terei ma ma matave.  
<sup>34</sup> Ma gomara ina ravim me taudanene;  
anatapuna ina pupuni.

## 26

<sup>13</sup> Rava mata-galagalawana e ririwa, “Āmoōamo gāigaiawana au doa! Āmoōamo  
gāigaiawana au etanai!”

<sup>15</sup> Mata-galagalawana lam au urana e vaivaiaia

wate eġa ina voepai au gamona.

## 29

- <sup>3</sup> Aiai ravana nuaulaula i ġoana-guratei, nuaiai ġaeġaena amana e vereverei.  
Wate aiai da etanai waivinei maiteni e nena lamna ana mane ma ana purapura  
anatapuna e vikalokaloei.
- <sup>15</sup> Kwapu ma nuaterena riwai, natum nuaulaula e vereverei.  
Wate tevera eġa viararamanana, alona e vivitepaubai.
- <sup>17</sup> Natunatumi ona vinuaterenei, da mara nonoa awarim nuauba;  
ma oram ina vinuaiaini.

## 31

### *Wavine aiaii kaukauana*

- <sup>10</sup> Mepa nanare wavine aiaina ma egoegolana uta nelaġai?  
Wavinena i vidualaulauna kaua eġa me ġaima lebalebarina maiana ġaeġaena.
- <sup>11</sup> Orot awana i vitumaġanei,  
ma eġa aiwai ina voladaġei.
- <sup>12</sup> Wavine, kaua aiaii ma eġa kaua apoapoe ita neneiai awana awarina  
ana lawana au anatapuna.
- <sup>13</sup> Wavine sipu aparana ma waiape i vaia  
ma i vinuaiiai da ina rauġaroġaro.
- <sup>19</sup> Wavine sipu aparana ma waiape ina metani  
ma gara ina ġauġauri.
- <sup>20</sup> Ana numa ma orana i votawanei  
molamolakai ma vovoladaġai awarii.
- <sup>30</sup> Erawa lamna kaua morumoruna  
ma inanana aiaina ina amoa;  
wate wavine BADA e vivivirei, rava tauna ina voepaepai.  
<sup>31</sup> Wavinena ina voepaepai aubaina i kauana-kauei.  
Rava anatapui, wei wavinena ona voepaepai.

## Ecclesiastes Tauviararamana

### *Pariwerena*

Aiai da wei bukana i giruma lamna eġa wavana tata aramanei. Wate rava ġelau e ririwa da gulau Solomon i girumi. Ma aiai i girumi lamna anina da rava araramanina. E ririwa da wavana lamna *tauviararamana*. Aubaina purapura vopiripirii e bababaniei. Rava maġamaġau God eġa ita aramanei aubaina da i ġoei da ina baiei da aiwai e tuputupua. Wate anona eġa ita nenelaġai. Tauviararamana wei ravai ai nota e ririweta. Mara ġelauna rava aiwai i kaukauei lamna eġa anoi Ma e ririweta da wei kauai lamna me ive tata viaġaġei. Rava i nelaġai da lawana wei au dobuna lamna anona eġa aiwai.

### *Tauviararamana ana giu*

- <sup>1</sup> Wei lamna tauviararamana, David natuna, mai Israel ai gulau ana viararamana;  
<sup>2</sup> Tauviararamana i riwa, “Anona eġa!  
 Anatapuna kwakwavina!”  
<sup>3</sup> Ma nolanela da ma magura ma anona aiwai?  
<sup>4</sup> Kimta e nenei ma e nena, e  
 wate dobu maemaena e mamae.  
<sup>5</sup> Madegħa e gogogo ma e arearere,  
 ma e wanawanavirai da ina vikarena-melei.  
<sup>6</sup> Kariwabu e ġotaġota,  
 rauanaġa e opuopu,  
 e kwavikwaviviro  
 ma e wanawanavirai da ina vikarena-melei.  
<sup>7</sup> Waira anatapui au boga e opuopu,  
 wate boga eġa ita oaoai.  
 Waira matanei,  
 e ġaiġairai ma e nena me au matana.  
<sup>8</sup> Kaua anatapuna i vi'nigarigari,  
 menanare tana riwa nei?  
 Matata eġa melanai ina inana iaua;  
 Taniġata eġa melanai ina nonora iaua.  
<sup>9</sup> Aiwai wariaġa i tupua ina tupua me,  
 aiwai wariaġa i kauai ina kauana-melei.  
 Eġa aiwai, kaua vouna wei au dobuna!  
<sup>10</sup> E ririwa, “Ona inanai! Wei kaua vouna.”  
 Wate eġa! Wei kaua maemaena;  
 wariaġana, muriai da ta tupua.  
<sup>11</sup> Kaua wariaġa i tuputupua, eġa aiai ita notanotai.  
 Ma kaua marina da muriai e tuputupua, eġa aiai ina notai.

### *Nuaulaula anona eġa*

- <sup>12</sup> Tau lamna tauviararamana ma Israel ai gulau au Jerusalem. <sup>13</sup> Orau a terei da aiwai anatapuna au dobu e tuputupua, nuaulaulei ana girumi. Ma a aramanei da God vita ġaeġaena rava i verei. <sup>14</sup> Aiwai e tuputupua au dobu a vinua-notenotei ma a inanai da;  
 anatapui anona eġa, kwakwavina. Ive ava ta viviaġaġei.  
<sup>15</sup> Aiwai barabarai amapo eġa ma vojijimana-melei,  
 aiwai awarim eġa, lamna menanare ma iavanei.  
<sup>16</sup> Au orau a riwa, “Tau a nuaulaula guratana,  
 eġa me aiai ġelauna au Jerusalem i vivigulau nanare.

A ramanei nuaulaula aiwai ma aramana aiwai. <sup>17</sup> A gōei da ata aramana-kauei nuaulaula aiwai ma bua ma opa aiwai.

Wate a aramanei da wei lamna me ive a viviaḡaḡei.

<sup>18</sup> Aubaina au nualaula e rarata, mae-boaboa e rarata au aramana e rarata, au nuabola e rarata.”

## 2

### *Vinuaiiana-melana lamna anona eḡa.*

<sup>1</sup> A vinotanota a pa, “Abeka nuaiiai ana baiei, ana raudadani, da i aii bo eḡa.” Wate a nelaḡai da wei lamna kwakwavina. <sup>2</sup> Lamna aubaina a riwa da kaka labalababa ma erawa lamna bua. Ma erawana aiwai aiaina e vereverem? <sup>3</sup> Nuaulaula a ḡoana-guratei, ma a ḡoei da wine ata umai da orau ita telatela ma kua opaopai ata kauei, da ata aramanei metauna i aii rava au dobu awari, maranai mara tupona ava au dobu e mamae.

<sup>4</sup> Kua ḡaeḡaei a vikarei, au numa ḡaeḡaei a voa-naiei ma grape wapui a paewi. <sup>5</sup> Wapu da pepei a kauei ma ai uuai tapuna ma tapuna a paewi. <sup>6</sup> Dogo a ḡarai da garewa ma wapaketa i vojijini, lamnei wei wapui a vivituvanei. <sup>7</sup> Awariu taunola au numa tuputupuai, ma taunola maḡamaḡau nelarai ma waivinei a gimarai. Au bulumakau ma sipu i maḡa guratana eḡa me aiai ḡelauna au naona au Jerusalem nanare. <sup>8</sup> Awariu gold ma silver gaegaena ma nanare dobuḡela gulau ai via. Tauwela nelarai ma waivinei a vimaiei ma guguini inanai aiiai a vivaneiai au numa, au ani vieraerawa. Aiwai a ḡoeḡoei ana tapuna awariu. <sup>9</sup> Tau a maura ma a vipurapura kua eḡa me aiai ḡelauna au Jerusalem nanare. Ma wei anatapuna au orana au nuaulaula i mae-kua.

<sup>10</sup> Aiwai a inanai ma a rauoḡarei a vaia, anatapuna a notai da ita vinuaiainiu.

Au nola anatapui a kauana-kauei, ma nuaiaina lamna au nola maiana.

<sup>11</sup> Anina ma aiwai anatapuna a voavoai ma a polepolei, a vinua-notenotei ma a aramanei da wei anatapui lamna anona eḡa,

lamna me ive ata viviaḡaḡei wei au dobuna amapo eḡa aiwai tana vaia.

### *Nualaula i aii eḡa me bua*

<sup>12</sup> Nuaulaula, bua ma opa anoi a vinua-notenotei.

Gulau ana raviepaia, aiwai ḡelauna ina kauei?

<sup>13</sup> Ma aramanei da nuaulaula i aii kua eḡa me opa, ma lalalaina i aii kua eḡa me gimtona.

<sup>14</sup> Rava nuaulaulana matana au kolana e mamae wate opaopana waguwaguvareina e bababara.

Ma aramanei da ravai ruaḡai ai damona tagogi.

<sup>15</sup> A vinua-notanota a pa, “Tau ma opaopana ai damona tagogina. Au nuaulaula aiwai ḡelauna ina vereu?”

Au nota a pa, “Wei maiteni anona eḡa.”

<sup>16</sup> Rava nuauaulaulai lamna me rava opaopai amapo nai ravai nuanuata ina vuru.

Kapore! Rava nuaulaulauna ma rava opaopana e irairaḡe.

<sup>17</sup> Tau lawana a geduaiei, au dobu aiwai anatapuna ta kaukauei iniviara ava e verevereta. Anatapuna kwakwavina, me ive taviviaḡaḡei.

### *Bagibagi ḡaeḡaena eḡa anona*

<sup>18</sup> Anatapuna au dobu a polepolei a geduaiei, aubaina nai ana voterei, da rava au muriu e nenei aubaii. <sup>19</sup> Ma aiai i aramanei da tauna rava nuaulaulauna bo rava opaopana?

Wate tauna aiwai a polepolei ma au aramanei a vitupui ina vaia. Wei anona eġa. <sup>20</sup> Au bag-ibagi anatapuna wei au dobuna a notai ma orau i peu. <sup>21</sup> Aubaina rava ana nuaulaulei ma ana aramanei i nola kua, da i maura ma anatapunana ina voterei da rava gelauna, eġa taunoleina ina vaia. <sup>22</sup> Marana patapatai nola ma nuabola inina e viviarei au dobu ma aiwai ina vitupui? <sup>23</sup> Tauna ana nola da iniviara ma nuabola; waguvarai maiteni eġa ita matamatave. Wei maiteni eġa anona.

<sup>24</sup> I aii da rava ita am ma ita uma ma ana nola ita vinuaiiei, ma a inanai da vinuaii lamna God uranei. <sup>25</sup> Aubaina God eġa. Lamna eġa am ma eġa nuaiai. <sup>26</sup> Aiai God e vivinuaiaini, God tauna nuaula, aramana ma nuaiai, e vereveri. Wate ġoa apoapoe ravana ana nola i verei da mane ma maura ġaeġaena ina vitupui, Wate God nai maurana ina vaivaitawanei ma aiai e vivinuaiaini ina verei. Ġoa apoapoe taukauei ai nola lamna kwakwavina, me ive i taviviaġaġei!

### 3

#### *Aiwai anatapui ai au mara e tuputupua*

<sup>1</sup> Mara ma iri i terei da aiwai anatapui au dobu ai au mara e tuputupua.

<sup>2</sup> Vinatuna ana mara ma iraġe ana mara paewa ana mara ma tuaruta ana mara.

<sup>3</sup> Viraġena ana mara ma vilawana ana mara, amrika ana mara ma voa ana mara.

<sup>4</sup> Tou ana mara ma kaka ana mara, mogu ana mara ma ara ana mara.

<sup>5</sup> Ġaima viorerena ana mara ma tama melanana ana mara, taragwaba ana mara ma eġa taragwaba ana mara.

<sup>6</sup> Baia ana mara, ma baia voterena ana mara, ma purapura vojijinana ana mara ma purapura vineboana ana mara.

<sup>7</sup> Sika ana mara ma popo ana mara, genuana ana mara ma babani ana mara.

<sup>8</sup> Nuavaina ana mara ma ġoaġai ana mara viġaiġaiawa ana mara ma nuauba ana mara.

### 4

<sup>9</sup> Rava ruaġa i aii eġa me rava tagogi, aubaina tau i ina viagu vivira ma maura ina nelaġai.

<sup>10</sup> Mepa da tagogi ina peu, turana e mamae da ina voepai. Wate tam ainelam ma u peu lamna i apoapoe kua, aubaina kampa eġa aiai da ina voaguim.

<sup>11</sup> Ma nanare mepa da rava ruaġa i matave tagogi, tau eġa inii ina ubauba. Rava tagogi menanare ainelam ina vibolabola-melei?

<sup>12</sup> Am ġavia, ainelam ina viġaviem ma ina vovaiubaim, wate maranai taumi ruaġami e viviġaviem amapo ona vobelei.

Ma rava tonuġa i virewapana kua me ġurava barawa tonuġei metametanana. Wei ġuravana viaituinana ma kauana-avei.

### 5

<sup>10</sup> Aiavoi mane nuanuai e vaivaia eġa melanai nuanuai ina rauei; aiavoi e ġoeġoei da ina vipurapura; tau eġa melanai ai rauoġara anatapuna ina vaia.

A inanai da wei anona eġa.

- 11 Maranai am maura e rarata,  
lamna maranai patara e ġeġetai da e amam vereverem.  
Wate wei maurana aiwai aiaina e vereverem?  
Eġa aiwai, anina e viatataim da tam maumauram, wate rava ġelauna am maura  
ina tawanei aubaim.
- 12 Taunola e amam kaua bo eġa,  
wate e matamatave kaua.  
Mane ravana eġa nanare, tauna ana maura e notanota-maratomei.
- 13 Au dobu kaua apoapoe kaukauana a inanai;  
Mane ma purapura ravana ana maura au anara e tereterei muriai aubaina. Wate  
wei lamnei, ana nuabola ġaeġaena i tuarui.
- 14 Ana mane ma ana maura i kauana  
labalababai ma anatapuna i vine-boai.  
Natuna eġa ana buderi ita terei.
- 15 ✧ Menanarena dobuna ta ruinei  
nanarena tana nae me, kovakovata ma ana ura kwakwavita.  
Amapo eġa ata purapura, ta vopolepolei tana vinimavoei.

## 7

- 15 Au lawana kwakwavina au orana kaua ruaġa a inanai;  
Rava aiaina BADA ana nola e kaukauei i'raġe laġilaġina  
ma ġo'apoapoe taukaueina God ana tarawatu e viviaigai wate ana lawana i manawa.
- 16 Lamna aubaina eġa ma viġoa aiaina guratana bo ma vinuaulaula guratana,  
mepa da ma viraġena-melem.
- 17 Wate nanare, eġa ma vitaniġapota guratana  
ma eġa ma opa;  
eġa ita ai da ma iraġe muriai da am mara.
- 18 I aii mepa da wei riwai bagibagina ma nonori  
Aiai God e vivivirei lamna ina paina-melei  
da wei kauai ruaġai eġa ina kauei.
- 19 Rava nualaulaunana tagogi rewapana ġaeġaena ina verei  
eġa me gulagulau 10 au taon.
- 20 Riwa kaua! Weka au dobu eġa aiai tagogi kaua aiaii ava taukaueina.  
Ma eġa ġo'apoapoe ita kaukauei.

## 8

16 A ġoei da nuanuau ita ulaula lamna aubaina rava ai mae au dobu a inanai, ma  
lamnei a aramanei da marai ma waguvarai eġa matave kaua. 17 God aiwai i kaukauei  
eġa ata aramana dadanei. Ma voguratei da ma nelaġai, wate amapo eġa ma aramanei.  
Nuaulaulai e ririwa da i aramanei, wate eġateni dadana.

## 11

*Ami au vilaraga ona vinuaiai*

<sup>9</sup> Laralaraga, ami vilaraga ona vinuaiaiei.

✧ 5:15: Job 1:21

Nuanuami ina morelana ami au vilaraga.  
 Orami ma matami ana rauoġara ona kauei.  
 Wate ona aramanei da aiwai o kaukauei  
 God ina etaremi, anatapuna aubaina.  
<sup>10</sup> Lamna aubaina nuabola au murimi ona terei ma tupuami ona paina-melei,  
 aubaina amapo eġa ona vilaraga nonoa.

## 12

<sup>1</sup> Ami au vilaraga, taukauemi eġa nuanuami ina vuru,  
 muriai da nuabola ona nelaġai;  
 maranai magura i tuġereġerei,  
 ma ona riwa, “Lawana marina eġa ita ai!”  
<sup>2</sup> Lamna maranai madeġa, nawaravi ma ubona ina ġuvai,  
 ma apau ina nememei da mara ina ġuva-nonoei.  
<sup>3</sup> Anina ma nimami, taugagaloemi ina sisi  
 aemi marina vivirewapanana ina vokokokara.  
 Ivomi ina viruaġa da ami lam eġa ona uta gwadagwadai,  
 matami ina vinawanawa da eġa ona inana kaula.  
<sup>4</sup> Taniġami ina pota da gugura au etanai eġa ona nonori,  
 kiu ina logologoi ina ravidagudaguimi wate ai wela anatapui ina amoa.  
<sup>5</sup> Taukauemi ona vinuanotenotei:  
 Maranai aidamo ona gagatei ma babara ona rovoei,  
 maranai kora ina tonaimi me rei talana,  
 ma tam ma gwaġa-nae me kapau e gwaġagwaġa-nae iraġe aubaina.  
 Erawa ma morelana anatapui ina kwa. Tauta kokoaġa ta tuġereġerei ma tou  
 ina vikarei au doa.  
<sup>6</sup> Taukauemi ona vinuanotei,  
 muriai da lavutu ġuravana ina wanautuini,  
 bo nau goldei ina wanawamai  
 ma reduġoru ina wanakabakabari.  
<sup>7</sup> Ma tupuami ina naeme au doa  
 ma aruami ina naeme God, tauverena awarina.  
<sup>8</sup> Tauviararamana i riwa, “Anona eġa! Anona eġa!  
 Anatapuna anona eġa.”

### *Damona, God ma vivirei ma riwana ma voteletelei*

<sup>9</sup> Tauviararamana nuanuana i ulaula kaula, ma aiwai i aramanei rava i viararamani. Riwa  
 nuaulaulai maġamaġai i 'avi ma i girumei ma i rereġa-kauei. <sup>10</sup> Tauna riwa vinuaubana  
 i baiei ma aiwai i girumi lamna jijimanina ma ririwa-kaulana.

<sup>11</sup> Tauviararamana riwai lamna me kwapu ma riwa nuaulaulai i gam me tutu, nuan-  
 uam ita tonatonai. Wei anatapuna BADA i vereta. <sup>12</sup> Anina natu, ma aramanei da kaula ġelau  
 ma inana-kauei. Buka girumai eġa ina kwa ma giruma ġiriġiri i vinigarigari.

<sup>13</sup> Wei anatapui au murina.

Riwa tagogiava ma aramanei:  
 God ma vivirei ma ponana ma voteletelei.  
 Wei lamna aubaina rava i vitupui.

<sup>14</sup> God ata kaula anatapui govagovaġai,  
 aiiai bo apoapoe, ina kovoġi.

## Peroveta Isaiah ana buka

### *Pariverena*

Wei bukana lamna peroveta gāeāena au Jerusalem i mae tana riwa 750 BC. nanarena, wavana Isaiah. Bukana iavana tonuā:

Kapita 1-39 e ririweta da mai Assyria ai gulau ma ai sorodia vivirewapanai dam gēloui Israel ma Judah au ririvai i vipupuni. Gulagulai Israel ma Judah i vibadei.

Kapita 40-55 lamna mai Babylon ai gulau mai Judah i vipupui ma i pupuna-naiei da au Babylon. Perovetana i vinuaubai ma i riwei da God ina naiana-melei ma lawana vouna ina verei.

Kapita 56-66 lamna mai Judah i nememei au Jerusalem. Ma perovetana God ana ogatara Jerusalem ravi aubai e bababaniei.

## 2

### *BADA ana ola*

<sup>1</sup> God ana pariverena, Judah ma Jerusalem aubaii wenanare, Isaiah - Amoz natuna i verei.

<sup>2</sup> Mara au murina,  
ola mepa tempol marina e maimairi, ina mae-nonoa.  
Ina gētelara kaua eā, me ola gēloui.  
Dam nununai patarai ina taini kampa da ina voepaepa.

<sup>3</sup> Dam patarai ina nei ma ina riwa,  
“Ona nei, tana gāe BADA ana au ola,  
Jacob ana God ana au numa.  
Weka ana kaua ina viararamanita  
da au ivina tana babara.  
Aubaina BADA Riwana au Zion da ina opu,  
BADA ana tarawatu Jerusalemei ina opu.

<sup>4</sup> Tauna dam gāeāe ai viāiāiawa ina rauetarei,  
ma ina kovoā.  
Ai sod ina guda-virai da ipa uata,  
ma ai pawasi ina guda-virai da naipi ai raāaraāi kosii aubaii.  
Dam damai eā ina viāiāiawa vivira me,  
bo ina vokaukaua, gāvia aubaina.

<sup>5</sup> Ona nei Israel natunatui, BADA ana au ravilala au ivina tana babara.”

## 5

### *BADA ana grape wapuna welana.*

<sup>1</sup> ✧ Ona rautaniāana ma au nuavainana ana wela ana ravi.  
Au nuavainana ana grape wapuna i paewi,  
doa au maumaurana, ola au barana.

<sup>2</sup> I auni ma gāima i viopuni ma i gari  
ma grape goroāorovai aiaii, avavai, i paewi.  
Violaāa numana i voai  
ma nanare wine anigudana i bori au kira.

✧ 5:1: Mrk 12:1



Anina ma i vipaipai da grape uena aiaii ita verei,  
Wate grape anatapui i viġora.

<sup>3</sup> Marina taumi Mai Jerusalem ma Mai Judah,  
Tau ma au grape wapuna ona babiniei!

<sup>4</sup> Aiwai ġelauna eġa ata kauei au wapu?  
Anatapuna a kauana-paiei!

A notai da grape uena aiaii ita vereu wate viviġorai i vereu.

<sup>5</sup> Marina ana riwem,  
wenanare ana kauei au wapu awarina.  
Garina ana viairikarikai da ġamoġamo ina rui  
Ma wapuna ina ġara-viravirai.

<sup>6</sup> Ana voterei da modu ura gogoi ina vinelana  
ma eġa aiai grape ina taraġadaġadari  
bo modu ina tuparaguragui.

Modu ma donadona, wapuna ina puru-pai.  
Apau ana egari da eġa kampa garewa ina atuna.

<sup>7</sup> BADA Vivirewapana Kaukauana  
ana grape wapuna lamna, Israel  
ma grape ġoroġorovana ae tuġuna e rerereġi  
lamna ana dam mai Judah,

I notanotai da lawana aiaina ita maeni  
wate i 'nanai da tara i vitoini;  
kaua jijimanina ita nelaġai  
wate viġaiġaiawa gararai i nonori.

## 6

### *BADA Isaiah i ġorei da ina viperoveta.*

<sup>1</sup> Madegana gulau Uziah i 'raġe, tau Bada a inanai. Tauna ana au anikiala, au aidamo telarana i kiakiala ma ana gara adana tempol i vioai. <sup>2</sup> Au ririvana lamna Seraph ruaġa. Tagotagogi ava papei six; papena ruaġei naoi i purui, ruaġei aei i purui ma ruaġei, i lavelave. <sup>3</sup> Ma tauiva i viġoreġore vivira;  
“Vivivirem, vivivirem, vivivirem tam BADA, Vivirewapanana;  
Dobu anatapuna am boruma i oai.”

<sup>4</sup> Ponai gugurana tempol tuatuana i gui ma bau tempol i vioai.

<sup>5</sup> Ma a riwa, “Aio! A kauana-boai! Babani apoapoei gamou i vimiramirai, ma rava gamoi miramirai au poui a mamae, wate matauei gulau, Bada vivirewapana kaukauana a inanai.”

<sup>6</sup> Ma seraph tagogi incense aniapuna au tepana ai moniana i kavini ma i lavenei awariu.

<sup>7</sup> Ma ai moniane i gamou i vodadani ma i riwa, “Ma inanai, wei ipirim i vodadani; am apoapoe vinimalana i vaitawanei ma am ġo'apoapoe i notatawanei.”

<sup>8</sup> Anina ma BADA ponana a nonori i riwa i pa, “Aiai ana paritawanei? Aiai aubaita ina nae?”

Ma a riwa a pa, “Tau weka. Ma paritawaneu!”

## 7

*Immanuel ana mataira.*

<sup>10</sup> Muriai, BADA, gulau Ahaz i riwana-melei i pa, <sup>11</sup> “BADA am God ma vibaḡai da mataira piripirina, doa au ipu dewadewana, irairaḡei ai au animae bo mara au tepa dewadewana, ina viatataiem.”

<sup>12</sup> Wate Ahaz i paribelei, “Tau eḡa Bada ana vibaḡai mataira aubaina. Eḡa ata ḡoei da Bada ana raudadani.”

<sup>13</sup> Ma Isaiah i riwa i pa, “Gulau David ana epaepaia, ona rautaniḡana kaua! Taumi ami orapotei rava orai o vivibadoi ma marina o ḡoei da kauana tagogina ona kauai Bada awarina bo? <sup>14</sup> Lamna aubaina Bada ainelana mataira ina viatataiemi: Matatapu ina duama ma tevera orotona ina ḡuni ma ina viwavai Immanuel.” Wei anona God tauta maiteni.

## 9

*Awarita tevera i tupua*

<sup>1</sup> Tau i vivinu'apoapoe, ai vinuapoapoe ina kwa. Rorova dobu Zebulun ma dobu Naphtali i kwalai\* ma i vinimalamalai, wate muriai dobuna ina viboruma-kauai. Galili, jentail ai dobu, au boga Mediteranean ina vikarei da maramatanei ina nae da waira Jordan au baba ḡelauna.

<sup>2</sup> Tau i waguwaguvareina taubabarai  
lalaina ḡaeḡaena i 'nanai;

Tau i gimtona taumaenina†  
awarii lalalaina i lalai.

<sup>3</sup> Tam ai dam u vimaḡai  
ma ai nuaiai u viratai;  
am viturana i vinuaiaiei;  
me tuaruta au marana e vivinuaiai,  
me sorodia e vivinuaiai,  
maranai, ḡavia purapurai i tuarui, e ḡutaḡutai.

<sup>6</sup> Aubaina, awarita tevera i tupua!

Tevera orotona i vereta!

Tauna ina vibada.

Tauna ina ḡorei:

Tauvinuaterena Aiaii telarana, God Vivirewapanana;

Amata Maemae Nonoana; Nuauba Badana.

<sup>7</sup> Ana vigulau ma ana nuauba ina tua,  
eḡa damona ita mamae.

Noina Gulau David ana au vigulau gabuna ina kiala,  
ma nuavainei ma jijimaninei ina vibada kaua;

Ina mae-nonoa, marina da mara au damona.

BADA VIVIVIREWAPANA KAUKAUANA

ana nuavainei wei anatapuna ina kauai!

## 11

*David ana epaia*

<sup>1</sup> Me ai tuḡutuḡu ita nabinabi

Mara e nenei maranai Jesse ana damei gulau ina nei.

\* **9:1:** I pupuna-naiei au Assyria i vipaniapani † **9:2:** Iraḡe paratana

- <sup>2</sup> Ma BADA Aruana tauna au tepana ina rauei da:  
 Nuaulaula ma aramana ġaeġaena ina verei,  
 ana oġa tara aiaina ma tepa tora ina verei, da ana rava ina paina-kauei.  
 BADA ina aramanei ma ina vivirei.
- <sup>3</sup> Bada votelatelana, lamna ana nuaiai ġaeġaena,  
 ma eġa kua tepana inanana bo viarautu awarinei, ina kovoġimi;
- <sup>4</sup> Tauna molamolakai ina rauetarana-kauei,  
 ma vivinuapoapoe au dobu aubaii ina mairi.  
 Ma gamona bolabolana dobu ina kovoġi,  
 ma ponanei ġo'apoapoe ravai ina viraġeni.
- <sup>5</sup> Tauna kua jijimanina ina vijiġoratei  
 ma patutu ina vitairoroei.
- <sup>6</sup> Nanare auou moduei sipu natuna maiteni ina mae,  
 ma leopard gote ġaubona au ririvana ina matave,  
 nanare cow ma lion natunatui ina laba-tagogi;  
 ma tevera ina viġamoġamo.
- <sup>7</sup> Bulumakau ma bear ina am tagogi,  
 natunatui ina matave tagogi,  
 ma lion gidagida ina ani me bulumakau.
- <sup>8</sup> Tevera daradarana mota ana au nibo ina vikalokalo  
 Ee! Ma tevera edaedana mota aiara ana au nibo, urana ina tereġairei.
- <sup>9</sup> Au Zion, au ola vivivireina eġa aiwai ina vikeroi bo ina viapoapoeni.  
 Aubaina BADA aramanana  
 dobu ina vioai, me waira boga e vivioai.
- <sup>10</sup> Nai maranaina gulau vouna, Jesse ana damei,  
 ina vomairi da ina vimataira dobu au ana tapuna.  
 Dam ġaeġaei anatapui ina deri ġeta awarina, ana au animae boruborumana.

## 35

### *Etanai Vivivireina*

- <sup>1</sup> Mutulua ma dobu poipoina ina vinuaiiai,  
 dobu dariġaġa ina vinuaiiai ma ina talai!
- <sup>2</sup> Berana ina numoi,  
 ma ina vinuaiiai ma ina logologoi!  
 Inanana i vidualaulauna me Lebanon olai  
 ma ana maura me Carmel olana ma Sharon wapuna.  
 Kampa BADA ana boruma rava ina viatataiemi,  
 BADA ana vigulau ina inanai.
- <sup>3</sup> Ura vogarigarii ona vovaibagi,  
 ae tutu gwaġagwaġana ona vovaibagi;
- <sup>4</sup> Rava rovorovoi ona riwei,  
 “Eġa ona rovo! Ona virewapana!  
 Ona inana! God ana mejina e nenei;  
 da ami ġavia ina vipupui.”
- <sup>5</sup> Ma mata potapotai ina inana  
 ma taniġa potapotai ina nonora
- <sup>6</sup> Gwaġagwaġai ina viauaupepa me deer, ma gumgum ana morelanai ina vigaragararei.  
 Waira au dobu dariġaġa ina wanaiwaġi,

ma vuvura ina raupaipairei.

<sup>7</sup> Doa paipairana ina vitopa  
vuvura ina raupaipairei

au dobu dariḡaḡa,

modu ma gonu ina gogo labalababa auou moduei ana au animae.

<sup>8</sup> Ma kampa etanai ḡaeḡaena e ḡoreḡorei *Etanai vivivireina*, ina mae.

Etanaina lamna tauī God ana babara e nenaeni, tauī ava aubaii,  
Rava orai miramirai eḡa ina babarani.

Bubuai weka eḡa ina babara dadana.\*

<sup>9</sup> Eḡa lion bo raviuru kampa ina babara.

Eḡa ḡamoḡamo ḡaiḡaiawai kampa ina mae

BADA rava i vivilawania,

tauī ava kampa ina babara.

<sup>10</sup> BADA aiavoi i gimara-melei wenanare ina nememei

ana welawelai ina rui au Zion

Nuaii maemaena ina vikunuteiei,

nuaii ma morelana ḡaeḡaena ina peu au tepai,

nuabola ma iniviana ina amoa.

## 40

*God ana rava ina vinuubai.*

<sup>1</sup> Ami God e ririwa, “Au rava, ona vinuubai!

Nuuba riwai ona riwei.”

<sup>2</sup> Riwa egolanei mai Jerusalem ona riwei

ona riwei da ai vinuapoapoe marana i kwa,  
ai ḡo’apoapoe i nota-tawanei.

BADA ai ḡo’apoapoe i vimaiei mara ruaḡa.

<sup>3</sup> ✧ Rava e viḡoreḡore;

“BADA ana aninae au mutulua ona vokaukauei!

Etanai jijimanina ata God aubaina au mutulua ona kauei.

<sup>4</sup> Gwagwa ona dobo-naiei,

ma ola anatapui ona ḡara tawatawanei

doana anatapuna ona vimataveni,

ona ḡara-laboḡi.

<sup>5</sup> BADA ana boruma ina vieḡai,

ma rava anatapui ina inanai.

Lamna BADA gamonei i riwai!”

<sup>9</sup> Zion, tam pariverena aiaina e garagararei.

Ma ḡae ola ḡaeḡaena au tepana

ma ponam ḡaeḡaenei,

pariverena aiaina ma raugugulei

ma eḡa ma rovo!

Taon ḡaeḡaei Judah au paratana ma pariverei,

“Ami God e nenei!”

<sup>10</sup> Ona inana BADA God ana rewapanana

e nenei da ina vibadeta.

Ona inanai! Maiana, lamna rava i vivilawania, maiteni e nenei.

\* **35:8:** Bo avena da ai nota i aburu, tauī eḡa ina kwako. ✧ **40:3:** Mrk 1:3

11 ✨ Ana rava ina ġamoi me sipu tauġamoina,  
ana sipu natunatui au nuanuana ina raparapai.  
ma tatauvao ina ravena-kauei.

## 42

### *BADA ana taunola.*

1 ✨ BADA i riwa,  
“Wei au taunola, a vinei,  
a vovaivirewapani ma a vinuaiaiei.  
Aruau au orana a terei  
ma tauna lawana aiaina, ma kua jijimani in neiai dobu au anapuna.  
2 Tauna eġa ina garara  
bo ponana ina rata au deba.  
3 Rava me gonu barabarana eġa ina gai,  
bo rava me wiki tupona eġa ina boi.  
Wate lawana aiaina ma kua jijimani in neiai dobu anapui awarii da ai lawana.  
4 Eġa orana ina peu bo ina vokokokara,  
lawana jijimani in terei au dobu;  
bonabona ravai aueia nanare, e vivipaipai.”  
6 ✨ “Tau BADA jijimani, a vinem ma ana vovaivirewapanim da lawana aiaina ma neiai;  
ma ana raunimavoaim ma ana gagaloem.  
Tamei, parivainuaġana bagibagina rava anapui au dobu maiteni ana kauei,  
ma vilalaina jentail awari.  
7 Ma mata-potapotai matai ma vikalai;  
ma ravai au panipani numana;  
nai tau gimtona maemaei ma tereopunei.”

## 49

### *BADA ana taunola*

3 BADA i riweu i pa,  
“Israel tam au taunola ma tamei au boruma ana vieġai.”  
5 Au manawa ma BADA i vineu da ana taunola;  
da ana rava mai Israel kwakokwakoi ana neiana-meleiai awarina.  
BADA i vimaegaeġaeniu;  
Tauna au rewapana.  
6 ✨ I riweu “Au Taunola,  
Jacob ana dam ma voepana-melei ma  
mai Israel kwakokwakoi ma neiana-meleiai; lamna nola aburuna.  
Wate nola ġaeġaena a vereverem;  
lalalaina ma naiei jentail awarii  
ma lawana mamae-nonoana ma naiei da dobu au ġia dewadewana ina ġeta.”  
14 Wate mai Jerusalem i riwa,  
“BADA i netawaneta! Tauta nuanuana i vuru”  
15 Ma Bada i paribelei,  
“Moina! Tatauvao natuna melamelana au ġuġuna, nuanuana ina vuru bo;

bo natuna i ġuniġunia nuanuana ina vuru  
 Mepa da alo nuanuana ina vuru,  
 wate tau, eġa nuanuau ina vuru!”  
 16 Jerusalem eġa melanai nuanuau ina vuru  
 Ona inantai! Wavami, au ura lapalapau a rurui.

## 50

### *BADA ana taunola patupatutuna.*

4 BADA God i viararamaniu aiwai ana latoni,  
 da ġokokokarai ma peupeui ana vovairewapani.  
 Ubaubani patapatai e ravidagudaguii,  
 ma taniġau a tonetonei da  
 ana rautaniġanana ma ana viararamana kaua.  
 5 BADA God aramana i vereu  
 ma eġa ata pariġaiei bo ata mae-puputei.  
 6 ✧Uporau a verei da i kwapu-kauei,  
 ma a voterei da mutuorou i amui.  
 Eġa naou ata govaġi maranai i vinimalamalaiu  
 ma naou i ovai.  
 7 Wate BADA God au muriu e maimairi,  
 lamna aubaina eġa ita vitepaubaubaiu.  
 A vokaukaua da ana nebelei,  
 aramanei da eġa ina vinimalamalaiu.  
 8 God au ririvau, ma ina vitaubabani aubaiu.  
 Tauna ina riwemi da tau eġa aiwai ata kauana-boai.  
 Aiai ina viwavuii?  
 Tana nae tana etara  
 Au ġavia mepa, taumi ona nei?  
 9 Anina BADA tauoina e gagaloeiu,  
 Aiai ina riwei da tau a kauana-boai?  
 Taui anatapui ina gumaġa me gara wadubona.  
 Komaġana ina ambaubauni.

## 52

### *BADA ana vilawana e nenei*

7 I ai ġaġa, taupariverena a inantai olei e taġotaġonai.  
 Riwa Aiaina e jimejimej:  
 nuauba ma nuaiiai riwai  
 ma BADA ana vilawana.  
 Ma Zion i riwei, “Ami God e vivibada.”  
 8 Ona rautaniġana! Ami tauvineneġana e vigaragararei;  
 ana morelanai e logologoi;  
 Taui mataiei BADA i ’nanai  
 e nenememei au Zion.  
 9 Jerusalem wanarikarikana,  
 ana morelanami ona wela-gogona BADA awarina.  
 Tauna ana rava i vinuaubai,  
 ma ana melagai Jerusalem, i vai-melei.  
 10 Dobu anatapui au matai

✧ 50:6: Mrk 14:65

ana rewapana vivivireina e vivieḡai.  
Rava anatapuī au dobu  
BADA ana vilawana, ina inanai.

*Taunola ana vinuapoapoe ma ana boruma.*

- <sup>13</sup> BADA i riwa, “Au taunola ana nola ina kauana-kauei!  
Rava tauna ina voepai au tepa dewadewana.  
<sup>14</sup> Au naona rava maḡamaḡai tauna i ’nanai  
ma i virovoroaneī.  
I vunu-kauei ma i vitaratarai;  
da inanana eḡa me rava.  
<sup>15</sup> Wate marina dobu patarai ina raviḡori  
ma gulagulau gamoi i pota tauna voepaepa aubaina.  
Eḡa ita pariverēi,  
marina mataieī ina inanai,  
ma aiwai eḡa ita nonori, ina aramaneī.”

## 53

- <sup>1</sup> “Aiai wei pariverenana ita vitumaḡaneī?  
BADA aiai awarii ana rewapana i viatataieī?”  
<sup>2</sup> God au matana, i rata me ai-nabina,  
me aiwarama au kemara e gogogolana.  
Eḡa ita tupua karawata bo vigulauna,  
eḡa aiwaina vinualaulaunana da tata rauoḡareī.  
<sup>3</sup> Ta inana geduaieī ma ta inana-tawaneī,  
iniviara ma vinuapoapoe malana i vaia,  
ta raugovaḡeī,  
ta mae-puputei ma ta riwa da tauna rava labalababa.  
<sup>4</sup> Tauna, ata nuabola kovoḡana i vaia  
ma ata iniviara i avarai.  
Wate ta notai da  
ana ḡo’apoapoe aubaina, God i kovoḡi.  
<sup>5</sup> Ata kaua apoapoe aubaina i vitoneī,  
ata ḡo’apoapoe aubaina i vikeroī.  
Kovoḡaneī, nuauba i vereta;  
kwapu keroneī i vilawanita.  
<sup>6</sup> Anataputa me sipu kwakokwakona,  
ana nuaita mā ata ḡoaneī ta mamae;  
wate ata ḡo’apoapoe kovoḡana, BADA tauna i viavarai.  
<sup>7</sup> ✧ Au taunola i rauiviapoapoelana-kaueī,  
wate i volaḡota;  
eḡa aiwai ita latoni.  
I taravaina-naieī viraḡenana aubaina me sipu ḡaubona.  
Me sipu ana genugenuanana e nenaē aparabori aubaina eḡa aiwai ita latoni.  
<sup>8</sup> I pani ma i naieī  
ma eḡa aiai tauna ita vinuaboleī,  
eḡa ana epaepaia ma ina iraḡe.  
Ana lawana au pouna i kwa labalababa.  
Ana rava oina ai ḡo’apoapoe aubaina i’raḡe.

- <sup>9</sup> Tauna eġa morumoruna bo ġaiġaiawana.  
Wate tau i ġoei da danedanei maiteni ita doboi,  
ma purapura ravana ana au kokoġa i vimataveni.
- <sup>10</sup> Maranai ana lawana i puloei ata ġo'apoapoe aubaina.  
Lamna, BADA ana ġoana da tauna ita vunu-boai ma iniviara ġaeġaena ita vaia.  
Ma ana epaepaia ina maġa guratana  
ma ana lawana ina manawa.  
Ma taunei, BADA ana ġoana ina kauana-paiei.
- <sup>11</sup> Ana nola anona ina inanai ma ina vinuiaiei  
da ana nuabola eġa kwakwavina.  
Bada i riwa, "Au taunola patupatutuna a vinuiaiei,  
rava maġamaġagau ai kovoġa i avarai  
ma lamnei tau ana ġorei Rava-Jjimanii.
- <sup>12</sup> ✧ Ma lamna aubaina ana vimaġaeġaeni, tauna rava ġaeġaena.  
Ma ana au gabu ana terei  
rava ġaeġaei ma virewapanai maiteni  
ma ana maia ina ġutai.  
Aubaina ana nuaina ana lawana i verenei.  
Tauna ora-potapotai maiteni i'raġe,  
ma ġo'apoapoe ravai maġamaġau aubai i mairi."

## 54

### *BADA ana nuavaina Zion aubaina.*

- <sup>4</sup> Eġa ona rovo aubaina eġa ina vitepa-ubaubaimi.  
Tepami ina tora, eġa ina vinimalamalaimi.  
Ami laraga kauai nunuami ina vuru.  
Ami vikaiababa nuabolana ina amoa.
- <sup>5</sup> Aubaina, taुकauem lamna awam,  
wavana BADA Vivirewapana Kaukauana.  
Israel ana God Vivivireina am taugimaramelana,  
Tauna dobu anatapuna ai God.
- <sup>6</sup> Israel, tam me wavine tavine vovou  
ma awam i geduaiem ma u vinuabola kaua.  
Wate BADA ina ġore-melem awarina ma ina pa,
- <sup>7</sup> "A voterem mara aburuna,  
wate raunuapoapoe ġaeġaenei ana vaimelem.
- <sup>8</sup> Au meji i rata kaua da a mae-puputem mara aburuna.  
Wate au nuavaina mamae-nonoanei,  
ana raunuapoapolem."
- BADA taugimaramelana i riwa me,
- <sup>9</sup> ✧ "Awariu, wei me Noah ana au mara,  
maranai parivainuaġana bagibagina a kauei  
da eġa melanai wairei dobu ana purui-melei.  
Marina, nanare parivainuaġana bagibaginei a ririwem  
da eġa melana amlou ina ġaiġai da ana kovoġimi.
- <sup>10</sup> Ola ina vidagu  
ma ina amoa.  
Wate, au nuavaina mamae-nonoana,



ma au nuauba mamae-nonoana tam awarimi ina mae-nonoa.”  
BADA tauraunu’apoapoelemi i riwa.

## 55

### *Nuarelanami ona nei*

*BADA i riwa i pa,*

- 1 “Ona nei, nuanuarelanami! Waira wei!  
Awarimi mane eġa ona nei ona gimara ma ona am!  
Ona nei, wine ma mereki ona gimarai  
maiana eġa, ona vaioi.
- 2 Aiwai aubaina lam apoapoei awari mane e tawatawanei.  
Aiwai aubaina e nolanela labalababa.  
Ona rautaniġana kua ma ona am-iaua,  
ma lam aiaii dagidagiaii ona vinuaiaiei.
- 3 ✧ Taniġami ona toneiai ma ona nei awariu  
ona rautaniġana da ona lawana.  
Au parivainuaġana mamae-nonoana ana kauei tam maiteni.  
Ma viaiaina David a parivainuaġani ana verem.”
- 6 “BADA ona baiei da ona nelaġai,  
marina au ġereġeremi, ona vibaġai.
- 7 Ġoa apoapoe ravai, ami lawana apoapoei ona geduaiei  
ma nuanuami ona virai.  
Ee! Ma ona wanavirai BADA awarina da ina raunu’apoapoelemi  
ma ami ġo’apoapoe ina notatawanei.”
- 8 BADA i riwa, “Au nota eġa me ami nota nanare,  
ma au kua tapuna, eġa ami kua nanare.”
- 9 Mara i ġetelara eġa me dobu  
ma nanare au kua i ġetera eġa me ami kua.  
Ma nanare au nota i ġetelara eġa me ami nota nanare.
- 10 Garewa ma turuvani marei e peupeu  
eġa kwakwavina ina naeme au mara,  
waġe dobu ina viutuvanei  
da lam ina gogo,  
da pei ina vereta, paewa aubaina  
ma lam, aniam.
- 11 Ma wenanare riwau gamouei e opuopu;  
eġa kwakwavina ina nememei awariu  
da aiwai a pariparitawanei ina kauei;  
au ġoana anatapuna ina vikwai.

## 56

### *Lawana rava anatapui aubaii*

1 BADA wei e ririwei:

“Aburuna ava, ana nei da ana vilawanimi

---

✧ 55:3: Act 13:34

ma au viaiaina ana vieġai.

Lamna aubaina, kua aiiai  
ma jijimanii ona kaukauei.”

<sup>6</sup>“Mai jentail, aiiai da tau i vituraneu  
ma i vitaunoleu, ma wavau  
i vinuavainei ma i vimaēġaeġaeniu.  
Au Sabate i vivirei,  
ma au parivainuāġana bagibagina e vovojijina-kauei.

<sup>7</sup>✧Taufi ana neiai au ola vivivireina - Zion  
ma nuaiai ana verei au parinumana.  
Ma ai pulo e apuapui awariu ana vianinei.  
Anina ma rava, au tempol ina ġorei pari numana,  
dam anatapui au dobu aubaii.”

## 58

*Uji ririwa kauana.*

*BADA uji ririwa kauana e bababaniei:*

<sup>7</sup>“Am-irairaġei lam ona taraiġuei,  
ma ami numa ona votawanei,  
nelabalabai ma vinuapoapoe awarii.  
Kovakovai gara ona vioteni,  
ma taraoim eġa ona inana-tawanei.”

<sup>8</sup>“Maranaina, au viaiaina ina ravilalaimi me maratmtom madeġana,  
ma ami doria laġilaġina ana vilawani.  
Au naomi ana nae da ami aninae ana vovajijimani,  
ma murimiei, au boruma ina gagaloemi.

<sup>9</sup>Nai maranaina ona viġore ma TAU BADA, ana paribelemi.  
Agu ona gararei ma ana riwa, “Tau weka.”

“Eġa rava, vita ona verei, eġa ona viwawuwavu  
ma eġa babani morumorui ona kaukauei.

<sup>10</sup>Maranai am-irairaġei o viambagibagi,  
ġokokokarai o vovoagui.  
Lamnei, ami lalalaina gimtona ina lalai,  
ina ravilalai me aubenai madeġana.”

## 61

*Riwana Aiaina molamolakai aubai*

*BADA ana taunola e ririwa:*

<sup>1</sup>“BADA God, aruana i vereu.  
I vineu ma i paritawaneu da:  
Riwana Aiaina ata naiei molamolakai awari  
ma vinuanuabolai ana vinuabai.  
Ma panipani ana pariverei da deriei ina viopuni.

<sup>2</sup>I paritawaneu da rava ata pariverei,  
da mara i turiai maranai BADA ana rava ina vilawani

✧ 56:7: Mrk 11:17

ma ana ḡavia ina kovogī.

Ma i paritawaneu da vinuabolai ana vinuaubai.

<sup>3</sup> Da tauī e mogumogu au ola Zion,  
nuaiai ina vikunuteiei ma eḡa ina vidolodolo.  
Nuaiai logologona ma eḡa tou.  
Tauī ina vinuaiai ma eḡa ina vinuabola.

Ai kua jijimanina aubaina ina ḡorei BADA ana labarava ai jijimanina  
da tauna ina vimaēḡaeḡaeni.”

<sup>6</sup> “Ma taumi ina ḡoremi BADA ana pirisi.

Ina ḡoremi, God ana taunola.

Taumi dobu ḡelauī ai maura ona ani  
ma ona vigulagulauei.”

### *BADA i riwa*

<sup>8</sup> “Aubaina Tau, kua aiaī a ḡoeḡoei,  
danene ma ḡo’apoapoe a gedugeduaiei.

Au rava ai vinuapoapoe aubaina ana vimaiana-kauei;  
au parivainuaḡana bagibagina mamae-nonoana maiteni ana kauei.

<sup>9</sup> Dam anatapui, am epaepaia ina aramanei  
ma e inainana ḡaei.”

Ma ina pa,

“BADA i viaiaina-kauei.”

### *Zion i riwa*

<sup>10</sup> BADA awarina a vivinuaiai kua  
ma Aruau God awarina i vinuaiai kua.

Aubaina vilawana garanei i vigaraiu

Ma jijimana vianeī ma garanei i viotenu.

Me tavitavinevou orotona e vivigarai nanare bo

me wavine tavitavinevou ana viana e tavitavine.

<sup>11</sup> Me doa, pei e vivigogoi ma debagau lam e verevereta,  
nanare BADA God, rava e teretere-vaijijimani  
au dobu da tauna ina voepaepae.

## 64

### *Pari agu aubaina*

<sup>4</sup> Oo Bada wariāḡa da marina, eḡa aiai god ḡelauī ponana ita nonori, ita inanai, bo  
ita aramana dadanei.

Anina Tam ainelam.

Tauī da e vivipaipaiem e vovoagui.

<sup>5</sup> Tam kua aiaī ravai e vovoagui,  
am tarawatu e vovojijini.

Wate maranai ta ḡo’apoapoe ḡiriḡiri  
tam amlom e voḡaiḡai.

Aiwai aubaina ma vilawaniai?

<sup>6</sup> Anatapuaī a ḡo’apoapoe,

Au matam, ai kua jijimanii anatapui miramirai me gara wadubona.

Anataputa ta poipoi me ai-rugurugu,

Ata ḡo’apoapoe e kapupuana-naieta.

<sup>7</sup> Ma eḡa aiai wavam ita voepaepai

bo ita voguratei da naom ita inanai.  
Lamna aubaina tam u netawanelai  
da ai ġo'apoapoei e vunuvunuiai.

- <sup>8</sup>Wate BADA, tam amaiai.  
Tauai dogodogo ma tam nau tauvoaina.  
Tam anatapuiai uramei u rauġaroġaroelai.
- <sup>9</sup>Lamna aubaina, eġa ma meji guratana awariai.  
Ma eġa ai ġo'apoapoe ma nota-nonoei.  
Ma i 'nanaiai, anatapuiai tam natunatum.

## Peroveta Jeremiah ana buka

### *Pariverena*

Jeremiah lamna peroveta wavana naenaena au Jerusalem, ma BADA riwana i raugugulei ana rava awari. Tauna riwa bagibaginei ana rava i ririwei menanare God tau i na kovoḡanei, aubaina Tauna i mae-puputei ma god ḡelau i votaḡotaḡoi.

### *Bada Jeremiah i ḡorei*

<sup>4</sup>BADA i riweu i pa:

<sup>5</sup>“A vinem, muriai da alom au manawana a teretagociem.  
Muriai da uta tupua, A tereriem,  
rava anatapui ai peroveta.”

<sup>6</sup>A paribelei, “Oo BADA God, tau tevera ota, ma babani eḡa ata aramanei.”

<sup>7</sup>BADA i riweu, “Eḡa ma riwa, ‘Tau tevera ota.’ Ma nae mepa a pariparitawanem, ma aiwai a ririwem tau i ma parivere. <sup>8</sup>Eḡa ma rovoei aubaina Tau a paritawanem. Tau tam maiteni ana mae da ana gagaloem. Tau BADA a babani.”

<sup>9</sup>Anina ma BADA urana i viloloi da ipiriu i tapedadani ma i riweu,  
“Marina riwau au gamom a terei.

<sup>10</sup>Ma aramana-kauei da marina rewapana a vereverem,  
da dobu anatapui ai gulagulau ai kovoḡa ma vinolenolei wenanare,  
Ḡelau ma orumi, ma viairikarikai,  
ma vovaiubai ma vipupui.  
Ḡelau ma voepai ma ma paewi.”

<sup>17</sup>“Ma vokaukua Jeremiah! Ma vomairi ma aiwai anatapuna a riwem ravai ma parivere.  
Eḡa ravai ma rovoei, bo au matai, ana virorovoiem.

<sup>18</sup>Amadodo a vovaiwewapanim me  
melagai vivirewapanana, tuatua ma garina iramei voavoana. Tam ma mairi  
ma eḡa maiJudah ma ai gulagulau, ai gabemani ravai, ai pirisi ma dobuna ravai  
ina tereḡairem.

<sup>19</sup>Tau i na viḡaviem wate i na kauana-avei.  
Aubaina tau tam maiteni, ma ana gagaloem. Tau BADA a babani!”

## 6

### *Bada i riwa,*

<sup>13</sup>“Rava anatapui, ḡaeḡaei da muomuoi,  
e ḡoeḡoei da moruei mane i na kauei;  
peroveta da pirisi anatapui nanare  
rava e morumorui.

<sup>14</sup>Tau i, au rava keroi ḡaeḡaei  
e bunabunamai apamina me kero aburuna.  
E ririwa da aiwai anatapuna anina,  
Wate eḡa anina!”

## 17

*BADA ona-vitumaḡanei*

<sup>5</sup> BADA e ririwa,

“Aiavoi da ai vitumaḡana rava ota awarii e tereterei,  
ma ai rewapana e vitumatumaḡaneiei;

ma e gedugeduaieu,  
ana parivaiapoapoeni.

<sup>6</sup> Tau i me, ai podapodai au dobu dariḡaḡa  
eḡa aiwai aiaina ita inainanai.

Tau i dobu au paipairana ina mae, ai ma modu eḡa,  
me au dobu au vivibogana ita mamae kampa eḡa rava ita mamae.”

<sup>7</sup> “Wate aiavoi awariu e vivipatutu ma e vivitumaḡana da  
BADA ai tepamairi, tau i ana viaiaini.

<sup>8</sup> ✧ Tau i me ai, vuvura au adana i paewi,  
ma warami i ḡaira waira au orana.

Eḡa marapoi ina rovoei,  
ma rugurugui majimajiḡai ina maimairi.

Ma marapoi ana au mara,  
eḡa ua ita vovoterei.”

<sup>9</sup> “Rava nuapoui lamna morumoru kauana, i apoapoe kaua,  
ai ai i aramana-kauei, da ina vilawani.

<sup>10</sup> Tau BADA rava nuapouii  
a tuvirevirei ma kaua govagovaḡai au orai a inana-pai.

Rava anatapui ai kaua ana inanai.  
ma ai kaua awarinei ana puloi.”

## 20

*Jeremiah ana beura*

*BADA i riwa,*

<sup>5</sup> Tau, Jerusalem ma ai mane ma ai maura ma aiwai anatapui polapolai i toitoiei  
ana veredamanei ai ḡavia awarii. Ina nei ma Judah, ai gulagulau ai purapura mai ai ḡaeḡae  
maiteni ina pupuna-naiei au Babilon.

*Jeremiah i riwa,*

<sup>7</sup> Oo BADA! u gwala-kaueu da a viperoveta  
ma a voterem da u kauei.

Tam u virewapana guratana da  
u tereḡaireiu.

Marina tau rava ai anivinama.  
Rava anatapui e vivinameu, marai ma waguvarai.

<sup>8</sup> Maranai a paripariverena,  
Riwa ana nuai e rubaruba-opu.

“Viḡaiḡaiawa! Pupu e nenei!”

BADA ana pariverena aubaina, vinama ava a nenelaḡai.

<sup>9</sup> Mepa da ana geduai ma wavana eḡa ana latoni bo wavanei ana jima  
Lamna maranaina riwam lamna me ai araratana,  
orau e ararai.

Amapo eġa ana vojijina-guratei. Amapo eġa!  
<sup>10</sup> A nonori patara e viviarautueu.  
 Au ġavia i maġa kauga,  
 ma e vineneġaneu da ana neboa,  
 ma ina viwavuiu ina pa,  
 “mepa da i jima boa, ina waro-melei ma tauta ata biwa tana vaia.”

<sup>11</sup> Wate BADA tau maiteni  
 me tauviġavia vivirewapana kaukauana.  
 Lamna aubaina au ġavia eġa ina tereġaireu.  
 Tau i ina vunū-aveu ma ina vinimala kauga.  
 Ina vinimalana-nonoei ma eġa nuanuai ina vuru.

<sup>12</sup> “Oo BADA Vivirewapanam! Tam rava jijimani e raraudadani,  
 ma ai nota ma orai e araramanei.  
 Au vita au uram a terei  
 ma ana inanaim, au ġavia ma kovogġi.

<sup>13</sup> Ona wela BADA awarina.  
 Ona voepaepai.  
 Maranai Rava vivirewapanai, gwaġagwaġai e rarau-iviapoapelei,  
 lamna BADA ana rewapanai tau i ina gagaloei.”

## 23

### *BADA Gulau vouna ina vinei mamae-terenai aubai*

<sup>1</sup> BADA e ririwa, “Au rava ai babada nuabola ġaeġaena ina nelaġai! Tau i sipu taupaini apoapei. I vipaipai-boa da sipu i vidabararai.”

<sup>2</sup> Lamna aubaina BADA, Israel ana God, wenanare Israel babadai awari e ririwa, “Taumi ami kauelai au sipu o vidabararai ma o vilamolamonei. Eġa ota vipaipai kauga. Lamna kauai apoapei aubaina ana kovogġimi. <sup>3</sup> Anina ma Tau au sipu ġelau i a virubai au dobuġela, ana neiana-meleiai ai au gari. Wei mamae-terenai ina vinatuna ma ina maġa guratana. <sup>4</sup> Taupainii rava kauga ana tere-naiei da ina viġamoġamo kauga ma eġa ina rovo me bo orai ina sisi. Eġa tagogi ina kwako. Tau BADA a riwa.”

<sup>5</sup> ✧ BADA e ririwa  
 “Mara vouna e nenei maranai gulau ana terei David ana damei.  
 Wei gulauna ina vibada kauga ma kauga aiainei ma jijimaninei dobu anatapuna  
 ina vibadei.  
 Nota aiainei Judah ravai ina rauetaraveni ma  
Israel ravai au nuauba ina mae.

<sup>6</sup> Wei maranaina mai Judah, ina vilawani  
 ma Israel ana nuaubai ina mae.  
 Ma wavana ina ġorei, BADA Tauterevaujijimanita.”

## 31

### *BADA Israel ina vaimelai.*

<sup>7</sup> BADA i riwa:  
 “Ana nuaiaimi ona wela Jacob ana dam aubaina  
 ponami ona voepai dam viġulauna aubai.  
 Ona voepaepa, ona jima ma ona riwa,  
 ‘God, am rava mai Israel mamae-terenai ma vilawani!’

<sup>8</sup> Au kariwabuei au rava ana neiana-meleiai,  
 dobu au giana da au giana anapui.  
 Maiteni mata-potapotai ma sigesigei,  
 duaduamai ma tautauvaoui.  
 Dam patara gāeāena ina nememei.  
<sup>9</sup> Ana rupenai ma ana toutoui agu aubaina,  
 ana neiana-meleiai  
 Waira adanei ana taravainiai,  
 etanai abuabunei da eā ina peu.  
 Tau Israel amana,  
Ephraim au natuevou.”

*Parivainuaāana bagibagina vouna.*

<sup>31</sup> ✧BADA e ririwa i pa, “Mara e nenei maranai parivainuaāana bagibagina vouna ana kauei mai Israel ma Judah maiteni. <sup>32</sup> Wei lamna eā me noinoi maiteni a kauei nanare; maranai a raunimavoai ma Egyptei a taravaina-opunei. Aubaina au parivainuaāana i viaigai avena da nuanuai a vaia me oroto awana nuanuana e vaivaia. <sup>33</sup> Wei parivainuaāanana mai Israel maiteni ana kauei nai marana au murina.” BADA e ririwa, “Au tarawatu ai au nota ana terei ma au nuanuai ana girumi. Wei ina terekauei da Tau ai God ma tau i au rava. <sup>34</sup> Ma eā ai rava ina viararamana-melei bo riwa vivira, ‘BADA ona aramane!’ Aubaina au aburuna da au magurina anapui ina aramaneu. Tau ai go’apoapoe ana nota-tawanei ma eā ana nota-melei.” BADA e ririwa.

### 33

*Nuauba parivai-nuaāanana*

<sup>14</sup> ✧BADA i riwa, “Mara e nenei maranai au parivainuaāana bagibagina mai Israel ma mai Judah maiteni a kaukaueia anona ina tupua.

<sup>15</sup> Nai maranaina,  
 rava kaua David ana damei ina nei;  
 Ma Tauna kaua aiaii ma jijimaniina kauei au dobu.

<sup>16</sup> Nai au marana  
Judah ina vilawani ma  
Jerusalem ana nuaubana ina mae.  
 Wei melagaina ina gōrei, *BADA Tauterevaijijimani.*”

### 38

*Jeremiah waira dogona au orana.*

<sup>4</sup> Babadai, gulau Zedekiah i riwei, “Wei ravanana Jeremiah tana viraāeni. Ana baban-iei, sorodia ruaāgauta lawalawai ma rava āelau e viviorabadoi. Tauna eā rava ita vovoagui wate e viviorabadoi.”

<sup>5</sup> Gulau i paribelei, “Tauna au urami, ami gōana nanare ona kauei. Tau eā ana viāaemi.”

<sup>6</sup> Ma Jeremiah i vaia ma i tere-āairei gulau natuna Malkijah, ana au dogo, wei lamna gulau ana sorodia ai au potuma au ririvana. Ma āuravei Jeremiah i tere-āairei au \*dogo. Au orana dogodogo ava, ma Jeremiah i monu āaira da i mairi dogodogo orana.

✧ 31:31: Mrk 14:24 ✧ 33:14: Jer 23:5-6 \* 38:6: Wei lamna wapaketa dogona, viutuvana aubaina.



## Lamentation Mogu Jerusalem aubaina

### *Pariverena*

Wei bukana e ririweta da au 586 B. C mai Israel i vinuapoapoe kaua maranai ai ġavia i nei da Jerusalem i pupuni ma rava ma purapura aiaii i vaia da i naiei. Tauta eġa tata aramana-kauei aiai wei bukana i girumi wate rava ġelau i e notanotai da augunai Jeremiah wei bukana i girumi.

### *Jerusalem ana nuabola*

<sup>1</sup> Kapore! Zion wariġa am patara i rata ġaġa, marina u kwakwava.  
Dam patarai ai voepaepa, marina i vikaiababa.  
Wariġa dobuġela gulagulai ai voepaepa. Tauna i 'nana ġaei.  
Marina i vitaunola.

<sup>2</sup> E toutou maratomi,  
jirigwegwena au navanavana e toitoi.  
Ana nuavainana maġamaġau i ruba-tomana, eġa aiai da ina vinuau bai.  
Ana rava\* anapui i mae-puputei ma i viġaviei.

<sup>3</sup> Judah i pani ma i pupuna-naiei.  
Au dobu ġela i vivipanipani,  
e rarau-iviapoapoelei,  
i vitaomana au dobuġela.  
Ġavia i mae-kwaviviroi,  
menanare ina onaġanei?

<sup>4</sup> Zion etanaina e mogumogu  
eġa aiai kampa ita nenaie torela aubaina.  
Ana anirui i kwakwava,  
Pirisi e gunugunura,  
ana guguini e vivitouana;  
Nuapouna i wanagwadgwadai.

<sup>5</sup> Ana ġavia i vibada,  
au urai e mamae.  
BADA nuabola ġaeġaena i neiai Zion awarina  
aubaina ai ġo'apoapoe i rata.  
Natunatui i paninaiei aueia, ai ġavia au mataii.

<sup>6</sup> Kapore wariġa Zion na!  
Wavana naenaena, vinualaulaunana marina mepa?  
Marina, Zion ana babada lamna me  
deer, nuanuai i arelei ma i raumolaġau ma lam i baiana-avei.  
Inina i garigari  
ma eġa tagotagogina da ai ġavia ina rubatawanei.

<sup>7</sup> Zion i kwakwava, ravana eġa.

\* **1:2:** Ana eririam lamna wapu god Baal ma Aserah ma mai Judah maġamaġau wei god i voepaepai. Ana rava lamna tauviġavia mai Egypt ma nanare maiteni i viturana ma maranai ġavia i ġetai taui i viruberubei.

Ana maura, wadubona e vinuanotenotei.  
 Maranai ana rava i peu ai ġavia au urai, eġa aiai ita nei da ita rauagui.  
 Ana ġavia Zion ana peu i 'nanai ma i vinamei.

### 3

- 19 BADA, A tenam nae, eġa matave kaua, iniviara maiteni,  
 a vinuapoapoe kaua, notana i viġora kaua.
- 20 A notanota-maelei  
 ma au orau a toutou.
- 21 Wate BADA a vinua-notenotei ma orau e vovovaivirewapani. Lamnei a vitumaġana:
- 22 da BADA ana nuavaina mamae-nonoana.  
 Ma ana raunuapoapoe eġa ina kwa.
- 23 Ubaubanai, e raviravivouni;  
 am vipatutu i rata kaua.
- 24 A ririwana-meleu, BADA au buderi lamna a vivitumaġanem.
- 25 Taii daBADA e vivitumaġanei ma e baibaiei, ina viaiaini.
- 26 I ai da tana volaġota ma BADA tana paini da ina vilawanita.
- 27 I aii da vilamolamona ma nola ma aramanei. Am au vilaraga,
- 28 maranai BADA e viviaramanita,  
 ma mae genuatau.
- 29 Tana mae-ġaira au debidebi,  
 mepa da agu ina nei.
- 30 Navanavami ona verei da ina ravi, ma ina vijiboġimi.  
 Wate eġa ona vobelei aubaina.
- 31 Bada eġa ina geduaiana-nonoeta.
- 32 Avena da maraġela nuabola e neineiai, wate ana raunua apoapoe i rata kaua.  
 Aubaina ana nuavaina i rata kaua, eġa damona.
- 33 Wate wei kauai eġa ita vinuaiaiei.

## Peroveta Ezekiel ana buka

### *Pariverena*

Ezekiel mai Jew au Babilon i vipanipani awari i babani. Tauna mara nonoa vivirarautua vinualaulaunai ma awanainei ana babani i tereterei.

Tauna rava ai riwa vouna i verei da ina vipaipai ma ai bada ina terepa-melei.

God mai Israel dobu au gia dewadewana anatapui ina neiana-meleiana da ai au dobu oina ina terei.

## 2

### *God Ezekiel i vinei ana peroveta*

<sup>1</sup> Bada ana boruma a inanai ma au doa a peu. Ma a nonori pona i riweu, i pa, “Rava ota natuna, ma vomairi ma awarim ana babani.” <sup>2</sup> I bababani ma God aruana au orau i rui ma i voepai ma a nonori awariu i bababani. <sup>3</sup> I riwa, “Rava ota natuna, a pariparitawanem dam paripariviravirai mai Israel awarii. Amamai maiteni eġa ita voteleteleu ma awariu i pariviravira da marina. <sup>4</sup> Rava paripariviravirai ma orai badobadoi ma eġa ita vivivireu. A pariparitawanem da ma riwei, ‘Wei Bada riwana.’ <sup>5</sup> Tai paripariviravirai ma ina rautaniġanem bo eġa lamna avena, wate ina aramanei da peroveta i ġetai awarii.”

## 17

### *God Israel ina ravivouni*

<sup>22</sup> Bada God wenanare i riwa, “Tau ai cedar manamanaina nuanuana ana vogai da ana paewi. Raġana au tepadewadewana nabina ana gai da ola manamanaina au tepana ana paewi. <sup>23</sup> Israel ola au tepai ana paewi, ina raġai ma ina raunumo, ai gulauna. Kiu tapuna ma tapuna au raġai ina raunoġi ma au ġoui ina viġou. <sup>24</sup> Ai anatapui nai au dobuna ina aramanei da tau BADA, ai manamanaii ana taragai ma ai tupotupoi ana voepai. Ma ai majimajiġana ana vipoini ma ai poina ina raurugu ma ina rata, Tau BADA a babani, ma aiwai a riwei nanare ana kauai.”

## 33

### *God Ezekiel i vinei da tauvineneġana.*

*BADA i riwa:*

<sup>7</sup> “Rava ota natuna, Tau a vinem tauvineneġana dam Israel aubai; riwa a vereverem ma nonori ma babani bagibaginei ma riwei. <sup>8</sup> Maranaġi ġo’apoapoe ravana a ririwei, ‘Tam, ġo’apoapoe ravana, amapo ma i raġe.’ Ma ravana eġa uta pariverei da ana ġo’apoapoe ita voterei, ma ina iraġe. Marina ana iraġe au uram a tereterei. <sup>9</sup> Wate mepa da ġo’apoapoe ravana u riwei da ana lawana ita virai ma eġa ana lawana ita virai, ana ġoa apoe ina iraġelei, ma tam am lawana ina mae.”

## 34

### *BADA tauvipaipai aiaina*

<sup>11</sup> Bada God wenanare e ririwa, “Tau ainelau au sipu ana baiei ma ana ġamoi. <sup>12</sup> Sipu taupainina, ana sipu kwakokwakoi e baibaiei da e nenemeleiai. Nanare tau, au sipu

e kwakokwako-nae. Ana nelaḡai ma ana neiana-meleiai, maranaina dobu i waguverei ma i gimtonei.\*

<sup>15</sup> –Tau ainelau au sipu ana ḡamoi ma ana terei da ina matave kaua, Tau BADA God a babani. <sup>16</sup> Tau kwakokwakoi ma nelabalababai ana baiei, ma ana neiana-meleiai. Ma keroi ana bunamai ma ḡokokokarai ana vovaivirewapani. Wate dododoi ma virewapani ana pupuni. Jijimaninei au sipu ana ḡamoi.

<sup>17</sup> –Taumi au sipu Tau BADA God a ririwana-kauemi da taumi tagotagogi ava ana rauetaremi. Aiaii ma apoapoei ana vilamonei, sipu ma gote ana vilamonei.”

## 36

### *BADA ana rava ina ravivouni*

<sup>16</sup> BADA i riweu, i pa, <sup>17</sup> “Rava ota natuna, maranai Israel ai au dobu i mamae, tau i kaua apoapoei ai dobu i vimirai. Tau au matau lamna i vimira-melei me wavine ana nawaravi e vaivaia. <sup>18</sup> Marina, au meji ana iwaḡa-tawanei awarii aubaina tau i tara i vitoini au dobu, ma nanare kokoitau ei dobu i viapoapoeni. <sup>19</sup> A vidabararai ma a vilamolamonei au dobuḡela, ai ḡo’apoapoei ma ai kaua awariei a kovoḡi. <sup>20</sup> Wate metauna au dobuna i rui tau i wavau vivivireina i vijiboḡi, aubaina nai dobuna ravai e ririwa, ‘Wei lamna BADA ana rava wate ana dobu i opu-tawanei.’ <sup>21</sup> A ḡoei da au rava au wava vivivireina ita vimaēḡaēḡaeni, wate noi rava mai Israel dobu anapui i naeni ma i vitepaubaubai.

<sup>22</sup> –Lamna aubaina, marina dam Israel ma parivere, Bada God wei i riwei, ‘Tau a neineiana-meleiaimi, eḡa tam am kaua aiaina aubaina. Tau a kaukauei wavau vivivireina aubaina, taumi wavau o viapoapoeni-naiei jentail ai au dobu. <sup>23</sup> Ana viatataiemi da wavau, ḡetelarana ma vivivireina. Wavau taumi dobu au anapui o vitepaubaubai. Taumie i dobu ana viatataiemi da tau vivivireu <sup>24</sup> aubaina dobudobuai ana taravainimi ma ana neiana-meleiaimi ami au dobu.’

<sup>25</sup> –Wairei ana vitoaimi da ona aii, ami mira ma kokoitau viborumai mirana ina oḡa-tawanei. <sup>26</sup> Ma nuauami vouna, ma aruami vouna ana veremi. Nuauami badobadoi ana votawanei ma aiaina ana terei. <sup>27</sup> Ma Aruau au oram ana terei da au tarawatu ma au viaramana ona votaḡotaḡoi.”

## 37

### *BADA gelama ina ravivouni*

<sup>1</sup> BADA i raunimavoai ma aruanei i naieu da gwagwa ḡaēḡaena au pouna i tereu, rava gelamii gwagwanana i oai. <sup>2</sup> Gwagwanana a naeni ma a inanai da gelama i maḡa guratana ma i poi. <sup>3</sup> I paridadaneu, “Rava ota natuna, amapo wei gelamii ina virava me bo eḡa?” A paribelei, “Oo! Bada God, tam ainelam u aramanei.”

<sup>4</sup> Ma i riweu, “Riwauei gelama ma riwei, ‘Gelama poi, BADA riwana ona nonori.’ <sup>5</sup> Bada God wenanare gelama i riwei, “Lavutu au orami ana terei ma ona lawana me! <sup>6</sup> Vioa ma warowaro ana veremi, ma opi da gelama ina purui. Ma lavutu ana veremi da ma lawana. Kampa ma aramanei da Tau BADA.” <sup>7</sup> I ririweu nanare a babani, a vikarei da a bababani ma dobuna ura ketarana i nae da dobuna i oai, gelama anapui i vitagogiei. <sup>8</sup> A inainana ma warowaro ma vioa gelama au tepana i ampasi ma au tepai opi i tupua da i purui, wate awari eḡa lavutu.

<sup>9</sup> Ma i riweu i pa, “Rava ota natuna, Bada God riwanei ive ma riwei, ‘Bada God e ririwa, ive meiei da meiei e uveuvena, au orami lavutu ina opui ma taubeu patarai e matamatave

\* **34:12:** Wei lamna awanaina maranai mai Babilon Israel ina pupuna-naiei au 587 B.C.

ona uveni da ina lawana me.”<sup>10</sup> Ma i ririweu nanare a babani, ma lavutu ravai tupuai i ruini. Anatapui i lawana ma i mairi sorodia boruna g̃aẽgaena.

<sup>11</sup> I riwa me, “Rava ota natuna, mai Israel lamna me wei gelamii. Tau i e ririwa i pa, ‘Tauta gelama poi ava ma ata tumaḡana i kwa, ata dam i kwa.’<sup>12</sup> Lamna aubaina ma riwana-melei, Bada God wenanare e ririwa, ‘Ona inana! Ami kokoaga ana votawanei ma ana voepaemi ma ana neiana-meleiaimi au Israel.’<sup>13</sup> Au rava! Maranai wei i tupua, ona aramanei da Tau BADA.<sup>14</sup> Ma Aruau au orami ana terei ma ona lawana ma ana neiana-meleiaimi ami au dobu oina. Maranaina, ona aramanei da Tau BADA. Ee! A ririweia; ana kauēi.”

## Peroveta Daniel ana buka

### *Pariverena*

Daniel tauna laraga maranaina i naiei au Babilon da i vipanipani. Ma maranai i vomagura tauna i terei da gabemani ai bada g̃aẽgaena. Tauna ana au lawana i vipatutu ma God i votetelei.

Ana vipatutu awarinei God nuaulaula i verei, ma tauna tagotagogina da rava ai rauboni anona ina viẽgai ma kaua aiwai amapo ina tupua e viviẽgai.

## 7

### *Daniel ana rauboni*

<sup>13</sup> ✧ Waguvarai inana a inanai, ma kaua aiwai a inanai me Rava Natuna apau oraninei i nenei, ma i taravaina-naiei MAEMAE NONOANA awarina. <sup>14</sup> MAEMAE NONOANA vibadana ma rewapana ma vimaēgāēgaena, tauna i verei da ina vibada, da dam anatapui ma dobu anatapui ai ponei ina voepaepai ma ina voteletelei. Ma ana rewapana ina mae-nonoa, ma ana vigulau vibadana ẽga ina kwa.

## 12

### *Mara au damona*

<sup>1</sup> ✧ Ma nai maranaina anela vivirewapanana Michael, Israel ana taugagalo, ina ẽga. Amapo nuabola g̃aẽgae otana ina nei, ẽga melanai nanare tata inainanai, au karena da marina. Wate wei au marana rava aiavoi da wavai au buka i girugirumia ina lawana. <sup>2</sup> Mãgamãgauri irairagei ina vomairi me, ma ina nae, g̃elau i lawana maemae nonana ma g̃elau vinimala maemae-nonoana. <sup>3</sup> Rava nuaulaulau i lalai me mara madẽgana. Ma tau i mãgamãgauri e raveraveni da lawana jijimani e maemaeni, ina lalai me ubona.

## Peroveta Hosea ana buka

### *Pariverena*

Hosea God ana peroveta, tauna mai Israel awari God riwana i jimei. God i riwa da tau i ina kovogi ma ai dam ina pupuni aubaina tau i tauna i geduaiei ma god morumorui i voepaepai ma ai kua apoapoe i votaḡotaḡoi.

Hosea awana tauna i voterei ma nelara ḡelau maiteni i nena. Wate tauna awana nuanuana i vaini ma i baiei ma i taravaina-meleiai ana au numa. Wei bukana e viviatataieta da nanare tagogina avena da mai Israel ai God i geduaiei tauna anina da tau i nuanuai i vaia ma i parivainuaḡana da tau i ina neiana-meleiai awarina.

## 11

### *God, Israel nuanuana i vaia*

<sup>1</sup> Bada Hosea i riwei, i pa, “Maranai Israel ana au vitevera, a vinuavainei ma Egyptei a ḡore-opunei.

<sup>2</sup> Wate a viḡoreḡore ma tauna amapo da i nenetawaneu.

Tauna ana pulo i apuapui Baal awarina, ma daji ḡabuḡabui, i apuapui kokoitau ḡelau awarii.”

## Peroveta Amos ana buka

### *Pariverena*

Amos taon au aburuna i mae Bethlehem au ririvana, au Judah maranai God tauna i kwatuei ana peroveta. Tauna God riwana mai Israel i riwei da God, ai kaula apoapoei aubaii ina kovogi. Wei ravai God ega ita vimaegaegaeni ma ega ita ririwa kaula, i morumoru ma molamolakai awarii kaula apoapoei i kaukauei.

Ma maiteni Amos God ana parivainuagana tau i verei da amapo tauna Israel ana gabemani ina ravivouni, Jerusalem ina voa-melei ma gulau David ana tupua rerega ravai dobuna ina vibadana-melei ma ana nuaubai ina mae.

## 8

### *Tou gaegeaena e nenei*

<sup>4</sup> Ona rautanihana! Taumi voladagai o kwalekwalei  
ma molamolakai o tugwadagwadai.

<sup>5</sup> O ririwa, nawaravi vouna torelana ina kwa lagilagina  
ma Sabate ina kwa.

Ma witi tana gimarei,  
witi ruva aburuna tana terei ma maiana tana gaegeaei  
ma sikere morumorunei tana gimagamarei.

<sup>6</sup> Witi logilogii o tami da witi o tavipotoi ma o gimarei  
ma lamnei, molamolakai o gimarai ami taunola.  
Tau maia me busi, maiana aburuna.

<sup>7</sup> BADA parivainuagana-bagibagina, ana wava i kauai,  
nai wavana mai Israel e vimaegaegae,  
I pa, "Ami go'apoapoei ega melanai nuanuau ina vuru."



## Peroveta Jonah ana buka

### *Pariverena*

God ana peroveta Jonah i kwatuei da au Niniveh ita raugugula. Wate tauna eġa ita ġoei da ana dobu ravai ai ġavia wariġana awarii ita raugugula.

God i rauaġaiġaiei ma iana tauna i lawani. Au murina, i nae au Niniveh ma i nelaġai da mai Israel ai ġavia, God riwana i votetelei.

### *Jonah BADA i rauaġaiġaiei*

<sup>1</sup> Mara tagogi BADA, Amitai natuna Jonah i riwei, <sup>2</sup> “Ma vomairi ma nae au taon ġaeġaena Niniveh. Ma riwei, da ai ġo’apoapoei a inana da i rata kua ma lamna aubaina ana kovoġi.”

<sup>3</sup> Wate Jonah, BADA i voterei ma etanai ġelauna i vaia ma ina ruba ġaira au Joppa. Ma kampa waga i nenaie au Tarshish i nelaġai. I vimaia ma i geru da ita nae. I notai da BADA ita ruba govaġei.

<sup>4</sup> Wate BADA kojikojira ġaeġaena i paritawanei da waga ita viairikarikai. <sup>5</sup> Waga ravai ai lawana aubaina i rovo-kaukua ma ai god awarii i tou agu aubaina, ma purapura au boga i viorereni da waga ita telatela. Wate Jonah waga au orana i raunuavuru.

<sup>6</sup> Kapena i ġaira awarina ma i eni i pa, “Mara i apoapoe ġaġa ma e matamatave! Ma vomairi, ma tou am god awarina da ina voaguitta. Mepa da ina raunu’apoapoeleta da eġa tana iraġe.”

<sup>7</sup> Waga ravai i babani vivira i pa, “Ġaima tana vikalokaloei da tana aramanei aiai ana wavu.” Kalona i kauei ma wavuna Jonah awarina i peu <sup>8</sup> Ma tau Jonah i paridadanei, “Aiwai aubaina kojikojira awarita i peu? Tam aiai? Tam am nola aiwai, tam meiei?”

<sup>9</sup> Jonah tau i paribelei i pa, “Tau Hebriewe ma tau BADA, Mara ana God a voepapai, Tauna boga ma doa i kauei.”

<sup>10</sup> Waga ravai i rovo kaukua ma i vigaragararei, “Aiwai aubaina lamna u kauei!” Jonah boiboġi i vieġa da tauna BADA i rovoei da i rubaruba. <sup>11</sup> Mara i apoapoe kua ma tau Jonah i vitaravirevirei, “Aiwai tana kauei da kojikojira ina kwa?”

<sup>12</sup> Jonah i riwa, “Ona tawaneu au boga ma ive ina raumairiei. Aramanei da tau au kauelei wei ivena i vomairi.”

<sup>13</sup> Wate waga ravai i lare-guratana da waga ita ġairei au gera, wate eġa tagotagogina, kojikojira i voguratei. <sup>14</sup> Anina ma tau anapui i tou Jonah ana God awarina i pa, “Oo BADA! eġa ma voterelai da wei ravana ana ġo’apoe aubaina, ana i’raġe, ma eġa tarana wavuna ana avarai!”

<sup>15</sup> Ma Jonah i vojijini ma i tawana-opunei au boga ma maratagogi kojikojira i wanatuini ma daumora i matave. <sup>16</sup> Ma ravai i rovoana-kauei da pulo i apui BADA awarina ma i parivainuaġani da tauna ina vivirei.

<sup>17</sup> Wate BADA iana ġaeġaena i paritawanei da Jonah i lawani. Ma Jonah iana au manawana i mae aupom ma waguvara tonuġa.

## 2

### *Jonah ana pari*

<sup>1</sup> Jonah iana au manawana ma i raupari BADA, ana God awarina. <sup>2</sup> I pa, “Au nuabola au orana a tou BADA awarina, ma i paribeleu.

Irairaḡei, ai au dobu  
ma agu a gararei

ma au tou u nonori.

<sup>3</sup> Au gabinou u tawana ḡaireu,  
boga au gabaura dewadewana.  
Boga i kwaviviroiu.

Rabamam ḡaeḡaei i viaimonumonui.

<sup>4</sup> Oo BADA! A notai da tau u tereopuneu,  
ma a notai da eḡa melanai am tempol vivireina ana inana-melei.”

<sup>5</sup> “Boga i puruii  
lavutui i tupo  
ma aragoma kolau i pani.

<sup>6</sup> A monu ḡaira ola au kare dewadewana,  
a vipanipani nai au dobuna,  
dobuna metaetana guduguduna maemaena.

Wate tam BADA au God, u vilawaniu.  
Lawalawaiu gabinouei u sinaepaiu,

<sup>7</sup> Malana a vaia au lawana i opuopu,  
ma BADA a raupari awarim,  
am au tempol, ma u nonoriu.

<sup>8</sup> Tau i kokoitau labalababa e viviborumei,  
am nuavaina mamae-nonoana i geduaiei.

<sup>9</sup> Wate tau ana welem, ana voepaepaim  
ma au pulo ana apui awarim.  
Au parivainuaḡa awarim ana kauei  
lawana maemaie nonoana BADEI e nenei.”

<sup>10</sup> Ma BADA iana i egari da Jonah i medana-tawanei au gera.

### 3

#### *Jonah i nae au Niniveh*

<sup>1</sup> Ma BADA i babani me Jonah awarina, <sup>2</sup> I pa, “Ma nae taon ḡaeḡaena vinualaulaunana Niniveh ma au riwa a vereverem ma pariverei.”

<sup>3</sup> Jonah, BADA riwana i voteletelei ma i nae au Niniveh. Niniveh lamna taon ḡaeḡae otana ma aupom tonuḡa i vaia da i verautuini. <sup>4</sup> Jonah i vikarei nai au taona ma aupom tagogi i babara ma i jima i pa, “Aupom 40 ina kwa ma Niniveh ina pupu.” <sup>5</sup> Mai Niniveh BADA riwana i vitumaḡaneie ma i vioga da anatapui magurina da aburuoina i vianina tagogi da ina uji ma uji garana i oteni da ina vimataira.

<sup>6</sup> Maranai Niniveh ana gulau wei riwana i nonori, tauna ana anikiala i opu-tawanei ma ana gulau garana i ḡiḡi. Uji garana i oteni ma au lapukare i kiala. <sup>7</sup> Ma mai Niniveh awarii wei vinolanolana bagibagina i paritawanei tauna au wavaneie. Wenanare i riwa:

Eḡa rava bo bulumakau bo sipu, aiwai ina ani bo ina umai. <sup>8</sup> Ma ḡamoḡamo ma rava uji garana ina oteni ma ina raupari guratana BADA awarina. Ma kaua apoapoe ma ḡoaḡai ina geduaiei. <sup>9</sup> Aiai i aramaneie? Mepa da God nuanuana ina amviravira ma nuavaineie ana meji ina vojijini da eḡa ina pupunita.

<sup>10</sup> Maranai God inanai aiwai i kaukaueie ma menanare ai kua apoapoe i geduaiei, Tauna nuanuana i virai ma eḡa ita pupuni.

## 4

*Jonah ana ǵaiawa ma BADA ana nuavaina*

<sup>1</sup> Wate Jonah wei ogana eǵa ita ǵoei ma amlona i ǵaiǵai kua. <sup>2</sup> ✧Ma i raupari BADA awarina, i pa, “BADA a notai da amapo nanare ita tupua muriai da au melagai ata opu-tawanei. A ’ramanei da tam God raunuapoapoem ma iviaiam, eǵa laǵilaǵina amlom ita voǵaiǵai ma am nuavaina maemae-nonoana. Tam eǵa am ǵoana da ǵo’apoapoe ravai ma pupuni wate ma tere-kauei. Lamna aubaina a ruba nae au Tarshish. <sup>3</sup> ✧Ma marina BADA, au lawana ma vaitawanei, i ai da ata iraǵe ma avena ata mae!”

<sup>4</sup> Wate BADA i paribelei, i pa, “Tam aiwai e ǵaiǵaiawei?”

<sup>5</sup> Jonah i opu melagai au metaetana, au maramatanei. Kampa ǵou i voepai ma au gabaurina i kiala ma i vipaipai da BADA aiwai ita kauei nai taona awarina. <sup>6</sup> Ma BADA ǵoroǵorova i vigogoi da i tuaǵeta Jonah au tepana da ana ǵou. Ma Jonah wei i vinuaiaina-kauei.

<sup>7</sup> Wate ubaubana boiboǵi aupom ǵela, BADA motamota i paritawanei da ǵoroǵorovana i ani da i’raǵe. <sup>8</sup> Maranai madeǵa i gogo, God ive maramatanei i paritawaneiai. Ma madeǵa Jonah kolana i rarani da i ǵokokokara. I ǵoei da ita iraǵe ma i riwa, “Iraǵe i aii, eǵa me lawana.”

<sup>9</sup> Wate God Jonah i paridadanei, “Am nola aiwai da amlom i ǵaiǵai kua wei ǵoroǵorovana awarina?”

Jonah i paribelei, “Amloi i ǵaiǵai kua da a ǵoei ana i’raǵe.”

<sup>10</sup> BADA i riwa, “Wei ǵoroǵorovana u vivinuabolei lamna eǵa tam uta kauei bo uta paini. Tauna waguvarai i gogo ma waguvarai i’raǵe. <sup>11</sup> Wate nai taon ǵaeǵaena Niniveh ma ana patara 120,000, tau i gimtona taumaenina ma ai ǵamoǵamo maǵamaǵai. Wei taona a vinuabolei tapa?”

## Peroveta Micah ana buka

### *Pariverena*

Wei bukana, Micah mai Israel e ririwei da God tau awari amlona i ġaiġai. Tauna am-lona i ġaiġai aubaina eġa ita votelatelei. Lamna aubaina ai ġavia ina voterei da ina viġaviei.

Wate nanare BADA ana parivainuaġana i jimei. BADA i parivainuana da au damona ana rava ina vilawani.

## 5

### *Gulau meiei ina nei*

<sup>1</sup> Sorodia ona vomairi! Ona vokaukau!

Ġavia Jerusalem i matave kwaipipini.

Israel ana gulau ina kwapui, jiġonei navanavana ina kwapui.

<sup>2</sup> Tam, Bethlehem Ephrathah,

melaġai aburu oina dam Judah au orai.

Wate awarimiei, Israel ai gulau ina opu.

Tauna wariġana,

au karena da marina.

<sup>3</sup> BADA mai Israel i voterei ai ġavia au urai,

da wavine marina au manawa, tevera orotona ina ġuni.

Ma ai rava ġelau i tuvai-opunei,

ina nememei ai au gana au Israel.

<sup>4</sup> Tauna BADA ana rewapanei, ina mairi ma ana sipu ina raveni,

ana vinualaulaunei ma BADA wavana ġaeġaenei.

Rava anatapui au dobu, Tauna ina vivirana-kauei

ma lamna aubaina tau kampa ina mae-kaua.

## Peroveta Zechariah ana buka

### *Pariverena*

Mai Jew ai ġavia i nei ma tau i pupuna-naiei au Babilon. Ma madeġa 70 au murina Babilon ai gulau mai Jew i voterei da i naeme au Israel tempol voamelana aubaina. Zechariah maiteni i nae. BADA Zechariah i riwei da mai Israel wenanare ina pariverei, “Ona mae-taviremi awariu ma ana maetavireu awarimi.”

Zechariah turana peroveta Haggai maiteni i nola tagogi nai au marana.

## 9

### *Zion ana gulau e nenei*

<sup>9</sup> BADA i riwa, “Ona morelana Zion  
Ona logoimi Jerusalem,

ona inana! Ami gulau e nenei awarim.

Orana Jijimanina ma ana ġavia i vovaiubai.

Ana volaġotana donkey e gerugerui,  
donkey ġaubona i gerui.

<sup>10</sup> Dam Ephraim awarii Chariot ina vaitawanei,  
ma Jerusalem awari ġavia horse ina vaitawanei.

Ma viġavia ana pidu ina gai.

Tauna rom ina neiai.

Ma ana vibada boga i taġoni da au boga ġela,  
au waira Euphrates da dobu au gia dewadewana.”

## 12

### *Tauna i tonatonai ana mogu.*

<sup>10</sup> Tau-Bada, David ana epaepaia ma mai Jerusalem awarii, raunuapoapoe ma rupena aruana ana iwagi. Tau i taepai ma i tonatonaiu ina inana, ma ina touei ma ina moguei me rava natuna tagotago i’raġe; me natuevouna ina irairaġe. <sup>11</sup> Nai marana, tou ma tarakwatu au Jerusalem ina rata kava me au Hadad-Rimmon au wapuna, au Meggido maranai gulau Josiah i viraġeni.

## 13

<sup>1</sup> BADA Virewapana Kaukauana i riwa i pa, “Mara ina ġetai maranai vuvura ina votawanei au Jerusalem. David ana epaepaia ma mai Jerusalem anapui ina nei ma ai ġo’apoapoe ma ai mira ina oġa-tawanei.”

## Mark Riwana Aiaina, Mark i girugirumia

### *Pariverena*

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauei.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua maġamaġau ita kauei. Wei kauai tana inainai maranai: e viviararamana; ma arua-apoapoei e viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kua i girumi ma eġa ana viararamana ita giruma-guratei. Mark i vieġeta menanare Iesu au korosi i 'raġe da rava anatapui ita vilawanai ma God menanare, Iesu iraġalei i vovaimairini.

*John Taubabataito, Iesu ana aninae i vovokaukauei  
(Matthew 3:1-12; Luke 3:1-18; John 1:19-28)*

<sup>1</sup> Wei lamna Iesu Keriso Messiah God natuna Riwana Aiaina karena.

<sup>2</sup> Wariaġa peroveta Isaiah i girugirumia nanare:

“Ona rautaniġana! Au peroveta au naom ana paritawanei  
da am aninae ina vokaukauei.”

*(Malakai 3:1)*

<sup>3</sup> ✧ “Peroveta au mutulua e viviġoreġore:

‘Taumi BADA ana aninae ona vokaukauei,  
ana eta ona vovai-jjimani!’

*(Isaiah 40:3)*

<sup>4</sup> Ma taupariverena John i nei au mutulua da rava i bababataitoi ma God riwana i jimejime i pa, “Ami ġo'apoapoe ona voterei, ma ona mae-taviremi God awarina ma ami ġo'apoapoe ina nota-tawanei ma ana babataitoimi.” <sup>5</sup> Ma rava anatapui Judea au paratana ma au Jerusalem i nae da John ita rautaniġanei. Maranai ai ġo'apoapoe i rupeni, John, tau i babataitoi au waira Jordan.

<sup>6</sup> Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa. <sup>7</sup> Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiu da ana ae uma ġuravana ana rupeni. <sup>8</sup> Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi  
(Matthew 3:13-17; Luke 3:21-22)*

<sup>9</sup> Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi. <sup>10</sup> Ma maranai Iesu wairei i ġeġetai, i 'nana da mara i wanatawanei ma Arua Vivivireina me gabubu i ġairai. <sup>11</sup> ✧ Ma God ponana marei i opu ma i riwa i pa, “Tam, tau natu au nuavaina ma u vinuainiu.”

*Satan, Iesu i raelari  
(Matthew 4:1-11; Luke 4:1-13)*

<sup>12</sup> Ma lamna au murina God Aruana Vivivireina Iesu i paritawanana-opunei au mutulua. <sup>13</sup> Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

✧ **1:3:** Isa 40:3 ✧ **1:11:** Gen 22:2; Isa 42:1; Mrk 9:7

*Iesu, lebalebaḡai ruaḡa ma ruaḡa i raukwatuei  
(Matthew 4:12-22)*

<sup>14</sup> Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei. <sup>15</sup> Ma Iesu i ririwa i pa, “God ana mara vinevinena i ḡetai. God ana vibadana vouna rava aubai, lamna i turiai. Ami ḡo’apoapoena ona rupeni ma ona mae-tavirem ma Riwana Aiaina ona vitumaḡane!”

<sup>16</sup> Mara tagogi Iesu Galili topana au gerana i bababara nae. Ma lebalebaḡai ruaḡa i ’nanai, Simon\* ma ana tevera Andrew au topa i rarauagida. <sup>17</sup> Iesu i riwei i pa, “Ona nei ma ona votaḡotaḡoiu. Ma me marina iana o tutuarui; nanare, ana viararamanimi da rava ona tuarui da ina vitumaḡaneu!”

<sup>18</sup> Ma maratogogi ai agida i voterei ma Iesu i votaḡotaḡoi. <sup>19</sup> Ma tau i gera i verau-nae. Iesu, Zebedi natunatuna i ’nanai, James ma John ai au waga ai agida wanawanarorona i vokaukauei. <sup>20</sup> Ma maratogogi tau i ḡorei, “Taumi ona nei ma ona votaḡotaḡoiu!” Ma tau amai Zebedi† ana taunola maiteni i voterei ma Iesu i votaḡotaḡoi.

*Iesu, arua-apoapoena rava awarina i viaḡaḡana-opunei  
(Luke 4:31-37)*

<sup>21</sup> Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei. <sup>22</sup> Tauna ana rewapanana i viararamana eḡa me mai Jew ai tarawatu babadai § nanare. Ma taurautaniḡana ana viararamana i baiei.

<sup>23</sup> Maranai Iesu pari au numana i viviararamana ma oroto arua-apoapoena orana i ruiruinia i garara <sup>24</sup> i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

<sup>25</sup> Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

<sup>26</sup> Ma arua-apoapoena orotona i viaikwajiei ma ponana i rata, i garara ma i opu-tawanei. <sup>27</sup> Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!” <sup>28</sup> Iesu nolana, maratogogi i tua Galili au anatapuna.

*Iesu, rava maḡamaḡai i vilawani  
(Matthew 8:14-17; Luke 4:38-41)*

<sup>29</sup> Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae. <sup>30</sup> Simon poiana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i parivere. <sup>31</sup> Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

<sup>32</sup> Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.\* <sup>33</sup> Ma rava anatapui nai au melagaina i vitagogiei numa au metaetana. <sup>34</sup> Ma Iesu, maḡamaḡai ai doria nununai i vilawani ma arua-apoapoe maḡamaḡai rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

*Iesu au Galili i raugugula nae  
(Luke 4:42-44)*

\* **1:16:** Wavana ḡelauna Peter † **1:20:** Eng. Zebedi. ‡ **1:21:** Eng. Capernaum. § **1:22:** Wariḡa BADA, ana Tarawatu Moses i verei mai Israel aubai. \* **1:32:** Madeḡa ina neulai au murina anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei. † **1:34:** Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita eḡari da sorodia ita vibadei ma ta viḡavia, me tau i vivinua-notenotei nanare. Jhn 6:15 ma inanai.

<sup>35</sup> Ubaubanai boiboḡi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari. <sup>36</sup> Muriai, Simon ana rava maiteni i nae da i baiei. <sup>37</sup> Ma maranai Iesu i nelaḡai, ma i riwei i pa, “Rava anatapui e baibaie.”

<sup>38</sup> Iesu i paribelei i pa, “Tana nae taon ḡelau i ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.” <sup>39</sup> Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi dorianana i vilawani*  
(*Matthew 8:1-4; Luke 5:12-16*)

<sup>40</sup> Anina ma rava awarina opi dorianana, i nei Iesu awarina ma au naona i peu ma i raudune ma agu i vibaḡei i pa, “Mepa da ma ḡoei, anina da ma viaiainiu.‡”

<sup>41</sup> Ma Iesu nuabola orana i oai ma urana i viloloi da i vodadani ma i riwa i pa, “Anina a ḡoeḡoei, ma aii!” <sup>42</sup> Ma maratogogi opi-dorianana, oroto i voterei ma tauna i aii me. <sup>43</sup> Anina ma Iesu i riwana-guratei i pa, <sup>44</sup> “Tam ma nae! Aiwai i tuputupua awarim, eḡa rava ma vieḡei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauei da ina vimataira tau awari! Pirisi pulo tauapuina ana vianina ina verei da tam u lawana.”

<sup>45</sup> Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eḡa rava ita mamaelana kampa i nae. Wate rava mepa maemaei i nei Iesu awarina.

## 2

*Iesu, oroto gwaḡagwaḡana i vilawani*  
(*Matthew 9:1-8; Luke 5:17-26*)

<sup>1</sup> Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai. <sup>2</sup> Ma rava maḡamaḡau i vitagogiei au numa. Patara i rata guratana da numa i oai ma metaeta maiteni i maepotai. Iesu, God riwana i raraugugulei. <sup>3</sup> Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina. <sup>4</sup> Rava i maḡa guratana ma eḡa tagotagogina da ita neiai Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona. <sup>5</sup> Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, “Natu, am ḡo'apoapoei, a nota-tawanei.”

<sup>6</sup> Anina mai Jew ai tarawatu babadai ḡelau i kiakiala, au orai i vinua-notanota i pa, <sup>7</sup> “God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijiboḡi ma e ririwa da tauna, God nanare.”

<sup>8</sup> Maratogogi, Iesu Aruanei ai nota i vaia ma i riwei i pa, “Aiwai aubaina wei kauai o vivinua-notenotei? <sup>9</sup> Metauna i telatela: ḡwaḡagwaḡana ata riwei, ‘Am ḡo'apoapoe a nota-tawanei.’ Bo ata riwei, ‘Ma vomairi, am animatave ma vaia ma ma babara?’ <sup>10</sup> A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani.” Ma gwaḡagwaḡana i riwei i pa <sup>11</sup> “A riwem, ma vomairi, am animatave ma vaia ma ma nae au numa!”

<sup>12</sup> Orotona i vomairi ma maratogogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, “Tauai eḡa melanai kua wenanare ata inanai!”

*Iesu, Levi i kwatuei*  
(*Matthew 9:9-13; Luke 5:27-32*)

‡ **1:40:** Mai Jew ai Tarawatu e ririwa da rava lepeleperai, tau miramirai me dobu ḡela ravai - Jentail. Mai Jew amapo nai ravai eḡa ina vodadani. Rava miramirai eḡa maiteni ina vitaparoro bo au melagai ina mae. Lamna aubaina mepa da rava miramirana i lawana, tauna ina ai-me, God tauna ina vaimelai ma rava maiteni ina mae ma ina taparoro.



<sup>13</sup> Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei. <sup>14</sup> Ma i verau-nae aburuna ma Apius\* natuna Levi i 'nanai, ana bagibagi au gabuna i kiakiala ma *tax* i tamitami Rome gabemanina aubaina. Iesu i riwei i pa, “Ma votaḡotaḡoiu!” Levi i vomairi ma i votaḡotaḡoi.

<sup>15</sup> *Tax* tautami ma ḡo'apoapoei ravai maḡamaḡai, Iesu ma ana tauvotaḡotaḡo i votaḡotaḡoi. Ma anapui, Levi ana au numa i kiala gogona ma i amam.† <sup>16</sup> Tarawatu Babadai ḡelau lamna Pharisi, ma tau i 'nanai da Iesu *tax* tautami ma ḡo'apoapoei ravai maiteni i amam. Anina ma Iesu ana tauvotaḡotaḡo i riwei i pa, “Aiwai aubaina Iesu *tax* tautami ma ḡo'apoapoei ravai maiteni e amam?”

<sup>17</sup> Ma maranai Iesu wei riwana i nononori ma tau i riwei i pa, “Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei ḡo'apoapoei ravai aubai ma eḡa rava jijimani aubai.”

### *Uji vitaraviravirana*

*(Matthew 9:14-17; Luke 5:33-39)*

<sup>18</sup> Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitara-virevirei, “Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?”

<sup>19</sup> Iesu i paribelei i pa, “Taumi o notanotai da tau aiavoi i raukwatuei tavine ana au torela, ina mae lota bo? Eḡateni kua! Maranai tavitavine vou orotona, tau maiteni e mamae, tau eḡa ina uji. <sup>20</sup> Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji.”

<sup>21</sup> Ma riwa e mamae, “*Tau kua vouna a neiai eḡa me taumi ami kua wadubona nanare.* Eḡa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roro ma gavogavo ina rata. <sup>22</sup> Ma nanare, eḡa aiai *wine* vouna ina vaini da *wine* aniterenana wadubona ḡamoḡamo opinei au orana ina iwaḡi. Mepa da ina kauēi, lamna *wine* vouna ina dodo ma *wine* aniterenana wadubona ina viaroroi ma *wine* ma aniterenana ina wanabauni‡. Wate *wine* vouna, anina da *wine* aniterenana vouna au orana ina iwaḡi.”

### *Iesu ana riwa Sabat aubaina*

*(Matthew 12:1-8; Luke 6:1-5)*

<sup>23</sup> Mara tagogi au Sabat, Iesu ana tauvotaḡotaḡo maiteni, *witi* wapuna au orana i nenaē. Ma ana tauvotaḡotaḡo *witi rovei* i vaini ma i amam. <sup>24</sup> Pharisi ḡelau i 'nanai wei kauana i kaukauēi ma tau Iesu i riwei, “Ma inanai, ata Tarawatu e mamae da Sabat, lamna lauvitau ana mara. Aiwai aubaina tau e vovobagibagi?”

<sup>25</sup> Iesu i paribelei i pa, “Me peroveta i girugirimia nanare. David ana tauvotaḡotaḡo maiteni am-iraḡe ma aiwai i kauēi? Taumi o iavi ma aiwai aubaina anona, eḡa ota vinuanotenotei? <sup>26</sup> \*Pirisi Ḣeḡetelarana Abiathar ana au mara, David, God ana au numa i rui ma palawa vovivirana i vaia ma ḡelau ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani.”

<sup>27</sup> Ma Iesu ana riwa au damona i riwa i pa, “God, Sabat i kauēi da rava voaguna aubaina ma eḡa rava ita kauēi Sabat voaguna aubaina. <sup>28</sup> Ona vinuanotenotei, tau Rava Natuna, lamna aubaina tau anina Sabat badana.”

\* **2:14:** Eng. Alphaeus. † **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauēi. Ma tau kua waduboi amamai ḡariei maiteni i vovoteletei ma i riwa da aiavoi Tarawatu eḡa ita voteletei lamna tau rava apoapoei, ḡo'apoapoei tau kauēi. ‡ **2:22:** Wine e tuputupua ma puropurona wine ana aniterenana ina viaisikasikai ✧ **2:26:** 1Sa 21:1-6

## 3

*Iesu, Orotu urana irairagēna i vilawani  
(Matthew 12:9-14; Luke 6:6-11)*

<sup>1</sup> Mara gēlauna au Sabat, Iesu i naeme au pari numana ma oroto urana irairagēna i 'nanai kampa i kiakiala. <sup>2</sup> Ma Pharisi gēlauri i gōei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eḡa au Sabat. <sup>3</sup> Ma Iesu, orotona i riwei, "Ma nei, au naoi ma mairi!" <sup>4</sup> Ma Iesu, ravai i vitara-virevirei i pa, "Sabat au marana, metauna i aii: Aiaina tana kauēi bo apoapoena? Tana vilawana bo tana viragēna? Tarawatu aiwai i riwei?" Ma anapui i genuana. <sup>5</sup> Iesu ana amloḡaiḡaina i 'nana viravira ma i 'nanai da tau i orai i bado ma nuanuana i bola-kauēi. Ma orotona i riwei i pa, "Uram ma viloloi!" Ma i viloloi ma i lawana. <sup>6</sup> Ma Pharisi maratagōgi i opu ma i nae Herod ana rava awarii\* ma ai oga i tarai da Iesu mena ita viragēnane.

*Iesu, Patara awari i babani*

<sup>7-8</sup> Iesu ana tauvotaḡotaḡo maiteni, tau i netawane ma i nae au gera da ita vilauvitau; ma mai Galili patara gaeḡaena i votaḡotaḡo. Rava maḡamaḡau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma taon gēlauri waira Jordan taon au babagelauna, Taia taon ma Sidon taon,† tau anapui i nei Iesu awarina. <sup>9-10</sup> ✧ Iesu, rava maḡamaḡau i vilawani. Ma lamna aubaina doridoriai maḡamaḡau i viviamdudu ma i gōei da tauna ita vodadani. Lamna aubaina ana tauvotaḡotaḡo i riwei da waga i vokaukauei. <sup>11</sup> Maranai, arua-apoapoei rava au orai maemaēi, Iesu i 'nanai ma au naona i peu ma i garara, "Tam God Natuna!" <sup>12</sup> Ma Iesu tau i viḡaei da avena ita vieḡa da tauna aiāi.

*Iesu ana Apasol 12 i vinei  
(Matthew 10:1-4; Luke 6:12-16)*

<sup>13</sup> Anina ma Iesu i ḡae au ola ma ana ḡoane nanare, rava i kwatuei da awarina i ḡei. <sup>14</sup> Tauna, nelara 12 i vinei da maiteni ita mae ma muriai ita paritawane da ita raugugula. Ma i ḡorei Apasol. <sup>15</sup> Ma i vovai-virewapani da arua-apoapoei rava au orai ina viopuni.

<sup>16</sup> Tau i vinevinei 12 ai wava wenanare,

Simon i ḡoreḡoreia Peter‡

<sup>17</sup> ma Zebedi§ natuna James ma ana tevera John i ḡorei Boaneges, anona waiparara natunatuna,

<sup>18</sup> Andrew,

Philip,

Batolomeo,\*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

<sup>19</sup> ma Judas Iskariotei;\* tauna, Iesu tauvibenabenameina.

*Rava i riwa da arua-apoapoei Iesu e vivibadei.  
(Matthew 12:22-32; Luke 11:14-23; 12:10)*

\* **3:6:** Herod ana rava anona lamna mai Jew ai boru, tau aiavo Rome gabemanina i vovoagui. Tau ai bada wavalatona Herod Antipas. Mai Jew maḡamaḡau ma mai Pharisi maiteni, i notai da Herod ana rava tau tauvibenabenam ai rava au oiena awarii. † **3:7-8:** Eng. Tyre & Sidon. Wei ravana eḡa mai Jew. ✧ **3:9-10:** Mrk 4:1 ‡ **3:16:** Anona Ġaima. § **3:17:** Eng. Zebedi. \* **3:18:** Eng. Batolomeo. † **3:18:** Eng. Alphaeus. ‡ **3:18:** Wavana gēlauna Judas - Luk 6:16 § **3:18:** Anona lamna tau mai Jew ma tau Rome e vivigaviei. \* **3:19:** Iskariot, lamna Judas ana melagai wavana da auna lamna Iskariotei.

<sup>20</sup> Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am. <sup>21</sup> Ma Iesu ana numa ravai nolana i nonori ma i riwa i pa, “Tauna i bua.” Lamna aubaina i nei da ina taravaini.

<sup>22</sup> Tarawatu babadai ḡelau i Jerusalemei i nei ma i riwa i pa, “Arua-apoapoei, ai bada Bielsibul,† Iesu au orana i rui ma lamnei arua-apoapoei e viviopuni.”

<sup>23</sup> Lamna aubaina Iesu, wei Babadai i ḡorei ma awanainei i pa, “Satan amapo Satan eḡa ina viopuni. <sup>24</sup> Mepa da dobu ravai ina viḡavia vivira, lamna dobuna ita mae ava. <sup>25</sup> Ma nanare dam ina viḡavia vivira, nai damna ita mae ava. <sup>26</sup> Ma Satan ita vomairi ma ita viḡaviana-melei, amapo ita mae ava. <sup>27</sup> Taudanene amapo eḡa rava virewapanana ana au numa ina danene, eḡa da au naona ravana ḡuravei ina raḡini ma muriai ina danene. <sup>28</sup> Riwa kua a ririwemi da God ami ḡo’apoapoei ma ami vijiboḡa anapui ina nota-tawanei. <sup>29</sup> Wate aiai da Arua Vivivireina e vivijiboḡi, God, nai ravana ana ḡo’apoapoei eḡa melanai ina nota-tawanei ma ana ḡo’apoapoei ina mae-nonoa.” <sup>30</sup> Iesu wenanare i babani, aubaina rava ḡelau e ririwa, “Iesu au orana arua-apoapoei e mamae.”‡

### *Iesu ana dam oina*

*(Matthew 12:46-50; Luke 8:19-21)*

<sup>31</sup> Iesu alona ma varevareina i nei ma au doa i maimairi ma riwa i paritawanei Iesu awarina da ita nei. <sup>32</sup> Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ḡoeḡoem.”

<sup>33</sup> Iesu i paribelei i pa, “Aiai alou ma aiavo i varevareiu?” <sup>34</sup> Anina ma tau i kiakiala i ’nanai ma i riwa i pa, “Ona inana! Wei tau alou ma varevareiu. <sup>35</sup> Aiai God ana ḡoana e kaukauei, tauna alou ma novu ma vareiu.”

## 4

### *Doa tapuna ma tapuna ai awanaina*

*(Matthew 13:1-9; Luke 8:4-8)*

<sup>1</sup> Iesu, giu i raukarena-melei Galili topana au adana. Ma patara i riei da ita rautaniḡanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

<sup>2</sup> Ma kua maḡamaḡau awanainei i giu ma i viararamana i pa, <sup>3</sup> “Ona rautaniḡana! Tau-paewa, ana wapu i vokaukauei ma pei i ravi awawari. <sup>4</sup> Pei ḡelau au eta i peu. Ma kiu i ḡeta ma i ani. <sup>5</sup> Ma pei ḡelau doa au ḡaiḡaimana i peu, doa au avavana. Ma lamna aubaina maratagogi i gogo. <sup>6</sup> Wate maranai madeḡa i rarani, maratagogi i poi, anona warami eḡa ita ḡaira guratana doa au orana. <sup>7</sup> Pei ḡelau, modu donadonai au poui i peu. Ma modu donadonai i gogo ma pei i gogogo i lavani, ma eḡa ita ua. <sup>8</sup> Ma pei ḡelau doa au aiaina i peu ma i gogo kua ma i ua, ḡelau 30, ḡelau 60 ma ḡelau 100.”

<sup>9</sup> Ma Iesu i riwa i pa, “Mepa da taniḡami e mamae, riwa ona nonori!”

### *Aiwai aubaina Iesu awanainei i babani*

*(Matthew 13:10-17; Luke 8:9-10)*

<sup>10</sup> Maranai Iesu ainelana i mamae ma ana tauvotaḡotaḡo 12 ma taurautaniḡana ḡelau i ḡeta ma Iesu i vibaḡai da awanaina anona ita riwei.

<sup>11</sup> Ma Iesu i paribelei i pa, “God ana vigulau ana kua mamae govaḡana; taumi i vieḡemi ma rava au tano maemaei, tau aiwai anapui awanainei e paripari-verei. <sup>12</sup> Lamna ana kau e da wariḡa peroveta aiwai i girugirumia ina tupua:

‘Tau ina inana ma eḡa ita inainanai.

Tau e rarautaniḡana ma eḡa ita araramanei;  
ma lamna aubaina tau eḡa ita nenei God awarina

† 3:22: Eng. Beelzebub. Anona lamna, nabugara ai bada. ‡ 3:30: Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eḡa melanai ai ḡo’apoapoei ina nota-tawanei.

da ai gō'apoapoe ita notatawanei.”

(Isaiah 6:9-10)

*Doa tapuna ma tapuna anoi.*

(Matthew 13:18-23; Luke 8:11-15)

<sup>13</sup> Anina ma Iesu i riwei i pa, “Wei awanainei a babani ma anona eġa ota aramanei bo? Ma awanaina ġelau menanare ona aramananei? <sup>14</sup> Taupaewa, God riwana, rava anatapui e paripari-verei. <sup>15</sup> Rava ġelau orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei. <sup>16</sup> Ma rava ġelau orai me doa viġaiġaimana. Tau, riwa i nonori ma maratagogi ana nuaiaii riwa e vaivaia. <sup>17</sup> Wate warami eġa da eġa ita mamae guratana. Ma maranai nuabola bo rau-iviapoapoe e nenei tau awari, aubaina tau ai tumaġana God awarina e tereterei. Tau maratagogi e peupeu. <sup>18</sup> Rava ġelau orai me pei, modu donadonai au orai e gogogolana. Tau anina riwa e nononori. <sup>19</sup> Wate lawana ai nuabola ma mane ai nuavainana ma kaua ġelau ai au nuaiai e ruirui ma God riwana e lavalavani da eġa ita uaua. <sup>20</sup> Ma ġelau, tau me pei doa au aiaina i peu. Tau, lamna anina riwa e nononori ma e vaivai-kauei ma e uaua: ġelau 30 ma ġelau 60 ma ġelau 100.”

<sup>21</sup> Iesu i riwei i pa, “Rava, eġa rampa ita neineiai da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa? <sup>22</sup> Kaua mamae govaġai, anataputapui a vieġai ma kaua govagovaġai nanarena ana vieġai. <sup>23</sup> Mepa da taniġami e mamae, riwa ona nonori!”

<sup>24</sup> Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi. <sup>25</sup> Lamna aubaina, mepa da riwau ona aramanei, tau ġelauna ma ġelauna ana veremi. Ma tau eġa ita aramanei, lamna aiwai aburuna i nononoria, ina vine-boai.”

*Pei gogogona ana awanaina.*

<sup>26</sup> Iesu e ririwa i pa, “God ana vigulau me rava, *witi* peina au doa ita ravi-awawari. <sup>27</sup> Ma waguvara e matamatave ma maratome e vovomairi ma pei e gogogo ma e rarata. Wate aiwaiei e gogogo, tauna e vivinuanainei. <sup>28</sup> Doa ana nuaina, pei me *witi* e vivigogoi ma e uaua. Au naona e raraupairei ma muriai e roverove ma muriai anona e magumagura au tapina. <sup>29</sup> Maranai i magura, rava petona e raraukarei. Tuaruta marana i ġetai.”

*Pei aburuoina ana awanaina*

(Matthew 13:31-32, 34; Luke 13:18-19)

<sup>30</sup> Iesu i riwa i pa, “God ana vigulau aiwaiei ana parivai-patepatei bo aiwai awanainei ana pariveremi? <sup>31</sup> Wenanare, wei aina peina, lamna me gaga peina, pei aburuoina au dobu ma au doa i paewi. <sup>32</sup> Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

<sup>33</sup> Ma Iesu, awanaina maġamaġai, rava au matai i raugugulei da tau ai rau-taniġana ana au ruva nanare. <sup>34</sup> Awanainei, rava awari i giugiu, wate ana tauvotaġotaġo ava awari kaua anatapui i vivieġai.

*Iesu, kojikojira i ravi-daumorai*

(Matthew 8:23-27; Luke 8:22-25)

<sup>35</sup> Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.” <sup>36</sup> Anina ma tau patara i voterei. Ma anatapui Iesu, maiteni au waga i geru ma i damana, waga ġelau maiteni. <sup>37-38</sup> Iesu, waga au murina unutama i terei ma i raunuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

<sup>39</sup> Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ġaeġaena i matave. <sup>40</sup> Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġana!”

<sup>41</sup> Ma tau i rovo kaua ma i riwa vivira i pa, “Wei aiai ravana da ive ma rabama tauna e vovoteletelei?”

## 5

*Iesu, arua-apoapoena oroto awarina i viaġaġana-opunei.*

*(Matthew 8:28-34; Luke 8:26-39)*

<sup>1</sup> Iesu ana tauvotaġotaġo maiteni Galili topana au baba ġelauna i ġeta, mai Gerasa ai au dobu. <sup>2</sup> Wei au dobuna, arua-apoapoena oroto au orana maemaena. <sup>3-5</sup> Eġa aiai tagotagogina da ita vovaiubai. Mara maġamaġauna, aena ma urana seinei i pani. Wate wei i viaituituini, ma eġa tagotagogina da seinei ita pani. Marai ma waguvarai i nene-labalababa ma i garagarara ma ġaimei tupuana i boribori-melei ma au kokoaga ma au ola i raunuma. <sup>6</sup> Maranai Iesu wagei i opuopu, arua-apoapoei orotona i ruiruinia, aueia Iesu i 'nanai ma kokoagei i ruba ma Iesu au naona i mae-peu ma i raudune. <sup>7-8</sup> Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ġoeġoei? God wavanei a vivibaġaim da eġa ma kovoġiu!” <sup>9</sup> Iesu, orotona i vitara-virevirei i pa, “Tam wavam aiai?”

I paribelei i pa, “Tauai a maġa, aubaina tau wavau lamna Ġavia Patarana.”

<sup>10</sup> Ma arua-apoapoei, Iesu i vibaġa-guratei da avena nai dobunei ita viopuna-tawanei.

<sup>11</sup> Ma poro boruna ġaeġaena au ġereġere ola au adana i labalaba. <sup>12</sup> Ma arua-apoapoei, Iesu i vibaġai, “Ma paritawanelai poro au orai ana rui.” <sup>13</sup> Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ġaira da au topa i monu.

<sup>14</sup> Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua. <sup>15</sup> Ma maranai i nae Iesu awarina, orotona au naona arua-apoapoei patarai au orana i mamae; tauna i kiakiala, gara i oteni ma ana nota jijimanina. Ma tau i rovo kaua. <sup>16</sup> Ma aiwai i tupua orotona ma poro awari, tau i 'nainanaia, rava i riwana-naiei.

<sup>17</sup> Ma dobuna ravai, Iesu i vibaġai da dobuna ita oputawaneii.

<sup>18</sup> Iesu au waga i gerugeru ma orotona, Iesu i vibaġai i pa, “Tau maiteni tana nae.”

<sup>19</sup> Iesu i viġaei ma i riwei i pa, “Ma naeme am au dam. Ma BADA kaua aiwai ġaeġaena i kaukaueia ma ana iviaiai tam awarim, tau ma pariveri.”

<sup>20</sup> Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma tau i anatapui i nononoria i baiei.

*Iesu, Jairus natuna wavinena ma wavine doridaiana i vilawani.*

*(Matthew 9:18-26; Luke 8:40-56)*

<sup>21</sup> Iesu wagei i damana me topa au baba ġelauna. Maranai kampa i ġeta ma topa au adana, ma patara i rieiai. <sup>22</sup> Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu <sup>23</sup> ma i vibaġa-guratei i pa, “Natu guguinina e irairage. Ma nei ma uram au inina ma terei ma ina lawana.”

<sup>24</sup> Anina ma Jairus, Iesu maiteni i nae ma patarana i mae gariġuruvi ma i votaġotaġoi.

<sup>25</sup> Wavine tagogi kampa patarana au orana awarina tara-doriana i mae da madeġa 12 i kwa. <sup>26</sup> Ana mane anataputapuna, dokedoketa maġamaġau awarii i tawanei ma eġa tagotagogina ita vilawani ma amapo da ana doria i rarata. <sup>27-28</sup> Tauna, Iesu nolana ma ana babani i nonori ma au orana i vinua-notanota i pa, “Mepa da ana gara ava ana vodadani ma ana lawana.” Ma tauna, Iesu murinei i nei ma ana gara i vodadani. <sup>29</sup> Maratagogi, tara-doriana i wanatuini ma malana i vaia da i lawana. <sup>30</sup> Nai maranaina, Iesu malana i vaia da ana rewapana i opu-tawanei ma i mae-tavirei patara au poui ma i riwa i pa, “Aiai au gara i vodadani?”

<sup>31</sup> Ana tauvotaġotaġo, tauna i riwei, “Ma inanai, patara i mae gariġuruvim! Ma menanare da u riwa ‘Aiai i vodadani?’”

<sup>32</sup> Wate Iesu i 'nana viravira da ita inanai aiai i vodadani. <sup>33</sup> Wavine i rovo kaua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i viegei. <sup>34</sup> Anina ma Iesu, wavine i riwei i pa, "Natu, am tumaḡana i vilawanim. Am doria i kwa, ana nuaubam ma nae!"

<sup>35</sup> Maranai i bababani ma rava ḡelau i Jairus ana numei i nei ma i riwei i pa, "Natum ana mara i kwa. Eḡa Taugiu ma visina-viravirai."

<sup>36</sup> Iesu ai babani i nonora-tawanei ma Jairus i riwei i pa, "Eḡa ma rovo, ma vitumaḡana!" <sup>37</sup> Iesu, rava ḡelau i viḡaei ma Peter ma James ma ana tevera John maiteni i nae. <sup>38</sup> Ma Jairus ana au numa i ḡeta ma Iesu, patara i 'nanai; i toutou ma i taratarakwatu <sup>39</sup> ma i rui ma tau i riwei i pa, "Aiwai aubaina o taratara-kwatu ma o toutou? Tevera eḡa ita irage, tauna e matamatave ota."

<sup>40</sup> Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaḡotaḡo tonuḡa maiteni i rui mepa tevera i matamatave lana. <sup>41</sup> Iesu, tevera nimana i vaia ma i riwei i pa, "*Talitha koum!*" wei anona, "Kukuma, ma vomairi!"

<sup>42</sup> Maratagogi i vomairi ma babara i vikarei (Tauna ana madeḡa 12). Ma tau i ba kaua. <sup>43</sup> Iesu, tau i riwana-guratei da eḡa aiai ita viegei ma i riwa da ita viambagibagi.

## 6

### *Mai Nasaret, Iesu i parivirevirei*

<sup>1</sup> Iesu ana tauvotaḡotaḡo maiteni nai dobuna i netawanei ma i naeme ana au melagai. <sup>2</sup> Ma Sabat marana i ḡeta ma tauna giu i vikarei au pari numana. Ma rava maḡamaḡau i riei da i rautaniḡanei. Tau i anatapui i baiei ma i vitara-viravira vivira i pa, "Wei tauna nuaulaula ma aramanana mepa i vaia?" Ma, "Kaua aiwaiei e kaukauei?" <sup>3</sup> Anina ma tau i ava i babani vivira i pa, "Tauna tauvoa. Mary ana natuevou ma varevarena James, Joses, Judas ma Simon ma novunovui weka e mamae tauna bo?" Ma lamna aubaina mai Nasaret, Iesu i parivirevirei.

<sup>4</sup> Iesu, tau i riwei i pa, "*Peroveta* dobu au ḡelau e vivivirei, wate ana au melagai, ana rava ma ana dam oina, eḡa ita vivivirei."

<sup>5-6</sup> Tauna i baiei da rava eḡa tauna ita vitumaḡanei. Ma eḡa tagotagogina da kaua vivirewapanai kampa ita kauei. Tauna urana, rava ruaḡa ota doridoriai au tepai i terei ma i vilawani. Ma muriai, melagai nununai au ḡereḡerei i viararamana nae.

### *Iesu ana Apasol i paritawanei da ita viararamana*

<sup>7</sup> Ma Iesu, tau i 12 i ḡoreiai ma ruaruagei ava i paritawanana-opunei ma rewapana i verei da arua-apoapoei ina viaḡaḡana-opunei. <sup>8</sup> Ma riwa bagibaginei i riwei i pa, "Ami au vaḡai, eḡa aiwai ona vaia anina jiḡona ava; eḡa lam, eḡa autu bo mane au urami. <sup>9</sup> Ae uma ona oteni ma eḡa kwama ḡelauna ona vaia." <sup>10</sup> Ma i riwei i pa, "Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei. <sup>11</sup> ✨Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai melagaina ona oputawanei ma aemi pokauna ona rauabuabui da ina aramanei da tau i ai wavu!"\*

<sup>12</sup> Ma tau i opu ma rava awari i raugugula ma i riwei i pa, "Taumi ami ḡo'apoapoei ona voterei ma ona mae-taviremi God awarina!" <sup>13</sup> Tau i, arua-apoapoei i viaḡaḡana-opunei. Ma rava doridoriai maḡamaḡau, olive oirana au kolai i buloi ma i vilawani.

### *John Taubabataito ana irage*

✨ **6:11:** Act 13:51      \* **6:11:** Wariaga mai Jew, tauvaḡai e nenememi au Israel. Tau i au aei pokau e rarauabuabui maranai Israel ana au parata e ḡeḡeta, lamna tau i orai e viaiaini. Ma Iesu ana tauvotaḡotaḡo wei i kauei da melagai ravai ina notai, "Tauvotaḡotaḡo e ririwa da tauta orata apoapoenā me tauta eḡa mai Jew."

14-16 ✨ Iesu nolana i nae da rava anapui i aramanei ma tauna i babaniei. Ma rava gēlauri i ririwa i pa, “Tauna, kua vivirewapanai e kaukauei, aubaina tauna John Taubabataito iragelei i vomairi me.” Gēlauri i ririwa i pa, “Tauna Elijah i nememei.” Ma gēlauri i ririwa i pa, “Tauna peroveta wariāgai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.” 17-20 John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana ḡiriḡiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma viraḡenana i ḡoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eḡa tagotagogina da aiwai ita kauēi.

21 Ma wavine, gavogavo i 'nanai, maranai Herod ana tupua marana i ḡeta ma torela i vokaukauei. Ma gabemani babadai ḡaeḡaei ma sorodia ai babada ḡaeḡaei ma Galili babadai i raukwatuei. 22 Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, “Aiwai u ḡoeḡoeia ma vibaḡaiu ma ana verem!” 23 Ma i parivainuaḡani i pa, “God au matana a ririwem da aiwai u vivibaḡeiu ana verem da au vigulau navanavana au paratana.”

24 Ma tevera wavinena i opu ma alona i paridadanei i pa, “Aiwai ana vibaḡei?”

Ma i paribelei i pa, “John Taubabataito kolana.”

25 Ma maratagogi i vipaparana ma gulau awarina i rui ma i vibaḡai i pa, “A ḡoeḡoei da marina John Taubabataito kolana ma vereu au aboma!” 26 Ma gulau nuanuana i bola-kauēi. Wate parivainuaḡana boiboḡi i kauēi tau i amam au matai. Ma lamna aubaina guguini, aiwai i vivibaḡei anina i vianinei. 27 Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini. 28 Ma kolana au aboma i terei ma guguini i verei ma guguini, alona i verei. 29 Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi*

*(Matthew 14:13-21; Luke 9:10-17; John 6:1-14)*

30 *Apasol* i ḡeta memei ma aiwai anapui i kaukauei ma i raraugugulei, Iesu i vieḡei. 31 Lamna maranai, rava maḡamaḡai i nenei ma i nenaē da Iesu ana tauvotaḡotaḡo maiteni eḡa gavogavo ita maemaē da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.” 32 Ma anapui wagei i nae au mutulua.

33 Wate rava maḡamaḡai i 'nanai i nenaē ma i aramanei tau aiavoi. Ma melagai nununai anapui geraei i ruba gogona da au dobuna i aiḡeta. 34 Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauēi. Tau me sipu ma eḡa ai tauvipaipai. Ma Riwana Aiaina viararamanai i raukarei. 35 Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere. 36 Rava ma paritawanei da ina nae au melagai ma au wapu au ḡereḡere da ai lam ina gimarai.”

37 Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*‡ tana vaia da wei patarana tana viambagibagi?” 38 Ma Iesu i paridadanei i pa, “Palawa biaḡa awarimi? Ona nae ma ona baiei!”

✨ 6:14-16: Mrk 8:28 † 6:14-16: Herod Antipas, Galili ana Wavalatona. ‡ 6:37: 200 denarii. Denarius tagogi lamna taubagibagi ai maia au pom tagogo nolana aubaina.

Maranai i nelaḡai ma i riwa i pa, “Awariai, palawa five ma iana ruaḡa.”

<sup>39</sup> Anina ma Iesu, patara i riwei i pa, “Boru nununai, gidagida au majimajiḡai ona kiala nae.” <sup>40</sup> Ma tau i ai au boru 50 da 100 nanare i kiala nae. <sup>41</sup> Ma Iesu, palawa five ma iana ruaḡa i vaia ma i ḡoutata au mara ma God i viegualauei. Ma palawa i vogimagimai ma iana i ḡutai da ana tauvotaḡotaḡo i verei ma tau i, rava i verei. <sup>42</sup> Ma patara i am ma i am-iaua. <sup>43</sup> Ma ana tauvotaḡotaḡo, lam am tereterenai i tuarui da poa muomuoi 12 i vioai. <sup>44</sup> Nelara 5,000 i viambagibagi.

*Iesu, waira au tepana i babara  
(Matthew 14:22-33; John 6:15-21)*

<sup>45</sup> Anina ma Iesu, ana tauvotaḡotaḡo i egari da ita aidamana au Bethsaida. § Tau i au waga i geru da i nena ma tauna, patara i paritawanei. <sup>46</sup> Patara i paritawanei ma tauna ava i ḡae au ola da ita raupari. <sup>47</sup> Ma waguvara ana tauvotaḡotaḡo au waga au topa ma Iesu au alala. <sup>48</sup> Ma ana tauvotaḡotaḡo, lare i vovoguratei da ita ḡota wate ive i viraumatamatani. Ma maratomtomo nanare, Iesu i nae awari. Tauna waira au tepana i bababara ma i ḡoei da tau i ita tutelarei. <sup>49-50</sup> Ma maranai tau i, Iesu i 'nanai topa au tepana i bababara ma i notai da tauna konaḡa ma i rovo kaukua ma i vigaragararei. Ma maratagogi Iesu i riwa i pa, “Tepami ina tora! Tau, eḡa ona rovo!”

<sup>51</sup> Ma au waga i geru ma ive i wanatuini ma tau i i bana-kauei. <sup>52</sup> Avena da kua palawa awarina i kauei i 'nanai, wate ana rewapana eḡa ita aramana-kauei. Tau i orai i bado ma i vinuanaina.

*Iesu, rava doridoriai maḡamaḡau i au Genesaret i vilawani  
(Matthew 14:34-36)*

<sup>53</sup> Tau i, topa i damani ma au Genesaret i ḡota ma ai waga i raḡini. <sup>54</sup> Tau i, waga i oputawanei ma rava, Iesu i 'nanai ma maratagogi i aramanei da tauna. <sup>55</sup> Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasiei i vivaneiai. <sup>56</sup> Iesu mepa i nenelana, melagai ḡaeḡaei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibaḡa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

## 7

*Amamami ai giu  
(Matthew 15:1-9)*

<sup>1-4</sup> Pharisi ma Jew anatapui, magumagura ai giu maḡamaḡau e notanota-jijini. Tau i, ai aniuma ma ai aniam anatapui e oḡaoḡai lamnei tau i e viaiaina-melei God au matana. Ma maranai au maket da e nenei, urai ina oḡai ma ina am. Tau i eḡa ina am da au naona urai ina oḡa kauei me ai magumagura ai giu nanare.

Maratagogi Pharisi ḡelau ma Tarawatu Babadai, Jerusalem ei i nei Iesu awarina da ita rautaniḡanei. Ma tau i i 'nanai da Iesu ana tauvotaḡotaḡo ḡelau, urai eḡa ita oḡai ma i amam.

<sup>5</sup> Ma tau i, Iesu i vitara-virevirei i pa, “Aiwai aubaina am Tauvotaḡotaḡo magumagura ai giu, eḡa ita votaḡotaḡoi ma ana ura miramirai e amam?”

<sup>6</sup> Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kua maranai i riwa, i pa:

‘Wei ravai ipiriei e vovoepaepai,  
wate nuanuai aueia.

<sup>7</sup> Tau i rava ai giu e viviararamani.

Lamna aubaina ai voepaepa anona eḡa.’

*(Isaiah 29:13)*

§ 6:45: Eng. Bethsaida.



<sup>8</sup> Taumi, God ana Tarawatu o teretere-tawanei ma ami giu o votaḡotaḡoi.”

<sup>9</sup> Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotaḡotaḡoi. <sup>10</sup> ✨ God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona viraḡeni.* <sup>11</sup> Wate taumi o viararamana da aiai awarina mane bo purapura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’ <sup>12</sup> Wei viararamanana, tau i e vivigaei da amana ma alona ina voagui. <sup>13</sup> Ma wei taunei viararamana, rava awari o vividamani; ma God riwana o vivikwakwavi. Ma kaua maḡamaḡau i ḡelau i maiteni o kaukauei.”

*Metauna kauai, rava orai e vivimirai.*  
(*Matthew 15:10-20*)

<sup>14</sup> Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei. <sup>15-16</sup> Aiwai au tano i au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”\*

<sup>17</sup> Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai. <sup>18-19</sup> Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapu i viaiaini).

<sup>20</sup> Anina ma i riwa i pa, “Aiwai, rava oranei e opuopu; lamna, rava e vivimirai God au matana. <sup>21</sup> Anina rava nuanuanei vinuanotanota apoapoei e opuopu me: viawawana labalababa, danene, viraḡena, awadanene, <sup>22</sup> ambo, rau-iviapoapoe, moru, erawa, unura, terevaideḡa, mae-ḡaeḡae ma opa. <sup>23</sup> Wei kauai apoapoei anatapui oranei e opuopu ma rava e vimiramirai.”

*Jentail wavine, † Iesu i vitumaḡane*  
(*Matthew 15:21-28*)

<sup>24</sup> Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa. <sup>25-26</sup> Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoenā, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoenā ita viopuni. <sup>27</sup> Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

<sup>28</sup> Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepaḡepa au gabaurina e rauraua e aniani.”

<sup>29</sup> Ma Iesu wei i riwei i pa, “U paribelana kaua, aubaina ma nae au numa. Arua-apoapoenā natum i opu-tawanei.”

<sup>30</sup> Ma wavine i naeme au numa. Natuna wavinena i ’nanai i matamatave, arua-apoapoenā boiboḡi tevera i opu-tawanei.

*Iesu, oroto taniḡa-potapotana ma mena birebirena i vilawani*

<sup>31</sup> Iesu Taia ma Sidon ana parata i netawanei ma au babaḡela Dekapolis i verautuini ma i nae au Galili topana. <sup>32</sup> Orotō taniḡana potapotana ma menana birebirena i neiāi Iesu awarina ma i vibaḡai da urana au inina ita terei da ita vilawani. <sup>33</sup> Iesu, oroto i taravainā-opune i da tau i ava ma ura-gigina, oroto au taniḡana i terei ma ura-gigina ḡelauna i ovai ma menana i vodadani. <sup>34</sup> Nuanuana i bolai ma i ḡoutata au mara; i lavutu tawanana ma oroto

✨ **7:10:** Exo 20:12; Exo 21:17 \* **7:15-16:** Giruma ḡelau i Mark uranei i girugirumia wei riwai wenanare e mamae, “Mepa da taniḡami e mamae, ona rautaniḡana.” † **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Tau i e notanotai da tau i ai guratana eḡa me rava ḡelau. Lamna aubaina tau i dobu ḡelau ravai e ḡoreḡorei auou.

i riwei i pa, “*Ephatha!*” Wei anona, “Ma wanatawanei!” <sup>35</sup> Maratagogi taniġana i wanatawanei ma menana i vidagudagu ma i babani kaua. <sup>36</sup> Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau eġa ita rautaniġana ma riwa i vituai. <sup>37</sup> Ma maranai ravai wei i nonori, tau i bana-kauai ma i riwa i pa, “Aiwai anapui i kauana-kauai. Tauna, rava taniġa potapotai e vivilawani da e rarautaniġana ma menabirebirei e bababani.”

## 8

*Iesu, rava 4,000 i viambagibagi*  
(*Matthew 15:32-39*)

<sup>1</sup> Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa, <sup>2</sup> “Au pom tonuġa patara maiteni a mae ma ai lam eġa ma a rau-nuapopoelei. <sup>3</sup> Tau i ġelau, uamei i nei. Mepa da ana am-iraġe ana paritawanei ai au numa, ma au etanai ina raumolaġau.”

<sup>4</sup> Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

<sup>5</sup> Ma Iesu, tau i paridadanei i pa, “Awarimi palawa biaġa?”

Tau i riwa i pa, “seven.”

<sup>6</sup> Ma Iesu, patara i riwei da au doa i kiala. Ma palawa seven i vaia ma God i viegualauei ma i vogimagimai ma ana tauvotaġotaġo i verei da patara i verei. <sup>7</sup> Ma tau awari, iana muomuoi ruaġa ota. Iesu i vaia; God i viegualauei ma ana tauvotaġotaġo i verei da patara i verei. <sup>8</sup> Tau anapui i am da i am-iaua. Ma lam am tereterenai i tuarui da poa ġaeġaei seven i vioai. <sup>9</sup> Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaġei*  
(*Matthew 15:39-16:4*)

<sup>10</sup> Maratagogi, Iesu ana tauvotaġotaġo maiteni au waga i geru ma i nae Damanuta ana au parata. <sup>11</sup> Pharisi ġelau i nei ma viparipariġai i vikarei Iesu maiteni. Tau i ġoei da Iesu ita raudadani da mataira Godei ita viatataiei. <sup>12</sup> Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e ġoeġoei? A ririwana-kauemi, amapo mataira eġa ona inanai.”

*Iesu, ana tauvotaġotaġo I parivainotai*

<sup>13</sup> Anina ma Iesu, patara i netawanei ma ana tauvotaġotaġo maiteni au waga i geru me ma i damana Topa Galili au baba ġelauna. <sup>14</sup> Ma ana tauvotaġotaġo, nuanuai i vuru da ai palawa ita vaia ma palawa tagogi ava au waga i mamae. <sup>15</sup> Iesu, tau I parivainotai i pa, “Pharisi ma Herod ai giu ma ai viararamana morumoruna ona inana-kauai! Lamna me yist.\*”

<sup>16</sup> Ma tau i babani vivira i pa, “Tauta eġa ata palawa aubaina da e ririweta.”

<sup>17</sup> Ma Iesu i aramanei ma tau i riwei, “Aiwai aubaina o bababani da taumi awarimi eġa palawa? Taumi amapo da eġa ota aramana ma o vivinuanaina? Orami i bado bo?”

<sup>18</sup> ✨Matami e mamae ma eġa ota inainana. Ma taniġami e mamae ma eġa ota nonora. Ma o vinuanotanota bo eġa? <sup>19</sup> Maranai palawa five a vogimagimai rava 5,000 aubai, lam am tereterenai o tami da poa biaġa o vioai?”

Tau i paribelei, “Twelve.”

<sup>20</sup> “Ma maranai palawa seven a vogimagimai rava 4,000 aubai, lam am tereterenai o tami da poa ġaeġaei biaġa o vioai?”

Tau i paribelei, “Seven.” <sup>21</sup> Ma tau i riwei i pa, “Ma amapo da o vivinuanaina!”

\* **8:15:** Yist mai Jew awarri awanaini lamna aiwai da apoapoe, mira bova e vivitua bo e vivimaġai. Weka Iesu mai Pharisee ma mai Herod ai lawana ma ai giu morumorui e babanai, da eġa ina tua. ✨ **8:18:** Mrk 4:12

*Iesu, oroto mata apoapoena i vilawani au Bethsaida*

<sup>22</sup> Tau i nei au Bethsaida ma rava ḡelau, oroto matana apoapoena i neiai Iesu awarina ma i vibaḡa-guratei da ita vodadani. <sup>23</sup> Ma Iesu, oroto matana apoapoena i raunimavoai ma melagaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eḡa?”

<sup>24</sup> Ma i taepai ma i riwa, “Rava a inainanai ma tau i me ai ita bababara.”

<sup>25</sup> Iesu, urana i tere-melei oroto au matana. Ma matana i wanatawanei da aiwai anata-puna i 'nana-kauei. <sup>26</sup> Iesu, tauna i paritawanei ana au numa ma i riwei, “Eḡa ma nae au melagai! Wate jijimanina ma nae au numa.”

*Peter i riwa da Iesu, tauna Keriso*  
(*Matthew 16:13-16; Luke 9:18-20*)

<sup>27</sup> Iesu, ana tauvotaḡotaḡo maiteni i nae melagaii Caesarea Philipai au ḡereḡerei. Maranai i nene ma Iesu, tau i paridadanei, “Rava e ririwa; tau aiai?”

<sup>28</sup> ✨Ma tau i paribelei, “Ḡelau e ririwa da tam, John Taubabataito. Ma ḡelau Elijah. Ma ḡelau e ririwa da peroveta wariḡana tagogi.”

<sup>29</sup> Ma Iesu, tau i paridadanei, “Wate taumi, mena o notanota-nei? O ririwa da tau aiai?”

Peter i paribelei, “Tam God ana *Messiah* - anona Keriso.”

<sup>30</sup> Iesu, tau i viḡaei da eḡa aiai ina riwei da tauna aiai.

*Iesu ana iraḡe ma ana vomairi me i babaniei*  
(*Matthew 16:21-23; Luke 9:21*)

<sup>31</sup> Ma Iesu i raukarei da ana tauvotaḡotaḡo i giuni i pa, “Rava Natuna ina vinuapoapoe kaua. Ma dogadogara, pirisi babadai ma tarawatu babadai, tauna ina pari-geduaiei ma ina viraḡeni. Ma au pom tonuḡa au murina ina vomairi me.” <sup>32</sup> Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei. <sup>33</sup> Wate Iesu i mae-tavirei ma ana tauvotaḡotaḡo i 'nanai. Ma Peter i eni, i pa, “Satan ma nae au muriu! Tam am nota eḡa Godei ita nenei, eḡa da ravei.”

*Iesu votaḡotaḡona anona*  
(*Matthew 16:24-28; Luke 9:23-27*)

<sup>34</sup> Ma Iesu, patara ma ana tauvotaḡotaḡo i raukwatuei ma i riwei, “Mepa da aiai ita votaḡotaḡoiu. Tauna ina boviana-melei ma ana korosi ina avarai ma ina votaḡotaḡoiu.† <sup>35</sup> Aiai ana lawana e tatajijini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimelai. <sup>36</sup> Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai. <sup>37</sup> Wate aiwaiei am lawana ma gimara-melei. <sup>38</sup> Mepa da aiai: tau ma au viararamana ina vinimalei; ma i mae-puputeu; ma ana ḡoanei kaua apoapoe ina kaukauei. Rava Natuna, tauna ina vinimalei maranaina ina nememei; Amana ana au boruma anela vivivirei maiteni.”

## 9

<sup>1</sup> Ma Iesu, wenanare i riwei, “Taumi a ririwana-kauemi; rava ḡelaumi weka o maimairi amapo eḡa ona iraḡe da God ana vigulau ona inana ana rewapanana ina nei.”

*Iesu inanana i virai*  
(*Matthew 17:1-13; Luke 9:28-36*)

<sup>2</sup> Au pom six muriai, Iesu, Peter, James ma John i taravaini. Ma tau i ava i ḡae ola ḡaeḡaena au tepana. Ma kampa tau i matai, Iesu inanana i virai. <sup>3</sup> Ana gara i arapora ma gamrina i vimata-kamokamota; eḡa me aiwai ḡelauna au dobu nanare. <sup>4</sup> Ma kampa

✨ **8:28:** Mrk 6:14-15 † **8:34:** Wei lamna awanaina. Anona lamna Iesu ana tauvotaḡotaḡo anina vinimala ma apoapoei ina nelaḡai aubaina tau, tauna i votaḡotaḡoi. Tauna eḡa ita ririwa da ana tauvotaḡotaḡo au korosi ina iraḡe me tauna.

au matai, Elijah ma Moses i eġa. Ma Iesu maiteni i bababani. <sup>5</sup> Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!” <sup>6</sup> Ma tau i rovo kaua ma Peter eġa ita aramanei da aiwai i latolatoni.

<sup>7</sup> ✧ Anina ma apau i eġa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniġanei!” <sup>8</sup> Maratagogi tau i ’nana viravira ma eġa ai ġelauna ita inanai ma Iesu, tauna ava.

<sup>9</sup> Ma maranai olei i ġaiġairai ma Iesu, tau i viġaei da aiwai i ’nananaia eġa ina vieġai da au naona Rava Natuna iraġelei ina vomairi me.

<sup>10</sup> Ma tau, wei riwana i voteletelei ma i babani vivira i pa, “Iraġelei vomairi me anona aiwai?” <sup>11</sup> Ma tau, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”\*

<sup>12</sup> Iesu i paribelei, “Riwa kaua Elijah au naona ina nei da aiwai anatapuna ina vokaukauei. Aubaina wariaġa i girumi da Rava Natuna ina vinuapoapoe kaua ma ina inana-geduaiei. <sup>13</sup> Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni  
(Matthew 17:14-21; Luke 9:37-43a)*

<sup>14</sup> Iesu ana tauvotaġotaġo tonuġa maiteni olei i ġaira memei ai rava awari ma patara ġaeġaena, tau i gariġuruvi. Ma Jew ai tarawatu babadai, tau maiteni i vivitarapiri.

<sup>15</sup> Maranai patara, Iesu i ’nanai. Tau orai i auepai ma awarina i ruba ma i viegualauei.

<sup>16</sup> Iesu, tau i vitara-virevirei, “Aiwai o vitarapiriei?”

<sup>17</sup> Orototagogi patara au poui i paribelana, “Tauviararamana, arua-apoapoena natu orotona au orana e mamae ma i kauei da eġa ita bababani, lamna aubaina a neiai awarim.

<sup>18</sup> Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ġiriġiriei; ma inina e badobado. Am tauvotaġotaġo a vibaġai da arua-apoapoena ita viopuni, wate eġa tagotagogina da ita kauei.”

<sup>19</sup> Ma Iesu i paribelei, “Oo mara aiwai ona vitumaġana! Ta mae ġaġa ma ami vita ana ’vara ġaġalei? Tevera awariu ona neiai!”

<sup>20</sup> Ma tevera i neiai Iesu awarina. Ma maranai arua-apoapoena, Iesu i ’nanai, maratagogi tevera i viaikwajiana-guratei da au doa i tonei ma i vitatauvira ma i vivipuropuro. <sup>21</sup> Iesu, tevera amana i vitara-virevirei, “Wei teverana ana doria mara aiwai i vikarei?”

I paribelei i pa, “Maranai aburunai. <sup>22</sup> Arua-apoapoena mara au anatapuna, tauna ai au araratana ma au wairae tawatawanei ma i ġoei da ita viraġeni. Mepa da tam tagotagogina; ma raunu’apoapoelelai ma ma voaguiiai!”

<sup>23</sup> Iesu, tauna i riwei, “Menanare da u riwa, ‘Mepa da tam tagotagogina?’ Aiai ravana e vivitumaġana, God anatapuna ina kauei tauna aubaina.”

<sup>24</sup> Maratagogi tevera amana i garara, “A vitumaġana, wate au tumaġana eġa ita rata ma ma voaguii da ina rata!”

<sup>25</sup> Iesu i ’nana da patara i rierieiai awarii ma lamna aubaina arua-apoapoena i egari i pa, “Tam arua taniġa-potapotana ma gungum. Tau a egaegarim da tevera ma opu-tawanei. Ma eġa melanai au orana ma rui me!”

<sup>26</sup> Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maġamaġgai kampa i riwa, “Tauna i’raġe!” <sup>27</sup> Ma Iesu, tauna urana i vojijini ma i sinaepai da i mairi.

✧ 9:7: Mrk 1:11 \* 9:11: Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma tau eġa ita notai da Elijah rau-iviapoapoe ina nelaġai ana au nememei. † 9:13: Iesu lamna John Taubabataito i bababaniei da tauna Elijah (Mat 11:13-14, 17:10-13)

<sup>28</sup> Muriai Iesu, ana tauvotaḡotaḡo maiteni i rui au numa. Ma maranai tau i ava ma i paridadanei i pa, “Aiwai aubaina tauai eḡa tagotagogina da arua-apoapoenā ata viopuni?”

<sup>29</sup> Iesu, i riwa, “Arua-apoapoei me wenanare, pari ainelana ina viopuni.”

*Iesu ana iraḡe i babaniana-melei*  
(Matthew 17:22-23; Luke 9:43b-45)

<sup>30</sup> Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramane i da tau i mepa. <sup>31</sup> Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i au urai. Ma tau i ina viraḡeni. Wate au pom tonuḡa au murina ina vomairi me.”

<sup>32</sup> Wate tau i eḡa ita aramane i tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara*  
(Matthew 18:1-5; Luke 9:46-48)

<sup>33</sup> Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanai aiwai o vitarapiriei?”

<sup>34</sup> Wate tau i genuana, aubaina au etanai tau i vitarapiri vivira da aiai i ḡetelara. <sup>35</sup> ✧ Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

<sup>36</sup> Ma Iesu, tevera i vaia ma au pou i vimairini. Ma urana au jiḡona i tere-taḡonei. Ma tau i riwei i pa, <sup>37</sup> “Aiai ravana; tau wavau, tevera wenanare i rauḡorei. Lamna tau maiteni e rarauḡorei. Ma aiai da tau e rarauḡorei. Lamna tauparitawaneu maiteni e rarauḡorei.”

*Aiai eḡa ata ḡavia, lamna turata*  
(Luke 9:49-50)

<sup>38</sup> Anina ma John, Iesu i riwei, “Tauviararamana! Tauai, oroto tagogi a inanai; tam wavamei arua-apoapoenā i viviopuni ma tauna eḡa turata. Lamna aubaina a viḡaei da eḡa ina kauana-melei.”

<sup>39</sup> Iesu i riwa, “Eḡa ona viḡaei! Eḡa aiai au wavau kaua babai ina kauē ma muriai ina parivai-apoapoeniu. <sup>40</sup> Aiai ravana eḡa ata ḡavia; lamna turata. <sup>41</sup> Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau i ai maia eḡa ina vine-boai.”

*Rauelara babanina*  
(Matthew 18:6-9; Luke 17:1-2)

<sup>42</sup> Aiai ravana i kauē da wei teverana ana tumaḡana Tau awariu i viapoapoeni da ḡo’apoapoe i kauē. Lamna i ai da ḡaima ḡaeḡaena ravana au uatabana ina duri ma au boga ina tawane i aubaina God, tauna ina kovoḡa-guratei. <sup>43-44</sup> Mepa da nimam i kauem da ḡo’apoapoe u kauē. Ma bori-tawane i! I aii da nimam tagogiava ma lawana mamae-nonoana ma vaia. Ma eḡa ma kauē da nimam ruaḡa aiaii ma ma nae ai au menamenana; mepa ai eḡa melanai ita bobo. ‡ <sup>45-46</sup> Mepa da aem i kauem da ḡo’apoapoenā u kauē. Ma bori-tawane i! I aii da sigesigem au lawana mamae-nonoana ma rui. Eḡa me aem ruaḡa aiaii ma ai au menamenana ina tawanem. § <sup>47</sup> Ma mepa da matam ina kauem da ḡo’apoapoenā u kauē. Ma vaitawane i! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem; <sup>48</sup> dobuna motamotana eḡa ita irairaḡe ma ai eḡa ita bobo.

<sup>49</sup> Au Tauvotaḡotaḡo anaputapui, ai araratane i ina bogai.

<sup>50</sup> “Nia i ai lam viaiainana aubaina. Ma mepa da i tomatoma, mena ma vidagiane i. Nia au orami ina mae ma ona viturana vivira!”

✧ 9:35: Mrk 10:43-44 ‡ 9:43-44: Wariḡa nimaiei i giruma damane i tau i riwana tagogina me vs 48. § 9:45-46: Wariḡa nimaiei i giruma damane i tau i riwana tagogina me vs 48.

## 10

*Iesu, tavine vilamonana i babaniei*

<sup>1</sup> Ma Iesu, dobuna i netawanei ma i nae Judea ana paratana. Ma Waira Jordan i damani da au baba ġelauna. Patara ġaeġaena i riana-melei. Ma Iesu i viararamana, me mara patapatana i kaukauei nanare.

<sup>2</sup> Ma Pharisi ġelau i ġoei da tauna ita waroi. Ma lamna aubaina i vitara-virevirei, “Tarawatu e mamae bo eġa da rava, awana maiteni ita vilamonei?”

<sup>3</sup> Ma Iesu i paribelei, “Moses ana Tarawatu aiwai e ririwei?”

<sup>4</sup> Ma tau i riwa, “Moses ana Tarawatu e ririwa da oroto *vilamona pepana ina girumi ma awana ina verei. Ma tau i vilamonei.*”

<sup>5</sup> Iesu i paribelei, “Taumi orami i bada. Au baina Moses wei Tarawatuna i terei. <sup>6</sup> ✠Wate ona notai da au karena, maranai God rava i kauei *ma tauna oroto ma wavine i kauei.* <sup>7</sup> ✠Ma lamna aubaina oroto amana ma alona ina netawanei <sup>8</sup> *ma awana maiteni ina vitagogi da tau i eġa ruaġa me au naona ma tupua tagogi.* <sup>9</sup> God aiwai i vitagogiei, eġa aiai ina vilamonei.”

<sup>10</sup> Maranai tau i naeme au numa, ma tauvotaġotaġo, Iesu i vitara-virevirei wei kauai aubaii. <sup>11</sup> Iesu i paribelei, “Mepa da oroto, awana i voterei. Ma wavine ġelauna i ravaġi. Lamna tauna, awana awarina i rauiviapoapoe. <sup>12</sup> Ma nanarena mepa da wavine, awana i voterei ma oroto ġelauna i ravaġi. Lamna awana, awarina i rauiviapoapoe.”

*Iesu, roaroa i viaiaini*

<sup>13</sup> Rava ġelau, roaroa i neiai Iesu awarina da urana au tepai ita terei. Ma ana tauvotaġotaġo, ravai i viġaei. <sup>14</sup> Maranai Iesu wei kauai i 'nanai. Ma ana tauvotaġotaġo i eni ma i riwa, “Roaroa ona voterei da awariu ina nei. Ma eġa ona viġaei. Au baina God ana vigulau, lamna rava wenanare aubai me wei roaroai. <sup>15</sup> A ririwana-kauemi. Aiai, God ana vigulau eġa ina vaia me tevera aburuna nanare. Tauna, eġa God ana au vigulau ina rui.” <sup>16</sup> Ma roaroa i taravaini ma i rapai, urana au tepai i terei, i raupari ma i viaiaini.

*Purapura ravana*

*(Matthew 19:16-30; Luke 18:18-30)*

<sup>17</sup> Ma maranai Iesu i vomairi da i nena. Orotu i ruba ġeta ma au naona i raudune ma i riwa i pa, “Taugiu vinualaulaunam. Aiwai ana kauei da lawana maemae-nonoana ana vibuderiei?”

<sup>18</sup> Ma Iesu i paribelei i pa, “Aiwai aubaina, tau u vikaua vinualaulauneu? God, tauna ava vinualaulaunana. <sup>19</sup> ✠Tam, God ana Tarawatu u aramanei, *Eġa ma viraġena! Eġa ma awadanene! Eġa ma danene! Eġa ma viwavu-moru! Eġa ma amkwalakwala! Amam ma Alom ma vivirei!*”

<sup>20</sup> Ma tauna i riwei, “Taugiu! Maranai tau aburueu da amadodo, wei tarawatui anatapui a voteletelei.”

<sup>21</sup> Iesu, tauna i 'nanai ma i vinuavainei ma i riwei, “Kaua tagogi e mamae eġa uta kaukauei. Ma nae ma am purapura anatapuna ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaġotaġoiu!”

<sup>22</sup> Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

<sup>23</sup> Iesu i 'nana viravira ma ana tauvotaġotaġo awari i riwa, “I piripiri kaua da purapura ravana, God ana au vigulau ina rui.”

<sup>24</sup> Tauvotaġotaġo riwana i baiei maranai Iesu wenanare i babani. Ma Iesu i riwa me, “Natunatu! I piripiri kaua da purapura ravana,\* God ana au vigulau ina rui. <sup>25</sup> I telatela kaua da ġamoġamo ġaeġaena wavana kamel, iġoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei.”

✠ **10:6:** Gen 1:27 ✠ **10:7:** Gen 2:24 ✠ **10:19:** Exo 20:13; Exo 20:14; Exo 20:15; Exo 20:16; Exo 20:12 \* **10:24:** Wei riwana buka ġelau awarii e mamae ma ġelau eġa purapura ravana.

<sup>26</sup> Tau i vinuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae-nonoana ina vaia?”†

<sup>27</sup> Iesu awarii i 'nana ma i riwei, “Rava awarii wei kauai i piripiri. Wate ega God awarina. God awarina aiwai anapuna i telatela kaua.”

<sup>28</sup> Ma Peter i riwei, “Ma tauai menanare? Tauai ai purapura a voterei ma tam a vota<sup>g</sup>oim.”‡

<sup>29</sup> Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina vota<sup>g</sup>ota<sup>g</sup>oiu; tau ma Riwana Aiaina aubaina. <sup>30</sup> Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anapui ina ma<sup>g</sup>a. Rava ina rau-iviapoapoelem; aubaina tam, tau au Tauvota<sup>g</sup>ota<sup>g</sup>o da mara au murina tauna lawana mamae-nonoana ina vaia. <sup>31</sup> Wate ma<sup>g</sup>ama<sup>g</sup>au marina e vivinao; tau i ina vimuri. Ma ma<sup>g</sup>ama<sup>g</sup>au da e vivimuri; ina vinao.”

*Iesu ana ira<sup>g</sup>e babanina i vitonui*

*(Matthew 20:17-19; Luke 18:31-33)*

<sup>32</sup> Iesu, ana tauvota<sup>g</sup>ota<sup>g</sup>o maiteni i ge<sup>g</sup>ae au Jerusalem. Iesu, tau i au naoi i nena. Tauvota<sup>g</sup>ota<sup>g</sup>o i baiei. Ma rava gelau i au muri i nenei i rovo kaua. § Ma tau i 12 i rau<sup>g</sup>orei au ririva ma i raukarei da kaua amapo da awarina ina tupua; tau i vie<sup>g</sup>ei <sup>33</sup> I pa, “Ona inana, tauta ta ge<sup>g</sup>ae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana ira<sup>g</sup>e ina vianinei. Ma Mai Jentail ina verei. <sup>34</sup> Ma tauna ina vijibo<sup>g</sup>i ma ina ovai ma ina kwapui ma ina vira<sup>g</sup>eni. Au pom vitonuina ina vomairi me.”

*James ma John ai viba<sup>g</sup>a*

*(Matthew 20:20-28)*

<sup>35</sup> - Zebedi natunatuna James ma John i nei Iesu awarina ma i viba<sup>g</sup>ai i pa, “Tauviararamana! Tauai ai goana a viba<sup>g</sup>ei uta kauai.”

<sup>36</sup> Iesu i riwa i pa, “Aiwai o goe<sup>g</sup>oei ana kauai aubaimi?”

<sup>37</sup> Tau i paribelana, “Ma verelai da ana kiala, tagogi au oiem ma gelauna au kelakelaum am au vigulau.”

<sup>38</sup> Iesu i paribelei, “Taumi ega ota aramanei aiwai o viba<sup>g</sup>ei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoiu?\*”

<sup>39</sup> I paribelei, “Tauai tagotagogina!”

Iesu i riwei, “Iniviara kelakana anina ona umai ma ona ira<sup>g</sup>e me tau ana ira<sup>g</sup>e. <sup>40</sup> Wate tau au rewapana ega ita mamae da ana veremi da mepa ona kiala au oieu bo au kelakelau. God, rava i vinevinei; tau i ai gabu i vokaukai.”

<sup>41</sup> Maranai Tauvota<sup>g</sup>ota<sup>g</sup>o 10 gelau, wei riwana i nonori. Tau i James ma John awarii i gaiawa. <sup>42</sup> Ma Iesu, tau i anapui i gorei da awarina ma i riwei, “O aramanei da jentail ai babada, dobu gela ravai jentail awarii e mamae-gae<sup>g</sup> ma e rarau-iviapoapoelei. Wate tau i ai babada gae<sup>g</sup>, ai rewapana i getelera da ai rava e vibadebadei da ai goana e kaukai. <sup>43</sup> ✨Wate au tauvota<sup>g</sup>ota<sup>g</sup>o ega nanare. Ega da aiai i goei da ina getelera taumi au poumi; tauna anina da ina vitaunola. <sup>44</sup> Aiai i goei da ita vinao. Tauna ina vitaunola rava anapui

† **10:26:** Mai Jew i notai da rava vipurapurai lamna BADA ana verena ana nuavaina matairana, tau i e notai da BADA, rava vipurapurai ega ina gagaloei, tauna ravai gelau maiteni ega ina gagaloei. ‡ **10:28:** Peter i goei da ita aramanei da tauvota<sup>g</sup>ota<sup>g</sup>o ai au ira<sup>g</sup>e maiana aiwai, ina vaia. § **10:32:** Iesu i ge<sup>g</sup>ae au Jerusalem ma rava ma<sup>g</sup>ama<sup>g</sup>au i vi<sup>g</sup>aviei ma lamna aubaina ana tauvota<sup>g</sup>ota<sup>g</sup>o i baiei da tauna tepana i tora da weka i nena. Rava gelau i vota<sup>g</sup>ota<sup>g</sup>o, tau i rovo kaua da aiwai awarina ina tupua maranai i geta au Jerusalem. \* **10:38:** ...babataito me tau ina babataitoiu tau i iniviara ma ira<sup>g</sup>e e bababaniei, maranai Iesu au Gethsemani i raraupari muriai da ana ira<sup>g</sup>e tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nela<sup>g</sup>ai. ✨ **10:43:** Mrk 9:35

aubai. <sup>45</sup> Ma nanare Rava Natuna eġa ita nei da tauna, tana nolei. Wate ita vitaunola rava aubaii. Ma ana lawana ita verenei da rava maġamaġau ai lawana ita gimara-melei.”†

*Iesu, rava mata-potapotana Batimeus i vilawani*  
(Luke 18:35-43)

<sup>46</sup> Ma tau i ġeta au Jeriko. Iesu, ana tauvotaġotaġo, patara ġaeġaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana. <sup>47</sup> Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapoeleu!”‡

<sup>48</sup> Rava maġamaġau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapoeleu!”

<sup>49</sup> Iesu i tumairi ma i pa, “Ona ġoreiai!”

Anina tau, mata-potapotana i ġoreiai i pa, “Tepam ina tora ma ma vomairi! E ġoreġorem!”

<sup>50</sup> Tauna, ana puru i tawanei ma i vomairi laġilaġina ma i nei Iesu awarina.

<sup>51</sup> Iesu i paridadana i pa, “Aiwai u ġoei ana kauai aubaim?”

Mata-potapotana i paribelei, “Taufiararamana! A ġoei da ana inana me.”

<sup>52</sup> Iesu i riwa, “Ma nae! Am tumaġana i vilawanim.” Maratagogi tauna i ’nana me ma Iesu au eta i votaġotaġoi.

## 11

*Iesu i rui au Jerusalem*  
(Matthew 21:1-11; Luke 19:28-40; John 12:12-19)

<sup>1</sup> Ma maranai Jerusalem i tuġereġerei ma i rui au Betphagi ma Bethani\* au ola Olives. Ma ana tauvotaġotaġo ruaga i paritawanei, <sup>2</sup> ma i riwei i pa, “Ona nae au melagai au naomi. Maranai o ruirui, kampa donki natuna ġaubo, raġiraġitana ona nelaġai. Tauna eġa aiai ita geru-dadanei. Ona rupeni ma ona neiai.† <sup>3</sup> Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ġoeġoei ma maratagogi ina paritawana-melei.”

<sup>4</sup> Ma i nae ma donki ġaubona au doa au metaeta raġiraġitana i rupeni. <sup>5</sup> Rava ġelau kampa i maimairi i paridadana i pa, “Aiwai o kaukauei donki ġaubona o ruperupeni?”

<sup>6</sup> Ma i paribelei me Iesu i ririweia nanare ma tau i voterei da i nae. <sup>7</sup> Tau donki i neiai Iesu awarina ma ai puru au uporana i tawana-epai ma au tepana Iesu i kiala. <sup>8</sup> Ma rava maġamaġau, ai puru au eta i ebani ma ġelau, ai rugurugu i tarataria i ebani. <sup>9</sup> Tau i vivinao ma tau i muri i nenei i garara:

“Hosanna!”‡

“Viviaiainana tauna BADA au wavana e nenei!”

<sup>10</sup> “Viviaiainana amata David ana vigulau e nenei!”

“Hosanna au aidamo telarana!”

<sup>11</sup> Iesu i ġeta au Jerusalem ma i rui au Tempol ma anatapuna i tuvirevirei ma au i biga aubaina, i opu me au Bethani, tau 12 maiteni.

*Iesu, damala aina i parivai-irairaġeni*  
(Matthew 21:18-19)

<sup>12</sup> Ma marana i tom, tau Bethani i opu-tawanei ma Iesu am-iraġe. <sup>13</sup> Au weia ma damala aina i ’nanai ana ruguruguna. Ma i nae da ita inana da i ua bo eġa. Maranai kampa

† **10:45:** Iesu i vinuapoapoe ma iraġe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaġa nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24) \* **11:1:** Eng. Bethphage & Bethani. † **11:2:** Mai Jew awari, donki lamna nola aubaina ma eġa gulau ana anigeru. Donki i gerui lamna e ririweta da tauna gulau ana nuaubana ma vilamolamonana i nei. ‡ **11:9:** Lamna pona Aram anona ma vilawaniai ma muriai lamna viegulau ma vimae-ġaeġaena aubaina.



i ġeta, eġa aiwai ita nelaġai. Anina ai ruguruguna ava, aubaina eġa damala ana mara. <sup>14</sup> Iesu, damala aina i riwei i pa, “Eġa aiwai amadodo ma amapo anom ina am-melei!” Ma ana tauvotaġotaġo i nonori aiwai i latoni.

*Iesu, taugimara tempolei i viaġaġana-opunei*  
(*Matthew 21:12-17; Luke 19:45-48; John 2:13-22*)

<sup>15</sup> Maranai tau i ġeta au Jerusalem, Iesu i rui Tempol garina au orana ma taugimara i viaġaġana-opunei, mane tauviraina§ ai kepakepa ma gabubu taugimareina ai anikiala i vitauvirai. <sup>16</sup> Ma i viġaei da eġa aiwai ana gimara Tempol au orana ita avarai-naiei. <sup>17</sup> ✧Ma rava i viararamani i pa, “I girugirumia nanare,

‘Au numa ina ġorei pari numana  
dam anatapui au dobu aubaii.’

Wate taumi o vovirai da kwalakwalai ai guba.”\*

<sup>18</sup> Pirisi Babadai ma tarawatu Babadai i nonori ma i ogei da ita viraġeni. Tau, Iesu i rovoei aubaina patara ana viararamana i baiei.

<sup>19</sup> Ma au bigai Iesu ana rava, Jerusalem i opu-tawanei.

*Damala aina i poi*  
(*Matthew 21:20-22*)

<sup>20</sup> Ma ubaubanai tau i nenaie ma damala aina i ’nanai anatapuna i poi. <sup>21</sup> Peter i notai ma i riwa “Tauvitararamana ma inana! Damala aina u parivai-irairaġenia i poi.”

<sup>22</sup> Iesu i paribelei, “God ona vitumaġanei! <sup>23</sup> A ririwana-kauemi. Rava wei olana ita riwei, ‘Ma vomairi ma au boga ma tawanem!’ Ma nuanuana eġa ina raġaraġa ma ina vitumaġana da aiwai e ririweia, ina tupua. <sup>24</sup> Lamna aubaina a ririwemi. Aiwai ami au pari o vibaġei, ona vitumaġana da taumi boiboġi o vaia ma ina viġarimiei. <sup>25</sup> Ma maranai e raraupari, au naona rava anatapui ai ġo’apoapoe awarim ma nota-tawanei. Ma nanare amam au mara am ġo’apoapoe ina nota-tawanei.”†

*Jew babadai, Iesu ana vibadana i vitarapiriei*  
(*Matthew 21:23-27; Luke 20:1-8*)

<sup>27</sup> Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina. <sup>28</sup> Ma i paridadanei i pa, “Aiwai vibadanei wei kauai e kaukauei? Aiwai vibadana i verem da wei kauai uta kauai?”

<sup>29</sup> Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei. <sup>30</sup> Aiwai, John taubabataito vibadana i verei da rava ita babataitoi, God bo rava? Ona riweul!”

<sup>31</sup> Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’ <sup>32</sup> Wate eġa tana riwa da, ‘Ravei.’ Tau rava i rovoei, aubaina rava anatapui, ai nota da John anina peroveta. <sup>33</sup> Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

## 12

*Tauipi ai awanaina*  
(*Matthew 21:33-46; Luke 20:9-19*)

§ **11:15:** Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ġelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ✧ **11:17:** Isa 56:7 \* **11:17:** Iesu dobuġela manena tauviraina ma gimara ravai i viwavui da tau pari numana i vovirai da amkwalakwalai ai guba, tau rava ai arua nolana e viviapoapoeni Jer 7:11-15. † **11:25:** Riwa wadubo nonoana uraiei i girugirumia vs 26 weka eġa ita mammae, Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei.

1 ✨ Iesu i vikarei ma awanainei awari i babani i pa, “Mara tagogi oroto, ana wapu i kauei ma grape i paewi\* ma i gari ma grape anigudana ma violaḡa numana i voai. Ma tauipi ḡelau i verei da ita nolei tau i anatapui aubai. Ma i vaḡai au dobu ḡela. 2 Tuaruta ana mara i ḡetai ma taniwaga, ana taunola i paritawanei tauipi awarii da ana ḡuta ita vaia. 3 Wate tauipi, tauna i vojijini ma i kwapui ma kwakwavina i paritawanei. 4 Ma taniwaga, taunola ḡelauna i paritawanei. Ma tau i, kolana i viaibauni ma i vitepaubaubai. 5 Ma taunola ḡelauna i paritawanei ma tauna i viraḡeni ma i maḡa ḡelau i paritawanei, ḡelau i kwapui ma ḡelau i viraḡeni. 6 Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau i, natu ina vivirei.’ 7 Wate tau i, tauna i ’nanai ma i riwa vivira i pa, ‘Wei taniwaga natuna. Ona nei, tana viraḡeni ma ana buderi ina viḡaritaiei!’ 8 Ma i vunui ma i viraḡeni ma tupuana wapuei i tawanana-opunei.

9 –Wapu taniwagana marina aiwai ina kauei tau i awarii? Tauna ina nei ma tauipi ina viraḡeni ma grape wapuna ina veredamanei tauipi ḡelau awari. 10 Wei girumana o iavi bo eḡa?

‘Wei ḡaimana, tauvoa i geduaiei,  
wate muriai i nelaḡai da tauna ḡaima kaua.

11 Wei lamna, BADA ana kaua  
ma inanana i vinualaulauna.” (Psalm 118:22-23)

12 Jew babadai i aramanei da awanaina lamna tau i bababaniei ma i ḡoei da ita pani. Wate tau i patara i rovoei, lamna aubaina Iesu i voterei ma i nae.

*Caesar awarina tax tana terei bo eḡa?  
(Matthew 22:15-22; Luke 20:20-26)*

13 Ma Pharisi ḡelau ma Herod ana rava ḡelau i nae Iesu awarina da riwei ita waroi. 14 Tau i nei ma i riwa, “Tauviararamana, tauai aramanei da tam rava jijimanim. Ma rava wavai naenaei ma rava labalababa eḡa uta vibainaenaei ma anatapui e vaivaia da tagogi. Wate tam God ana babani riwa kauei e viararamani. Ma riwai tax tana terei Rome gulauna wavana Caesar† awarina, i aii bo eḡa?”

15 Wate Iesu, ai moru i ’nana-bauni ma i riwei, “Aiwai aubaina o raudadaniu? Mani tagogi ona neiai da ana inanai!”

16 Denarius tagogi i neiai Iesu awarina ma tau i vitara-virevirei, “Wei aiai aruana ma wavana?”

I paribelei, “Caesar.”

17 Iesu i riwa, “Aiwai Caesar ḡarinei, Caesar ona verei. Ma aiwai God ḡarinei, God ona verei!” Ma tau i baiei.

*Sadusi ḡelau, Iesu i vitara-virevirei irairaḡelei vomairina aubaina  
(Matthew 22:23-33; Luke 20:27-40)*

18 ✨ Mai Sadusi ai vitumaḡana da rava eḡa ita vovomairi-me maranai e irairaḡe.‡ Anina ma ḡelau i nei Iesu awarina ma i paridadanei, 19 “Tauviararamana! God ana tarawatu, Moses wenanare i girumi: Mepa da oroto i’raḡe ma kaiababana i netawanei ma eḡa natunatu. Orotu vareina kaiababana ina ravaḡi ma roaroa ina ḡuni vareina aubaina. 20 Mara tagogi varevarei seven i mae. Ma natuevou i tavine ma eḡa natunatuna ma oroto i’raḡe. 21 Vareina viruaina kaiababa i ravaḡi ma tauna maiteni eḡa natuna ma i’raḡe. Ma nanare vareina vitonuina. 22 Ma nanare anatapui seven, wavinena i ravaḡi ma eḡa

✨ 12:1: Isa 5:1-2 \* 12:1: Parivainota wadubona, God au anatapuna Israel e bababaniei me tauna ana grape wapuna, me Isa 5:1-2. † 12:14: Sisa. ✨ 12:18: Act 23:8 ‡ 12:18: Sadusi tau i gulagulau ma rava ḡaeḡaei mai Jew ai giu babadai tau i maiteni eḡa ita vitumaḡana da anela bo arua ḡelau e mamae ma buka 5 i vinoa, Moses i girugirumia, tau i lamna ava e vivitumaḡanei (Karena, Exodus, Leviticus, Numbers, Deuteronomy). Ma eḡa buka ḡelau. Wate Moses ma BADA riwaiei tau i viatataiei da lawana e mamae iraḡe au murina.

natunatui. Au muriai wavine i'raḡe. <sup>23</sup> Anapui seven, wavinena i ravaḡi. Vomairi me au marana, lamna aiai awana?"

<sup>24</sup> Iesu, tau i riwei, "Aiwai Moses i girumi ma God ana rewapana eḡa ota aramanei. <sup>25</sup> Maranai tau iraḡelei ina vomairi, tau eḡa ina tavine bo ina vitavinei. Wate ina mae me anela au mara. <sup>26</sup> ✧ Ma rava iraḡelei ai vomairi babanina, Moses ana tarawatu eḡa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.* <sup>27</sup> Tauna eḡa rava irairaḡei ai God, wate rava lawalawai ai God. Taumi o moru kaua!§"

*Tarawatu ḡeḡetelarana*

*(Matthew 22:34-40; Luke 10:25-28)*

<sup>28</sup> Ma tarawatu badana tagogi i nae ma ai vitarapiri i nonori. Ma i nonori da Iesu i babani kaua, lamna aubaina tauna i vitara-viravira, "God ana tarawatu metauna i ḡetelara?"

<sup>29</sup> ✧ Iesu i paribelei, "Ḡeḡetelarana tagogi lamna wei: *Ona rautaniḡana Israel! BADA ata God, tauna ava BADA.* <sup>30</sup> BADA ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei! <sup>31</sup> ✧ Ma viruaina lamna wei: *Rava ḡelau nuanuam ina vaia me tam nuanuam e vaivai-melei!* Wei tarawatu ruaḡa i ḡetelara, eḡa me ḡelau nanare."

<sup>32</sup> Tarawatu badana i riwa, "Tauviararamana u babani kaua! Riwa kaua u babaniei, BADA Tauna ava God ma eḡa mepa ḡelauna. <sup>33</sup> Ma nuanuami ina vaia orami anatapunei ma ami nota anatapunei ma ami rewapana anatapunei. Ma, Rava turam nuanuam ina vaia me tam nuanuam e vaivai-melei. Wei tarawatu ruaḡa lamna i ḡetelara, eḡa me pulo apuapunana bo pulo ḡelau."

<sup>34</sup> Iesu i 'nanai da tauna i paribelana kaua ma i riwei, "Tam, God ana vigulau au ḡereḡerena e ḡeḡeta." Ma eḡa aiai tepana ita tora da Iesu ita vitara-viravirana-melei.

*Keriso tauna aiai?*

*(Matthew 22:41-46; Luke 20:41-44)*

<sup>35</sup> Maranai Iesu au Tempol i viararamana ma i vitara-viravira i pa, "Aiwai aubaina Tarawatu Babadai e ririwa da Keriso tauna David natuna? <sup>36</sup> ✧ Arua Vivivireina, David nota i verei ma tauna i riwa:

'MAMAE-NONOANA au gulau i riwei,

*Au oieu ma kiala*

*da am ḡavia*

*au ae karem da ma tuvaidoedoei.'*

*(Psalm 110:1)*

<sup>37</sup> —David, tauoina wei gulauna i ḡorei bada. Ma menanare da badana lamna, David natuna?" Patara ḡaeḡaena riwana i nonori ma i vinuai. §

*Iesu, Tarawatu Babadai ai kaua i babaniei*

*(Matthew 23:1-36; Luke 20:45-47)*

<sup>38</sup> Ma Iesu, tau i viararamani i pa, "Tarawatu babadai ona rovoei. Ai gara manamanai ma e bababara nae au deba da rava tau i vivivirei. <sup>39</sup> Tau anikiala vinevinei pari au numana ma au torela, gabu aiaii e vaivaia. <sup>40</sup> Tau, kaikaiababa e morumorui ma ai numa e kwalekwalei, e morumoru ma e raraupari-vai-manamanawa. Tau ai kovoḡa ina apoapoe guratana."

*Kaiababa ana pulo*

*(Luke 21:1-4)*

<sup>41</sup> Ma Iesu, pulo aniterenana au baba ḡelauna i kiala ma rava i 'nananai mane i tereterei. Rava maḡamaḡau vivimanei, mane maḡamaḡau i terei. <sup>42</sup> Wate kaiababa molamolakana i nei ma mane muomuoi ruaḡa i terei, ruvana i aburu kaua. <sup>43</sup> Ana tauvotaḡotaḡo i ḡorei

✧ 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau lawalawai maranai BADA, Moses awarina i babani. ✧ 12:29: Deu 6:4-5 ✧ 12:31: Lev 19:18

✧ 12:36: Psa 110:1

ma i riwei, “Anina a ririwemi, wei kaiababa molamolakana i tere-guratei, eġa me tau i ġelau. <sup>44</sup>Tau i ġelau ai maurei i verena, wate wei kaiababa molaka ma ġarinei anapapuna i terei, ana anilawana anapapuna.”

## 13

*Iesu i riwa da rava God ana Tempol ina rikai*  
(*Matthew 24:1-2; Luke 21:5-6*)

<sup>1</sup> Iesu, Tempol i nene-tawanei ma ana tauvotaġotaġo tagogi i riwa, “Tauviararamana! Numa i viġulau ġaġa ma numa ġaimai i rata ġaġa.”

<sup>2</sup> Iesu i paribelei, “Wei numai ġaeġaei u inanai, eġa ġaimai tagogi, turana au tepana ina mae. Ġaima anapapui ina rikai.”

*Rava ina vinuapoapoe kua. Iesu ana tauvotaġotaġo ina vipatutu*  
(*Matthew 24:3-14; Luke 21:7-19*)

<sup>3</sup> Iesu i kiakiala au ola *Olives*, Tempol au navanavaġela ma Peter, James, John ma Andrew i nei ma i vitaraviravirana govaġei <sup>4</sup> i pa, “Ma riwelai mara aiwai wei kauai ina tupua? Ma aiwai ina vimataira da wei kauai anapapui ina tupua?”

<sup>5</sup> Iesu, tau i riwei, “Ona inana kua da eġa aiai ina terevaideġaimi! <sup>6</sup> Rava maġamaġai, wavauei ina nei ma ina riwa, ‘Tau Keriso tauvilawana!’ Ma rava maġamaġai ina terevaideġai. <sup>7</sup> Ma maranai viġavia ona nonori ma viġavia aueia riwana ona nonori; eġa ona rovo! Wei kauai anina da ina tupua, wate wei eġa damona. <sup>8</sup> Dam, damai ina viġavia vivira ma dobu, dobuai ina viġavia vivira. Ma lolo ma gomara dobu au anapapuna. Wei kauai, lamna me wavine ana iniviarra e vivikarei maranai e vivinatuna.

<sup>9</sup> —Ona inana kua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaġotaġoiu. Ma tau awarii, Riwa Aiaina ona raugugulei. <sup>10</sup> Riwana Aiaina ona raugugulei rava anapapui awari ma muriai damona ina nei. <sup>11</sup> Ma maranai i panimi ma i etaremi. Eġa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eġa taumi ota babani, wate Arua Vivivireina. <sup>12</sup> Rava, vareina ina verenei da ina viraġeni. Ma ama, natunatuna ina verenei da ina viraġeni. Ma roaroa, amamai ma aloloi ina viġaviei da ina iraġe. <sup>13</sup> Rava anapapui ina geduaiemi tau aubaiu. Wate aiai da e maimairi-jjina da au damona, tauna ina lawana.”

*Iniviarra ġaeġaena ana mara*  
(*Matthew 24:15-28; Luke 21:20-24*)

<sup>14</sup> “Maranai ‘Kua apoapoe kaukauana’\* e maimairi mepa avena ita mairi. (Buka taujavana wei ina aramane i anona aiwai). Tau i aiavo i au Judea ina ruba laġilaġina au ola. <sup>15</sup> Aiai numa au tepana eġa ina ġaira bo ina rui au numa da aiwai ina vaia. <sup>16</sup> Aiai au wapu eġa ina naeme au numa da ana gara ina vaia. <sup>17</sup> Ma iniviarra ġaeġaena, waivine duaduamai ma tau i da e viviġuġu awari nai au marana! <sup>18</sup> God awarina ona raupari da wei kauai eġa au bodu ina tupua. <sup>19</sup> ✧Ma nai au marana amapo iniviarra ġaeġaena. Ma maranai God dobu i kauei, iniviarra ġaeġaena eġa nanare ita tupua ma amapo eġa nanare ina tupua me. <sup>20</sup> Wate BADA nai marana ina vitupoi. Mepa da eġa ina vitupoi, rava anapapui ina iraġe. Wate rava, tauna ana vinevine ina vilawani lamna aubaina mara ina vitupoi.

<sup>21-22</sup> —Muriai keriso tauvilawana morumorui ma peroveta morumorui ina nei ma mataira ma kua babai ina kauei ma ina kauana dadanei da God ana vinevine maiteni ita terevaideġai. Lamna aubaina mepa da aiai ina riwemi, ‘Ma inanai, Tauvilawana noi!’ bo ‘Tauna noi!’ Nai babanina eġa ona vitumaġane! <sup>23</sup> Ona inana kua; anapapuna a riwana-nonoemi!”

\* **13:14:** Eng. *Abomination of Desolation* Dan 9:27 11:31 & 12:11 ✧ **13:19:** Da 12:1

*Rava Natuna ana nei*  
(*Matthew 24:29-31; Luke 21:25-28*)

<sup>24</sup> Iesu wenanare i riwa, “Ma iniviara gāeḡaena au murina.

*Madeḡa eḡa ina rarana*  
*ma nawaravi eḡa ina lalai.*

(*Isaiah 13:10*)

<sup>25</sup> *Ma ubona marei ina peu*  
*ma rewapana ḡelau i au aidamo ina gui.*

(*Isaiah 34:4*)

<sup>26</sup> ☆—Nai maranaina, *Rava Natuna ana rewapanana ma ana borumana apauei ina nei.*

<sup>27</sup> Ma Tauna, ana anela ina paritawanei dobu au anatapuna da rava tauna ana vinevine ina tuarui dobu au damona da dobu ḡela au damona.”

*Damala ana awanaina*  
(*Matthew 24:32-35; Luke 21:29-33*)

<sup>28</sup> “Damala aina ana awanaina ona aramanei. Maranai ai e numonumoi, lamna ona aramanei da maura e tuturiai. <sup>29</sup> Ma nanare, maranai wei kauai anatapui ina tuputupua, ona aramanei da Rava Natuna i turiai; au metaeta i ḡetai. <sup>30</sup> Anina a ririwemi da wei kauai au naona ina tupua ma muriai da rava marina lawalawaii ina iraḡe. <sup>31</sup> Mara ma dobu ina amoa. Wate riwau eḡa ina amoa.”

*Bada ainelana ana nei i aramanei*  
(*Matthew 24:36-44*)

<sup>32</sup> “Ma eḡa ai ai ita aramanei nai marana bo madeḡa aiwai ina nei. Anela au mara eḡa ita aramanei ma Natuna eḡa ita aramanei. Amana, tauna ava i aramanei. <sup>33</sup> Ona vineneḡana ma matami ina kala!† Eḡa ota aramanei mara aiwai, wei kauai ina tupua. <sup>34</sup> Wei me rava ana numa i netawanei ma i vaḡai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneḡana i riwei da ita vineneḡana. <sup>35</sup> Ona vineneḡana! Eḡa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai. <sup>36</sup> Ma eḡa matamatavemi ina nelaḡaimi. <sup>37</sup> Aiwai riwana a ririwemi, riwana tagogina rava anatapui a riwei, ona vineneḡana!”

## 14

*Jew ai babada, Iesu i ogei da ita viraḡeni*  
(*Matthew 26:1-5; Luke 22:1-2; John 11:45-53*)

<sup>1</sup> ☆Au pom ruaḡa muriai da Raḡona ma Palawa Bagibagina torelai,\* Pirisi babadai ma Tarawatu Babadai eta i baibaiei da menanare govagovagane i Iesu ita vunui. <sup>2</sup> Ma i riwa, “Au torela wei kauai eḡa tana kauai, mepa da viḡaiḡaiawa gāeḡaena ina tupua.”

*Wavine, daji ḡabuḡabuna Iesu au kolana i waḡi*  
(*Matthew 26:6-13; John 12:1-8*)

<sup>3</sup> Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana gāeḡaena e ḡoreḡorei *nard*, Iesu au kolana i waḡi. <sup>4</sup> Rava ḡelau kampa i mamae i ḡaiawa ma i riwa, “Aiwai aubaina daji u vikalokaloei? <sup>5</sup> Wei dajina ita gimarei 300 *denarii* † ruvana ma manena molamolakai ita verei.” Ma tau, wavine i vienenei.

<sup>6</sup> Wate Iesu i riwa, “Ona voterei! Aiwai aubaina o vinuabolai? Tauna, kaua aiaina awariu i kauai. <sup>7</sup> Molamolakai awarimi e mamae-nonoa ma ona ḡoei ma tau i ona voagui. Wate tau awarimi eḡa ata mamae-nonoa. <sup>8</sup> Wavine ana nola i kauai. Tauna, dajiei

☆ **13:26:** Da 7:13 † **13:33:** Wedau Evanelia i girumi, ma i raupari, wate buka wadubo nonoana wei eḡa ita mamae, Luk 21:16 kampa ona inanai da e mamae. ☆ **14:1:** Exo 12:1-27 \* **14:1:** Raḡona (passover) Exo 12:1 Palawa eḡa yist maiteni (Unleavened-Bread) Exo 12:17 & 23:15 † **14:5:** Wei lamna me taubagibagi ana maia madeḡa tagogi aubaina.

tupuau i vokaukauana-nonoei vikokoaga aubaina.‡ 9 A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuanuai ina vuru.”

10 Judas Iskariotei tauna Apasol tagogi, Pirisi Babadai awari iġeta da Iesu ita vibenabenamei. 11 Tau i vinuai kua maranai wei i nonori ma Judas i parivainuaġani da mane ita verei. Ma Judas i 'nana da mepa gavogavo ita inanai da Iesu ita amverenei.

*Iesu ma Apasol, Raġona torelana i ani.*

*(Matthew 26:17-25; Luke 22:7-14, 21-23; John 13:21-30)*

12 Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

13 Iesu, tau ruġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi. 14 Au numana e ruiuiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?” 15 “Ma tauna, numa vatavatara ina viatataiemi i vokaukauana-nonoei ma kampa aubaita ona vokaukaua.”

16 Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

17 Au i biga ma Iesu i nei Apasol maiteni. 18 Tau i kepa kepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

19 Tauvotaġotaġo i vinuabola ma tagotagogi ava i pa, “Eġa tau tapa?”

20 Iesu i paribelei, “Taumi tagogi weka palawa e vivigaloi au aboma tau maiteni.

21 Wariaġa i girugirumia nanare, Rava Natuna ina iraġe. Wate aia da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei.”

22 Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

23 Anina ma *wine* kelakana i vaia ma i viegualau ma i verei da anatapui i umei, 24 ✧ “Wei tau tarau i toi rava maġamaġai aubai ma au parivainuaġana bagibagina ina vovai-virewapani. 25 Anina a ririwemi, *wine* eġa ana uma-melei da maranai God ana rava aubai ana vigulau.”

26 Ma tau voepaepa welana i ravi ma i ġae au Ola *Olives*.

*Peter; Iesu ina boviei*

*(Matthew 26:31-35; Luke 22:31-34; John 13:36-38)*

27 Iesu, tau i riwei “I girumi nanare,

God i riwa, ‘*Tauviġamoġamo ana viraġeni ma sipu ina vilamonei.*’ (Zekariah 13:7)

Ma nanare anatapumi ona ruba-tawaneu. 28 Wate au vomairi au murina ana aivinao au Galili.”

29 Peter i riwa, “Mepa da anatapui ina rubatawanem, wate eġa tau!”

30 Iesu, Peter i riwei, “A ririwana-kauem da amadodo waguvarai muriai da kokoreko ina tou mara ruġa; tam mara tonuġa ma bovieu.”

31 Wate Peter, ponana i bagibagi ma i riwa, “Avena mepa da tau, tam maiteni ana iraġe. Eġa melanai ana boviem!” Ma tau i ġelau riwana tagogina i latoni.

*Iesu au Gethsemani i raraupari*

*(Matthew 26:36-46; Luke 22:39-46)*

32 Ma au Gethsemani i ġeta ma Iesu, ana tauvotaġotaġo i riwei, “Weka ona kiala ma ana raupari.” 33 Ma Peter, James ma John i taravaini ma nuanuana i raġe ma nuanuana

‡ 14:8: Mai Jew ai kua da taubeu dajiei e bulobuloi muriai au kokoaga e tereterei. ✧ 14:24: Exo 24:8; Jer 31:31-34

i bola-kauei. <sup>34</sup> Ma tau i riwei, “Au nuabola i rata kaua au orau da e vunuvunui. Weka ona mae ma ona vineneġana.”

<sup>35</sup> Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoena tauna ita netawanei. <sup>36</sup> I riwa i pa, “*Abba* Amau! Aiwai anapuna tagotagogina tam awarim. Wei kovoġa kelakana ma vaitawanei. Wate eġa tau au ġoana, wate tam am ġoana.”

<sup>37</sup> Ma Iesu i nememei ma tau tonuġa rarau-nuavurui i nelaġai. Ma Peter i riwei, “Simon! Š tam aiwai matavena? Mara aburuna uta vineneġana bo eġa?” <sup>38</sup> Ma Iesu, tau i riwei, “Ona vineneġana ma ona raupari da eġa au raelara ona peu! Arua e ġoġoei, wate tupua i ġokokokara.”

<sup>39</sup> Ma i naeme ma parina tagogina i raupariei. <sup>40</sup> Maranai i nememei ma i nelaġai, i matamatave; tau, matai i vitai. Ma tau eġa ita aramanei aiwai ita riwei.

<sup>41</sup> Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ġetai, ona inanai. Rava Natuna ina vibenabenamei ġo’apoapoe ravai au urai. <sup>42</sup> Ona vomairi; tana nae; ona inana! Tauvibenabenameu e nenei!”

### *Iesu i pani*

*(Matthew 26:47-56; Luke 22:47-53; John 18:3-12)*

<sup>43</sup> Iesu i bababani ma Judas, tauna ana Tauvotaġotaġo tagogi i ġetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai. <sup>44</sup> Muriai da Iesu awarina ita ġeta; Judas, patara ai mataira i verei, “Orotona ana vigia laġolaġonei; nai tauna. Ona pani ma ona naiei ma ona inana-kauei!”

<sup>45</sup> Maranai Judas i ġeta ma i nae Iesu awarina ma i riwei, “Tauviararamana!” Ma i vigia-laġolaġonei. <sup>46</sup> Ma tau, Iesu i vojijini ma i pani. <sup>47</sup> Ma tagogi kampa i maimairi, ana sword i taina-lavui ma Pirisi ġeġetelarana ana taunola taniġana i borituini. <sup>48</sup> Ma Iesu, tau i riwei, “Taumi ana apiami o nei da ota panu bo, apamina tau amkwalakwalau? <sup>49</sup> Marana patapatai taumi maiteni ta mamae au Tempol ma a viararamana ma eġa ota panu. Ma i girugirumia nanare, ina tupua.”

<sup>50</sup> Ma Tauvotaġotaġo anapui, Iesu i voterei ma i ruba-tawanei.

<sup>51</sup> Ma laraga tagogi, i vikareko ma Iesu i votaġotaġoi. Tau i ġoei da ita vojijini, <sup>52</sup> wate ana kareko i vojijini ma tauna ana kovakovana i ruba.

### *Tau, Iesu i etarei.*

*(Matthew 26:57-68; Luke 22:54-55, 63-71; John 18:13-14, 19-24)*

<sup>53</sup> Ma tau, Iesu i naiei Pirisi Ġeġetelarana. Pirisi Babadai, dogadogara ma Tarawatu Babadai mepa i vitagogieiana. <sup>54</sup> Ma Peter i votaġotaġo da Pirisi Ġeġetelarana ana numa. Ma ana au debadeba, purusimani maiteni i kiala ma i viviairara. <sup>55</sup> Pirisi Babadai ma mai Jew ai boru ġeġetelarana, \* Iesu ana apoapoe i baiei da ita viraġeni; ma i baiana-avei. <sup>56</sup> Matamata maġamaġau, Iesu i viwavu-morumoruei, wate ai viwavu taputapunei ava.

<sup>57</sup> Ma ġelau i vomairi ma wei wavuna morumoruna i kauei Iesu awarina, <sup>58</sup> “Tauai a nonori tauna i riwa, ‘Wei tempolna i voavoai. Tau ana rikai ma au pom tonuġa au murina, Tempol ġelauna ana voai ma lamna eġa rava ita voai.’ <sup>59</sup> Wate nanare ai viwavu taputapunei ava.

<sup>60</sup> Pirisi ġeġetelarana i mairi tau au naoi ma Iesu i vitara-virevirei, “Wei ravai e viviwauim ma eġa aiwai ma paribelei bo?”

<sup>61</sup> Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaianana Natuna bo?”

Š 14:37: Au Mrk 3:16 Simon wavana i virai da Peter. \* 14:55: Mai Jew e ġoreġorei Sanhedrin. † 14:61: Isaiiah i parivereta da Keriso ana au iraġe eġa ina gagaloana-melei. (Isa 53:7).

<sup>62</sup> ✠ Iesu i paribelana, “Tau tauna! Ma *Rava Natuna ona inanai, Vivirewapanana au oiena ina kiala ma mara ladanei ina nei.*

<sup>63</sup> Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelau tana ġoei? <sup>64</sup> Taumi, vijiboġa o nonori ma ami nota aiwai?”

Tau anapui i riwa, “Tauna ana ġo’apoapoe aubaina anina da ina irage!”

<sup>65</sup> Ma ġelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tauvipaipai, Iesu i vaia ma i vunui.

*Peter, Iesu i boviei*

*(Matthew 26:69-75; Luke 22:56-62; John 18:15-18, 25-27)*

<sup>66</sup> Ma Peter au gabaura i mamae ma Pirisi ġeġetelarana ana taunola guguini i ġetai.

<sup>67</sup> Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tauvotaġotaġo!”

<sup>68</sup> Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [kokorereko i tou<sup>‡</sup>].

<sup>69</sup> Taunola guguini, Peter i ’nanai ma i raukarena-melei ma rava au ġereġere i maimairi i riwei, “Wei ravana, tau tagogi!” <sup>70</sup> Wate Peter i bovi me.

Mara aburuna muriai, tau au ġereġere i maimairi, Peter i riwana-melei, “Tam anina, tau tagogi; aubaina tam, Galiliei!” <sup>71</sup> Ma Peter i riwa, “God au matana, tau a ririwa kaua, ravana o ririweia a vivinuanainei!”

<sup>72</sup> Maratagogi kokorereko i tou mara viruaina ma Peter, Iesu riwana i notai - *Muriei da kokorereko ina tou mara ruaġa, tam mara tonuġa ma bovieu.* Ma Peter i vinuabola kaua ma i tou.

## 15

*Iesu i taravaina-naiei Pilate au naona*

*(Matthew 27:1-2, 11-19; Luke 23:1-5; John 18:28-38)*

<sup>1</sup> Ubaubanai boiboġi, pirisi babadai ma dogadogara ma tarawatu babadai anapui i viboru\* ma i vianina da Iesu i pani ma i veredamanei Pilate au urana. <sup>2</sup> Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.” <sup>3</sup> Pirisi Babadai e viviwavuum kaua maġamaġau aubai. <sup>4</sup> Ma nanare Pilate, Iesu i vitaraviravirana-melei i pa, “Tam ma paribelana bo eġa? Ma nonori e viviwavuum kaua maġamaġau aubai!” <sup>5</sup> Wate Iesu i genuana ma eġa ita paribelei. Ma Pilate i ba kaua.†

*Iesu ana irage i vianinei*

*(Matthew 27:15-38; Luke 23:13-25; John 18:39-19:16)*

<sup>6</sup> Tau ai kaua maemaena da Raġona Torelana au marana, Pilate, panipani tagogi, rava ai ġoanei e ruperupeni ma e vovoterei da e nena. <sup>7</sup> Orotu tagogi wavana Barabas; tauna Rome gabemani i viġaviei ma i pani da panipani au numana i mamae. Ana rava maiteni tauviraġena. <sup>8</sup> Ma patara i ġeta da Pilate ita vibaġai da panipani tagogi ita rupeni Raġona Torelana au marana. <sup>9-10</sup> Pilate i paribelei, “Taumi o ġoeġoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina. <sup>11</sup> Wate Pirisi Babadai, patara i egari da Pilate, Barabas ita rupeni ma eġa Iesu. <sup>12</sup> Pilate, patara i paridadana-melei i pa, “Tauna o ġoreġoreia mai Jew ai gulau mena ana kauanei?” <sup>13</sup> Tau i garara, “Ma tuparatui!” <sup>14</sup> Pilate i riwa, “Aiwai apoapoen a i kauai?” Ma tau i garara guratana, “Ma tuparatui!” <sup>15</sup> Pilate i ġoei da patara ita vinuabai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

✠ **14:62:** Da 7:13 ‡ **14:68:** Wei riwana buka au wadubo nonoana eġa ita mamae. \* **15:1:** Mrk 14:55 Sanhedrin

† **15:5:** Mai Rome ai tarawatu e mamae da maranai i viwavuum ma tauetara eġa uta paribelei lamna tam anina wavu ma varai.



*Sorodia, Iesu i vinamei*  
(*Matthew 27:27-31; John 19:2-3*)

<sup>16</sup> *Sorodia*, Iesu i taravaina-ruiei Pilate ana au numa ma ai rava ḡelau i ḡoreiai. <sup>17</sup> Ma gara lebalebarina‡ [*me gulau ana gara*] Iesu i vioteni ma kunuteia ai donadonanei i viri da au kolana i terei. <sup>18</sup> Ma vinamana i raukarei ma i garara, “Egualau mai Jew ai gulau!” <sup>19</sup> Ma kolana gonuei i raviravi ma i ovaovai. Ma ae-tutuie i mae-ḡaira au doa mā i raudunelei ma i vivinamei. <sup>20</sup> Ma i vijiboḡa vorovei ma gara lebalebarina i voḡiḡi-tawanei ma ana gara i vioteni. Ma i taravaina-opunei da ita tuparatui.

*Iesu i tuparatui*  
(*Matthew 27:32-44; Luke 23:26-43; John 19:17-37*)

<sup>21</sup> Tau i nenaē ma Simon i nelaḡai, rava SairinieŠ (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai. <sup>22</sup> Tau, Iesu i naiei da gabu i ḡoreḡorei Golgotha, lamna anona unu gabuna. <sup>23</sup> *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei. <sup>24</sup> Ma Iesu i tuparatui ma ana gara, tau i ava au orai i ḡutai.\*

<sup>25</sup> Ubaubanai 9 kilok nanare, Iesu i tuparatui. <sup>26</sup> Aniviwavuna i girumi ma i tutui, “Mai Jew ai gulau.” <sup>27-28</sup> ✧ Danedanenei ruaḡa, Iesu au ririvana i tuparatui; tagogi au oiena ma ḡelauna au kelakelauna.†

<sup>29</sup> ✧ Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuḡa ma voa-melei. <sup>30</sup> Ma vilawana-melem ma *korosiei* ma ḡairai!”

<sup>31</sup> Ma nanare Pirisi Babadai ma Tarawatu Babadai maiteni, Iesu i vivinamei, “Rava ḡelau i vilawani, wate ainelana ita vilawana-melana-avei. <sup>32</sup> Keriso Tauvilawana, Israel ana gulau; marina *korosiei* ma ḡairai ma tana inana da tana vitumaḡanei!” Danedanenei i tupatuparatui maitenai, Iesu i vinamei.

*Iesu ana iraḡe*  
(*Matthew 27:45-56; Luke 23:44-49; John 19:28-30*)

<sup>33</sup> Ma au benai dobu anapuna i waguverei da 3 kilok au bigai. <sup>34</sup> Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*” <sup>35</sup> Ma rava ḡelau au ḡereḡere i maimairi i nonori ma i riwa, “Ona rautaniḡanei, Elijah e kwatukwatuei!” <sup>36</sup> Ma rava tagogi i ruba da gara ai au damona i pani ma au *wine* tomatomana i vigaloi ma i voepai Iesu au ipirina ma i riwa,‡ “Ona vipaipai ma tana inana mepa da Elijah ina nei da ina tereḡairei.” <sup>37</sup> Ma Iesu ponana i rata ma i kwatu ma i lavutu tawanana. <sup>38</sup> Ma Tempol au orana anitereḡaḡara au pouna i wanasikai au tepana da i ḡaira au doa. <sup>39</sup> Ma *sorodia* ai bada, Iesu au naona i maimairi; i ’nanai da i lavutu tawanana ma i riwa, “Wei anina God Natuna.” <sup>40</sup> Waivine ḡelau aueia i mae ma i raraubiga: Mary Magdalene ma Mary (James keikeina ma JosesŠ aloi) ma Salome. <sup>41</sup> Tau, Iesu i votaḡotaḡoi ma i ovoagui marana i Galili i mamae ma waivine ḡelau maḡamaḡau, tauna maiteni i ḡeḡae au Jerusalem, anapui kampa.

*Iesu i vikokoagei*  
(*Matthew 27:57-61; Luke 23:50-56; John 19:38-42*)

<sup>42-43</sup> Ma au biga i tuturiai Joseph Arimatheae† tauna rava ḡaeḡaena tagogi boru ḡetelarana au orana. Tauna God ana vigulau ana nei i vipaipai. Ma vokaukua marana

‡ 15:17: Eng. purple. § 15:21: Eng. Cyrenian. \* 15:24: Tau ḡaima i tawanei me dice da aiwai garana ita vaia. ✧ 15:27-28: Isa 53:12 † 15:27-28: Giruma ḡelau waduboi vs 28 e mamae Ma aiwai i kaukaueia lamna peroveta i ririweia i tupua, Tau i ’nanai me tau ḡo’apopoe taukauei. Isa 53:12 ✧ 15:29: Mrk 14:58 ‡ 15:36: Psa 69:21 peroveta i girumi da Keriso ita verei. § 15:40: Au Mat 27:56, Matthew i girumi Joseph ma eḡa Joses. \* 15:42-43: Eng. Arimathea.

(Lamna Sabat au naona)<sup>†</sup> ma Joseph ana tepatorana, Pilate awarina i rui ma Iesu taubeuna i vibaḡei. <sup>44</sup> Pilate i baiei da Iesu boiboḡi i'raḡe. Tauna, *sorodia* ai bada i kwatuei ma i vitara-virevirei da Iesu i'raḡe bo eḡa? <sup>45</sup> Maranai *sorodia* ai bada i parivere i da anina riwa kaua. Ma Pilate, Joseph i riwei da Iesu tupuana i vaia.

<sup>46</sup> Joseph, gara maiana ḡaeḡaena i gimara i ma Iesu tupuana i tere-ḡairei. Gare i umai ma au guba tupuana i vimataveni ma ḡaima ḡaeḡaena i kaipeuri da kokoaga metaetana i viaitomeni. <sup>47</sup> Mary Magdalene ma Mary - Joses alona i 'nanai mepa Iesu taubeuna i vimataveni.

## 16

### *Iesu i vomairi*

<sup>1</sup> Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimara i da i naiei da Iesu tupuana ita buloi.\* <sup>2</sup> Ma Sunday ubaubanai boiboḡi maranai madeḡa i gogogo, tau i nae au kokoaga. <sup>3</sup> Ma i nena ma i bababani, "Aiai aubaita ḡaima kokoaga au metaetana ina kaipeura-tawanei?" <sup>4</sup> Maranai tau i taepai, i 'nanai da boiboḡi ḡaima i kaipeura-tawanei - ḡaima ḡaeḡae kaukauana. <sup>5</sup> Maranai i rui au guba ma oroto laragana ana gara ararapoirina i 'nanai au oiena.<sup>†</sup> Ma tau orai i auepai. <sup>6</sup> Orotu laragana i riwa, "Eḡa orami ina auepai, taumi, Iesu Nasarete i o baibaiei bo? I tupatuparatuia; tauna i vomairi! Ona inana, tauna eḡa weka! Tau weka taubeuna i vimataveni. <sup>7</sup> ✧ Marina ona nae ma ana tauvotaḡotaḡo ona riwei, ma Peter eḡa nuanuami ina vuru da Iesu e vivinao au Galili. Kampa ona inana i ririwemi nanare." <sup>8</sup> Tau i opu ma kokoage i viruberubei ana ini sisisi ma ana rovoi. Tau i rovo kaua, lamna aubaina eḡa rava ita riwei.

### *Mark 16:9-20*

*Mark Riwana Aiaina damona lamna wariḡa i vine-boai. Ma rava ḡelauna aiwai i notanotai nanare au vs 9 da 20 i girumi. Wei damonana weka i vikarei.*

### *Iesu, Mary Magdalene awarina i eḡa*

<sup>9</sup> Iesu iraḡelei i vomairi me au Sunday ubaubanai boiboḡi ma i ainae da Mary Magdalene awarina i eḡa. Maraotai Iesu, Mary awarina arua-apoapoei seven i viopuni. <sup>10</sup> Iesu, ana tauvotaḡotaḡo i vivinuabola ma i toutou ma Mary i ḡeta da i parivere. <sup>11</sup> Ma Mary i parivere da Iesu i lawana me ma tauna matanei Iesu i 'nanai. Wate tau eḡa ita vitumaḡanei.

### *Iesu, tauvotaḡotaḡo ruaḡa awari i eḡa*

<sup>12</sup> Wei au murina Iesu inanana tapuna ma ana tauvotaḡotaḡo ruaḡa awari i eḡa; maranai tau i nena au melagai. <sup>13</sup> Tau i naeme ma tauvotaḡotaḡo ḡelau i vieḡei. Wate tau nanare eḡa ita vitumaḡanei.

### *Iesu, Tau 11 awari i eḡa*

<sup>14</sup> Muriai tau 11 i amam ma Iesu awarii i eḡa. Ma i eni aubaina tau orai i bado ma eḡa ita vitumaḡana maranai rava, i riwei da Tauna i vomairi me. <sup>15</sup> ✧ Iesu ana Apasol i riwei, "Ona nae dobu au anapuna. Ma God Riwana Aiaina ona jimei rava anapui awarii. <sup>16</sup> Aiai da i vitumaḡana ma i babataito; tauna ina lawana. Ma aiai da eḡa ita vitumaḡana ina kovoḡi. <sup>17</sup> Ma tau aiavoi da i vitumaḡana, rewapana ina verei da kaua babai ina kaui. Ma arua-apoapoei ina viopuni ma pona tapunei ina babani. <sup>18</sup> Tau, mota uraiei ina vaia

<sup>†</sup> **15:42-43:** Mai Jew ai Sabate, madeḡa e neneulai au Friday e vivikarei da madeḡa e neneulai au Saturday e kwakwa. Mai Jew ai Tarawatu e ririwa da rava i 'raḡe lamna marana tagogina ina doboi. Sabate amadodo madeḡa e neneulai ina vikarei lamna aubaina Joseph i volaḡilaḡina da Iesu taubeuna ita doboi. \* **16:1:** Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi. † **16:5:** Tupua i vimataveni au oiena i kiakiala, ana gara ararapoirina. ✧ **16:7:** Mrk 14:28 ✧ **16:15:** Act 1:8

ma waiawa ina umai ma eā ina rauputei. Ma urai doridoriai au kolai ina terei ma ina lawana.”

*God, Iesu i ġaiei au Mara*

<sup>19</sup> ✠BADA Iesu, awari i babani vorovei. Ma tauna i ġaiei au mara ma God au oiena i kiala.  
<sup>20</sup> Tauvotaġotaġo i opu ma dobu au anatapuna i rarausugula. Ma BADA, tau i voagui ma kaua babai i kaukauei da tauvotaġotaġo aiwai i bababaniei i vovai-virewapani.

## Apasol ai kua Pariverena

Luke ana buka i giruma vorovei ma muriai Apasol ai kua bukana i girumi. Tauna ana ano gaegeaena lamna i goei da rava ita viegei da menanare Arua Vivivireina Iesu ana tauvotaḡotaḡo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaḡana. Tauamgiruma ana nota gaegeaena da wei bukana tauiavana ita pariveri da kerisiana avena Rome gabemanina ita viviḡaviei. Kerisiana vitumaḡanana lamna mai Jew ai vitumaḡana e kaukauana-paiei. Wei bukana i ḡutai da raḡaraḡana tonuḡa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana gae au murina Ekalesia au Jerusalem ai nola i vikarei;

Palestine taun ḡelau awari i tua-nae;

Ma i tua-nae au Mediteranean da i nae au Rome paratana. Wei bukana ana kua gaegeaena lana Arua Vivivireina i nolanola, ma rewapana tauvitumaḡana au Jerusalem i verei au Pentecost. Ma wei au bukana i vieḡeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaga kerisiana ai pariverena i tere-tagogiei raugugula au maḡamaḡau, ma kua ma ai nola i kaukauei anatapui. Wei au bukana i girumi da wei parivai-nuaḡanana ana rewapana tauvitumaḡana ai au lawana ma kerisiana ai au voepaepa i viatataieta.

### Buka rereḡana 1.

Vokaukua tauvimatamata aubai (1:1-26)

Iesu ana tarawatu ma ana parivainuaḡana damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vaḡai tagogi (13:1–14:28)

Boru au Jerusalem (15:1-35)

Paul ana vaḡai viruaina (15:36–18:23)

Paul ana vaḡai vitonuina (18:24–21:16)

Paul i vipanipani au Jerusalem, Caesarea, ma Rome (21:17–28:31)

### *Iesu ana Apasol i parivainuaḡani*

<sup>1</sup> Eḡalau Theophilus, buka au naona a girugirumia\* lamna Iesu ana tupua ma ana nola i vikarei da i kaukauei ma i viviararamana a pariverem <sup>2</sup> i nae da ana gae au marana. Muriai da Iesu i ḡaiei au mara, Tauna Arua Vivivireinei ana apasol vinevinei riwa bagibaginei i pariveri. <sup>3</sup> Iesu ana iraḡe au murina i vieḡana-meiei ana apasol awarii. Ma kua maḡamaḡau i kauei da apasol i vitumaḡana kua da Tauna anina i lawana me. Tau awarii i eḡa au pom 40 au orana ma God ana vigulau i babaniei. <sup>4</sup> Maranai ana apasol maiteni i vitagogiei ma i riwana-guratei i pa, “Eḡa Jerusalem ona oputawanei, wate pulona amau i paripari-vainuaḡanimi ona paini, maraotai a ririwemi nanare. <sup>5</sup>☆John wairei i babataito, wate mara aburuna ava Amau, Arua Vivivireinei taumi ina babataitomi.”

### *God Iesu i ḡaiei au Mara*

\* **1:1:** Bukana au naona i girugirumi lamna Luke ana Gospel ☆ **1:5:** Mrk 1:8

<sup>6</sup> Muriai maranai Iesu ma Apasol i vitagogiei ma tau i Iesu i vitara-virevirei i pa, “Bada! Marina, Israel ana† vigulau ma vere-melei bo?”

<sup>7</sup> Ma Iesu i paribelei, “Amau ainelana ana rewapanai mara ma iri e vivibadei, aubaina da taumi ega ona aramanei. <sup>8</sup> ✧ Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.” <sup>9</sup> ✧ I babani vorovei ma au matai God Iesu i gaei au mara. Ma apau i nei da i purui ma tau i ega ita inana-melei.

<sup>10</sup> Ma tau i googouta au mara ma nelara ruaa ai gara ararapouri au ririvai i raumairiei. <sup>11</sup> Ma i riwa, “Mai Galili, aiwai weka o maimairiei ma o googoutatei? Wei ravana menanarena o inana i gaenei, amapo nanare ina nememei.”

*Judas epaiana i vinei*

<sup>12</sup> Anina ma Apasol Ola Olive, i voterei ma i gaira me au Jerusalem lamna ega uama ma au geregere. <sup>13</sup> ✧ Ma au Jerusalem i geta ma i gae numana i mamae lana au tepana au vatavatara. Tau ai wava, Peter, John, James ma Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot‡ ma Judas - James natuna. <sup>14</sup> Ma wei ravai mara patapatana i vitagogiei ma i raraupari gogona, waivine gelaui ma Iesu ana roaroa ma aloi Mary maiteni kampa.

<sup>15</sup> Wei au marana, tauvitumaana 120 i vitagogiei ma Peter i vomairi ma wenanare awari i babani, <sup>16-17</sup> “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariaga gulau David i riwei da ina tupua; ma aiwai i ririwei anina nanare i tupua.” <sup>18</sup> Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu. <sup>19</sup> Ma rava anatapui au Jerusalem wei iragena riwana i nonori, lamna aubaina tau i dobu ai ponei i viwava Hakeldama, wei anona *Tara Doana*.

<sup>20</sup> “Wariaga Gulau David i girugirumia, nanare i tupua,

*Ana animae ina kwakwava,*

*ma ega ai ai au orana ina mae.*

*(Psalm 69:25)*

Ma

*rava gelauna ana nola ina vaia.*

*(Psalm 109:8)*

<sup>21</sup> ✧ Lamna aubaina marina awarita, rava gelauna tana vinei da ina raviepaiai. Tauna ravanana Iesu maiteni ta bababara-nae madega tonuga au orana, <sup>22</sup> John rava i babataitoi au marana ma i nae da Iesu i gaei au mara. Ma maiteni tana nola ma rava tana riwei menanarena God Iesu iragelei i vovaimairini.”

<sup>23</sup> Ma tau i rava ruaa i vinei, Joseph-Barsabas (ana wava gelauna Justus) ma Matthias.

<sup>24-25</sup> Anina ma tau i raupari, “BADA tam rava anatapui orai u aramanei. Ma viegelai da wei ravai ruaa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.” <sup>26</sup> Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

**2**

*Arua Vivivireina i gairai*

† **1:6:** Rome gabemanina Juda i vibadei wei au marana, Mai Jew wei ega ita goei, ma i goei da ita virai. ✧ **1:8:** Mrk 16:15 ✧ **1:9:** Mrk 16:19 ✧ **1:13:** Mrk 3:16-19 ‡ **1:13:** Rava ununurana. Wei ravai mai Rome ai gabemani e vivi gavi. ✧ **1:21:** Mrk 1:9; Mrk 16:19 § **1:26:** Wei kalona wenanare: mai Jew wava gaima muomuoi awari i girugirumi ma e tawatawanei, ma ai ai ana namba i ega lamna tauna ina vaia. Tau i vitumaana da wei kauana awarini God tau i ina viataie da ai ai ita vinei. (Pro 16:33)

1 Pentecost torelana i ġetai ma tauvitumaġana anatapui numa tagogi au orana i vitagogiei. \*

2 Maratagogi gugura ġaeġaena, nonorana me ive vivirewapanana marei i ġairai ma tauvitumaġana i mamae numana i vioai. 3 Taui purapura inanana me ai menamenana i 'nanai, i ġairai ma rava tagotagogi ava au kolai i kiala. 4 Ma Arua Vivivireina anatapui i vioai ma pona taputapunei ava i bababani Arua ana aguei.

5 Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui. 6 Ma patarai kampa i viruberubei, ma i nonori da gugurana lamna tauvitumaġana taui tagotagigiava ai ponei i bababani ma taui ai nota i kwa. 7 Taui anatapui i baei ma taui ava i babani vivira i pa, "Wei mai Galili bo? 8 Ma menanarena da anataputa awarita ata ponei e bababani! 9-10 Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ġereġerena, ma ġelauta mai Rome, 11 ġelau mai Jew ma ġelau Jentail wate inibori i vaia da i vimai Jew. Ma ġelauta mai Crete ma mai Arabia. Wate God kua ġaeġaena i kaukaueia, ata ponei i bababaniei ma ta nononori!" 12 Taui anatapui i vinuanaina, nuanuai i raġaraġa ma i bababani vivira, "Wei aiwai kauana e tuputupua?"

13 Wate ġelau taui i vinamei i pa, "Wei ravai i uma bua!"

*Peter rava awarii i raugugula*

14 Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kua. 15 Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

16 Wei lamna wariġa peroveta Joel i ririweia e tuputupua:

17 *Mara au damona,*

*Aruau rava anatapui awari ana iwaġi.*

*Ma natunatumi nelarai ma waivinei riwau ina jimej,*

*ma nelara voui mataiei kua ina inanai,*

*ma babada magumaguri rauboniei kua ina inanai.*

18 *Wate nanare, Aruau ana iwaġi au taunola nelarai ma waivinei awarii,*

*ma ina vitaubabani.*

19 *Ma kua babai au mara ana kauei,*

*ma au dobu mataira ana vieġai*

*ai araratana, tara ma bau potopotona.*

20 *Ma madeġa ina waguwarei*

*ma nawaravi ina ravitaratarai,*

*muriai da BADA ana mara ġaeġaena ma boruborumana ina nei.*

21 *Nai au marana aiavoi da BADA awarina e viviġore agu aubaina BADA taui ina vilawani.*

*(Joel 2:28-32)*

22 *Ma Peter i babani me:*

Mai Israel ona rautaniġana: God Iesu Nasaretei i vovai-virewapani da kua babai, ma mataira ġaeġaei i kauei da ita viatataiem i tauna anina Godei i nei. 23 ✧ Wate God wariġa i viogei ma ana ġoana nanare da Iesu au urami i terei, ma taumi ġo'apoapoe ravai ai aguei, Tauna au korosi o tuparatui da o viraġeni. 24 ✧ Wate God, Iesu iragħei

\* 2:1: Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei. † 2:15: Mai Jew taui au bigai sia e aniani ma wain e umaumai.

✧ 2:23: Mrk 15:24 ✧ 2:24: Mrk 16:6

i vovaimairini, ma iraḡe iniviarana i vaitawanei ma iraḡe eḡa tagotagogina da tauna ita vojijini. <sup>25</sup> Wariāḡa David Iesu i bababaniei maranai i riwa:

*Tau a inana* BADA God au naou mara au anata-puna.

*Tauna au oieu lamna aubaina eḡa ana rovo.*

<sup>26</sup> Lamna aubaina nuaiiai orau i oai ma menau i morelana, ana iraḡe ma a aramanei da tupuau ma paina-kauei.

<sup>27</sup> Ma aruau eḡa rava irairāḡei ai au dobu ma voterei, ma tam eḡa am taunola vivivireina tupuana ma voterei da ina buda.

<sup>28</sup> Tam lawana etanaina u viatataieu,

*ma Tam maiteni a mamae ma a vinuaiiai kaua.*

*(Psalm 16:8-11)*

<sup>29</sup> Au rava, A riwana-kauemi da amata gulau David i'raḡe da i doboi, ma ana kokoaga weka e mamae. <sup>30</sup> ✧ Wate David lamna peroveta, ma i aramanei da God i parivainuaḡani da ana damei gulau ina opu, me tauna nanare. <sup>31</sup> Ma David i 'nanai God muriai aiwai ina kauei ma i riwa,

*Keriso ina vomairi me,*

*ma tupuana eḡa rava irairāḡei ai au dobu ina voterei da ina buda.*

*(Psalm 16:10)*

<sup>32</sup> Ma God Iesu-na tagogina iraḡelei i vovaimairini, ma tauai anata-puiai a vimatamata.

<sup>33</sup> Ma God i ḡaie ma au oiena i vikialai. Ma Arua vivivireina i verei me i parivainuaḡana nanare, ma nai Aruana tagogina Iesu awariai i waḡi, lamna marina o nononori ma o inainanai. <sup>34</sup> ✧ David eḡa ita ḡae au mara, ma wate i riwa, BADA au Bada i riwei, "Au oieu ma kiala <sup>35</sup> ma am ḡavia au ae karem ana terei.

*(Psalm 110:1)*

<sup>36</sup> Lamna aubaina mai Israel anata-pumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

<sup>37</sup> Ma maranai rava wei riwana i nononori, tauai orai i rautonai da Peter ma Apasol ḡelau i riwei, "Varevareiai, tauai aiwai ana kauei da ana lawana?"

<sup>38</sup> Ma Peter i paribelei, "Taumi tagotagogi ava Iesu Keriso wavanei ona rupena ma ona babataito ma ami ḡo'apoapoei ina nota-tawanei, ma God ana pulo Arua Vivivireina ona vaia. <sup>39</sup> Wei parivai-nuaḡanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina."

<sup>40</sup> Ma Peter riwa ḡelau maiteni rava i vinua-terenei, ma i egari, "God ona vianinei da ina vilawanimi, ma eḡa kovoga ona vaia." <sup>41</sup> Ma rava maḡamaḡau Peter ana babani i vitumaḡanei ma i babataito ma nai au marana rava 3,000 ai au boru i rui.

### *Tauvitumaḡana i mae gogona*

<sup>42</sup> Ma tauvitumaḡana Apasol ai viararamana i nononori, ma i viboruboru, i amam ma i raraupari gogona. <sup>43</sup> Apasol kaua babai ma mataira ḡaeḡae maḡamaḡau i kaukauei ma anata-pui i rovo ma God i vivirana-kauei. <sup>44</sup> ✧ Ma tauvitumaḡana anata-pui gabu tagogi i vivitagogiei ma aiwai ḡariei ai rava maiteni i ḡutaḡutai. <sup>45</sup> Tauai ai doa, ai numa, ai wapu ma ai purapura i gimagimarei ma manena ai rava ḡelau maiteni i ḡutaḡutai. <sup>46</sup> Tauai mara patapatai au tempol i vivitagogiei, ma ai au numa ana nuaiiai ma ana morelanai i amam gogona. <sup>47</sup> Ma tauai God i vovoepapai ma rava anata-pui i vivinuaiaini. Ma marana patapatai rava voui i neneiai Iesu awarina ma tauvitumaḡana ai boru i viviratai.

## 3

### *Peter; oroto aena gwaḡagwaḡana i vilawani*

<sup>1</sup> Mara tagogi au bigai 3 oklok, Peter ma John pari aubaina i ḡeḡae au Tempol. <sup>2</sup> Ma oroto tagogi aena gwaḡagwaḡana i tupuei, ma mara au anata-puna ana rava i avavara neiai da Tempol metaetana, e ḡoreḡorei, metaeta aiaina, kampa i vivikialai ma rava i ruirui tempol au orana i vivigimanei mane aubaina. <sup>3</sup> Maranai i 'nanai da Peter ma John

aburuna ava da au metaeta ita rui, ma i vibaḡai mane aubaina. <sup>4</sup> Peter ma John orotona i 'nana-tunutunui ma Peter i riwa, "Ma inanaia!" <sup>5</sup> Ma orotona tau i 'nanai ma i notanotai da aiwai awarii ita vaia. <sup>6</sup> Ma Peter, orotona i riwei, "Awariu silva ma gold eḡa wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

<sup>7</sup> Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana, <sup>8</sup> ma aenei i viauepa ma babara i vikarei. Anina ma tau maiteni i rui au tempol ma tauna tempol oraninei i bababara, i viviauepa ma God i vovoepaepai. <sup>9</sup> Ma rava anatapui orotona i 'nanai i bababara ma God i vovoepaepai, <sup>10</sup> ma i aramanei da tauna ravana tagogina tempol metaetana e ḡoreḡorei *inanana aiaina* au naona, i kiakiala ma i vivigigimana. Ma rava anatapui i 'nanai aiwai i tupua wei orotona awarina ma i ba-guratana.

### *Peter patara awarii i babani*

<sup>11</sup> Ma orotona Peter ma John i vovojijini ma rava anatapui i bana-kauei, ma i viruberubei tau awari au lovelove e ḡoreḡorei, Solomon ana lovelove. \* <sup>12</sup> Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunui, apamina tauai ai rewapani bo ai vipatutuei, wei ravana a kauei da i babara? <sup>13</sup> ✧ Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraḡeni, ma Pilate au matana o geduaiei. Pilate i ḡoei da ita rupeni wate taumi eḡa ota vianinei. <sup>14</sup> ✧ Iesu lamna rava vivivireina ma jijimanina, wate o geduaiei. Ma Pilate i ḡoei da Iesu ita rupeni, wate taumi o ḡoei da tauviraḡena i rupeni aubaimi. <sup>15</sup> Ma taumi lawana maemae-nonoana tauvereina o viraḡeni, wate God i vilawana-melei, tauai wei a vimatematei. <sup>16</sup> Wei ravana aena gwaḡagwaḡana Iesu au wavana i vitumaḡana ma lamna aubaina i lawana. Taumi o aramanei ana doria menanare, Wate ana tumaḡana Iesu awarina i vilawani.

<sup>17</sup> Ma au rava marina a aramanei da taumi ami babada maiteni Iesu o viraḡeni, aubaina taumi eḡa ota aramanei da tauna tauvilawana. <sup>18</sup> Wate wei lamna wariḡa God ana peroveta anatapui i ririweia i tupua, God i riwa da ana tauvilawana ina vinuapoapoe. <sup>19</sup> Ami ḡoa apoapoe Ona voterei ma ona mae-taviremi God awarina da tauna ami ḡo'apoapoe ina nota-tawanei. <sup>20</sup> Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai. <sup>21</sup> Iesu au Mara ina mae da God kua anatapui ina ravivouni, me God ana peroveta vivivirei wariḡa i ririweia nanare. <sup>22</sup> ✧ Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anatapuna e ririwemi ona rautaniḡanana-kauei. † <sup>23</sup> ✧ Ma aiai da wei perovetana eḡa ina rautaniḡanei lamna God ana rava awariei ina vilamonei."

<sup>24</sup> Peroveta Samuel ma muriai Peroveta maḡamaḡaui, kua i ririweia marina e tuputupua. <sup>25</sup> ✧ Taumi nai perovetai natunatui ma taumi maiteni parivainuaḡana bagibagina au orana. Au baina God Abraham i riwei, "Am epaepaia awariei dam anatapui au dobu ana viaiaini." <sup>26</sup> Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tagotagogi ava ami ḡo'apoapoe ota opu-tawanei ma ota nei Tauna awarina.

## 4

### *Jew babadai Peter ma John i etarei*

\* **3:11:** Solomon ana lovelove tagogi tempol au orana e mamae. Wei lamna gari au ririvana ma ana tuatua maḡamaḡauna. ✧ **3:13:** Exo 3:15 ✧ **3:14:** Mrk 15:6-14 ✧ **3:22:** Deu 18:15, 18 † **3:22:** Mai Jew e ririwa da Moses lamna ai peroveta ḡaeḡaena. ✧ **3:23:** Deu 18:19 ✧ **3:25:** Gen 22:18



<sup>1</sup> Peter ma John rava awari i bababani ma pirisi pulo tauapuina ma tempol taupainii\* ai bada ma Sadusi gēloui † i gētai. <sup>2</sup> Tau i amloi i gāigai kua Peter ma John awari aubaina tau i viviararamana da God, Iesu iraḡelei i vovaimairini ma wei i viatataiana da God rava anatapui iraḡelei ina vovaimairini. <sup>3</sup> Tau Peter ma John i pani ma au i pom aubaina panipani au numana i terei da i mae mara. <sup>4</sup> Wate rava maḡamaḡau riwa i nonori ma i vitumaḡana, ma ai maḡa nelara 5,000 waivine eḡa ita iavi.

<sup>5</sup> Ma mara i tom ma Jew babadai, dogadogara ma tarawatu babadai au Jerusalem i vitagogiei. <sup>6</sup> Ma pirisi gēḡetelarana Annas kampa ma Caiaphas, John, Alexander ma pirisi gēḡetelarana ana rava maiteni. ‡ <sup>7</sup> Ma tau Peter ma John i neiei da au naoi i vimairini ma i riwei, “Aiwai rewapananei, ma aiai wavanei wei o kauēi?”

<sup>8</sup> Arua Vivivireina Peter orana i vioai ma tau i riwei, “Rava ai babada ma dogadogara; <sup>9</sup> tauai kua aiaina a kauēi gwaḡagwaḡana awarina ma amadodo taumi o vitara-virevirelai, da menanare tauna i lawananei. <sup>10</sup> Ma wei ona aramana-kauēi, da taumi ma mai Israel anatapui, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi. <sup>11</sup> Taumi tauvoa nai ḡaimana o geduaiei, wate wei ḡaimana lamna numa ogona, numa ana tapuna e vovojijini. §

<sup>12</sup> —Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

<sup>13</sup> Ma tau Peter ma John ai tepatora inanai ma maranai i aramanei da tau i eḡa girugirumai, ma i baei. Ma i aramanei da tau Iesu ana tauvotaḡotaḡo. <sup>14</sup> Ma wate i ’nanai oroto i vivilawania Peter ma John maiteni i maimairi, lamna maranai tau gamoi i pota. <sup>15</sup> Anina ma Peter ma John i riwei da boru gabuna i opu-tawanei, ma tau i ava i vitarairavira vivira. <sup>16</sup> Tau i vitaraviravira-viravira i pa, “Aiwai tana kauēi wei nelarai awari? Rava anatapui au Jerusalem i aramanei da tau kua babai i kaukauēi, lamna eḡa tana boviei. <sup>17</sup> Wate tana viḡaei da wei kauai eḡa ina tua rava gēloui awari, ma riwa bagibaginei tana viḡaei da eḡa aiai awarina Iesu wavanei ina raugugula.”

<sup>18</sup> Anina ma tau i ḡorei da i rui me, ma riwa bagibaginei i viḡaei da eḡa aiai awarina Iesu wavanei ina raugugula bo ina viararamana. <sup>19</sup> Wate Peter ma John tau i paribelei, “Taumi ami nota aiwai. Tauai God ana voteletelei bo taumi? <sup>20</sup> Tauai aiwai a inainanaia ma a nononoria babanina eḡa ana voterei.”

<sup>21-22</sup> Wei Orotona i vivilawani lamna gwaḡagwaḡana ma ana madeḡa 40. Lamna aubaina rava anatapui God i vovoepapai, ma babada eḡa ita aramanei menanare Peter ma John ina kovoḡanei. Ma i parivairovorovo-melei ma i paritawanei da i nae.

*Tauvitumaḡana God i vibaḡai agu aubaina.*

<sup>23</sup> Peter ma John i nae me ai rava awari ma pirisi gaeḡaei ma dogadogara aiwai i ririweia tau i vieḡei. <sup>24</sup> ✧ Maranai tauvitumaḡana wei riwana i nonori, tau anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaei taukauēina. <sup>25</sup> Tam Arua Vivivireinei am taunola, amaiai David gamonei u babani ma u riwa,

*Aiwai aubaina rava awariai e mejimeji,  
ma aiwai aubaina ai oga e taratara labalabai?*

\* **4:1:** Tempol tau-painina lamna anatapuna au tempol e inainana-vaitetei (purusimani). Tau pirisi gēḡetelarana ana taunola. † **4:1:** Sadusi tau iraḡelei vomairime eḡa ita vitumaḡanei ‡ **4:6:** Mai Rome Caiaphas i vinei da Pirisi gēḡetelarana, poiana Annas epaiana. Wate mai Jew ai au giu da aiai pirisi gēḡetelarana vaivaina i vaia, tauna anina ina mae da au iraḡe. Luke e ririwa da Annas tauna pirisi gēḡetelarana. § **4:11:** Mai Jew ai numa ḡaimai i voavoai. Iesu tauna anina God ana Tempol vouna ogona. (Eph 2:19-21, Isa 28:16). ✧ **4:24:** Exo 20:11

<sup>26</sup> *Ma dobu ai gulagulau i vokaukaua ma babada gaegeaei gelau maiteni i vitagogiei da*

*BADA ma ana tauvilawana\* maiteni i viġaviei. (Psalm 2:1)*

<sup>27</sup> ✧ Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulobuloia i viġaviei. <sup>28</sup> Ma tam am rewapani ma am ġoanei am oga menanare u tarataranei marina nanare i tupua. <sup>29</sup> BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei. <sup>30</sup> Uram ma viloloi da ma vilawana ma kaua babai ma mataira gaegeaei ma kauei, am taunola Vivivireina Iesu wavanei.

<sup>31</sup> Ma pari au murina, tau mepa i vivitagogiei gabuna i vigo. Ma Arua Vivivireina anatapui orai i vioai. Ma ana tepatorai God riwana i raugugulei.

### *Tauvitumaġana ġariei i ġutaġutai*

<sup>32</sup> ✧ Tauvitumaġana anatapui ai nota ma orai tagogi. Ma ai purapura tagogi ma eġa aiwai ita nuanei. <sup>33</sup> Ma Apasol ana tepatorai ma rewapani BADA Iesu ana iraġe, ma ana vomairi me i raugugulei. Ma God ana viaiaina gaegeaena tau anatapui awari i peu. <sup>34-35</sup> Ma tau i orai eġa aiwai ita voladaġei aubaina, ai rava gelau ai doa bo ai numa i gimagimarei ma manena i neneiai Apasol awari i tereterei, ma aiwai da aiwai i vovoladaġei nanare i vovoagui.

<sup>36</sup> Me Joseph, tauna Levi ana damei, au Saipras i tupua, ma Apasol tauna i ġoreġorei Barnabas, wei wavana anona lamna tauduġu. <sup>37</sup> Tauna ana doa i gimarei, ma manena i neiai da Apasol awari i terei.

## 5

### *Ananias ma Saphaira*

<sup>1</sup> Anina ma Ananias awana Saphaira maiteni ai doa navanavana i gimarei. <sup>2</sup> Ma airuaġa i vianina tagogi da mane navanavana i nuanei, ma Ananias mane navanavana i naiei da Apasol awari i terei.

<sup>3</sup> Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagimarei manena navanavana u nuanei?” <sup>4</sup> Doa lamna tam ġarimei da uta gimarei bo eġa. Ma maranai u gimarei lamna manena tam ġarimei da uta verenei, aiwai aubaina nota apoapoeni au oram i rui? Tam eġa rava awarina uta moru, wate God awarina u moru.” <sup>5-6</sup> Maranaina Ananias wei riwana i nononori, tauna i peu da i’raġe. Anina ma nelara i rui da tupuana i umai ma i naiei da i doboi. Ma aiavoi da wei riwana i nonori i rovo kaua.

<sup>7</sup> Tau eġa ita mae guratana, ora tonuġa nanare ma awana i nei, aiwai i tupua eġa ita aramanei. <sup>8</sup> Ma Peter wavine i paridadanei, “Abe uta riweu, tam awam Ananias maiteni doa o gimagimarei maiana anina wei bo?” Ma tauna i paribelei, “Ee, doa maiana anina nai.”

<sup>9</sup> Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo ma inanai au metaeta da tam maiteni ina avara-opunem.”

<sup>10</sup> Maratagogi wavine Peter au ae karena i peu da i’raġe. Maranai nelara i rui au numa ma i ’nanai da wavine i’raġe, anina ma i avara-opunei da awana au ririvana i doboi.

<sup>11</sup> Lamna maranaina ekalesia anatapui, ma rava aiavoi da wei riwana i nonori i rovo kaua.

### *Apasol rava maġamaġai i vilawani*

<sup>12</sup> Ma Apasol mataira ma aniba kauai maġamaġai i kaukauei rava awari. Ma tauvitumaġana Solomon ana au lovelove i vivitagogiei. <sup>13</sup> Wate rava gelau ai au boru ruina i rovoei, wate rava tau i vivirana-kauei. <sup>14</sup> Wate nelara ma waivine maġamaġai Iesu

\* 4:26: Wei lamna Keriso. ✧ 4:27: Mrk 15:1 ✧ 4:32: Act 2:44-45

awarina i vitumaḡana ma tauvitumaḡana ai au boru i ruirui. <sup>15</sup> Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eḡa da ḡouna tau i ita ḡouni da ita lawana. <sup>16</sup> Ma melagai ḡelau i Jerusalem au ririvana ravai maḡamaḡau ai rava doridoriai, ḡelau arua-apoapoei i ruiruinia i neiai ma anatapui i vilawani.

<sup>17</sup> Anina ma pirisi ḡeḡetelarana ma ana rava mai Sadusi anatapui orai unura i oai. <sup>18</sup> Ma Apasol i pani, ma panipani au numana i terei. <sup>19</sup> Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei, <sup>20</sup> “Ona rui tempol au orana, ona mairi ma lawana vouna riwana anatapuna rava ona parivere.” <sup>21</sup> Anela i ririwei nanare, tau au tempol i rui ma rava viararamanai i vikarei. Nai maranai pirisi ḡeḡetelarana ana rava maiteni i ḡetai ma boru ḡaeḡaena e ḡoreḡorei Sanhedrin i terei. Ma rava i paritawanei au panipani numana da Apasol ita neiai awari. <sup>22</sup> Tau i panipani au numana i ḡeta ma i baina-avei, ma i naeme da i vieḡa. <sup>23</sup> I pa, “Panipani numana anina i gudu-kauei, ma tauvipaipai au metaeta i maimairi; wate maranai tauai metaeta a votawanei lamna eḡa aiai kampa.” <sup>24</sup> Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

<sup>25</sup> Ma rava tagogi i nei ma i riwa, “Ona rautaniḡana! Nelara panipani au numana o teretereia, tau i tempol e maimairi ma rava e viviararamani.” <sup>26</sup> Anina ma tempol taupainina ai bada, ma babada ḡelau maiteni i nae ma Apasol i neiai. Tau i rovo ma eḡa ita egari mepa da rava ḡaime i ravi.

<sup>27</sup> Ma Apasol i neiai boru ḡeḡetelarana au naoi, ma pirisi ḡeḡetelarana tau i vitara-virevirei. <sup>28</sup> I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tauai o vereverelai.”

<sup>29</sup> Ma Peter Apasol ḡelau aubai i vitauvibabani i pa, “Tauai God ana voteletelei ma eḡa rava. <sup>30</sup> Taumi Iesu au *korosi* o tuparatui ma o viraḡeni, wate amamata ai God Tauna i vovaimairini. <sup>31</sup> Ma marina Tauna God au oiena e kiakiala, Tauna BADA ma Tauvilawana, Da mai Israel ai ḡo’apoapoe ina rupeni, ma ai ḡo’apoapoe ina nota-tawanei. <sup>32</sup> Ma tauai Arua Vivivireina maiteni wei kauai anatapui mataielai a inanai. Ma nanare God Arua Vivivireina i paritawanei rava votelatelai awari.”

<sup>33</sup> Tau i wei babanina i nonori ma amloi i ḡaiḡai kua, ma i ḡoei da Apasol ita viraḡeni. <sup>34</sup> Wate Pharisi ma tarawatu badana wavana Gamaliel, rava anatapui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava. <sup>35</sup> Anina ma ana rava i riwei, “Mai Israel, ona inana kua ma muriai da aiwai wei ravai awari ona kauei. <sup>36</sup> Mara tagogi oroto wavana Theudas viḡavia i vikarei ma i kauana-melei da tauna rava ḡaeḡaena, ma rava ai maḡa 400 nanare tauna i votaḡotaḡoi. Ma maranaina tauna i viraḡeni ana tauvotaḡotaḡo i vilamonei ma aiwai anatapuna kampa i kwa. <sup>37</sup> Wate tauna au murina oroto Galiliei wavana Judas i ḡeta, census au marana ma rava maḡamaḡau tauna i votaḡotaḡoi, ma tauna maiteni i viraḡeni, ma ana tauvotaḡotaḡo i vilamonei. <sup>38</sup> Lamna aubaina a ririwemi da wei ravai ona voteretawanei! Mepa da tau i nola ravei, amapo ina peu. <sup>39</sup> Wate mepa da Godei, taumi eḡa tagotagogina da wei ravai ona viḡaei, taumi mepa da God o viviḡaviei.”

<sup>40</sup> Tau i Gamaliel ana babani i voteletelei. Ma Apasol i riwei da i rui, ma i wipiei i kwapui ma i viḡaei da Iesu wavanei ina jima, ma i paritawanei da i nae.

<sup>41</sup> Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiiai Sanhedrin i opu-tawanei, <sup>42</sup> Tau i mara patapatana tempol au orana ma au numa God riwana aiaina i raraugulei ma i viviararamana da Iesu tauna Keriso.

## 6

### *Stephen i vinei tauvoaḡu*

<sup>1</sup> Tauvitumaḡana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tau i beubeura da ai kaikaiababa ai ḡuta eḡa ita tereterei.

<sup>2</sup> Anina ma Apasol 12 tauvitumaḡana ai boru i raukwatuei. Ma i riwei, “Tauai Apasol ma ai nola lamna God riwana ata jimejime i ma avena mane nolana maiteni ata kaukauei.

<sup>3</sup> Lamna aubaina au rava, awarimi rava 7 ona vinei, tau i orai Arua Vivivireina i oai ma nuaulaulai da wei nolana ina kauei, <sup>4</sup> Ma tauai ai nola da pari ma God riwana ava ana jime i.”

<sup>5</sup> Rava anatapu i wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

<sup>6</sup> Ma wei ravai i nei i ma Apasol nimai tau i au tepai i terei ma i raupariei.

<sup>7</sup> Anina ma God riwana i vituai ma au Jerusalem rava maḡamaḡau i Iesu i vitumaḡanei, ma nanare pirisi maḡamaḡau i vitumaḡana.

### *Stephen i pani*

<sup>8</sup> Anina ma God Stephen i viaiaini ma i vovai-virewapani da mataira ma kaua babai i kaukauei rava awari. <sup>9</sup> Wate mai Jew ḡelau i provins nununai i nei mai au Sairini,

mai Alexandria, ma Silisia ma Eisia ai parinumana e ḡoreḡorei panipani \*waduboi, Stephen ana ḡavia i vomairi. <sup>10</sup> Wate Arua Vivivireina, Stephen nuaulaula ma riwa

i verei ma i bababani da tau i vigaopotai. <sup>11</sup> Lamna aubaina tau i rava ḡelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma

God i vivijiboḡi.” <sup>12</sup> Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau i Stephen i vojijini ma i naiei mai Jew ai Boru ḡeḡetelaranat†

awarina. <sup>13</sup> Ma tau i rava ḡelau i nei i da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi.

<sup>14</sup> Tauai a nonori i riwa da Iesu Nasaretei tempol ina rikai ma tarawatu Moses i verevereta anatapu i maiteni ina virai.”

<sup>15</sup> Ma rava anatapu i nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

## 7

### *Stephen ana babani.*

<sup>1</sup> Anina ma Pirisi ḡeḡetelarana Stephen i paridadanei, “Wei viwavuna, riwa kaua bo?”

<sup>2</sup> \*Stephen i paribelei:

Varevareiu ma amamau, au babani ona rautaniḡanei. God boruborumana noita Abraham awarina i eḡa au Mesopotamia, muriai da ita nae au Haran. <sup>3</sup> Ma God tauna i riwei, *Am dobu ma am dam ma netawanei da ma nae dobu ana viatataiem lana.*

<sup>4</sup> \*Anina ma Abraham Mesopotamia i netawanei ma i nae da au Haran i mae. Amana i'raḡe ma au murina God Abraham i paritawanei da marina dobuna o mamae lana kampa ita mae, <sup>5</sup> \*Nai maranaina God eḡa Abraham doa ita verei, eḡa aburu dadadana! Wate i parivainuaḡani, da ina verei tauna ma ana epaepaia aubaii. Nai au marana Abraham eḡa natunatuna, <sup>6</sup> \*ma God wenanare Abraham i riwei, *Am epaepaia au dobu ḡela ina mae ma ina vitaunola, nai dobuna ravai tau i ina rau-iviapoapelei da madeḡa*

\* **6:9:** Wei ravai lamna slave waduboi, marina i voterei da ana ḡoanei e mamae. † **6:12:** Sanhedrin. ☆ **7:2:** Gen 12:1 ☆ **7:4:** Gen 12:4 ☆ **7:5:** Gen 12:7; 13:15; 17:8 ☆ **7:6:** Gen 15:13-14

400 ina kwa. <sup>7</sup> ✧ Wate ravai, awarii e vivitaunola ana kovoḡi, ma muriai mai Israel ina opui ma wei au dobuna ina voepaepaiu. <sup>8</sup> ✧ Anina ma God inibori parivai-nuaḡanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunatuna 12 anatapui inii i bori. Wei babadai lamna tauta noinoita.

<sup>9</sup> ✧ Jacob natunatuna varei Joseph i unurei ma i gimarei da ita vitaunola au Egypt, wate God tauna awarina i mae. <sup>10</sup> ✧ Ma ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei. <sup>11</sup> ✧ Ma gomara ḡaeḡaena i ḡeta au Egypt ma au Canaan, ma vinuapoapoe ḡaeḡaena i tupua. Ma noinoita eḡa ai lam. <sup>12</sup> Ma maranai Jacob i nonori da au Egypt lam, ma noinoita i paritawanei au Egypt, wei ai babara naona. <sup>13</sup> Ma muriai i nae me ma wei maranai Joseph i vieḡana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei. <sup>14</sup> ✧ Anina ma Joseph riwa i paritawanei amana Jacob awarina ma i riwei da ana numa ravai anatapui, ai maḡa 75, ita nei au Egypt. <sup>15</sup> ✧ Anina ma Jacob i nae au Egypt. Tauna kampa i raḡe ma nanare natunatuna anatapui. <sup>16</sup> Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

<sup>17</sup> ✧ Maranai mara i tuḡereḡerei da God Abraham i paripari-vainuaḡania ita kauei, ata patara i maḡa guratana au Egypt. <sup>18</sup> Ma Pharaoh vouna au Egypt i vibada ma tauna noita Joseph eḡa ita aramanei. <sup>19</sup> ✧ Tauna amamata i morui ma i rau-iviapoapoelei, i egari da natunatui melamelai numei i viopuni da ita iraḡe. <sup>20</sup> ✧ Wei au marana Moses i tupua, tevera inanana aiaina. Amana ma alona natui i ḡamoi da nawaravi tonuḡa i kwa. <sup>21</sup> ✧ Ma maranai tevera numei i tere-opunei, gulau natuna guguinina tevera i vaia ma i ḡamoi da natuna. <sup>22</sup> Ma mai Egypt ai nuaulaula Moses i viararamani ma i virewapana, babani ma nola awarina.

<sup>23</sup> ✧ Moses ana madeḡa 40 ma i nota da ita nae ana dam ravai ita raugenari. <sup>24</sup> Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i virāḡeni. <sup>25</sup> Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eḡa ita aramanei. <sup>26</sup> Ma maratamna Moses i nae me ma ana rava ruaḡa i viḡaiḡaiawa i 'nanai, ma i riwei, "Taumi ava ma aiwai aubaina o viḡaiḡaiawa?" <sup>27</sup> Wate ḡaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?" <sup>28</sup> Tam ma virāḡeniu me pom Egyptei u virāḡeni nanare bo?" <sup>29</sup> Maranai Moses wei i nonori tauna Egypt i rubatawanei ma i nae au Midian, wei eḡa ana dobu wate kampa i mae. Muriai dobuna wavinena i ravaḡi ma natunatuna nelarai ruaḡa i tupua.

<sup>30</sup> ✧ Ma kampa i mae madeḡa 40 i kwa ma BADA ana anela au mutulua ola Sinai au ḡereḡerena tauna awarina i eḡa, inanana me ai menamenana ai aburuna rugurugui au orana i ḡeḡae. <sup>31</sup> Wei i 'nanai ma i baei ma i nae au ḡereḡere da ai arata ita tuvirevirei ma i nonori BADA i riwa i pa, <sup>32</sup> "Tau amamam ai God, Abraham ma Isaac ma Jacob ai God." Maranai Moses wei i nononori i rovo kaukaua ma naona i tere-govaḡi. <sup>33</sup> Ma BADA i riwa, "Am ae uma ma votawanei! Wei gabuna au tepana e maimairi, lamna doa vivivireina ma Viaiainana. <sup>34</sup> A inanai menanare mai Egypt, natunatu e rarau-iviapoapoelei. Ai oratou a nonori ma a ḡairai da tau i ata vai-tawanei. Ma marina ma nei, Tau ana paritawanem au Egypt."

✧ 7:7: Exo 3:12 ✧ 7:8: Gen 17:10-14; Gen 21:2-4; Gen 25:26; Gen 29:31-35:18 ✧ 7:9: Gen 37:28; Gen 39:2-21  
 ✧ 7:10: Gen 41:39-41 ✧ 7:11: Gen 42:1-2 ✧ 7:14: Gen 45:9-10, 17-18 ✧ 7:15: Gen 46:1-7; Gen 49:33 ✧ 7:17: Exo 1:7-8 ✧ 7:19: Exo 1:10-11; Exo 1:22 ✧ 7:20: Exo 2:2 ✧ 7:21: Exo 2:3-10 ✧ 7:23: Exo 2:11-15 ✧ 7:30: Exo 3:1-10

35 ✨ Stephen i riwa:

Wei Moses na tagogina, mai Israel i parivirevirei i pa, “Aiai i terem da tauai ma vibadelai ma ma rauetarelai?” Moses i paritawaneiai da ita vibademi ma ita tereopunemi, anela i eḡaeḡa ai menamenana au poui, ana aguei. 36 ✨ Ma Moses tau i Egypte i ravena-opunenei ma mataira babai ma vivirewapanai i kaukauei au Egypt, Boga lebalebarina ma ai au vaḡai madeḡa 40 au mutulua. 37 ✨ Wei Moses-na tagogina, mai Israel i riwei, “God muriai peroveta ami damei ina paritawaneiai me tau.” 38 ✨ Moses Israel patarana maiteni Egypt i opu-tawane i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamane tauta awarita. 39 Wate noinoita Moses i parivirevirei ma au orai i ḡoei da ita nae me au Egypt. 40 ✨ Ma tau i Aaron i riwei, “Nai ravana Moses, Egypte i taravai-opunelai, tauai eḡa ata aramane aiwai awarina i tupua. Ma tauai ai god kokoitau ma kauai da ina rauetaraveniai.” 41 ✨ Anina ma bulumakau ḡaubona kokoitauna i kauai, ma pulo i apui awarina ma i amei ma i umei, da aiwai uraiei i kaukauei i vimae-ḡaeḡaeni. 42 Wate God tau i mae-puputei ma i voterei da ubona ma nawaravi ma madeḡa au mara i vimae-ḡaeḡaeni. Wei lamna peroveta nununai i ririweia i tupua:

*Rava mai Israel! Maranai madeḡa 40 au mutulua.*

*Taumi eḡa Tau awariu ḡamoḡamo ota vunui ma ota apui tapa?*

43 Taumi ami god Molek ana numa gara ma ami ubona god kokoitauna Rephan o avarai. Kokoitau o kauai da ota vimae-ḡaeḡaeni.

*Lamna aubaina rava borui ami au dobu ina vainimi ma ina naiemi aueia, Babilon ina netawane i dobu au ḡelauna. (Amos 5:25-27)*

44 ✨ Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare. 45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 ✨ God, David nuanuana i vai-kauai ma David i vibaḡa da tauna God ana numa ita voai. 47 ✨ Wate David eḡa numa ita voai ma natuna Solomon numa i voai. 48 Wate God ḡeḡetelerana eḡa rava uranei numa ita voavoai au orana ita mamae, me peroveta wariḡa i riwa i pa:

49-50 *Aubaina Tau aiwai anatapuna au mara ma au dobu a kauai. Tapa?*

BADA i riwa, “Mara\* au anikiala ma dobu aeu kareu aniterenana.

*Wate numa aiwaina ona voai tau aubaiu? Eḡateni!*

*Tau au animae-kaua mepa? Eḡa mepa! (Isaiah 66:1-2)*

51 Ma Stephen i riwa:

Taumi orami badobadoi. Ma eḡa ota ḡoeḡoei da God ona voteletelei ma taniḡami o vopotai da ana riwa eḡa ota nononori. Taumi Arua Vivivireina o vivigaviei me noinoimi i kaukauei nanare. 52 Noinoimi metau perovetai eḡa ita rau-iviapoapoelei. Wariḡa perovetai, God ana tauvilawana, ana nei i vinolenolei; Wate noinoimi wei perovetai maiteni i viraḡeni. Ma marina Tauna i nei ma o vibenabenamei ma o viraḡeni. 53 God ana anela i paritawaneiai da ana tarawatu noinoita i verei, wate taumi tarawatuna eḡa ota voteletelei.

*Stephen ḡaime i viraḡeni*

✨ 7:35: Exo 2:14 ✨ 7:36: Exo 14:21; Num 14:33 ✨ 7:37: Deu 18:15, 18 ✨ 7:38: Exo 19:1-20:17 ✨ 7:40: Exo 32:1 ✨ 7:41: Exo 32:2-6 ✨ 7:44: Exo 25:9, 40 ✨ 7:46: 2Sa 7:1-16 ✨ 7:47: 1Ki 6:1-38 \* 7:49-50: Wei anona lamna Bada wenanare natuna i riwei, “Tam au oieu ma kiala ma am ḡavia au ae kareu ana tuvaidoedoei”

<sup>54</sup> Maranai babada wei riwana i nonori ma i meji guratana ma ivoi i uta-giri-giriei Stephen awarina. <sup>55</sup> Wate Arua Vivivireina Stephen orana i oai, i taepai au mara ma God ana boruma i 'nanai, ma Iesu God au oiena i maimairi. <sup>56</sup> Ma i riwa, "Ona inana! Mara metaetana i wanatawanei ma Rava Natuna a inainanai God au oiena e maimairi." <sup>57</sup> Marina tau i anatapui taniḡai i vopotai, i vigaragarei ma Stephen aubaina i ruba, <sup>58</sup> ma i taina-opunei au doa, taon i opu-tawanei da au ririva ma ḡaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni. <sup>59</sup> Tau i viraureaui ma tauna i raupari i pa, "BADA Iesu, aruau ma vaia! <sup>60</sup> Ma ae-tutunei i peu ma i garara, "BADA ai ḡo'apoapoe ma nota-tawanei." Wenanare i riwa ma i'raḡe.

## 8

<sup>1-2</sup> Ma Saul kampa da Stephen ana iraḡe i 'nanai ma i vianinei. Rava patupatutui ḡelau ana toutoui ma ana tarakwatui i nei ma Stephen taubeuna i naiei ma au kokoaga i terei.

### *Saul Ekalesia i rau-iviapoapoelei*

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anatapui i viruba-tomana au Judea provins ma Samaria provins. Apasol ava au Jerusalem i mae. <sup>3</sup> ☆Wate Saul i vikarei da ekalesia ai boru ita viamoai. Numa anatapui i ruini ma nelara ma waivine i taina-opunei ma i paritawanei au panipani-numana.

### *Philip au Samaria*

<sup>4</sup> Wate tauvitumaḡana Jerusalem i rubaruba-tawanei taon ma dobu anatapuna i naeni ma Riwana Aiaina i raugugulei. <sup>5</sup> Ma Philip i nae au taon tagogi au Samaria ma kampa BADA ana Vinevine Keriso i raugugulei. <sup>6</sup> Maranai patarana, Philip i raraugugula i nonori, ma i 'nanai kua babai ma mataira ḡaeḡae i kaukauei tau i anatapui orai taputapunei i rautaniḡana. <sup>7</sup> Tauna arua-apoapoei rava maḡamaḡau i orai i egari da ana garagararai i viopuopuana, ma nanare rava maḡamaḡau gwaḡagwaḡai ma sigesigei i vilawani. <sup>8</sup> Ma nuaiai ḡaeḡaena i mae nai au taona.

### *Simon tauna barabaravuna*

<sup>9</sup> Wenanare, nai au taona oroto tagogi i mae wavana Simon, ma tauna wariaga ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena. <sup>10</sup> Rava labalababa, ma wavai naenaei anatapui ana babani i rarautaniḡana-kauei ma i ririwa, "Tauna, God ana rewapana e ḡoreḡorei, Rewapana Ḡaeḡaena." <sup>11</sup> Tau i vineneḡanana-kauei aubaina mara nonoa tau i Simon ana baravu i baebaei. <sup>12</sup> Wate tau i Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito. <sup>13</sup> Simon maiteni i vitumaḡana ma i babataito. Ma Philip mepa i nena tauna kampa aubaina kua babai ma mataira vivirewapanai i kaukauei. Tauna wei pulona i bana-kauei.

<sup>14</sup> Maranai Apasol au Jerusalem i nonori da mai Samaria, God Riwana i vitumaḡanei, tau i Peter ma John i paritawanei awari. <sup>15-16</sup> Ma au Samaria i ḡeta ma tau i raupariei da Arua Vivivireina ita rui au orai. Aubaina tau i Iesu wavanei ava i babataito. Ma arua vivivireina eḡa ita rui. <sup>17</sup> Peter ma John urai tau i terei ma i raupari da Arua Vivivireina au orai i rui. <sup>18</sup> Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi, <sup>19</sup> ma i vibaḡa i pa, "Tau maiteni nai rewapanana ma vereu da rava au kolai urau ana terei ma tau i Arua Vivivireina ina vaia." <sup>20</sup> Wate Peter i paribelei i pa, "Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai! <sup>21</sup> Tam wei nolana au orana am gabu eḡa ita mamae, aubaina oram eḡa ita ai

☆ 8:3: Act 22:4-5; 26:9-11

God au matana. <sup>22</sup> Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei. <sup>23</sup> Aubaina a inanim da unura oram i oai tauai awariai ma wei notai apoapoei e panipanim.” <sup>24</sup> Simon marina Peter ma John i riwei, “Aubaiu BADA awarina ona raupari da aiwai o ririwei eḡa ina tupua awariu!”

<sup>25</sup> Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

### *Philip ma Ethiopiei*

<sup>26</sup> Mara tagogi BADA ana anela, Philip i riwei, “Ma vokaukaua ma ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua). <sup>27</sup> Anina ma Philip i vokaukaua ma i nae. Ma wei au etanaina oroto Ethiopiei i ’nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina, <sup>28</sup> ma i nena-me ana au dobu. Ma ana au chariot i kiala ma wariḡa peroveta Isaiah buka i girugirumia i ’aiavi. <sup>29</sup> Ma Arua Vivivireina Philip i riwei, “Ma nae ma chariot au ririvana ma babara-nae.” <sup>30</sup> Anina ma Philip i ruba chariot au ririvana ma i nonori badana peroveta Isaiah ana buka i ’aiavi. Ma Philip i paridadana, “Aiwai e iaiavia e araramanei bo eḡa?” <sup>31</sup> Orotona i paribelei, “Menanare ana ’ramananei mepa da rava eḡa ita parivai-araramaniu!” Ma Philip i vibaḡai da i ḡeta da au ririvana i kiala. <sup>32</sup> Buka au orana, wei riwana i ’aiavi,

*Tauna i taravaina-naiei me sipu viragēnana aubaina  
me sipu natuna e genugenuana maranai aparana e boribori,  
tauna eḡa aiwai ita latoni.*

<sup>33</sup> *Tauna i vijiboḡi ma i vimalamalalai ma eḡa ita kauana-kauei awarina.  
Aiai ana epaepaia ina babaniei.*

*Aubaina ana mara au dobu i vaitawanei.”*

*(Isaiah 53:7-8)*

<sup>34</sup> Ma orotona, Philip i paridadanei, “Isaiah e babaniana-melei bo rava ḡelauna e babaniei?”

<sup>35</sup> Ma Philip, wei riwana awarina i vikarei ma riwa ḡelau maiteni ma Iesu Riwana Aiaina i viaramani. <sup>36</sup> Ma i nena da waira i ’nanai ma Ethiopiei i riwa, “Ma inana waira noi, aiwai aubaina da eḡa ana babataito?” <sup>37</sup> \* <sup>38</sup> Badana, chariot taurubeina i riwei, “Chariot ma vojijini” Ma tauna ma Philip i ḡaira waira au orana ma Philip, badana i babataitoi. <sup>39</sup> Maranai wairei i ḡeta, BADA Aruana maratagogi Philip i vai-tawanei ma turana eḡa ita inana-melei, ma ana morelanana i nae ana au dobu. <sup>40</sup> Wate Philip au Asotus i raueḡa ma dobuna i naeni ma Riwana Aiaina i raugugulei da au Caesarea taon i ḡeta.

## 9

### *Saul i vitumaḡana*

<sup>1</sup> Wate Saul amapo da i mejimeji ma i ḡoeḡoei da BADA ana tauvitumaḡana ita viraḡeni. Ma i nae Pirisi Ġetelarana awarina, <sup>2</sup> ma i vibaḡai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaḡanai, nelara ma waivine ita pani ma ita neiai au Jerusalem. <sup>3</sup> Ma Saul, Damaskas i tuḡereḡerei, nanare ma lalalaina marei i ḡairai da tauna i ravilalai. <sup>4</sup> Tauna i peu au doa ma pona i nonori awarina i babani i pa, “Saul, Saul! Aiwai aubaina e rarau-iviapoapoeleu?”

<sup>5</sup> Saul i paridadana, “Tam aiai bada?”

Ma pona i paribelei, “Tau Iesu, tauna e rarau-iviapoapoelei! <sup>6</sup> Marina ma vomairi ma ma rui au Damaskas, ma kampa aiwai ina riwem ma kauei.”

\* **8:37:** Buka wadubo nonoana vs 37 eḡa ita maae.



<sup>7</sup> Nelara Saul maiteni i nenaē i mairi kwakwa, ana gamopotai, tau i pona i nonori wate eġa aiai ita inana. <sup>8</sup> Ma Saul au doa i matamatave i vomairi ma matana i kala, wate eġa aiwai ita inana. Ma ana rava i raunimavoai ma i taravaina-naiei au Damaskas. <sup>9</sup> Ma au pom tonuġa eġa ita inana, eġa ita am bo ita uma.

<sup>10</sup> Au Damaskas tauvitumaġana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

<sup>11</sup> BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu. <sup>12</sup> Ma ana au inana i ’nanai oroto wavana Ananias i nei awarina ma urana au inana i terei da ita inana-me.”

<sup>13</sup> Wate Ananias i paribelei, “Bada, rava maġamaġau i riweu da wei ravana ana kaua i apoapoe kaua tauvitumaġana awarii au Jerusalem! <sup>14</sup> Ma weka i nei pirisi ġaeġaei ai rewapanei da aiai wavam e viviborumei ina pani.”

<sup>15</sup> Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii. <sup>16</sup> Tau ana viatataiei da aubaiu ina jima ma rau-iviapoapoe ġaeġaena ina nei awarina.”

<sup>17</sup> Anina ma Ananias i ġeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i eġa maranai weka u nenei, i paritawaneu awarim da ma inana me ma Arua Vivivireina oram ina vioai.” <sup>18</sup> Maratagogi purapura inanana me iana wenavina au matana i peu, ma tauna, inana me. Ma i vomairi ma i babataito. <sup>19</sup> Ma i am ma ana rewapana i vai-melei.

### *Saul au Damaskas i raugugula*

<sup>20</sup> Ma tauna maratagogi i nae ma pari au numai i raraugugula da Iesu anina God natuna. <sup>21</sup> Tau aiavo i da Saul i nonori i ba kaua ma tau i ava i babani vivira i pa, “Wei ravana tagogina, rau-iviapoapoe ġaeġaena Iesu ana tauvitumaġanai awarii i kaukauei au Jerusalem bo? Tauna i nei weka nolana tagogina aubaina da tauvitumaġana ita pani ma ita naiei Pirisi babadai awarii bo.” <sup>22</sup> Wate Saul ana raugugula i virewapana kaua ma lamnei mai Jew au Damaskas i aramanei da Iesu anina Keriso, Vinevinena, ma lamna aubaina ana babani eġa ita parivirevirei.

<sup>23</sup> Ma au pom biaġa au murina Jew babadai i viogatara da Saul ita viraġeni. <sup>24</sup> Mai Jew marai ma waguvarai taon garina au metaetana i vipaipai da Saul ita viraġeni. Wate Saul ai ogatara riwana i nonori. <sup>25</sup> Ma waguvarai tauvitumaġanai ġelau i bada Saul i taravaini ma iriga ġaeġaena au orana i poai ma gavogavo aburuna taon au garina, kampa ġuravei i tere-ġairei au doa ma i ruba.

<sup>26</sup> Saul i ġeta au Jerusalem ma maranai i ġoei da tauvitumaġanai ai au boru ita rui. Wate tau i rovoei ma eġa ita vitumaġanei da tauna Iesu ana tauvotaġotaġo. <sup>27</sup> Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i ’nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei. <sup>28</sup> Anina ma tau i Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei. <sup>29</sup> Ma nanare Saul mai Jew pona Greek taubabanieina maiteni i babani ma i viparipariġai, ma tau i viogatara da tauna ita viraġeni. <sup>30</sup> Maranai tauvitumaġana ġelau wei i nonori, ma Saul i taravaina-naiei au Caesarea da i paritawanei au Tarsus.

<sup>31</sup> Anina ma ekalesia au Judea, Galili ma Samaria ana nuaubaii i mae. Ma Arua Vivivireina ana aguei ekalesia ai tumaġana i vovai-virewapani, Ma ai boru i rarata, ma tau BADA i vivirana-kauei.

### *Aeneas ma Dorkas*

<sup>32</sup> Nai maranaina Peter dobu maḡamaḡau i naeni, ma God ana tauvitumaḡana awarii i ḡeta au Lidda. <sup>33</sup> Kampa oroto wavana Aeneas i nelaḡai, tauna gwaḡagwaḡana madeḡa 8 ana au aravi i matave. <sup>34</sup> Peter i riwa, “Aeneas, Iesu Keriso i vilawanim! Ma vomairi ma am aravi ma noui!” Ma maratagogi i lawana. <sup>35</sup> Anina ma rava maḡamaḡau au Lidda ma Sharon wapuna melagaina, i mae-tavirei BADA awarina.

<sup>36</sup> Au Joppa tauvitumaḡana tagogi wavana Tabitha (Greek ponanei lamna Dorkas) tauna marana patapatana kaua maḡamaḡau aiaii i kaukauei molamokai aubaii. <sup>37</sup> Wei marana tauna i doria ma i’raḡe ma tupuana i oḡai ma numa vatavatara au aidamo, i vimataveni. <sup>38</sup> Lidda, lamna Joppa au ḡereḡerena ma maranai tauvitumaḡana i nonori da Peter au Lidda, tau i ai rava ruaḡa i paritawanei da Peter i egari i pa, “Laḡilaḡina ma nei!”

<sup>39</sup> Ma Peter tau i maiteni i nae da i ḡeta ma i taravaina-ruiei au numa vatavatara. Kaika-iababa maḡamaḡau ana toutoui Peter i mairi kwaviviroi. Maranai Dorkas lawalawaina ma kwama da gara i popopoia Peter i viatataiei.

<sup>40</sup> Wate Peter anapui i vibaḡai da i opu au doa, ma ae-tutunei i mae-ḡaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i ’nanai, i vomairi da i kiala. <sup>41</sup> Peter urana i viloloi ma i voagui da i vomairi. Ma tauvitumaḡana anapui ma kaikaiababa maiteni i kwatueiai, ma wavine lawalawaina tau i verei. <sup>42</sup> Ma wei riwana dobu Joppa i naeni ma rava maḡamaḡau Iesu i vitumaḡanei. <sup>43</sup> Peter au Joppa i mae au pom biaḡa nanare Simon ḡamoḡamo opina taurauḡaroḡaroeina ana au numa.

## 10

### *Peter ma Cornelius*

<sup>1</sup> Au Caesarea oroto\* wavana Cornelius, tauna mai Italy sorodia boruna ai bada. <sup>2</sup> Tauna rava jijimanina ma patupatutuna, ma ana numa ravai maiteni God tau-rauduneleina. Ma molamolakai i paipaina-kauai ma marana patapatatai i raraupari God awarina. <sup>3</sup> Au bigai tagogi 3 oklok nanare i raraupari ma ana au inana, God ana anela au aiaina i ’nanai, i nei awarina ma i riwa, “Cornelius!”

<sup>4</sup> Cornelius ana rovona anela i ’nana-tunutunui ma i riwa, “Au bada, menanare!” Ma anela i paribelei, “Am pari ma am verena molamolakai awarii, i ḡeta God awarina me pulo apuapunana ḡabuna. <sup>5</sup> Ma marina nelara ḡelau ma paritawanei au Joppa ma ravana wavana Simon wavana ḡelauna Peter ina taravainiai. <sup>6</sup> Tauna rava wavana Simon, ḡamoḡamo opina taurauḡaroḡaroeina awarina e mamae gera au ririvana.”

<sup>7</sup> Maranai anela i nae, Cornelius ana taunola ruaḡa i ḡoreiai, ma ḡelauna lamna sorodia, tauna ana tauvipaipai, tauna God tauvitumaḡaneiana. <sup>8</sup> Tauna aiwai anapuna tau i riwei ma i paritawanei au Joppa.

### *Peter Cornelius i raugenari*

<sup>9</sup> Maratomna au benai nanare maranai nelarai Joppa i tuḡereḡerei, Peter i ḡeta numa au tepana da ita raupari. <sup>10</sup> Ma am i ’raḡe ma i ḡoei da aiwai ita ani, maranai tau i lam i vovokaukauei, ma Peter matanei rauboni i ’nanai. <sup>11</sup> I ’nanai mara i wanatawanei ma purapura inanana me puru ḡaeḡaena au adana 4 i vojijini ma marei i tere-ḡaireiai au dobu. <sup>12</sup> Au orana lamna sia tapuna ma tapuna, tetetei me mota ma kiu au aidamo lavelavei. <sup>13</sup> Ma pona i riwa, “Peter ma vomairi, ma viraḡena ma ma am!”

<sup>14</sup> Wate Peter i paribelei, “Eḡa! Lamna eḡa melanai ana kauai. Eḡa melanai lam viviḡana ata am-dadani.”

<sup>15</sup> Wate pona i babani me, “Aiwai God i viviaiainia, eḡa ma riwa da i apoapoe.”

<sup>16</sup> Mara tonuḡa wenanare i tupua ma me marana puruna i ḡaiana-melei au mara.

\* **10:1:** Wei ravana jentail.

<sup>17</sup> Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaḡai ma i ḡeta ana au metaeta. <sup>18</sup> Tau i paridadana, "Weka rava wavana Simon-Peter e mamae bo eḡa?"

<sup>19</sup> Peter amapo da wei i vivinua-notenotei maranai Arua vivivireina i riwa, "Simon, nelara tonuḡa e baibaie! <sup>20</sup> Lamna aubaina ma vomairi ma ma ḡaira au gabaura, eḡa ma geduai, aubaina tau a paritawanei awarim."

<sup>21</sup> Peter i ḡaira ma awarii i riwa, "Taumi tau o baibaieu bo, Ami ḡoana aiwai?"

<sup>22</sup> Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maḡamaḡau tauna e vivivirei. Anela vivivireina i riwei da uta nei ana au numa da aiwai u araramanei uta riwei." <sup>23</sup> Ma Peter nelarai i ḡorei da i rui au numa ma kampa i matave.

### *Peter Cornelius ana au numa*

Ma maratamna anapui i nae, Tauvitumaḡana ḡelau i Joppa maiteni i vomairi. <sup>24</sup> Ma au pom ḡelauna tau i Caesarea i ḡeta. Cornelius tau i paipaini, ma ana numa ravai ma ana rava i ḡorei da i nei. <sup>25</sup> Ma maranai Peter i ruirui au numa, Cornelius Peter i 'nanai ma i mae-ḡaira au ae karena ma ana vivirana i raudune. <sup>26</sup> Wate Peter tauna i voepai ma i riwa, "Ma vomairi, Tau rava ota me tam."

<sup>27</sup> Peter ma Cornelius i bababani ma i ruirui au numa. Ma i 'nanai da patara tauna i paipaini. <sup>28</sup> Peter tau i riwei, "Taumi o aramana-kauei da tauta mai Jew ata tarawatu e viviḡaeta da Jentail maiteni tana mae-gogona bo tana raugenari. Wate God i viatataieu da eḡa rava ana ḡorei rava apoapoena bo miramirana. <sup>29</sup> Lamna aubaina maranai u vibaḡaiu da ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?"

<sup>30</sup> Cornelius i paribelei, "Au benai wenanare au pom 4 marina i kwa, au numa a raraupari, nanare ma rava ana gara arapoirina ma namanamarina au naoiu i raumairiei. <sup>31</sup> Ma i riwa, 'Cornelius! God am pari i nonori ma am verena molamolakai awarii i vinuaiaiei! <sup>32</sup> Ma nelara ma paritawanei au Joppa da Simon e ḡoreḡorei Peter awarina. Tauna Simon, ḡamoḡamo opina taurauḡaroḡaroena ana au numa e mamae.' <sup>33</sup> Lamna aubaina da am riwa laḡilaḡina ava a paritawanei, ma i ai da tam u nei. Tauai anapui ai marina weka God au matana a vivipaipai da BADA aiwai i riwem ana nonori."

### *Peter ana babani*

<sup>34</sup> Ma Peter babani i raukarei, "Marina a inana-kauei da God rava anapui e vaivaia da tagogina. <sup>35</sup> Wate dobu dobuai ravai God e vivivirei ma kaua aiiai e kaukauei, Tauna wei ravai e ḡoḡoḡoi, <sup>36</sup> Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaḡanei ma tauna ai lawana ina vibadei. <sup>37</sup> Taumi o aramanei Iesu aiwai i kauei Judea au anapuna, au Galili i vikarei maranai John babataito ai kaua i raugugulei. <sup>38</sup> God Arua Vivivireina ma rewapana Iesu Nasarete i verei da dobu maḡamaḡau i naeni ma kaua aiiai i kaukauei, ma rava au orai arua apoapoe i ruiruini, i vilawani.

<sup>39</sup> —Aiwai anapuna au Judah provins ma au Jerusalem i kaukauei tauai anapui ai i vimatematei ma a bababaniei. Tauna au korosi i tutui da i'raḡe. <sup>40</sup> Wate God tauna iraḡelei i voepa-melei aupom au vitonuina ma i kauei da ḡelauai awariai i eḡa. <sup>41</sup> Eḡa rava maḡamaḡau tauna ita inana, anina tauvimatamata i vinevinei awari ava i ḡeta. Lamna tauai maiteni a uma ma am ana vomairi au murina. <sup>42</sup> Ma i egariai da dobu au anapuna ana raugugula ma ana jima da God Iesu i vinei da rava anapui lawalawaii ma irairaḡei ina rauetarei. <sup>43</sup> Peroveta anapui i jimei da maranai rava Iesu i vitumaḡanei, Tauna wavinei God tau ai ḡo'apoapoe ina vaitawanei."

<sup>44</sup> Maranai Peter i bababani ma Arua Vivivireina i ġairai ma rava i raurautaniġana i vioai. <sup>45</sup> Ma mai Jew Joppei i nenei Peter maiteni, i ba kua maranai God Arua Vivivireina i paritawana ġairei Jentail awarii. <sup>46</sup> Au baina mai Jew i nonori tau i pona tapunei i bababani ma God i vivimae-ġaeġaeni. Anina ma Peter i riwa, <sup>47</sup> “Tau i Arua Vivivireina i vaia me tauta. Wei lamna aubaina eġa aiai ina viġaeta da wei ravai tana babataitoi.” <sup>48</sup> Ma tau i Cornelius ana numa ravai maiteni ma ana rava ġelau i Iesu Keriso wavanei i babataitoi, ma tau i Peter i vibaġai da maiteni ita mae mara aburuna.

## 11

### *Peter ana babani*

<sup>1</sup> Apasol ma tauvitumaġana au Judea provins i nonori da Jentail maiteni God riwana i nonori ma i vitumaġana. <sup>2</sup> Ma maranai Peter i ġeta me au Jerusalem tauvitumaġana mai Jew ġelau tauna i eni i pa, <sup>3</sup> “Tam Jentail ai au numa u rui, ma maiteni u am!”

<sup>4</sup> Anina ma kua menanare i tuputupuanei anapuna Peter tau i parivere: <sup>5</sup> I riwa i pa:

Maranai a raraupari au Joppa ma matauei kua a inana, ma purapura inana me puru ġaeġaena adana 4 i vojijini ma marei i tere-ġaireiai awariu. <sup>6</sup> Au orana a inana lamna ġamoġamo maramaraġamai ma moduei, tetetei me mota ma kiu au aidamo lavelavei.

<sup>7</sup> Ma pona a nonori i pa, “Peter ma vomairi, ma viraġena ma ma am!”

<sup>8</sup> Tau a paribelei, “Eġa! Lamna eġa melanai ana kau. Eġa melanai lam viviġana ata am-dadani.”

<sup>9</sup> Wate pona marei mara viruaina i babani, “Aiwai purapurana God i riwa da i ai, tam eġa ma riwa da i apoapoe.” <sup>10</sup> Mara tonuġa wenanare i tupua, ma puruna i ġaiana-melei au mara.

<sup>11</sup> Nai maranaina mai Caesarea ai rava tonuġa i paripari-tawaneiai, au metaeta i raumairiei. <sup>12</sup> Ma Arua Vivivireina i riweu da eġa aiwai ana notai ma orau taputapunei ana nae. Mai Joppa tauvitumaġana 6 maiteni a nae ma ravana ana au numa a rui.

<sup>13</sup> Cornelius i riwelai da anela awarina i eġa, ma i riwei, “Rava ma paritawanei au Joppa da rava wavana Simon Peter ina neiai.” <sup>14</sup> Tauna wei riwana ina neiai ma lamnei tam ma am numa ravai maiteni ina vilawanimi.

<sup>15</sup> Ma babani a raukarei ma Arua Vivivireina i ġairai da tau i vioai me au naona awarita i tupua nanare. <sup>16</sup> ✧ Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.” <sup>17</sup> Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau aiai da God ata viġaei?

<sup>18</sup> Tau i viganopotai maranai wei i nonori, ma God i viborumei i pa, “Riwa kua da God Jentail maiteni i vianinei da ina rupena ma ina lawana.”

### *Ekalesia au Antiok*

<sup>19</sup> ✧ Ekalesia ġelau rau-iviapoapoe i rovoei maranai Stephen i viraġeni ma i vilamonei au uama. Ġelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii. <sup>20</sup> Wate ekalesia ġelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei. <sup>21</sup> BADA ana rewapana tau i orai i mae ma Jentail maġamaġau i vitumaġana ma i mae-tavirei BADA awarina.

<sup>22</sup> Wei riwana i ġeta ekalesia awarii au Jerusalem, ma tau i Barnabas i paritawanei au Antiok. <sup>23-24</sup> Maranai i ġeta ma i 'nanai da God ravai i viaiaina-kau, tauna i vinuaiai ma i egari da BADA awarina ina vipatutu orai taputapunei. Barnabas tauna rava aiaina, Arua Vivivireina orana i oai ma ana tumaġana i rata, ma God ana aguie, i rauguga ma rava maġamaġau i taini BADA awarina.

<sup>25</sup> Ma Barnabas i nae au Tarsus da Saul ita baiiei. <sup>26</sup> Ma i nelaḡai ma i neiai au Antiok, ma kampa tauvitumaḡana maiteni i mae madeḡa tagogi i kwa, ma patara ḡaeḡaena awarii i viararamana. (Weka au Antiok lamna i vikarei da tauvitumaḡana i viḡorei Kerisiana)

<sup>27</sup> Wei au marana peroveta ḡelau Jerusalem ei i ḡairai. <sup>28</sup> ✧Peroveta tagogi wavana Agabas i vomairi ma God ana rewapanei i vieḡa da gomara e nenei au naoii dobu au anapuna (Caesar Claudius ana vibada au marana gomarana i nei). <sup>29</sup> Tauvotaḡotaḡo au Antiok i vianina da tau i ava ita kauana-guratei da mane vounaina ita kauai da ai rava ekalesia au Judea ita voagui. <sup>30</sup> Tau nanare i kauai ma manena Barnabas ma Saul au urai i terei ma tau ekalesia ai babada au Jerusalem i verei.

## 12

### *James i viragēni ma Peter i pani*

<sup>1</sup> Lamna maranai, gulau Herod Agrippa\* i raukarei da ekalesia ḡelau i rau-iviapoapoelei. <sup>2</sup> James, John tuana uana sodei i bori-tuini. <sup>3</sup> Ma maranai Herod i 'nanai da mai Jew wei kauana i vinuaiaiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua. <sup>4</sup> ✧Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i ḡoei da Peter ita vojijini da raḡona torelana au murina ma au deba ita rauetarei. <sup>5</sup> Ma lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

### *Peter pani numanei i tere-opunei*

<sup>6</sup> Ma nai waguvaraina, ma maratamna da Peter ita rauetarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia ḡelau au metaeta i vipaipai.

<sup>7</sup> Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, “Laḡilaḡina ma vomairi!” Ma sein au urana i dabarara. <sup>8</sup> Ma Peter i riwei, “Ma vigara ma ae uma ma oteni.” Ma nanare i kauai. Ma i egari, “Am kwama potopotona ma oteni ma ma votaḡotaḡoiu.”

<sup>9</sup> Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukai, tauna i notai i rarauboni. <sup>10</sup> Tau, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tau etanai tagogi i ḡairani ma maratagogi anela tauna i voterei.

<sup>11</sup> Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua.” <sup>12</sup> Maranai ana nota i nememei tauna i nae Mary ana au numana. (Mary lamna John alona. John wavana ḡelauna Mark). Kampa rava maḡamaḡai i vitagogiei ma i raraupari. <sup>13</sup> Peter au metaeta i raupewapewa ma taunola wavana Rouda i nei da metaeta ita votawanei. <sup>14</sup> Ma Peter ponana i nonori ma i aramanei da tauna, ma i vinuaiai guratana da eḡa metaeta ita votawanei ma i ruba-rui da i vinolanola i pa, “Peter au metaeta e maimairi!”

<sup>15</sup> Wate tau eḡa ita vitumaḡanei ma i riwei, “Tam ma bubua!” Wate tauna i riwa bagibagi. Ma tau i riwa, “Nai Peter ana anela.”

<sup>16</sup> Wate Peter i rarau-pewapewa ma maranai tau metaeta i votawanei ma i 'nanai da tauna, tau orai i auepai.

✧ 11:28: Act 21:10 \* 12:1: Tauna gulau Herod 1 ḡoḡana. ✧ 12:4: Exo 12:1-27

<sup>17</sup> Peter urana i voepai da rava i genuana ma i riwei menanare BADA pani numanei i tere-opunei. Ma i riwei, "James† ma ekalesia gēlaui wei ona parivere." Ma Peter i nae au dobuḡela.

<sup>18</sup> Maranai mara i tom kampa au pani numana nuabola ma vinuanaina gāeḡaena i peu sorodia awarii da aiwai i tupua Peter awarina <sup>19</sup> Herod, ana sorodia i egari da Peter i baiei wate eḡa ita nelaḡai. Lamna aubaina sorodia 16 i etarei ma i viraḡeni. Muriai Herod Judea i netawanei ma i nae au Caesarea da ita mae mara aburuna.

### *Herod iraḡe*

<sup>20</sup> Marina Herod amlona i ḡaiḡai kaua Taia ma Sidon ravai awarii, lamna aubaina tau i ana boru i nei da Herod maiteni wei i babaniei. Tau i Herod ana taunola gāeḡaena Blastus, i taravaini da ita voagui. Tau i rom i vibaḡei Herod maiteni. Aubaina ai lam Herod ana do buei i nenei. <sup>21</sup> Ma marana i ḡetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani. <sup>22</sup> Ma patara ana babani i nonori ma i logoi i pa, "Wei lamna god e bababani ma eḡa rava!"

<sup>23</sup> Maratagogi BADA ana anela Herod i vipeuni au doa ma motamota orana i ani da i'raḡe, aubaina tauna rava ai voepaepa i vinuaiaiei ma eḡa rava ita riwei da BADA ita voepaepai.

<sup>24</sup> Ma ekalesia BADA riwana i raraugugulei ma rava maḡamaḡai i nenei BADA awarina ma ekalesia i rarata. <sup>25</sup> Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

## 13

### *Barnabas ma Saul i viaiaini ma i paritawanei*

<sup>1</sup> Kerisiana au Antiok au orai peroveta ma taugiu wavai wenanare, Barnabas, Simeon (e ḡoreḡorei Gawara), Lusias Sairinie, Manaen (Tauna gulau Herod Antipas maiteni i rata tagogi), ma Saul. <sup>2</sup> Mara tagogi maranai tau i ujuju ma BADA i vovoepaepai ma Arua Vivivireina i riwa i pa, "Tau, Barnabas ma Saul a vinei, ona tereriei au nola aubaina." <sup>3</sup> Anina ma uji ma pari au murina tau i urai Barnabas ma Saul au tepai i terei ma God ruaḡai i viaiaini ma i paritawanei.

### *Au Saipras*

<sup>4</sup> Ma Arua Vivivireina Barnabas ma Saul i paritawanei da i ḡaira au Selus ma kampa i amkuka damana au bonabona Saipras. <sup>5</sup> Ma au Salamis i ḡota ma i nae mai Jew ai au boru numana ma God riwana i raugugulei. John-Mark tau i maiteni i nae da ai tauagu.

<sup>6-7</sup> Tau i bonabonana i kwaviviroi da au Paphos taon i ḡeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ḡoei da God ana babani ita nonori ma lamna aubaina Barnabas ma Saul i rauḡoreiai. <sup>8</sup> Wate barabaravuna Bariesu (Greek ponanei lamna Elimas) Saul ma Barnabas i viḡaviei da gavena ana tumaḡana ita viapoapoeni. <sup>9</sup> Saul wavana ḡelauna Paul, Arua Vivivireina orana i oai ma barabaravuna matana i 'nana-tunutunui. <sup>10</sup> Ma i pa "Tam Satan natuna ma kua ai i ma jijimani tauviapoapoenina! Tam morumoru kaukauam ma gwalagwalamerum. Ma amapo da BADA ana kua ma voviravirai da moru. <sup>11</sup> Ma marina BADA urana ina kovoḡim da matam ina apoapoe mara aburuna ma eḡa madeḡa lalalaina ma inana." Maratagogi matana i vinawanawa ma i gimtona ma nare da were i voladaḡa-nae da rava au urana ita vojijina.

<sup>12</sup> Maranai gavena i 'nanai aiwai i tupua ma i vitumaḡana, aubaina tauna BADA ana viararamana i bana-kauei.

† 12:17: Iesu ana tevera

*Paul God Riwana Aiaina i jimejime i au Antiok taon au Pisidia*

<sup>13</sup> Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem. <sup>14</sup> Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala. <sup>15</sup> Ma rava gēlauri, Moses ana tarawatu bukana ma peroveta gēlauri ai buka i 'avi, ma babada riwa i paritawane Paul ma Barnabas awari i pa, "Varevareiu! Mepa da awarimi nota aiwai da ota voagui ai lamna marina ona gēi da ona babaniei."

<sup>16</sup> Paul i vomairi ma urana i voepai da rava i genuana ma babani i vikarei i pa:

Mai Israel ma taumi ega mai Jew ai God tauviborumaina, ona rautaniġaneu! <sup>17</sup> ✧ Mai Israel ai God noinoita i vinei, ma i vimaurai ai au mae au Egypt, ma ana rewapana gaegeane i dobunei i taravaina-opunei. <sup>18</sup> ✧ Madega 40 au mutulua ami kaua apoapoei ami beura ma ami gunura anapui am-iauei. <sup>19</sup> ✧ Dam gaegeai 7 i vipupui au Canaan ma dobuna mai Israel i verei da i viġariana-nonoai. <sup>20</sup> \* Wei anapuna madega 450 au orana i tupua. Wei au murina God taurauetara† i terei da tau i vibadei da peroveta Samuel ana mara. <sup>21</sup> ‡ Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madega 40 i kwa. <sup>22</sup> § Ma God Saul i tere-opunei ma David i terei ai gulau. Ma wenanare i riwa i pa, "Tau a aramanei da David, Jesse natuna orau ana rauogara, ma au goana anapuna ina kauai."

<sup>23</sup> Muriai me God i parivainuaġani nanare, Mai Israel ai Tauvilawana, Iesu David ana damei i nei. <sup>24</sup> ✧ Muriai da Iesu ita nei, John mai Israel anapui awari i jima da ai go'apoapoe ina voterei ma ina mae-tavirei God awarina ma ina babataito. <sup>25</sup> ✧ Ma John ana nola au damona i riwa, "Taumi o notanotai da tau Tauvilawana bo? Ega! Tau ega tauna. Wate ona rautaniġana, rava au muriu e nenei tauna i ġetelara, tau ega tagotagogina da ana ae uma ġuravana ana rupeni."

<sup>26</sup> Varevareu - Abraham natunatuna ma taumi Jentail God tauviviborumaina, God tauta awarita, kwakokwakoi vilawanai riwana i paritawaneiai! <sup>27</sup> Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejime i au Sabate marana patapatana. <sup>28</sup> ✧ Tai ega ana apoapoea aiwai ita nelaġai da Iesu ita viragēni, wate Pilate i vibaġai da ita viragēni.

<sup>29</sup> ✧ Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-ġairei ma au guba i vimataveni. <sup>30</sup> Wate God Iesu iragēlei i vovaimairini. <sup>31</sup> ✧ Ma au pom maġamaġau Iesu tau i maiteni au Galili da i gēgae au Jerusalem awari i ega. Wei ravai marina e vivimatamata rava awarii.

<sup>32</sup> Marina tauai Riwana Aiaina a paripariveremi. Wei parivainuaġanana wariaga noinoita awari i kauai. <sup>33</sup> Ma God nanare i kauai tauta eda muri aubaita, da Iesu iragēlei i vovaimairini, au Psalm viruaina wenanare I girumi,

*Tam natu.*

*Amadodo Tau a viamanem.*

*(Psalm 2:7)*

<sup>34</sup> God Iesu iragēlei i vovaimairini da ega tupuana ina buda. Me i girugirumi nanare i pa, *Au viaiaina vivivireina David a parivainuaġani tam ana verem.* *(Isaiah 55:3)*

<sup>35</sup> Psalm gelauna wenanare i girumi,

*A 'ramanei da Tam am Messiah-Tauvilawana tupuana ega au kokoaga ma voterei da ina buda.* *(Psalm 16:10)*

✧ 13:17: Exo 1:7 ✧ 13:18: Num 14:34 ✧ 13:19: Deu 7:1 \* 13:20: (a) Jdg 2:16; (b) 1Sa 3:20 † 13:20: Wei ravai lamna ai gavia babadai ma ai tauravena ma taurauetara *Judge*. ‡ 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 ✧ 13:24: Mrk 1:4 ✧ 13:25: Mrk 1:7 ✧ 13:28: Mrk 15:13-14 ✧ 13:29: Mrk 15:42-47 ✧ 13:31: Act 1:3

<sup>36</sup> Maranai David i mamae ma God ana nola i kauēi ma i'raḡe, ma amamana maiteni i doboi ma tupuana i buda. <sup>37</sup> Wate God Iesu iraḡelei i vovaimairini ma tupuana eḡa ita buda.

<sup>38-39</sup> Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anatapui da Iesu e vivitumaḡanei, ai ḡo'apoapoe e notanota-tawanei ma ai viturana e viviaiaini. Wei Moses ana tarawatu eḡa ita kaukauei.

<sup>40</sup> Ona paina-melemi da peroveta aiwai i ririwei eḡa awarimi ina tupua. Aubaina i riwa;

<sup>41</sup> *Ona rautaniḡana vivijiboḡami,*

*kaua ḡaeḡaena ana kauēi da Ona baei ma ona iraḡe!*

*Aubaina ami au lawana kaua ḡaeḡaena ana kauēi da taumi ona vitumaḡana-avei.*

<sup>42</sup> Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita babanana-kauēi. <sup>43</sup> Boru i kwa da rava i vilamonei, mai Jew borui ma ḡelau marina ina bori i vaia da i vimai-jew, tau Paul ma Barnabas i votaḡoi, ma i riwana-guratei da Iesu ana aguei ina mae jijina.

<sup>44</sup> Au Sabate ḡelauna taon ravai anatapui i ḡeta da Iesu riwana aiaina ita nonori.

<sup>45</sup> Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

<sup>46</sup> Ma Paul ma Barnabas ana tepatorai i babani, "God riwana a jime i awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eḡa ota ḡoeḡoi. Lamna aubaina ana voteremi ma God riwana ana jime i Jentail awarii.

<sup>47</sup> BADA wenanare riwa bagibaginei i riwelai,

*Tau a vinemi da lalalaina Jentail awarii,*

*da rava anatapui au dobu ona riwei menanare ai ḡo'apoapoe a nota-tawanei ma a vilawani. (Isaiah 49:6)*

<sup>48</sup> Maranai Jentail wei riwana i nonori, tau i vinuaiai kaua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaḡana.

<sup>49</sup> Ma BADA Riwana Aiaina i vituai nai au paratana. <sup>50</sup> Wate mai Jew Jentail waivinei manemanei ma mai Jew ḡelau i egari da Paul ma Barnabas ai ḡavia i vomairi ma dobunei i viaḡaḡana-opunei. <sup>51</sup> ✧ Anina ma tau i aei pokauna i rauabuabui da ita viatataiei da BADA eḡa ita vinuaiai awarii ma i nae au Ikoniam taon. <sup>52</sup> Wate Arua Vivivireina kerisiana voui au Antiok orai i oai ma i vinuaiai kaua.

## 14

### *Paul ma Barnabas i jima au Ikoniam.*

<sup>1</sup> Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maḡamaḡau i vitumaḡana. <sup>2</sup> Wate mai Jew ḡelau eḡa vivitumaḡanai Jentail i kelari ma ai nota i barai da Paul ma Barnabas i geduaiei. <sup>3</sup> Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai maḡamaḡau i kauēi. Wei i vimataira da ai jima lamna riwa kaua.

<sup>4</sup> Taon i kai ḡelau mai Jew aubaii i mairi ma ḡelau Aposol aubaii i mairi. <sup>5</sup> Ma mai Jew ma Jentail ḡelau i vioga da Paul ma Barnabas ḡaime i virauraei. <sup>6</sup> Wate tau riwana i vaia ma dobuana i ruba-tawanei ma i nae au taon ḡaeḡaei Listara ma Derbi au Laikonia provins ma taon au ririvai. <sup>7</sup> Ma weka Riwana Aiaina i jimana-naiei.

### *Rava i notai da Paul ma Barnabas god*

<sup>8</sup> Au Listara oroto aena ḡokokokarana, alona manawanei gwaḡagwaḡana i vinatunei ma eḡa ita babara dadana. <sup>9</sup> Kampa i kiala ma Paul i bababani i rarautaniḡanei. Paul matana

✧ 13:51: Mrk 6:11



i tawanei ma i 'nanai da tauna i vitumaḡana da ita lawana <sup>10</sup> ma i garara awarina, “Aemei ma mairi!” Ma orotona aenei i mairi ma babara i vikarei. <sup>11</sup> Maranai patara i 'nanai Paul aiwai i kauai tau i ava ai ponei i babani vivira, “god ruaḡa i ḡairai awarita me \*rava.” <sup>12</sup> Tau i riwa da Barnabas lamna mai Greek ai god Zeus† ma Paul i vitauvibabani aubaina i riwa da tauna Hermes. <sup>13</sup> Zeus ana pulo gabuna, taon au giana, Zeus ana piri si patara maiteni bull ma berana ulaulai i nei ai taon au metaetana da Apasol ita puloi.

<sup>14</sup> Wate maranai Paul ma Barnabas wei riwana i nonori, tau ai gara i sikai ma i ruba-opu patara awarii ma i garara, <sup>15</sup> ✧ “Aiwai aubaina wei kauana o kaukauei? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anatapuna au orai i kauai. <sup>16</sup> Wariaḡa tauna rava i voterei da ai ḡoanei i mae. <sup>17</sup> Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuaiai e oaoai.” <sup>18</sup> Apasol i bababani ma i kauana-guratei da ravai ita viḡaei da tau i avena ita puloi.

### *Mai Listara Paul ḡaimai i virauraei.*

<sup>19</sup> Mai Jew ḡelau Antiok ei ma Ikoniamei i nei ma patarana i egari da Paul ḡaimai i virauraei ma taonei i taina-opunei, i notai da tauna irage. <sup>20</sup> Wate maranai vivitumaḡana i ḡeta da i mae-kwaviviroi, tauna i vomairi ma i naeme au taon.

Aupom ḡelauna tauna ma Barnabas i nae au Derbi.

<sup>21</sup> Paul ma Barnabas Riwana Aiaina i jimei au Derbi ma ekalesia voui maḡamaḡau i rui. Ma i nae me au Listara, Ikoniamei ma Antiok. <sup>22</sup> Metauna au dobuna i jimajima kampa tauvitumaḡana i ririwana-guratei ma i vovai-virewapani da ina mairi-jijina ai au tumagaḡana i pa, “Piripiri maḡamaḡau au orana ona rui wate au murina God ana au vibadana ona rui.”

<sup>23</sup> Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini. <sup>24</sup> Anina ma au Pisidia provins i verautua da i nae me au Pamphilia provins. <sup>25</sup> Au Perga BADA riwana i jimei ma i ḡaira au Atalia. <sup>26</sup> Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaḡai da tau i ita viaiaini ai au nola ma i paritawanei ma marina ai nola e vivikwai.

<sup>27</sup> Ma kampa i ḡeta ma ekalesia i vitagogiei, ma aiwai anatapuna God ana aguei i kaukauei rava i vieḡei, ma menanare Iesu metaeta i votawanei da Jentail maiteni Tauna i vitumaḡanei. <sup>28</sup> Ma kampa tauvitumaḡana maiteni i mae guratana.

## 15

### *Boru au Jerusalem*

<sup>1</sup> Wate nelara ḡelau Judeaei i ḡairai au Antiok ma ekalesia i viararamani i pa, “Mepa da eḡa inibori ona vaia Moses ana tarawatu e ririwei nanare, God taumi eḡa ina vilawanimi.”

<sup>2</sup> Ma karuwaḡawaḡa ḡaeḡaena i bauni Paul ma Barnabas maiteni. Ma tau i Paul, Barnabas ma rava ḡelau i vinei da i ḡae au Jerusalem da Apasol ma babada ita inanai wei babanina aubaina. <sup>3</sup> Ma i paritawanei au Jerusalem, Ma ai au vaḡai ekalesia au Phonisia ma Samaria provins i parivere i menanare Jentail i mae-tavirei God awarina. Ma tau i vinuaiiai kaua maraina wei i nonori. <sup>4</sup> Maranai i ḡeta au Jerusalem, ekalesia ma Apasol i nei da i nebelei. Tau i parivere i menanare kaua anatapui God ana aguei i tupua. <sup>5</sup> Wate ekalesia ḡelau mai

\* **14:11:** Paul ma Barnabas Greek ponanei i bababani † **14:12:** Zeus lamna mai Greek ai god ḡaeḡaena. Rava ai vitumaḡana da godna e vilawani. Hermes lamna Zeus natuna ma tauna lana Tau-vinolanolana. Zeus ma god ḡelau aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupu ma e kauwei da rava e vivinatuna kauwa. ✧ **14:15:** Exo 20:11

Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

<sup>6</sup> Apasol ma babada i viboru da wei babanina i okei. <sup>7</sup> ✨Ma i vitarapiri guratana ma Peter i vomairi ma tau i riwei i pa, “Au rava! O aramanei da au orata God i vineu da Riwana Aiaina ana jimei Jentail awarii da tau i ina nonori ma ina vitumaḡana. <sup>8</sup> ✨God rava anapui ai nota e araramanei, ma Jentail Aruana Vivivireina i verei me tauta nanare. Wei matairana i viatataieta da God i vianina. <sup>9</sup> Tauna Jentail ma tauta e vaivainita da tagogina, ma ata vitumaḡanei orata i viaiaiani. <sup>10</sup> Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei. <sup>11</sup> Eḡateni! Tauta anapui ta vivitumaḡana da BADA Iesu ana aguei tana lawana, ma nanare Jentail maiteni.”

<sup>12</sup> Rava anapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kaua aniba ma vivirewapanai i kauei Jentail awarii.

<sup>13</sup> Maranai i babani vorovei, James\* babani i vikarei, “Au rava ona rautaniḡaneu.

<sup>14</sup> —Peter †au naona i pariveremi menanare God Jentail i raugenari ma ḡelau i vinei da tauna ḡarinei. <sup>15</sup> Ma Peroveta nununai wei kauai i bababaniei marina nanare e tuputupua:

<sup>16</sup> *Wei au murina ana nememei,  
ma David ana numa gara ana voa-melei.*

*Ana vituramairini  
ma ana kauei da ina virewapana me.‡*

<sup>17</sup> *Da rava mamae-terenai*

*BADA ina baiei,*

*Wate Jentail a rauḡorei da ḡariuei, BADA i riwa.*

*(Amos 9:11-12)*

<sup>18</sup> *Wariaḡa da marina wei ta aramanei.*

<sup>19-21</sup> — ✨Lamna au baina eḡa tana kauei da ina pipiri Jentail aubai, tau e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e raugugulei boru au numai Sabatena patapatana.”

### *Pepa i girumi Jentail awarii*

<sup>22</sup> Ma Apasol, babada ma ekalesia anapui rava ḡelau i vinei ma i paritawanei au Antiok au Syria provins Paul ma Barnabas maiteni. Tau i babada ruaḡa i vinei wavai Judas wavana ḡelauna Barsabas ma Sailas. <sup>23</sup> Ma wei pepa au urai i terei,

Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

<sup>24</sup> Tauai riwana a vaia da rava ḡelau ai au boru i ḡairai ma ai viararamani i vinuabolaimi ma i visina-viraviraimi, wate tauai nai ravai eḡa ata paritawanei. <sup>25</sup> Lamna aubaina tauai a viboru ma a vianina da taupariverena ata paritawaneiai, ata rava Paul ma Barnabas maiteni, <sup>26</sup> tau i verena-melei ma ai lawana eḡa ita vinuabolei BADA Iesu Keriso wavana aubaina. <sup>27</sup> Judas ma Sailas a pariparitawanei da tau i gamoiei ina riwemi aiwai tauai a girumi.

<sup>28</sup> Arua Vivivireina ma tauai ai ḡoana da eḡa vita ḡaeḡaena ana veremi, anina wei tarawatuna ava.

<sup>29</sup> Lam god morumorui i puloi eḡa ona ani,

Eḡa tara ona umai, Eḡa ḡamoḡamo uana kikikina vioana ana tarana ona ani.

✨ 15:7: Act 10:1-43 ✨ 15:8: Act 10:44; 2:4 \* 15:13: Iesu ana tevera † 15:14: Peter wavana ḡelauna Simon.

‡ 15:16: Maranai God David ana numagara e bababaniei lamna David ana vibadana vouna e ririwei ma eḡa ana epaepaia. ✨ 15:19-21: Lev 18:6-23; Lev 17:10-16

Eġa ona viawawana labalababa,§  
 Mepa da wei tarawatui ona vojijina-kauei, taumi kaua aiaina o kaukauei.  
 Egualau kaua.\*

<sup>30</sup> Ma nelarai i paritawanei da i ġaira au Antiok, ma ekalesia i rieiai da pepa i verei. <sup>31</sup> Ma tau i 'avi ma i vinuiai kua pariverena aiaina aubaina. <sup>32</sup> Judas ma Sailas tau i God ana peroveta ma i babani guratana awarii ma wei tau i vinuiai ma ai tumaġana i vovai-virewapani. <sup>33</sup> Ma kampa i mae mara aburuna ma ekalesia ana nuubai i paritawana-melei au Jerusalem. <sup>34</sup> † <sup>35</sup> Wate Paul ma Barnabas au Antiok i mae, ma tau maiteni BADA Riwana Aiaina i viararamani ma i raugugulei.

*Paul ma Barnabas i vilamonei*

<sup>36</sup> Ma muriai Paul, Barnabas i riwei, "Tana nae dobu au anapuna mepa BADA Riwana Aiaina ta raugugulei ma ekalesia tana raugenari, ma tana inana tau anina bo eġa." <sup>37</sup> Barnabas i ġoei da John-Mark ita taravaini. <sup>38</sup> ✧ Wate Paul wei notana eġa ita ġoei aubaina au naona John tau au Pamphilia i ruba-tawanei ma eġa ita mae da maiteni ita nola. <sup>39</sup> Ai viparipariniġai i apoapoe guratana da tau i vilamonei. Barnabas, Mark i taravaini ma kukei i damana au au Saipras. <sup>40</sup> Paul, Sailas i vinei. Ma ekalesia, BADA i vibaġai da ana aguei tau ai au nola ina paini. <sup>41</sup> Tau Syria da Silisia i naeni ma ekalesia i raugenari ma i vinua-terenei.

## 16

*Timothy Paul ma Barnabas maiteni i nae*

<sup>1</sup> Paul i nae au Derbi da au Listara, kampa tauvotaġotaġo i mae wavana Timothy. Tauna alona Jew ei ma kerisiana, Wate amana Jentail. <sup>2</sup> Ekalesia au Listara ma Ikoniam Timothy i voepaepana-kauei. <sup>3</sup> Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramanei da tauna amana Jentail. <sup>4</sup> Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaġotaġoi. <sup>5</sup> Ma ekalesia ai vitumaġana i vovai-virewapani ma tauvitumaġana voui i ruirui marana patapatai.

*Paul ana rauboni*

<sup>6</sup> Arua Vivivireina Paul ana rava maiteni i viġaei da eġa BADA riwana ita jimei au Eisia provins, ma Pirijia ma Galatia paratana i naeni. <sup>7</sup> Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei. <sup>8</sup> Ma Maisia i verautuini da i nae au Troas. <sup>9</sup> Waguvaraina Paul ana au inana i 'nanai oroto Macedonie i maimairi ma i vivibaġai i pa, "Ma damanai au Masedonia da ma voaguiai!" <sup>10</sup> Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jimei.

*Paul i nae au Philipai.*

<sup>11</sup> Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis. <sup>12</sup> Ma kampa da a babara nae au Philipai taon au Masedonia provins, weka mai Rome ai sorodia ai bareki ġaeġaena i mae, kampa a veraumae. <sup>13</sup> Ma au Sabate taon a opu-tawanei ma a nae au waira, a notanotai da

§ 15:29: Viawawana labalababa ġelau wei: Rava ġelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravi o viviauwane (Lev 18:22, Rom 1:26-27) Ġamoġamo e viviauwane (Lev 18:23) Rava eġa uta ravaġi ma e viviauwane (Eph 5:3) Rava u egari da u viawawane. (Gen 34:7, Deu 22:25-28) \* 15:29: Kaua ġaeġaena lamna eġa ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 eġa ita mamae "Wate Sailas i ġoei da kampa ita mae." ✧ 15:38: Act 13:13

kampa boru gabuna wate eġa. A kiala ma waivine ruaġa ota kampa i rauriei awari a babani. <sup>14</sup> Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina maiana ġaeġaena taugimareina ma God i vitumaġanei, ma God orana i votawanei da aiwai Paul i bababaniei i rautaniġanana kauei. <sup>15</sup> Maranai wavine ana numa ravai i babataito ma i rauġorelai i pa, “Ona nei au numa mepa da o notanotai da tau kerisiana ririwa kauana.” Ma i egariai da ana au numa a mae.

### *Paul ma Sailas au panipani numana au Philipai*

<sup>16</sup> Mara tagogi a nenaie boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaeġaena i kaukauei ana taniwaga aubaina. <sup>17</sup> Tauna Paul ma tauai i votaġotaġoia ma i garagarara “Wei nelarai God ġeġetelarana ana taunola! E vivinolanola menanare God e vivilawananei.” <sup>18</sup> Wei kauana i kauei au pom biaġa da Paul i viamlo-ġaiġaini da i mae-tavirei ma arua apoapoena i riwei, “Iesu Keriso wavanei a egaegarim da wavine ma opu-tawanei!” Maratagogi arua apoapoena wavine i opu-tawanei.

<sup>19</sup> Maranai taunola guguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii. <sup>20</sup> Tau i nei ai tau-rauetara awarina ma i riwa, “Wei nelarai mai Jew wei dobuna ravai e vivinuraġaraġai. <sup>21</sup> Tau i ata rava kava ġelau e viviararamani ma wei ata giu e teretereġairei.”

<sup>22</sup> Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui. <sup>23</sup> I vunu-kauei ma i tawana-ruiei au panipani numana. Ma numana badana i egari da ita paina-kauei da eġa ita ruba. <sup>24</sup> Anina ma Panipani badana tau i tawana-ruiei, panipani numana au orana ma aei, ai vivitaini au orana i raġita-jijini.

<sup>25</sup> Nubautuvai Paul ma Sailas i raraupari ma i welawela God awarina ma panipani ġelau i rarautaniġana. <sup>26</sup> Nanare ma lolo ġaeġaetana dobuna i gui. Ma maratagogi pani numana metaetana i wana-tawatawanei ma panipani anatapu ai sein i dabarara. <sup>27</sup> Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita viraġena-melei. <sup>28</sup> Wate Paul i garara, “Eġa ma vunu-melem! Tauai anatapu i weka!”

<sup>29</sup> Pani numana badana ana taunola i ġorei da lalalaina ita neiai ma i ruba-rui ma ana sisistina i mae-peu Paul ma Sailas au naoi. <sup>30</sup> Ma i opunei au doa ma i paridadanei, “Babada aiwai ana kauei da ana lawana?”

<sup>31</sup> Tau i paribelei, “BADA Iesu Keriso ma vitumaġanei ma ma lawana, am numa ravai maiteni.” <sup>32</sup> Ma God riwana i raugugulei tauna ma ana numa ravai awari. <sup>33</sup> Nai maranaina avena da waguvarai, pani numana badana Paul ma Sailas i naiei ma keroi i oġai, Ma maratagogi tauna, ana numa ravai maiteni i babataito. <sup>34</sup> Paul ma Sailas i ġaiei ana au numa da i viambagibagi. Tauna ana numa ravai maiteni i vinuaii kava da marina God i vitumaġanei.

<sup>35</sup> Ma marana i tom ma tauetara ana taunola\* i paritawanei pani numana badana awarina ma i egari i pa, “Nelara ma voterei da ina nae.”

<sup>36</sup> Pani numana badana Paul i riwei, “Taurauetara i egariu da ana voteremi da ona nae. Marina ana nuubami ona nae.”

<sup>37</sup> Wate Paul, taurauetara i riwei, “Tauai eġa ita rauetarelai ma i vunu-kauelai patara au matai. Ma avena da tauai mai †Rome, wate marina i ġoei da govagovaġanei ina paritawanelai bo? Eġateni kava! Ona voterei da taurauetara ina nei weka da ina naielai.”

<sup>38</sup> Tau i wei babanina i naiana-melei da babada i riwei ma tau i rovo kaukava maranai riwana i nonori da Paul ma Sailas lamna mai Rome. <sup>39</sup> Ma i nei au pani numana ma i riwa, “Tauai a kauana-boai, ai ġo’apoapoe ona nota-tawanei.” Ma i tere-opunei ma i vibaġa-guratei

\* **16:35:** vs. 20 ma inana. † **16:37:** Mai Rome ai tarawatu lamna, “Eġa rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

da dobuna ita oputawanei. <sup>40</sup> Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawanei.

## 17

### *Au Thesalonika*

<sup>1</sup> Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae. <sup>2</sup> Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani. <sup>3</sup> Ma God riwanei i viararamana da Keriso ina vinuapoapoe ma iragelei ina vomairi me, “Wei ravana a bababaniei awarimi, tauna Iesu Keriso.” <sup>4</sup> Mai Jew ḡelau i orai i taini ma tau i votaḡotaḡoi. Ma nanare Jentail nelara maḡamaḡagai God taurauduneleina ma waivine wavai naenaei maḡamaḡagai.

<sup>5</sup> Wate mai Jew i unura ma rava ora-potapotai maḡamaḡagai au etanai i tami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari. <sup>6</sup> Wate maranai eḡa ita nelaḡai tau i Jason ma kerisiana ḡelau i taina-naiei taon babadai awari, ma i garara, “Wei ravai dobu au anapuna apoapoe maḡamaḡagai i kaui, marina i ḡetai ata au dobu.” <sup>7</sup> Ma Jason, Paul ma Sailas i taravaini ana au numa. Tau i Caesar ana tarawatu e viviaigai ma e ririwa da gulau ḡelauna e mamae wavana Iesu.

<sup>8</sup> Maranai patara ma taon babadai wei babanina i nonori tau i amloi i ḡaiḡai kaua, <sup>9</sup> ma Jason i egari da mane ḡaeḡaena i vimaiei da eḡa mae boaboa ḡelauna ina vitupui. Ma tau i Jason i voterei da i nae.

### *Au Berea*

<sup>10</sup> Ma waguvarai tau vitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana. <sup>11</sup> Mai Berea i viaiaii, eḡa me mai Thesalonika. Tau i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua. <sup>12</sup> Ma lamnei mai Jew maḡamaḡagai i vitumaḡana, ma nanare mai Greek waivinei wavai naenaei ma nelara.

<sup>13</sup> Maranai mai Jew au Thesalonika paratana i nonori da Paul God riwana i raraugugulei au Berea, tau i maiteni i nae kampa, ma rava i rauegari da ḡavia ita vikarei. <sup>14</sup> Maratagogi kerisiana Paul i paritawanei au gera wate Sailas ma Timothy au Berea provins i mae. <sup>15</sup> Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

### *Paul au Athens i raugugula*

<sup>16</sup> Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua. <sup>17</sup> Mai Jew ma mai Greek God tauviborumeina awari i jima guratana au pari numana ma nanare au deba, aiwai da i ḡeta ma i rautaniḡana. <sup>18</sup> Ma rava ḡelau nuaulaulai i ḡetai ma maiteni i vitarapiri, tau i e ḡoreḡorei mai Epicure ma mai Stoic\*, tau i lawana ai kaua tauvihararamanai. Ma ai rava ḡelau i paridadana, “Wei ravana aiwai e voḡavoḡanei?” Ḣelau i riwa, “Mepa da tauna dobu ḡelau ai god e bababaniei.” Tau i

\* **17:18:** Mai Epicure rava wavana Epicurus ana viararamana i votaḡotaḡoi. I viararamana da lawana ana ano lamna nuaiwai. Da tau i aiwai da tupuai ma matai ana rauoḡara, e vivinuaiaiei. Ma aiwai da e virovorovi bo inivira e verevereia. Tau i wei lamna e ḡeduḡeḡeuaiei. Tau i ririwa da God rava eḡa ita vinuavainiei Stoic rava wavana Zeno ana viararamana e votaḡotaḡoi. I viararamana da rava ma ai maiteni au ririvata ta mamae (nature) ita vivirei, Tau i ai ḡoana ma ai erawa ita teretawanei ma ita vinuanotanota kaua ma avena rava ḡelau ai agu ita raunenelei. Tau i ririwa, “Nuaiwai lamna kaua e vovoterei da mena ina tupua nei nanare ina tupua.”

wenanare i babani aubaina Paul Iesu Riwana Aiaina ma ana iraḡe ma ana vomairi me, i raugugulei.

<sup>19</sup> Ma i taravaini ma i naiei ai au boru e ḡoreḡorei Areopagus ma i riwei, “Ma nei ma a ḡoei da am viararamanana vouna e bababaniei, ata aramanei. <sup>20</sup> Kaua ḡelau e babaniei tauai a vivinuanainei, ma a ḡoei da ana aramanei anona aiwai?” <sup>21</sup> (Taumana ma mai Athens marana patapatai ai nola eḡa aiwai, da kaua voui ina virarautuei ma ina nononori.)

<sup>22</sup> Ma Paul babadai au naoi i mairi ma i riwa:

Dogadogara mai Athens! A inana da taumi vipatupatutumi ami god awarii, <sup>23</sup> A bababara ma ami pulo aniapunana a inainanai, ma tagogi a inana au tepana i giruma, “Wei God eḡa ata araramaneia aubaina.” Wei Godna o viviborumei wate eḡa ota aramanei. Tau ana riwemi nai Godna aiai. <sup>24</sup> ✧ Tauna God mara ma dobu ma aiwai anapuna au orana i kauai. Ma tauna mara ma dobu badana, ma numa rava uranei e voavoai au orana eḡa ita mamae. <sup>25</sup> Ma eḡa rava ai agu ita paipaini, tauna agu eḡa ita ḡoeḡoei. Aubaina tauna rava lawana ma lavutu ma anapuna e vereveri. <sup>26</sup> Au karena rava tagogi i kauai ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraḡe ma animae paratana i aiterei. <sup>27</sup> God wenanare i kauai da rava tauna ina baiei da mepa ina nelaḡai. Wate tauna au ḡereḡereta, eḡa au uama. <sup>28</sup> Taugiruma ḡelauna Greekei i riwai pa, “Taunei ta mamae ma ta bababara ma anapuna ta kaukai.”† Ma wate ami taugiruma ḡelauna i girumi i pa, “Tauai nanare tauna natunatuna.”‡

<sup>29</sup> Ma tauta God natunatuna, eḡa tana notai da God lamna me kokoitau, goldei bo silvei i kauai. Rava uraiei ma ana nuaulaulauei i kauai. <sup>30</sup> Wariaḡa rava God eḡa ita aramanei wate God tau i 'nana-tawanei, wate marina anaputa egaegarita da tana rupena ma tana mae-tavireta awarina. <sup>31</sup> Aubaina mara i vinei maranai rava anapui aiainei ma jijimaninei ina kovoḡi. Rava i vinei da taunei ina kovoḡa. God wei ravana iraḡelei i vovaimairini lamna ina vimataira rava awari da ravana anina tauna.

<sup>32</sup> Maranai Paul iraḡelei vomairina i babaniei, rava i nonori ma ḡelau tauna i vinamei wate ḡelau i riwa, “Tauai a ḡoei da muriai wei babanina ma babaniana-melei.” <sup>33</sup> Ma Paul ai boru i opu-tawanei ma boru i gudu. <sup>34</sup> Wate ḡelau i vitumaḡana ma Paul i votaḡotaḡoi. Tagogi lamna Dionisius, Areopagus boruna au orana, ma wavine wavana Damaris, ma rava ḡelau.

## 18

*Paul i nae au Corinth da rava awari Iesu ita jime*

<sup>1</sup> Paul Athens i netawanei ma i nae au Corinth. <sup>2</sup> Kampa Akwila tauna Jew au Pontus i tupua, marinaota au Italy \* da i nei awana Prisila maiteni. Aubaina Rome ai gulau Claudius mai Jew anapui i viaḡaḡei da Rome i opu-tawanei. Paul i nae da tau i ita inana. <sup>3</sup> Paul tau i maiteni i mae, tau i tauampopo, (ḡamoḡamo opina ma gara i popopoi numa aubaina ma i gimagamarei) me Paul ai nola tagogina. <sup>4</sup> Sabate patapatana au pari numana tauna mai Jew ma Jentail awari i jima guratana da orai ita sinavirai.

<sup>5</sup> Maranai Sailas ma Timothy au Masedonia da i ḡetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso. <sup>6</sup> Wate mai Jew Paul i viḡaviei ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eḡa tau ona viwavui! Marina da e nanae, ana nae Jentail awari.”

✧ **17:24:** 1Ki 8:27; Act 7:48 † **17:28:** Epimenides Ciritei au 6 century BC. ‡ **17:28:** Aratus Silisiei 3 century BC. \* **18:2:** Rome taon lamna taon ḡaeḡaena au Italy ma ai kapital AD. 49 au orana kampa viḡaiḡaiawa ḡaeḡaena da wavalatona Claudius mai Jew i riwei da dobuna i netawanei.

<sup>7</sup> Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au geregerena. <sup>8</sup> Crispus, pari numana ai bada, BADA i vitumaḡanei ana numa ravai maiteni, ma mai Corinth maḡamaḡau Paul i rautaniḡanei, i vitumaḡana ma i babataito.

<sup>9</sup> Waguvara tagogi BADA Paul ana au inana i babani i pa, “Eḡa ma rovo, ma babani ma eḡa ma genuana.” <sup>10</sup> Aubaina Tau tam maiteni. Ma rava eḡa ina rau-iviapoapoelem aubaina au tauvotaḡotaḡo i maḡa wei au dobuna. <sup>11</sup> Ma Paul kampa i mae madeḡa tagogi ma nawaravi six, ma God riwana i jimei.

<sup>12</sup> Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei. <sup>13</sup> Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

<sup>14</sup> Ma Paul gamona i laḡi da ita babani ma Galio i babani mai Jew awari i pa, “Mepa da taumi wei ravana o viviwavui da kua ḡaeḡaei bo kua apoapoe aubaina, lamna tau au nola da ata rau-taniḡanemi. <sup>15</sup> Wate wei taumi ami babani ami wava ma ami tarawatu, ana voterei au urami. Tau eḡa wei kauai ana rauetarei.” <sup>16</sup> Ma etara numanei i viḡaḡana-opunei. <sup>17</sup> Tau anapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

### *Paul i nae me au Antiok au Syria*

<sup>18</sup> Paul i mae mara aburuna tauvitumaḡana maiteni au Corinth ma wagei i nae au geregere au Cenkirei waga ai au animae. Prisila ma Akwila maiteni. Ma kampa Paul ana parivainuaḡana aubaina aparana i ḡari, ma anapui i nae au Syria <sup>19</sup> Tau au Ephesus i ḡeta ma Paul, Prisila ma Akwila i voterei. Ma i nae au boru numana Mai Jew awari i jima. <sup>20</sup> Rava i vibaḡai da ita mae mara aburuna wate tauna eḡa ita vianina. <sup>21</sup> Wate maranai i opu da ita nae ma tau i riwei, “Ana nememei mepa da God ana ḡoana, ma Ephesus i netawanei ma wagei i damana.” <sup>22</sup> Maranai i ḡeta au Caesarea ma i nae au Jerusalem da kerisiana i raugenari ma i nae au Antiok. <sup>23</sup> Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

### *Apolos mai Ephesus awari i raugugula*

<sup>24</sup> Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina. <sup>25</sup> Rava ḡelau, Apolos BADA ana etanai babanina, i viararamani, ma ana tepatorana i jima ma Iesu ana kua ma ana lawana i viararamana-kauei. Wate tauna John Taubabataito ana babataito babani ava i aramanei. <sup>26</sup> Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i ḡorei da maiteni i nae ai au numa ma BADA ana etanai ana babani i viaramana-kauei.

<sup>27</sup> Maranai Apolos i nanae au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita pariverei da tauna ita nebelei. Maranai au Akaia i ḡeta ma tau God ana aguei i vitumaḡana, agu ḡaeḡaena i verei. <sup>28</sup> Tauna ana babaniei au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

## 19

### *Paul au Ephesus*

† 18:13: Mai Jew e ririwa da Paul eḡa tau ai vitumaḡana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ḡoei da Rome ai bada Paul ina kovogi. Ma inana Act 16:20-21 ma 17:7.

<sup>1</sup> Apolos au Corinth taon Akaia provins i mae, ma Paul ola i taḡoni da au Ephesus i ḡeta. Kerisiana ḡelau kampa <sup>2</sup> ma i paridadanei i pa, “Arua vivivireina o vaia bo eḡa maranai o babataito?”

Tau i paribelei i pa, “Eḡa, Tauai eḡa ata aramanei da Arua vivivireina e mamae.”

<sup>3</sup> Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

<sup>4</sup>✠Paul i riwa, “John ana babataito lamna mataira da tau i ai ḡo’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.” <sup>5</sup> Maranai wei i nonori ma i aramanei tau i babataito BADA Iesu wavanei. <sup>6</sup> Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei. <sup>7</sup> Tau nelara iavana twelve.

<sup>8</sup> Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei. <sup>9</sup> Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijibogi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom. <sup>10</sup> Ma nanare i mae madeḡa ruaḡa i kwa, da mai Jew ma Jentail ravai maḡamaḡau i au Eisia provins maemaei BADA riwana i nonori.

### *Sceva natunatuna*

<sup>11</sup> Ma God ana rewapanei Paul kaua ḡaeḡaei ma aniba i kaukauei, <sup>12</sup> lamna avena wate rava ai agesi da ai nola garai i naiei Paul awarina da i vodadani ma i naei da rava doridorai i vodadani, ma arua apoapoei i opu-tawanei ma i lawana.

<sup>13</sup> Mai Jew ḡelaui dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaḡei. Tau arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.” <sup>14</sup> Skeva, pirisi ai bada natunatuna nelarai seven wei kauana i kaukauei. <sup>15</sup> Wate mara tagogi arua apoapoei i paribelei, “Iesu a aramanei ma Paul a aramanei ma taumi aiavoi?” <sup>16</sup> Ma rava au orana arua apoapoei maemaena i auepai ma tau i vunui da eḡa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

<sup>17</sup> Mai Jew ma Jentail ravai au Ephesus maemaei wei riwana i nonori ma rovo orai i ḡaeni ma Iesu wavana i vivirana-kauei.

<sup>18</sup> Maḡamaḡau i vitumaḡana ma i nae kerisiana awarii ma ai ḡo’apoapoe i rupeni. <sup>19</sup> Tauvitumaḡana voui maḡamaḡau paraparaumai,\* ai buka i vidamni au deba ma i apui. Maranai bukai ai maia i ’avi da silver 50,000†. <sup>20</sup> Kaua babai me wei, Iesu riwana i vibabarai nai au dobuna ma rava maḡamaḡau i vitumaḡana.

<sup>21</sup> Wei anatapura au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.” <sup>22</sup> Ma Paul ana tauagu ruaḡa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

### *Viḡaiḡaiawa au Ephesus*

<sup>23</sup> Iesu ana babani ma ana kaua vouna aubaina, ma viḡaiḡaiawa ḡaeḡaena i tupua au Ephesus. <sup>24</sup> Silver taunoleina wavana Demetrius, mai Greek ai god wavinena ana numa taparoro kokoitau i rarau-ḡaroḡaroei da i gimagamarei, ma wei nolana mane ḡaeḡaena e neinei silver taunoleina nai au dobuna aubaii. <sup>25</sup> Ma tau anatapai ai rava nolana tagogina e kaukauei maiteni i rauḡoreiai ma i riwa, “Au rava, o aramanei da ata maura wei

✠ **19:4:** Mrk 1:4, 7-8 \* **19:19:** Au Deu 18:10-14 God ana rava e vivigaei da eḡa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biḡa.



nolanei ta vaivaia. <sup>26</sup> Ma o inana ma o nonori menanare wei ravana Paul e kaukauei, Rava ai nota i sinavirai da maḡamaḡau god Artemis raudunena i voterei au Ephesus ma dobu Eisia paratana anapuna. Ma e ririwa da ‘rava god i rauḡaroḡaroei, lamna eḡa god.’ <sup>27</sup> Tauta tana inana kaua da wavata ma ata mane ani kauana eḡa ina apoapoe. Ma ata god ḡetelarana Artemis ana numa taparoro ma wavana eḡa ina vijiboḡi, eḡa au Eisia provins ava ma dobu au anapuna.”

<sup>28</sup> Maranai patara wei babanina i nonori tau i meji kaua ma i vigaragarei, “Artemis mai Ephesus ai god i ḡetelera!” <sup>29</sup> Ma tau i garagarara rava nai au dobuna i nonori ma tau i maiteni i garara labalababa. Anina ma patara Gaius ma Aristakas i vojijini tau ruaḡai mai Masedonia Paul ana tauvigwanigwaniana, ma i rubana-naiei nai dobuna ana boru gabuna. ‡ <sup>30</sup> Paul i ḡoei da patara au naoi ita rui da ita babani wate kerisiana eḡa ita vianinei. <sup>31</sup> Wate nanare Paul ana rava ḡelau au gabemani tauna i viḡaei da eḡa ina nae au boru.

<sup>32</sup> Patara i vinuanaina, i logologoi ma i garagarara labalababa ma eḡa ita aramanei aiwai aubaina weka i nei. <sup>33</sup> Mai Jew oroto tagogi i dudu-opunei au naoi wavana Alexander ma patara ḡelau i garara awarina da ita babani. Alexander urana i voepai da tau i ita genuana ma tauna ana rava aubai ita babani. <sup>34</sup> Wate maranai i aramanei da tauna Jew. Tau i anapui pona tagoginei wenanare i garagarara, “Tauta mai Ephesus ata god Artemis i ḡetelera!” da *hour* ruaḡa i kwa.

<sup>35</sup> Ma taon badana patara i riwei da i genuana ma i riwa, “Au rava mai Ephesus, rava anapui au dobu i aramanei da tauta tauvipapai mai Ephesus ai god ḡeḡetelarana Artemis ana numa taparoro ma ana ḡaima vivireina marei i peuai aubaina. <sup>36</sup> Eḡa aiai wei ina vikaua-moruei. Lamna aubaina orami ina rauei ma eḡa aiwai apoapoena ona kauai. <sup>37</sup> Wei ravai o neiai weka wate tau eḡa au numa taparoro aiwai ita danenei bo ata god ita riwana-boei. <sup>38</sup> Mepa da Demetrius ana rava maiteni e viviwavui tau ina nae ina rauetara ma ami viwavu ona naei kampa taurauetara awarina. <sup>39</sup> Ma mepa da ami nuabola ḡelau e mamae lamna taon babadai ai au boru ona babaniei ma ona tere-jijimani. <sup>40</sup> Ma amadodo aiwai i tupua, tau a rovo da ina viwavuita mae-boaboa aubaina. Wei vikaruwaḡawaḡana anona eḡa, ma mepa da Rome ina paridadana ma tauta menanare tana paribelananei. <sup>41</sup> Anina ma boru i gudui ma rava i vilamonei.”

## 20

### *Paul i nae au Masedonia ma Greece*

<sup>1</sup> Vikaruwaḡawaḡa au Ephesus taon i kwa ma au murina Paul kerisiana i raukwatueiai da i vinua-terenei, i viegualauei ma i netawanei da i nae au Masedonia provins. <sup>2</sup> Ma dobuna ḡaeḡaenana i naeni ma kaua maḡamaḡau kerisiana i vinua-terenei. Anina ma au Akaia\* i ḡeta. <sup>3</sup> Kampa nawaravi tonuḡa i mae. Tauna i vokaukaua da ita nae au Syria ma wate i nelaḡai da mai Jew ḡelau viraḡenana i viviogatarei lamna aubaina da i nae me au Masedonia. <sup>4</sup> Nelara ḡelau i votaḡotaḡo tau lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy. <sup>5</sup> Tau i wagei i ainae au Troas ma kampa i painiai. <sup>6</sup> Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ḡeta ai rava awari, kampa aupom 7 a mae.

### *Au Troas, Paul Eutikus iraḡelei i vovaimairini*

‡ **19:29:** Dobuna ana boru gabuna lamna numa ḡaeḡaena. Eḡa poewana, ma inanana me nawaravi gebona. Rava maḡamaḡau 26,000, nanare ina kiala **meeting place**. Rava e nenaie kampa da kalo tapuna ma e raraubiḡa. \* **20:2:** Marina e ḡoreḡorei Greek.

<sup>7</sup> Wiki au karena - Sunday tauai a vitagogielai voepaepa ma BADA ana amgogona aubaina, ma kampa Paul i jima da nubautuva, aubaina maratonna da ita nae. <sup>8</sup> Numa vatavataa au tepana a vitagogielai, ma kampa rampa maḡamaḡau i ararata. <sup>9</sup> Orotō laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepa dewadewana i peu-ḡaira da au doa i rauei. Maranai tau i ḡaira da ita voepai, tauna irairāḡena. <sup>10</sup> Paul i ḡaira, i matave-tepani ma i rapai ma rava i riwei i pa, “Eḡa ona vinuabola, tauna lawalawaina!” <sup>11</sup> Anina ma Paul i ḡae me au numa ma kerisiana maiteni BADA ana amgogona amna i ani ma awari i babani maratō. Ma Paul nai dobuna i netawanei. <sup>12</sup> Tau i laragana lawalawaina i naiei au numa ma rava orai i rauei.

### *Paul i amkuka au Miletus*

<sup>13</sup> Paul aenei i nae au Assos ma tauai i riwelai da wagei ana nae au Assos da tauna kampa ana vigerui. <sup>14</sup> Ma au Assos a vigerui ma a nae au Miletus <sup>15</sup> Maratonna bonabona Kios au ḡereḡerena a nae. Ma marana i tom au Samos a ḡeta, ma maratō ḡela au Miletus a ḡota. <sup>16</sup> Paul i ḡoei da jijimanina ina nae ma avena ita rui au Ephesus, eḡa ita ḡoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ḡeta muriai da Pentecost torelana.

### *Paul kerisiana au Ephesus i netawanei*

<sup>17</sup> Au Miletus Paul riwa i paritawanei au Ephesus taon kerisiana babadai awari da ita nebele. <sup>18</sup> Maranai au Ephesus taon i ḡetai ma tau i riwei i pa:

O aramanei au lawana menanare maranai vovounai weka au Eisia provins a ḡetai.

<sup>19</sup> Mai Jew i ḡoei da ita rau-iviapoapoeleu wate tau a vilamolamona ma ana toutou BADA awarina a vivitaunola. <sup>20</sup> O aramanei da maranai God Riwana Aiaina awarimi a raugugulei, riwa aiaina aniaguimi eḡa ata tajijini. Au deba a raraugugula rava maḡamaḡau au naoi, ma ami au numa a viararamanimi <sup>21</sup> Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaḡanei.

<sup>22</sup> Ma marina Arua Vivivireina i riweu da ana nae au Jerusalem. Eḡa ata aramanei kampa aiwai awariu ina tupua. <sup>23</sup> Wate taon nununai awari a nena ma Arua Vivivireina e vivieḡeu da amapo ina panu ma au deri ina tereu ma ina rau-iviapoapoeleu. <sup>24</sup> Ma mepa da ina viraḡeniu, wei lamna eḡa kaua ḡaeḡaena tau awariu. Wate kaua ḡaeḡaena lamna BADA Iesu nola i verevereu da ana vikwai. Wei nolana lamna, God ana iviaiai maemaena, riwana ana raugugulei.

<sup>25</sup> Maḡamaḡaumi awarimi a nei ma God ana vigulau a raugugulei wate marina a aramanei da amadodo da i nena, naou eḡa ona inana-melei. <sup>26-27</sup> God ana vilawana ogatarana rava aubai eḡa ata govaḡi awarimi lamna aubaina riwa bagibaginei a ririwemi da mepa da rava au babani eḡa ina vitumaḡanei ma ana lawana maema-nonoana ina vine-boai, lamna eḡa tau au wavu. <sup>28</sup> Taumi babada ma ona paina-melemi, nanare tauvitumaḡana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tau lamna God ana vinevine taranei i gimarai. <sup>29</sup> A aramanei da ana nae ma au muriu tauraugugula morumorui ina nei awarimi ma rava ai tumaḡana ina viapoapoeni, me auou moduei sipu au boruna viraḡena aubaina. <sup>30</sup> Ma rava ḡelau ami au dam oina ina vomairi ma ina viararamana ma moruei rava orai ina taini da tau i votaḡotaḡoi. <sup>31</sup> Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viararamanimi.

<sup>32</sup> Ma marina God au urana a teretere. Ana agu e verevereoimi ona vitumaḡanei. Wei aguina e vovavirewapanimi, ma ami pulo ina veremi, aubaina taumi God natu-natuna viaiainai. <sup>33</sup> Ma tau eḡa rava ana mane bo ana purapura ata rauoḡarei <sup>34</sup> Taumi

o aramana-kauei da tau nimauei a nola da mane a vaia da tau au taubagibagi turau aubaiai. <sup>35</sup> Nanare, a viatataiem i da ona nola guratana da mane ona vaia ma molaka ona voagui. Iesu ana babani eġa nuanuami ina vuru, Tauna i riwa i pa, “Verena i ai kaua eġa me vainana.”

<sup>36</sup> Paul i babani vorovei ma anapui i mae-ġaira au doa ma i raupari. <sup>37-38</sup> I vinolanola i pa, “Amapo eġa naou ona inana-melei.” Wei riwana i vinuabolai da i vitouana, Paul i taragwabai ma i ġigia-laġolaġonei. Ma i naiei da au waga i vigeruei.

## 21

### *Paul ana vaġai au Jerusalem*

<sup>1</sup> Ephesus kerisiana babadai a viegualaei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon. <sup>2</sup> Weka waga ġelauna i nenaie au Phonisia a gerui, <sup>3</sup> da au Saipras bonabonana a rubatawanei, au kelakelauai da a nae au Taia au Syria provins a ġota, da purapura ita viopuni. <sup>4</sup> Kampa tauvitumaġana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viġaei da eġa ina nae au Jerusalem. <sup>5</sup> Ma mara i ġetai da ata vomairi, kerisiana awawai maiteni da natunatu taon i voterei ma anapui i a ġaira au gera, a raupari gogona. <sup>6</sup> A viegualau da tauai au waga a geru ma tau i nae-me ai au numa.

<sup>7</sup> Au Taia ma a nae au Tolemais taon a ġeta. Tauvitumaġana kampa a nebelei ma aupom tagogi maiteni a mae. <sup>8</sup> ✧ Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina. <sup>9</sup> Tauna natunatuna waivine i 4 eġa tavitavine i, tau i God ana riwa i vivieġai rava awari.

<sup>10</sup> ✧ Aupom vomaġau i kwa, kerisiana wavana Agabas, tauna nanare God riwana i vivieġai, Judeaei i ġairai au Caesarea. <sup>11</sup> Ma i nei awariai da Paul ana tairoro i vaia ma tauna urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raġini, ma Jentail au urai ina terei.”

<sup>12</sup> Maranai wei riwana a nonori, tauai kerisiana ġelau i maiteni Paul a vibaġana-guratei, da avena ita nae au Jerusalem. <sup>13</sup> Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viraġeniu au Jerusalem, BADA Iesu a vovotaġotaġoi aubaina.” <sup>14</sup> Tauai a vivieġai ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

<sup>15</sup> Wei au murina a vokaukaua ma a vomairi au Jerusalem. <sup>16</sup> Kerisiana ġelau i mai Caesarea I naielai Nason ana au numa ma kampa a mae. Tauna oroto Saiprasie, ma Iesu votaġona i vikareni maranaina rava vovounai i vikare i da Iesu Riwana Aiaina i rarau-gugulei.

### *Paul, James i raugenari*

<sup>17</sup> Maranai au Jerusalem a ġeta kerisiana ana nuai i nebelei. <sup>18</sup> Maratom ġela Paul maiteni a nae da\* James a raugenari,† dogadogara anapui kampa. <sup>19</sup> Paul tau i viegualaei ma ana au vaġai God aiwai i kaukauei Jentail awari anapuna tau i parivere i.

<sup>20</sup> Maranaina wei riwai i nonori, tau i God i voepaepai ma Paul i riwa i pa, “Tura-iai u aramane i mai Jew ai maġa tausand nanare weka Iesu e vivitumaġane i, ma God

✧ 21:8: Act 6:5; 8:5 ✧ 21:10: Act 11:28 \* 21:18: Wei lamna Iesu ana tevera. Act 12:17; 15:13 ma Mrk 6:3

† 21:18: Mane anapui ai au vaġai i tami bo rava i puloi i vere i damanai mane taupainina i vere i

ana tarawatu e vovotaḡo-kauei. <sup>21</sup> Wate rava Jew kerisiana weka au Jerusalem am kauga i vibenabenaie, da tam Jew Jentail maiteni e mamae e viararamani da Moses ana tarawatu ina gedugeduaie. Ma u riwei da natunatui ini eḡa ina bori ma ai kauga ḡelau eḡa ina votaḡotaḡoi. <sup>22</sup> Tau i aramanei da tam u ḡetai, Marina aiwai tana kauei? <sup>23</sup> Aiwai a ririwemi ona kauei. Au nelara 4, tau parivainuaḡana bagibagina God awarina i kauei. <sup>24</sup> Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauei. Anina ma tau kolai ina ḡari ma rava anatapai ina aramanei da tam Moses ana tarawatu anina e vovotaḡotaḡoi, ma babani au naona lamna anatapuna moru kauga. <sup>25</sup> ✨Ma Jentail marina i vivitumaḡana aubaii pepa a girumi ma wenanare a riwei, sia e pulopuloei kokoitau awarii eḡa ina ani, Tara eḡa ina umai, Rava ḡamoḡamo uai e kikiki tarai eḡa ita toi-tawanana, eḡa ona ani. Eḡa ona viawawana labalababa.”‡

<sup>26</sup> Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tau ai viaiaina ina voterei. Ma maranaina pulo ita terei tau tagotagogi ava aubai.

### *Paul i pani.*

<sup>27-29</sup> ✨Ma aupom 7 aburuna ava da ita kwa ma Jew ḡelau au Eisia provins maemae tau Paul i 'nanai Tempol au orana. Au naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini ma i garara i pa, “Nelara mai Israel ona nei, ona voagui! Wei orotona dobu anatapuna e nenaeni ma rava anatapai e viararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!”

<sup>30</sup> Ma rava anatapai i nonori da au Tempol viḡaiḡaiawa i tupua ma anatapai kampa i ruba. Ma Paul i vojijini ma i taina-opunei au doa ma Tempol metaetana i gudui. <sup>31</sup> Maranai tau Paul viraḡenana i kaukauei, Mai Rome sorodia ai bada ḡaeḡaena i nonori da viḡaiḡaiawa ḡaeḡaena i tupua au Tempol. <sup>32</sup> Tauna laḡilaḡina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuana i voterei.

<sup>33</sup> Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, “Wei aiai orotona? Aiwai i kauei?” <sup>34</sup> Patara au orana rava ḡelau babani tagogi i gararei, ma rava ḡelau babani tapuna i gararei. Rava were da nare i garagarara da sorodia ai bada menanare ita nelaḡai ḡaiawa karena aiwai, lamna aubaina ana sorodia i egari da Paul ita naiei, ai au bareki. <sup>35</sup> Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita gagaloei. <sup>36</sup> Patara amapo da tau i vovotaḡotaḡoi ma i garagarara i pa, “Ona viraḡeni, ona viraḡeni!”

### *Paul patara awarii i babani.*

<sup>37</sup> Maranai tau aburuna ava da au bareki ita rui, Paul Greekei sorodia ai bada i riwei i pa, “Anina bo eḡa da awarim ata babani?”

Ma tauna i auepai ma i riwa i pa, “Tam Greek u aramanei bo? <sup>38</sup> Tau a notai da tam Egyptei, rorova ai babada u viḡaviei, Ma rava 4,000 orai potapotai u opunei au mutulua, Tam nai ravana bo?”

✨ **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ḡela awana oroto bo wavine maiteni e viawawana (Exo 20:14, Deu 5:18); Rava ḡela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ḡamoḡamo e viawawana (Lev 18:23); Rava ḡela, eḡa awaoim maiteni e viawawana (Eph 5:3); Rava ḡelau e gaegari da maiteni ma viawawana. (Gen 34:7, Deu 22:25-28). ✨ **21:27-29:** Act 20:4

<sup>39</sup> Paul i paribelana i pa, “Eġa! Tau Jew ei, au taon Tarsus a tupua, au Silisia provins, a vivibaġaim da rava awari ana babani.”

<sup>40</sup> Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.

## 22

<sup>1</sup> “Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai.”

<sup>2</sup> Maranai patarana Paul i nonori da tau i ponei i bababani, tau i genuana ma i rautaniġana.

<sup>3</sup> ✠ I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.<sup>\*</sup> A ġoanaguratei da God ata voepaepa-kauei me taumi anatapumi nanare. <sup>4</sup> ✠ Tau Iesu ana etanai tauvotaġotaġoina a rau-iviapoapoelei da ġelau i raġe. Nelara ma waivine a pani ma au numa panipani a tawana-ruiei. <sup>5</sup> Pirisi ġeġetelarana ana boru ġeġetelarana† maiteni i aramanei da tau a ririwa kaua. Tau i vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

<sup>6</sup> Aubenai Damaskas a tuġereġerei ma maratagogi lalaina gamrina ġaeġaena marei i ġairai da i tunui. <sup>7</sup> A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

<sup>8</sup> Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

<sup>9</sup> Rava maiteni a nena lalalaina i ’nanai wate babani eġa ita nonori.

<sup>10</sup> A paridadana a pa, “Bada Aiwai ana kauei?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

<sup>11</sup> Lalalaina gamrina i rata guratana ma matau i kamoi da eġa ata inainana. Ma tauvigwanigwaniana au urai i voa ma i naieu au Damaskas.

<sup>12</sup> Oroto wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauei. <sup>13</sup> I nei da au ririvau i mairi ma i riwa, “Vareiu Saul ma inana me!” Nai marana a inana me.

<sup>14</sup> Anina ma i riwa, “Amamata ai God i rautanim, da ana ġoana ma aramanei, ana Taunola Jijimanina‡ - matamei ma inanai, ma riwana taniġamei ma nonori. <sup>15</sup> Aiwai u inainanai ma u nononori ma vimatematei rava anatapui awarii. <sup>16</sup> Marina aiwai e paipaini! Tauai ana babataitoim ma BADA awarina ma raupari da am ġo’apoapoei ina oġa-tawanei.”

<sup>17</sup> Anina ma a nae au Jerusalem. Au Tempol a raraupari ma matauei kaua a inanai.

<sup>18</sup> A inanai BADA awariu i bababani i pa, “Rava weka am jima tau aubaiu eġa nonorana ita ġoeġoei. Laġilaġina Jerusalem ma opu-tawanei.”

<sup>19</sup> Wate tau a paribelei, “BADA wei ravai i aramanei da pari numai a nepai da kerisiana a vunui ma a pani-naiei. <sup>20</sup> ✠ Ma maranai am peroveta Stephen tarana i toi, tau kampa a maimairi ma ana iraġe a vianinei ma ġaima tautawanai ai gara a paipaini.”

<sup>21</sup> Ma BADA i riweu, “Ma nae a paripari-tawanem aueia Jentail awarii.”

### *Paul e ririwa da tauna Romei*

✠ **22:3:** Act 5:34-39 \* **22:3:** Gamaliel tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. ✠ **22:4:** Act 8:3; 26:9-11 † **22:5:** Sanhedrin ‡ **22:14:** Rava Jijimanina bo bulubulona, lamna Iesu wavana. Paul eġa Iesu wavana ita latoni mepa da taurautaniġana mai Jew ita viamloġaiġaini.

✠ **22:20:** Act 7:58

<sup>22</sup> Patarana Paul i rarautaniġane i ma maranai wei babanina i kau ei tau i meji guratana ma i vigaragararei i pa, “Ona viragena-tawane, eġa ina mael!”

<sup>23</sup> Tau i vigaragararei, ai kwama i kwajikwajiei ma pokau i tawatawanei awarina. <sup>24</sup> Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieġa aiwai aubaina ana rava amloi i ġaiġai ma awarina i garagarara. <sup>25</sup> Ma urana ruaġa i terepai au aidamo ma i raġiraġini da ita wipi ma Paul sorodia ai bada i riwei i pa, “Tau Rome-ei, Eġa ota etareu ma o vunuvunu-labalababaiu. Lamna menanare?”

<sup>26</sup> Maranai sorodia ai bada wei i nonori ma i nae da ai bada ġaeġaena i parivere. Ma tauna i vitara-virevirei i pa, “Aiwai e kaukai? Wei ravana Rome-ei!”

<sup>27</sup> Sorodia ai bada i nae Paul awarina ma i paridadanei, “Ma riweu! Riwa kaua da tam Rome-ei bo?”

Ma Paul i paribelei, “Ee, lamna riwa kaua!”

<sup>28</sup> Sorodia ai bada Paul i riwei, “Tau mane ġaeġaena Rome gabemanina a verei da a vimai Rome.”

Paul tauna i riwei, “Tau a tupua da Rome-ei.”

<sup>29</sup> Sorodia i ġoei da Paul ita etarei wate maratagogi ita ġori-melei. Ai bada ita ġori ma i rovo-kaukai maranai i aramane i da i kauana-boai da Paul, Rome-ei seinei i pani.

### *Paul Jew ai boru ġetelarana S au naoi i mairi.*

<sup>30</sup> Au maratamna sorodia ai bada i ġoei da ita aramana-kau ei mai Jew ai viwavu aiwai Paul awarina. Ma lamna aubaina Paul ana seinei i votawatawanei ma i opunei boru ġetelarana au naona i vimairini.

## 23

<sup>1</sup> Paul boru ġeġetelarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.” <sup>2</sup> Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai. <sup>3</sup> Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

<sup>4</sup> Tau Paul au ġereġerena i maimairi Paul i riwei, “Aiwai aubaina God ana Pirisi Ġetelarana e vivijiboġi?”

<sup>5</sup> Paul i paribelei, “Varevareiu eġa ata aramane i da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*” (*Exodus 22:27*)

<sup>6</sup> ☆ Anina ma Paul i 'nanai da Sadusi ma Pharisi ġelau kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareu!” <sup>7</sup> Maranai wei i latoni Pharisi ma Sadusi viparipariniġai i raukarei ma boru i kai da ruaġa. <sup>8</sup> ☆ Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġane i, wate Pharisi wei anatapu i e vivitumaġane i.

<sup>9</sup> Ġaiawa ġaeġaena i tupua ma tarawatu babadai ġelau tau Pharisi, i vomairi ma i babani guratana i pa, “Tauai eġa aiwai apoapoeni ata inanai wei ravana awarina! Mepa da anela bo Bada Aruana tauna awarina i babani?” <sup>10</sup> Viġaiġaiawa ġaeġaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

<sup>11</sup> Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubai u jima au Jerusalem nanare aubai u Rome ma jima.”

### *Mai Jew i vioga da Paul ina virageni*

<sup>12</sup> Ubaubanai mai Jew gēlalui i vitagogiei ma i viogatara ma i parivainuaḡana da eḡa ina am bo ina uma da Paul ina viragēni. <sup>13</sup> Nelara 40 nanare i vianina da Paul ina viragēni. <sup>14</sup> Tau i nae pirisi babadai ma dogadogara awarii ma i riwei, “Tauai parivainuaḡana bagibagina a kauēi da eḡa ana am da Paul ana viragēni.” <sup>15</sup> Taumi Boru gēḡetelarana maiteni ona moru ma riwa ona pari-tawanei sorodia badana awarina da Paul ina neiāi ma ona vitara-virevirei da riwa kaua ona vaia. Tauai ana vipaipai da ana viragēni muriai da weka ina ḡetai.

<sup>16</sup> Wate maranai Paul avuna wei ogatarana i nonori ma i nae sorodia ai au bareki ma Paul i parivereī.

<sup>17</sup> Ma Paul sorodia badana i ḡoreiai ma i riwei, “Wei laragana laḡilaḡina ma naiei ami bada awarina da ana riwa ina riwei.” <sup>18</sup> Ma i naiei ai bada ḡaeḡaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiāi awarim aubaina am riwa awarina.”

<sup>19</sup> Sorodia ai bada ḡaeḡaena laraga i vinimavoai ma i maeria ma i paridadanei, “Am riwa aiwai ma riweu?”

<sup>20</sup> I riwa, “Mai Jew i riwa da ita vibaḡaim da au maratomi Paul uta naiei ai au Boru gēḡetelarana, Wei anapuna moru. <sup>21</sup> Wate eḡa ma rautaniḡanei aubaina rava 40 nanare pota e paipaini da ina viragēni. Tau i vioga da eḡa ina am da Paul ina viragēni. Tau i vokaukaua ma am vianina ava e paipaini.”

<sup>22</sup> Ma bada laraga i riwei da eḡa aiāi ina riwei ma i paritawanei.

### *Tau Paul i paritawanei Gavēna Felix awarina.*

<sup>23</sup> Anina ma sorodia ai bada ḡaeḡaena babada ruaḡa i ḡoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi. <sup>24</sup> Hos biaḡa ona vaia Paul aubaina da aiaina ona naiei gavēna Felix awarina au Caesarea.”

<sup>25</sup> Ma sorodia ai bada pepa wenanare i girumi:

<sup>26</sup> Tau Claudius Lisias, a girugiruma awarim au bada vidualaulaunam, Gavēna Felix. Eḡalau.

<sup>27</sup> Mai Jew wei orotona i vojijini ma ita viragēni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei. <sup>28</sup> A ḡoei da ata aramanei ana apoapoe aiwai, da ata naiei ai Boru gēḡetelerana awarina. <sup>29</sup> Ma a nelaḡai da viwavuna lamna tauiva ai tumaḡana kauai ma Rome ana tarawatuei lamna tauna eḡa aiwai apoapona ita kauēi da ata viragēni bo ata pani. <sup>30</sup> Maranai riwana a vaia da mai Jew i ḡoei da govagovaḡanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina ḡetai da ai viwavu ina kauēi.

<sup>31</sup> Ma sorodia ai babada i ririweia nanare i kauēi ma waguvarai Paul i taravaini ma i naiei da au taon Antipatris i ḡeta. <sup>32</sup> Au maratomi aiera ma sod sorodiai i naeme au Jerusalem ma hosi sorodia Paul i naei au Caesarea. <sup>33</sup> Maranai hosi sorodiai au Caesarea i ḡeta pepana ma Paul gavēna i veredamanei au urana. <sup>34</sup> Gavēna pepa i 'avi ma Paul i paridadanei metauna provins-na u tupua ma i riwa, “Silisia.” <sup>35</sup> Gavēna i riwa i pa, “Am etara ana nonori maranai am tauviwavu ina ḡetai.” Ma sorodia i naiei Herod numa i voavoiana da ita inana-vaitetei.

## 24

### *Paul Gavēna Felix au naona i mairi*

<sup>1</sup> Aupom 5 au murina Pirisi gēḡetelarana Ananias ma dogadogara i ḡaira au Caesarea ai taurauetara wavana Tertelus maiteni. <sup>2</sup> Ma Paul i ḡoreiai gabemani au naona. Ma Tertelus i vomairi ma viwavuna i vikarei:

Au bada Felix \*vinualaulaunam, Am vibadanei ta mae ubauba ma ata nota eġa aiwai. Ma kuaa vouii ma aiaii u kaukauei ata dobu voana aubaina i voagu-kaueta. <sup>3</sup> Anatapuiai mepamepa a mamae a vinuai ai kuaa tam awarim. <sup>4</sup> Wate eġa ata ġoei da ana visina-viraviraim. Ma lamna aubaina a ġoeġoei da uta rautaniġaneu mara aburuna ava.

<sup>5</sup> Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret† ai bada. <sup>6</sup> Tau i ġoei da Tempol maiteni ita tuvaideoeoi ma lamna aubaina a pani. <sup>7</sup>‡ <sup>8</sup> Ma rautarei ma ma nelaġai da ai viwavu lamna anatapui riwa kuaa.

<sup>9</sup> Ma mai Jew Tertelus au murina i mairi ma i riwa, “Wei babani anatapui riwa kuaa!”

<sup>10</sup> Anina ma Gavena Felix Paul i raumotemotei da ita babani. Paul babani i vikarei i pa:

Au bada vinualaulaunam, a aramanei da tam madeġa biaġa wei dobuna ai tauraeutara lamna aubaina tau ana nuaubau ana babani aubaiu. <sup>11</sup> Am rava ina riwem da tau pom ota aupom <sup>12</sup> nanare a ġeta memei au Jerusalem da BADA ata voepaepai.

<sup>12</sup> Au tauviwavu eġa ita nelaġaiu ata viġaiġaiawa au Tempol bo au boru-numana bo mepa nanare au Jerusalem. <sup>13</sup> Ma ai viwavu tau awariu menanare tana aramanei da lamna riwa kuaa? <sup>14</sup> Wate riwa kuaa da tau amamata ai God a voepaepai ma BADA Iesu ana etanai, a votaġotaġoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anatapuna a vivitumaġaneu. <sup>15</sup> Tau God awarina a vitumaġana guratana me ravai nanare, da tauna muriai rava anatapui iragelei ina vilawana-melei, ravai aiaii ma rava apoapoei. <sup>16</sup> Lamna aubaina a kaukauana guratei da orau ina ai rava ma BADA awarii.

<sup>17</sup> ✧ Jerusalem a netawanei madeġa biaġa i kwa ma pom ota a nememei da molamolakai ata puloi ma pulo ata kauei God awarina. § <sup>18</sup> Tau aiaiu, maranaina i nelaġaiu au Tempol viaina pulona a kaukauei. Eġa patara maiteni ma eġa visinaviravira. <sup>19</sup> Wate mai Jew ġelau Eisia provinsei i nei kampa. Tau mepa marina! Ita nei au naom da ai viwavu ita terei. <sup>20</sup> Bo babada weka ita riweta au apoapoe aiwai maranai boru ġeġetelarana au naona a mairi. <sup>21</sup> ✧ Wate mepa da maratagogi awarii a garara a pa, “A vitumaġana da God rava anatapui iragelei ina vovaimairini! Lamna aubaina tau weka a maimairi.”

<sup>22</sup> Felix tauna BADA Iesu ana Etanai riwana i aramana-kauei, boru i gudui ma i riwa, “Maranai sorodia ai bada Claudius Lisis ina nei, ma ina paribelem.” <sup>23</sup> Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

### *Paul Felix i viararamani*

<sup>24</sup> Aupom biaġa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da Paul i neiai, ma rava ai tumaġana Iesu Keriso awarina i babanieu ma Felix i rautaniġana. \*

\* **24:2:** Felix ana au vibadana lamna eġa ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita ġaeġaei i verei da madeġa ruaġa i kwa Sisaei Nero wei ravana i viopuni. Ġavia ġaeġaena i tupua ma Jew Rome i viġaviei ma tau i Jerusalem i rikai da eġa aiwaina ita mae. † **24:5:** Wava Nazarene lamna Iesu ana tauvotaġotaġoi e babanieu aubaina tauna Nasareteu. Maranai Tertelus tau i ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e viviaigai. ‡ **24:7:** Verse 7 lamna buka waduwaduboi biaġava au orana e mamae, wate buka Greek ponanei i girugirumi maġamaġau wei ves-na au orana eġa. ✧ **24:17:** Act 21:17-28 § **24:17:** Madeġa 5 i kwa ma Paul i nememei au Jerusalem da ita mae mara aburuna da tauvitumaġana ita vovaiwewapani ma ana babara ma nolana aiaina ita virarautuei. (Act 18.22) ✧ **24:21:** Act 23:6 \* **24:24:** Mepa da Drusila Jew wavinena awarinei Felix wei ravai e ġoreġorei tauvitumaġana i aramanei. Drusila lamna Herod Agrippa natuna guguinina umauna ana madeġa 20. Tauna wavalatona Siriei i ravaġi wate i voterei maranai ana madeġa 16 da Felix i ravaġi. Wei lamna ana tavine viruiaina ma Felix ana tavine vitonuina.



<sup>25</sup> Wate maranai Paul babani i vikarei da God ana ḡoana, da rava lawana aiaina ma jijimanina ina maeni, ma erawa kauai ma ḡo'apoapoe ina geduaiei, aubaina mara e nenei maranai rava anapui ina etarei. Felix wei babanina i nonori tauna i rovo ma Paul i riwei, "Ma nae! Ma maranai ana ḡoem lamna ana kwatuem." <sup>26</sup> Ma Felix i ḡoeḡoei da Paul tauna manelei ita gwalai ma lamna aubaina mara i maḡa i raukwatuei ma awarina i babani.

<sup>27</sup> Madeḡa ruaḡa au murina Felix i rautom ma ana gabu Posias Festus i vaia. Felix i ḡoei da wavana ita ai mai Jew awarii lamna aubaina Paul au numa panipani i votere-tawanei.

## 25

### *Paul i vibaḡa da Sisa au naona ita mairi*

<sup>1</sup> Festus i ḡeta au Caesarea da ana nola ita vikarei ma aupom vitonuina i ḡae au Jerusalem. <sup>2</sup> Weka piriḡi ḡeḡetelarana ma dogadogara Festus i nebelei ma ai viwavu Paul awarina tauna i verei. <sup>3</sup> Ma Festus i vibaḡai da ita voagui da Paul ita paritawanei au Jerusalem. Tau i ava i vioga da Paul au etana i ita viraḡeni. <sup>4</sup> Wate Festus i paribelei i pa, "Paul au deri au Caesarea ma tau a ḡaiḡaira me kampa aupom ruaḡa au murina. <sup>5</sup> Mepa da Paul aiwai i kauana-boai lamna ami Babada maiteni ana ḡaira da kampa ami viwavu ina terei."

<sup>6</sup> Aupom 8 da 10 nanare au murina Festus i ḡaira me au Caesarea ma maratoma au numaetara i kiala ma ana sorodia i eḡara da Paul ita ruieiai au naona. <sup>7</sup> Maranai Paul i ruieiai, ma Jew babadai Jerusalem ei i ḡairai i nei awari ma ina viwavui, kua maḡamaḡau apoapoei aubai. Wate tau i viwavu anapui anona eḡa.

<sup>8</sup> Paul wei \*viwavui i vinua-naini ma i pa, "Tau eḡa aiwai apoapoea ata kauai mai Jew ai tarawatu awarina bo ai Tempol awarina bo Caesar awarina."

<sup>9</sup> Wate Festus i ḡoei da mai Jew ita vinuaiaini lamna aubaina Paul i paridadanei i pa, "E ḡoeḡoei bo eḡa da tana ḡae au Jerusalem ma etara?"

<sup>10</sup> Paul i riwa, "Tau marina Caesar ana au etara gabuna a maimairi, weka ina etareu. Tam u aramana-kauai da tau eḡa aiwai apoapoea ata kauai mai Jew awarii. <sup>11</sup> Wate mepa da aiwai apoapoea a kauai lamna ma viraḡeniu. Tau eḡa iraḡe ata rovoei. Wate mepa da wei lamna viwavu moru lamna eḡa aiwai ana rewapana ita mamae da ina veredamaneu. Tau a vivibaḡa Caesar awarina!"

<sup>12</sup> Festus Caesar ana dogadogara ai nota i vaia ma i paribelana i pa, "Tam u vibaḡa Caesar awarina, Anina Caesar awarina ma nae."

### *Festus Paul ana babani gulau Agrippa i parivere*

<sup>13</sup> Aupom biaḡa au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita viegualaei. <sup>14</sup> Ma i mae aupom vomaḡauna ma Festus Paul i rarauetara gulau i parivere i pa, "Felix panipani tagogi weka i voterei. <sup>15</sup> Ma maranai a nae au Jerusalem mai Jew ai piriḡi babadai ma dogadogara ai viwavu i neiai awariu ma i vibaḡaiu da Paul ita viraḡeni.

<sup>16</sup> —Ma a riwei da tauai mai Rome ai tarawatu e ririwa da eḡa rava ana kovoḡa labalababai da au naona ana rauetarei. Tau i ina ḡetai da ai viwavu taurauetara au naona ina mairi da ina gagaloana-melei. <sup>17</sup> Maranai tauviwavu maiteni weka a ḡetai. Tau eḡa ata vipaipai ma maratoma a eḡara da ravana i neiai da ita etara. <sup>18</sup> Tauviwavu i vomairi ma a notai da aiwai apoapoea aubaina ita viwavui wate eḡa. <sup>19</sup> Anina kua biaḡa ava ai taparoro kauai, ma rava tagogi irairaḡena wavana Iesu i vitarapiriei. Wate Paul e ririwa da Iesu lawalawaina. <sup>20</sup> Tau nuanuau i raḡaraḡa menanare riwa kua ana vainei ma Paul

\* **25:8:** Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamae da ana nuabola ina naiei au Rome da Caesar ina rauetarei. † **25:13:** Wei lamna Herod Agrippa 11, Herod Agrippa 1 natuna.

a paridadanei da i vianina da maiteni ata g̃ae au Jerusalem da kampa ata etarei. <sup>21</sup> Wate Paul i vibaḡa da Caesar ana viwavu ina rautaniḡanei. Ma sorodia a egari da au numa panipani ina paini da ana paritawanei Caesar awarina.”

<sup>22</sup> Ma Agrippa Festus i riwei, “A g̃oei da ravana ana babani ana rautaniḡanei.”

Ma Festus i paribelei, “Anina, au maratoma ma rautaniḡanei.”

### *Gulau Agrippa Paul i rautaniḡanei*

<sup>23</sup> Au maratoma gulau Agrippa ma Benisi gulau garai i oteni ma ana gabemani babadai g̃aeḡae maiteni, i arana-ruiei au boru numana. Festus ana sorodia i egari da Paul i ruieiai. <sup>24</sup> Festus i riwa, “Gulau Agrippa ma anatapumi o rieiai weka, wei ravana o inainanai! Tauna mai Jew au Jerusalem ma weka au Caesarea e g̃oeḡoei da ina iraḡe. <sup>25</sup> Wate tau a nelaḡai da tauna eḡa aiwai ita kauana-boai da ina iraḡe. Wate i vibaḡa da Caesar tauna ina rauetarei. Lamna aubaina a pariparitawanei Caesar awarina. <sup>26</sup> Wate Caesar aiwai ana riwei, eḡa ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi. <sup>27</sup> Aubaina eḡa ita ai da panipani ana paritawanei Caesar awarina ma ana viwavuna eḡa!”

## 26

### *Paul ana gudu i tarai*

<sup>1</sup> Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei <sup>2</sup> i pa:

I ai kua gulau Agrippa da amadodo tam au etara e rarautaniḡanei da Jew babadai ai viwavu awariu ana tere-vaijijimani. <sup>3</sup> Tau aramanei da tam mai Jew ai giu ma ai paripariḡai u aramanana-kauei. Lamna aubaina a vivibaḡaim da au paribelana ma rautaniḡanana-kauei.

<sup>4</sup> Mai Jew anatapui au lawana i aramanei, aburu da marina, au dobu oina da au Jerusalem. <sup>5</sup> ✧Tau rorova ava i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anatapuna a vojijina-kauei. <sup>6</sup> Ma marina a vivitumaḡana da God aiwai noinoita i parivainuaḡani ina kauei. Ma lamna aubaina tau weka a maimairi. <sup>7</sup> Wei parivai-nuaḡanana ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vitumaḡanana aubaina mai Jew e viviwavuii. <sup>8</sup> Aiwai aubaina o notanotai da God eḡa tagotagogina da rava iraḡelei ina vovaimairini?

<sup>9</sup> ✧Tau au naona a notai da aiwai anatapuna ata kauei da Iesu Nasaretei ata viḡaviei. <sup>10</sup> Ma anina lamna a kauei au Jerusalem. Pirisi ḡeḡetelerana babadai pepa i verei ma lamna i vovai-virewapaniu ma kerisiana vivivireii maḡamaḡai au numa panipani a terei, ma nanare ai iraḡe a vianinei. <sup>11</sup> Mara maḡamaḡai boru numai a naeni da kerisiana a vununaiei da ai tumaḡana ita boviei. Amlou i ḡaiḡai kua da dobu ḡelau i naeni kerisiana a baibaiei.

<sup>12</sup> Mara tagogi pirisi babadai au Jerusalem pepa i vereu da rewapana i vereu ma a nae au Damaskas. <sup>13</sup> Ma aubenai nanare, tau au etanai a nenaie ma a inanai, lalalaina marei i ḡairai ma i lalaiai, gamrina madeḡa i ḡetawanei! Au rava maiteni a bababara i lalaiai. <sup>14</sup> Anatapui ai a vipeuana au doa ma pona Hebrewi awariu i bababani. I riwa, “Saul, Saul aiwai aubaina e viviḡavieu? Tam e g̃oeḡoei da Tau ma viapoapoeniu wate eḡa da tam e viviapoapoeni-melem!”

<sup>15</sup> Ma a paridadana, “Bada tam aiai?”

Ma BADA i paribelei, “Tau Iesu, ravana tauna e viviġaviei. <sup>16</sup> Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inana ma aiwai ana viatataiem, ma vimatamatei rava awarii. <sup>17</sup> Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii, <sup>18</sup> da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ġo’apoapoe ina nota-tawanei, ma ina taravaini natunatuna rarautanii, ai tumaġana awariu aubaina.”

<sup>19</sup> Lamna aubaina Gulau Agrippa, tau riwa marei au inana a inana a voteletelei. <sup>20</sup> ✧Au naona a jima mai Jew awarii au Damaskas ma nanare au Jerusalem ma Judea anapuna ma muriai Jentail maiteni awarii. A jima da ai ġo’apoapoe ina votere-tawanei ma ina mae-tavirei God awarina, ma ai lawana ina vimataira da ai kaua apoapoe i voterei-tawanei.

<sup>21</sup> Wei babanii aubaina mai Jew au Tempol i vojijiniu ma i ġoei da ita viraġeniu. <sup>22</sup> Wate God i vilawaniu da marina, ma weka a maimairi da a vimatamata rava muomuoi ma nanare rava ġaeġaei awarii. Aiwai a bababaniei lamna peroveta nununai ma Moses i ririweta ina tupua. <sup>23</sup> ✧Tau i riwa da tauvilawana Keriso ina vinuapoapoe. Ma tauna ina iraġe ma ina vinoa da ina vomairi me ma wei matairana ina vinolanola da tauna God lalalaina mai Jew ma Jentail aubaii.

<sup>24</sup> Weka Festus i vionaġi ma i garara Paul awarina, “Tam u bua! Am aramana i vibuaim!”

<sup>25</sup> Wate Paul i paribelei, “Au bada Festus tau eġa ata bua. Tau aiwai a bababaniei lamna riwa kaua ma babani anona. <sup>26</sup> Wei kaua eġa govagovaġana ma aramanei da Gulau Agrippa anapuna i aramanei, ma lamna aubaina ana tepatorau wei kauai ana babaniei awarina.” <sup>27</sup> Paul Gulau Agrippa i riwei i pa, “Peroveta e vivitumaġanei bo eġa? A aramanei da nanare!”

<sup>28</sup> Ma Agrippa i paribelei, “U notai da tau laġilaġina ma sinaviraiu da ana vikerisiana!”

<sup>29</sup> Paul i paribelei, “Laġilaġina bo amapo, a raraupari God awarina da tam ma rava anapui wei au boruna ina tupua-vira me tau nanare wate eġa sein maiteni.”

<sup>30</sup> Anina ma gulau ma gavena ma Benisi i vomairi ma i nae. <sup>31</sup> Ma anapui i nena ma i babani vivira ma i vianina i pa, “Wei ravana eġa aiwai apoapoen ita kaui da tana viraġeni bo tana pani.”

<sup>32</sup> Ma Agrippa Festus i riwei, “Mepa da eġa ita vibaġa ġae Caesar awarina, lamna marina tata rupeni.”

## 27

### *Paul wagei i vaġai nae au Rome*

<sup>1</sup> Festus mara i tereterei i ġetai da tauai ata nae au Rome. Paul ma tau ma panipani ġelau maiteni au waga a geru ma a vaġai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena. <sup>2</sup> Waga Adaramitei i nei da a geru ma wagana i ġota-nae au Eisia provins gerana. Orotu wavana Aristakas ana dobu Thesalonika au Masedonia provins tauna maiteni i geru.

<sup>3</sup> Au maratonna au Sidon taon a ġota, Julius ivina i ai Paul awarina ma i voterei da i opu au gera da ana rava ita raugenari ma ana ġoana aiwai ita vibaġei. <sup>4</sup> Muriai wagei a opu da a nena ma ive i verau-matamataniai ma lamna aubaina bonabona au Saipras ma dobu ġaeġaena au pouna au mulaġina ambori. <sup>5</sup> Ma boga ġaeġaena a bori da Silisia provins da Pamphilia provins gerai a voterei da au Maira taon a rui au Lisia provins <sup>6</sup> Au Maira taon kampa sorodia badana mai Egypt ai waga Alexandriei i nena au Italy kampa

i vigeruai. <sup>7</sup> Ma aupom maḡamaḡai nuatauai a ruba ma a voia guratana da Cinidus taon a tuḡereḡerei wate ive i verau-matamataniai da kampa waga a virai da Crete bonabonana ma mutu Samone au poui au mulaḡina a nae. <sup>8</sup> Ma kampa nuatauai bonabona Crete gerana a naeni aubaina mara i apoapoe ma a ḡeta dobu e ḡoreḡorei U Aiaina, Lasea taon au ḡereḡerena.

<sup>9</sup> Mara ḡaeḡaena a vine-boai au vaḡai\* ma Rupena Ujina marana boiboḡi i kwa,† marina lamna ive ma rabama ai mara ma boga babarana i vinirovorovo. <sup>10</sup> Ma Paul i riwa, “Nelara, malana a vaivaia da ata vaḡai ina apoapoe kaua ma waga ma purapura tana vine-boapai. Ata lawana maiteni tana vineboai.” <sup>11</sup> Wate sorodia ai bada, kapena ana babani i rautaniḡanei ma eḡa Paul da kampa ata mae ma eḡa ata nae. <sup>12</sup> Wei gabuna eḡa ita ai wei ivena au marana ma rava maḡamaḡai i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ḡaeḡaena ma mutuui lavarata ma rauanaḡa e vinoa-vereverei, da au mulaḡina e mamae.

### *Kojikojira Ḡaeḡaena*

<sup>13</sup> Maranai rauanaḡa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae. <sup>14</sup> Ma eḡa barana ita uama ma kojikojira‡ olei iveiai. <sup>15</sup> Ive wagana i verau-matamatani ma waga eḡa tagotagogina da ita vobei ma i voterei da ive waga i avara-opunei. <sup>16</sup> Bonabona aburuna Kauda gerana au mulaḡina a ruba ma kampa a voia guratana da dingy a terepai au waga da a ragita-jijini. <sup>17</sup> Wei i kauana vorovei ma ḡuravei waga au gabaurina da waga adana i raḡita-kwaviviroi. Tau i rovo mepa da au maratete ina amḡaena au Syrtis,§ Libya au gerana. Lamna aubaina ḡuravei ai da kuka, i raḡita-tagogiei ma au boga i viorereni da waga ita bibi. Ma i voterei da kojikojira waga i avara-naiei. <sup>18</sup> Maratomna kojikojirana i rarau-guratanelei da purapura ḡelau i boga a viorereni. <sup>19</sup> Aupom vitonuina tau i waga purapurai i viorereni au boga. <sup>20</sup> Kojikojira i ruba da aupom biaḡa da madeḡa ma ubona i purui. Ravai ai nota i kwa.

<sup>21</sup> Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniḡaneu ma Crete eḡa tata oputawanei, amapo waga eḡa tata viapoapoeni ma ata purapura eḡa tata vineboai. <sup>22</sup> Wate a ririwana-guratemi da eḡa orami ina peu! Aubaina avena da waga ina monu wate eḡa ina iraḡe. <sup>23</sup> God lamna tau au BADA ma ana taunola tau. Waguvarai God ana anela i paritawaneiai awariu. <sup>24</sup> Ma i riwa, ‘Eḡa ma rovo! Tam anina da Caesar au naona ma etara! Ma ḡelauna lamna God ana nuavaina maemaena rava anatapui maiteni e vaḡavaḡai ina lawana.’ <sup>25</sup> Lamna aubaina tepami ina tora! Aubaina tau God a vivitumaḡanei ma menanare i ririweia nanarena ina tupua. <sup>26</sup> Wate tauta au maratete tana amḡaena.”

<sup>27</sup> Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau i gera i tuḡereḡerei. <sup>28</sup> Ma barawa au giana ḡaima i raḡini ma au boga i tawanana-ḡairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter. <sup>29</sup> Ma tau i rovo mepa da rabama waga au kira ina viarikarikai lamna aubaina waga au ipuna anika 4 i tawana ḡairei ma i vipaipai da mara ina tom tawanana. <sup>30</sup> Ma waga ravai ai kaua i kaukauei da ita ruba-govaḡa. Ma i vioga da dingiei ita opu waga au naona da anika ita dubara-naiei, ma lamna aubaina dingy i teretere-ḡairei au boga, <sup>31</sup> Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraḡe.” <sup>32</sup> Ma sorodia dingy ḡuravana i borituini ma dingy kwakwavina i peu au boga ma i avara-naiei.

\* **27:9:** Iri i parei da kojikojira ana mara ma i vaḡai. † **27:9:** Eng. Atonement bo *Yom Kippur* marana wei lamna September bo October rabama ma ive ai mara ‡ **27:14:** Kariwabu ḡaeḡaena § **27:17:** Wei lamna maratete.

<sup>33</sup> Ma maratomtoma Paul rava anata-pui i egari da ita am, i pa, “Taumi marina aupom 14 rovo i kauemi ma eġa ota am.” <sup>34</sup> “Tau a vivibaġa-guratemi da ona am da ona virewapana, eġa ai ai tagogi ina iraġe.” <sup>35</sup> Paul i babani vorovei ma au matai palawa i vaia, BADA i viegualaei ma i vogimai ma i ani. <sup>36</sup> Ma rava anata-pui inanai ma orai i bagibagi ma am i vikarei. <sup>37</sup> Tauai anata-pui ai 276 au waga. <sup>38</sup> Ma rava anata-pui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

### *Waga au maratete i amġaena*

<sup>39</sup> Maranai mara i tom tawanana tau i dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni. <sup>40</sup> Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba. <sup>41</sup> Wate waga au maratete i amġaena da i tapaiei, ma rabama waga ipuna i viairikarikai.

<sup>42</sup> Sorodia i ġoei da panipani ita viraġeni, da avena ita toa-ġaira au gera ma ita viruberubei. <sup>43</sup> Wate sorodia ai bada i ġoei da Paul ita vilawani ma i viġaei, anina ma ai viogatara eġa ita kauai. Ma tau i aiavo i toa i aramanei i egari da i viauepa au boga ma i toa-ġaira au gera. <sup>44</sup> Ma ġelau i aiwai da i tenatenam i vidauei. Ma nanare anata-pui lawalawaii au gera i ġota.

## 28

### *Paul au Malta bonabonana*

<sup>1</sup> Maranai a ġota au gera ma a aramanei da tauai au Malta bonabonana. <sup>2</sup> Dobuna ravai i nebelelai ma ivii i ai kaua awariai. Garewa atuna i vikarei ma i ubauba, ma tau i au gera ai i viviri. <sup>3</sup> Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani. <sup>4</sup> Dobuna ravai i 'nanai da motana Paul au nimana i dawedawe ma i pari-ararava, “Wei ravana lamna tauviraġena ma eġa ita monu wate ata god\* e ririwa da tauna eġa ina lawana.” <sup>5</sup> Wate Paul motana i viaikwajiei da ai au menamenana i rauei ma tauna eġa ita kero. <sup>6</sup> Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, tau i ai nota i virai ma i riwa da tauna god ġelauna.

<sup>7</sup> Au gerana a ġotaġota - lana au ġereġerena lamna dobuna badana Publius ana wapu ġaeġaena. Tauna i taravainiai ma i paina-kauelai da aupom tonuġa <sup>8</sup> Publius amana i doria manawa ruba ma iniġuġura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani. <sup>9</sup> Anina ma rava anata-pui doridoriai au bonabona i nei ma i vilawani.

### *Paul au bonabona Malta da i nae au Rome*

<sup>10-11</sup> Kampa mai Malta maiteni a mae nawaravi tonuġa. Ma ravai i voagu-kauelai ma maranai ata vomairi, ai ġoana vaġai aubaina anata-puna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaġa kokoitau i tai†. <sup>12</sup> Kampa ma a amkuka-nae da au Sairakius a ġota ma a mae aupom tonuġa <sup>13</sup> Kampa da ambori damana au Regium ma maratonna rauanaġa i wanabauni ma amkuka ma geraei a ruba da maratoma ġela au Puteoli a ġota. <sup>14</sup> Kerisiana kampa a nelaġai ma i riwelai da maiteni a mae wiki tagogi. Anina ma a babara-nae da au Rome taon a ġeta. <sup>15</sup> Kerisiana au Rome riwai ai i vaia da a nenei ma i ġei da ita nebelelai, ġelau i ġei au taon e ġoreġorei Vaġavaġai Tonuġa ai Numa ma ġelau i ġae Apius ana au maket. Maranai Paul wei ravai i 'nanai, ma i vinuai ai kaua ma God i viegualaei. <sup>16</sup> Maranai au Rome taon a ġeta tau i Paul numa i verei da ainelana i mae ma sorodia i terei da i 'nana-vaitetei.

\* **28:4:** God wavinena wavana kaua aiaina bo kaua jijimanina (Justice). † **28:10-11:** Wei lamna mai Rome ai god raġaraġa wavai Castor ma Pollux ruaġai e ġoreġore Dioscuri bo raġaraġa marei, Tau i lamna god Zeus ma Leda natunatui.

*Paul au Rome i raugugula*

<sup>17</sup> Ma aupom tonuġa au murina Jew babadai kampa maemaei i rauġoreiai ma awarii i babani, “Varevareiu tau eġa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i panu ma i veredamaneu Rome gavena awarina.

<sup>18</sup> Mai Rome i etareiu ma i ġoei da ita rupeniu aubaina eġa aiwai apoapoena ata kauei da ina viraġeniu. <sup>19</sup> ✧Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaeġaena Caesar awarina da ita rauetareiu. Wate lamna eġa au rava ata viviġaviei, eġa. <sup>20</sup> Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariaġa i ririwei boiboġi i nei.”

<sup>21</sup> Tau i paribelei, “Tauai eġa pepa Judeaei ata vaia bo ai rava riwa ita neiai. <sup>22</sup> Tauai aramanei da ravai anatapui kerisiana boruna e paripari-virevirei. Wate tauai a ġoei da am nota ana vaia.”

<sup>23</sup> Ma tau mara i terei da Paul maiteni ita viboru, ma patara i ġetai mepa Paul i mamaelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ġoei da orai ita taini da Iesu ita vitumaġanei. <sup>24</sup> Ana babaniei ġelau orai i taini ma ġelau eġa ita vitumaġana. <sup>25</sup> Ma tau avababana i viparipariniġaiei ma muriai da ita vilamonei Paul wei riwana tagogi i latoni i pa, “Arua Vivivireina riwa kava Peroveta Isaiah ponanei amamami i riwei i pa:

<sup>26</sup> *Ma nae am rava mai Israel awari da ma riwei,  
ona nononora wate eġa ona araramanei  
ona inantai wate eġa anona ona aramanei.*

<sup>27</sup> *Aubaina wei ravai orai i bado.  
Taniġai i gudui,*

*Tau matai i vopotai.  
Mepa da tau mataiei ita inainana,  
taniġaiei ita nononora  
oraiei ita araramanei,  
ma ita mae-tavirei awariu ma ata vilawani.*

*(Isaiah 6:9-10)*

<sup>28-29</sup> —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Tau ina rautaniġana.”

<sup>30</sup> Paul kampa numa i vivimaiei ma i mae madeġa ruaġa taputapuna. Ma rava maġamaġau i nenei da i raraugenari ma wei i vinuaiaiei. <sup>31</sup> Ana tepatorana God ana vigulau ma Iesu Keriso riwana Aiaina i jimei. Ma eġa aiai ita viġaei.